


Oct 12
1827.

Es de Sr. Pedro Gomez del Carmen calzado de Sevilla



De Sr. Wbacteria del Carmen
Carap de de Sevilla



AD PHILOSOPHIÆ BACCONICÆ

Tyrones.



Ost tertium Cursûs Philosophici tomum in sex ultimos libros Physicorum jam editum, recto ordine proditurus erat quartus in quatuor libros de Cælo, & Mundo, deinde quintus in duos de Generatione, & Corruptione, & sextus in tres de Anima. Ast quia Metaphysica singularem habet connexionem cum præcisionibus, universalibus, distinctionibus, aliisque, in ipsis etiam Physicorum libris differtis, idcirco à tomo tertio ad ultimum in Metaphysicam extremam Philosophiæ partem gradum facio. In reliquis verò, nisi studia maiora impedian, utilitati vestræ consulens, ultimum laboris exhauriam.

*Propria Nomina , nationes , & anni obitus Do-
ctorum Carmelitarum Theologorum, & Philo-
sophorum , quorum testimoniis nostra Philoso-
phia illustratur.*

A

Andreas à Cruce Lao ————— Catanensis — obiit anno 1675

B

Blasius à Conceptione ————— Carnotensis — obiit anno 1694

C

Chrysofomus Silvestranus Bacconii explanator — Varonensis — obiit anno 1608

D. Cyrillus Alexandrinus ————— Græcus — obiit anno 444

D

Daniel à D. Josepho Sammaco ————— Vienfis — obiit anno 1667

Didacus de Castilla Bacconii explanator ————— Hispalensis — vivit adhuc.

Didacus à JESU ————— Granatensis — obiit anno 1621

Dionysius Blasco Bacconii explanator ————— Utrillensis — obiit anno 1683

E

Elifeus Garcia Bacconii explanator ————— Aragonensis — obiit anno 1719

F

Franciscus Bonæ Spei ————— Belgicus — obiit anno 1667

Illustriſſimus Franciscus Suares de Vilhegas ————— Lusitanus — obiit anno 1664

G

Illustriſſim. Guido de Perpignano Magister Baccon. — Catalanus — obiit anno 1330

H

Hieronymus Aymo Baconii explanator ————— Taurinensis obiit anno 1620

I

Ignatius Ponce Bacca Baconii explanator ————— Matritensis —obiit anno 1707

Joannes Baptista de Lezana ————— Matritensis —obiit anno 1659

Joannes Chrysostomus Marasca textuum Baconii
explanator, restitutor, ac conciliator ————— Cremonensis —obiit anno 1634

S. Joannes Damascenus ————— Græcus ————— obiit anno 740

Joannes Walsingham quondam Baconii Magister —Anglicus ————— obiit anno 1330

Josephus Blanc ————— Valentinus —obiit anno 1613

Josephus Zagaglia Baconii explanator ————— Ferrariensis —obiit anno 1711

Julianus de Castelvì Ladron ————— Valentinus —obiit anno 1637

L

Lactantius Domaninius ————— Mantuanus —obiit anno 1596

M

Illustrissimus Matthæus de Orlando ————— Carinensis —obiit anno 1695

Michael Ayguanus ————— Bononensis —obiit anno 1575

P

Paulus à Conceptione ————— Navarrus ————— obiit anno 1734

Paulus de Perusio ————— Gallus ————— -obiit anno 1344

Petrus à Cornejo ————— Salmantinus —obiit anno 1618

R

Raymundus Lumbier ————— Aragonensis —obiit anno 1684

T

Thomas Waldensis ————— Anglicus —obiit anno 1430



ORDINIS FACULTAS.

*CENSURA REVERENDI ADMODUM
P. M. Fr. Petri Nolasco in Sacra Theologia Le-
ctoris jubilati, Conimbricensis Carmelitani Colle-
gii Rectoris, & studiorum Regentis.*

REVERENDISSIME PATER.

Ultimum Philosophiæ Cursus tomum juxta in-
conculsam, singularemque doctrinam nostri
Venerabilis Joannis Baconii Doctoris Reso-
luti, Authore R. P. nec non Sapientissimo Magistro
Fr. Emmanuele Ignatio Coutinho Conimbricensi Do-
ctore Theologo eruditissimo, Reverendissimæ Pater-
nitatis tuæ præcepto audiens, sedulo evolvi, magna
animi voluptate perlegi. Id mihi in præsentiarum
accidit, quod sæpissime evenisse expertus sum; num-
quam etenim aliis præclarissimi Authoris Tractati-
bus jam prælo datis vacavi, quin magna animi volu-
ptate perfunderer: ecquis enim in tam solido proba-
tionum pondere, in tam subtili arguendi methodo,
& in extricandis difficultatibus delictum non capiat?
Siquis id ultro non fateatur, eum à sensitivorum al-
bo deleas, & insensibilem jure merito dicas, necesse
est. Egregiam navat operam Sapientissimus M. ut
Universus Orbis Litterarius nostri Resoluti Præcep-
toris doctrinam, cui indivulso adhærere nihil anti-
quius habet, veneretur: id profecto cumulatissime
est

est assequutus, dum opus concinne ab eo elaboratum, qua late patet Orbis, diffunditur: non intra angustos Lusitaniæ limites, quæ in lucem prodierunt ejus Lucubrationes, delitescunt; illas Europa, Asia, & America colit, illas certatim expetunt, & requirunt quotquot sunt in Hispania, Italia, in Brasilia, & India justî philosophicarum rerum æstimatores. Grates perquam maximas eruditissimo Magistro agere debemus, qui sub Resoluti Præceptoris vexillo militare gloriamur, quod indefesso plane studio, & genuinam Antesignani nobis mentem exposuerit, & illius gloriam longe, lateque disperferit. Metaphysicum Tractatum quasi cæterorum coronam ultimo typis destinat, nec immerito; non quod vulgari paræmia tritum sit, quod finis coronat opus, sed quod Metaphysicam quasi scientiarum reginam in Hieroglyphicis rite coronaverit Antiquitas. Metaphysicam Philosophiæ reginam suo hoc Tractatu coronat Sapientissimus Author. Oh quantum ponderis in auro rationum, quibus suas firmat conclusiones, quantum fulgoris in explicandis circumfusa caligine obductis difficultatibus, quanta pretiositas in hoc Metaphysicæ, immo & integri Philosophici Cursus diademate! Hæc hæc est corona, quam integræ Philosophiæ, & sibi ipsi adaptavit Sapientissimus Author. Ultra metas eruditionis progreditur præclarissimus M. Fr. Emmanuel Ignatius Coutinho, dum in lucem suum hunc Metaphysicum Tractatum edit: brevis quidem est, si recentes hacce de re tractantes respicias: ast nuperos in alienam segetem falcem mittere, dum plurima ad Sacram Theologiam spectantia discutiunt, nemo est, qui non videat; nec quisquam jure poterit accusare brevitatem in Opere omnibus numeris absoluto, & cui nihil ad ultimam sui perfectionem desit: dignum ergo illud censeo & prælo, & cedro, maxime cum nihil rectæ Fidei regulis adversum, nihil bonis moribus dissonum contineat. Id unum habere

bere in votis me fateor, & Sapientissimum Mag. etiam, atque etiam rogarem, ut integer hic Cursus Philosophicus Theologico præluderet, & qui hactenus Resolutum Præceptorem nocturna versavit manu, versavit diurna, ut Antesignani mentem & fidelissime, & mira nobis perspicuitate exponeret in Philosophia, eandem in Theologia suscipiat provinciam; difficilis quidem ille est, sed quæ magnanimum Authorem Bacconii ergo ad ardua quæque capeßenda paratissimum non deterreat. Philosophico igitur Cursui consummato succedat integer Theologicus in ampliorem Bacconicæ doctrinæ gloriam, in Religionis immortale decus, in Lusitanix ornamentum maximum, in eximium Conimbricensis Academix splendorem. Hoc meum iudicium. Conimbricæ in regio Carmelitano Collegio nonis Martii anni M. DCC. LI.

Fr. Petrus Nolasco.

*CENSURA REVERENDI ADMODUM
P. M. Fr. Bernardi Antonii de Valle Sacræ Theo-
logiæ Professoris, & Doctoris Conimbricensis, San-
ctique Officii Qualificatoris.*

REVERENDISSIME PATER.

JUSSU Reverendissimæ Paternitatis vestræ liben-
tissimè perlegi accuratissimas R. admodum P.
M. ac Doctoris Fr. Emmanuelis Ignatii Couti-
nho in universam Metaphysicam Lucubrationes.
Mea n. utique, & communem omnium approbatio-
nem extorqueret statim vel ipsum Authoris nomen
sub voluminis facie designatum. Ingenuè tamen fa-
teor, non minori me gaudio, quàm diligentia in hu-
jus Operis lectionem incubuisse, quippe qui jam diu
antea prioribus Tanti Magistri documentis latè im-
butus, quatuor scilicet editis voluminibus compre-
hensam Philosophiæ medulam introspecteram; nunc
autem subtilioris scientiæ arcana, rerum omnium es-
sentias aperientem, earumque proprietates uno qua-
si intuitu enucleantem vidi, ac dimiratus sum Hæc
illa Metaphysicæ scientia est, quæ ab Aristotele
sæpe nuncupatur Prima Philosophia, quasi reli-
quarum Domina, ac Princeps, omnium principia
stabiliat, atque confirmet. Quam aptissimè igitur à
Principe etiam Mag. pertractari debuerat ad extre-
mum, qui tot jam Philosophiæ sphæræ sapientiæ suæ
lumina circumtulerat: sive etenim ejus gravitatem
in docendo, in arguendo vim, in deliberando ma-
turitatem, vel in adversariis redarguendis eviden-
tiam contemplerer, ubique magnus, ubique idem
mihi apparuit, quanquam pro materiæ præsentis di-
gnitate, de se altissimæ, ultra naturæ ipsius metas
transcendens, alius à se, & à se longè altiùs evo-
lasse videatur. Aquilinum verè illius ingenium tot
geminatis comprobare argumentis necesse omnino
non

non fuerat, nisi ea, plurimaque doctrinæ suæ monumenta, è cathedris olim dispersa auditoribus, colligere modò, atque in perpetuam, communemque lucem dare tanti referret ad Literariæ Reipublicæ decus, & incrementum. Non meum hoc tantum iudicium esto, sed omnium Sapientum, quod totius etiam Academiæ Conimbricensis suffragio video confirmari, cùm plane constet, illam pro Typographiæ sumptibus huiusce operis Authori plenâ adeo manu subsidium nuperrimè contulisse. Decebat enim verò, non quibuscumque, sed aureis centè caracteribus tam pretiosum Opus excussum iri. Hinc illud omnium quidem oculis, linguis, ac mentibus, non sine ingenti fânore, evolvendum in posterum augurari fas sit, cui tot jam calculis communem hominum sententiam annuere, ac suffragari liquet.

Quapropter studiosæ Juventuti, imò & eruditis omnibus, injurium fuerit, si quidquam ultro temporis latère patiamur hunc Philosophiæ thesaurum. Publicis typis mandari quantocius oportet; quod non ad Authoris sui tantùm, aliàs jam celeberrimi, nomen, ac gloriam, verum etiam ad Literati Orbis emolumentum spectare credo; quod denique ad nostri Ordinis ornamenta indies augenda luculentissimè suffecturum confido. Ita censeo. Conimbricæ, in regali Carmeli Collegio die 13. Martii ann. 1751.

Fr. Bernardus Antonius de Valle.

FACULTAS ORDINARII.

CENSURA REVERENDI ADMODUM
*P. M. Vincentii Mexia Clerici Regularis, Sacrae
Theologiae Professoris.*

EXCELLENTISSIME DOMINE

HAs Disputationes in libros Metaphysicorum à Sapientissimo Patre Fr. Emmanuele Ignatio Coutinho Doctore Theologo Conimbriensi pulcherrimo ordine digestas, nec non solidissimis rationibus subtiliter lucubratas, ut mihi demandatum munus peragerem, sedula discussione pervolvi; nihilque in hoc Opere, quod morum regulis, Fideive Orthodoxæ veritati vel in minimo adversetur, offendi: quinimo uberrimam eruditio-
num, ac doctrinarum segetem singulis, qui hisce sunt studiis addicti, haud mediocriter profuturam. Opus sanè tanto Ingenio, tantoque Authore dignum, cuius laus est totum hîc fecisse, quod ejus famam æternis coronet splendoribus; nihil, quod hujusmodi Lucubrationes typis evulgari prohibeat. Sic censeo. Datum Ulyssippone in Ædibus Deiaparæ à Divina Providentia sacris die 1. mensis Julii anno Domini 1751.

D. Vincentius Mexia Cler. Reg.

Vista a informação pôde-se imprimir o livro de que trata a petição, e depois torne conferido. Lisboa 3. de Julho de 1751.

D. J. A. L.

F A C U L T A S

R E G I I S E N A T U S.

CENSURA REVERENDI ADMODUM

P. M. Fr. Francisci à S. Theresia Xaverii Ex-Provincialis Ordinis S. Francisci, in Sacra Theologia Lectoris Jubilati, Consultoris S. Officii, ac Bulle Cruciatæ, & Patriarchatus Examinatoris.

D O M I N E.

N On Philosophiæ cenforis, sed Astronomi pergratum munus aggredior, cùm regio Majestatis vestræ placito obtemperans, metam laboris, sivè ultimum Philosophiæ Cursus Tomum, à Sapientissimo Magistro, ac Doctore, Admod. R. P. Fr. Emmanuele Ignatio Coutinho, Observantissimi Carmeli alumno, elaboratum, in examen revocare cogor: quippè nedùm Philosophi discursum, sed Solis cursum in ultima consummatione perfectum, circumspicio. Universa lustrans pergit spiritus, cùm Sol lucidos spargens radios, nubila dissolvens, gemmas, aurumquè in visceribus terræ procreans, circumfertur. Quid ergo in isto Philosophiæ completo cursu admirationem rapit? Author ipse splendore subtilitatis adimpletus, spiritu Resolutissimi sui Præceptoris insignitus, universam Philosophiæ sphæram peragravit: rerum omnium naturas, vel in logicali intentione consideratas, aut in physica ponderatione inspectas, vel tandem medullitus in metaphysico conceptu expressas, invisit: sublimis doctrinæ radios diffundens, clariori methodo, & si scholastico more, scribens, intima, difficilimaquè penetrat, referat, clarescit: opposita recludit objectionum nubila, demumquè veram, puram, gemmiferam, auream sanè mentem Resolutissimi Doctoris adaperiens, in omnium nedùm suæ Scholæ, sed exterarum

festitorum cordibus progenerat , ut singuli æmu-
 lentur, vel sequantur, vel, ut revereantur eam, agnos-
 cant. Solus, quia Sol, talis, ac tantus Doctor, inte-
 grum, & omnibus numeris absolutum cursum quive-
 rat nitidissimè efformare; ideoque in ultima illius
 consummatione, sicut lux septem dierum, in his elu-
 cubrationibus metaphysicis plenissimè resplendescit.
 Entis proprietates, Unum, Verum, Bonum, mirabi-
 liter describit: quò verò altiùs in illis discutiendis
 evehitur, proprias sui ipsius excellentiores depro-
 mit. Unus in arguendo, verus in scribendo, bonus
 in operando, totus, integerque supra Metaphysicæ
 verticem veneratur. At quid mirum! Si in Orien-
 te, primavè ætate, subtilissimi ingenii, ac promptis-
 simi, singularisque genii in omnium scientiarum ge-
 nera propensionem patefecit. Testis ego sum, & glo-
 rior; mirabar enim, quod ætatem juvenilem supe-
 rans, morum honestate gravis, prudentiâ præditus,
 ingenio perspicuus, quasi Tullius in dicendi arte,
 & quasi Aristoteles in Sophiæ disciplina antelatus
 existeret. Si verò cursum consummavit, fidem in ex-
 ponendo suo Resolutissimo Magistro servavit: jure-
 merito reponenda illi est corona justitiæ, quâ scili-
 cet per universum orbem nomen ejus celebrari,
 ejusque opera publico, inoffensoquè pede currere
 mereatur; quod equidem in Lusitani Imperii orna-
 mentum, utpotè istius clarissimi Solis Firmamentum,
 redundabit. Sic censeo, si Vestræ Majestati dignum
 videatur. Ulyssipone in Conventu Minorum Obser-
 vantium S. Francisci, die 17. Decembris ann. Domini
 1751.

Fr. Franciscus à S. Terefia Xaverius.

Que se possa imprimir vistas as licenças do Santo Offi-
 cio, e Ordinário, e depois de impresso tornará á Mesa
 para se conferir, e taxar, e dar licença para que corra, e sem
 isso não correrá. Lisboa 24. de Janeiro de 1752.

Ataide. Almeida. Carvalho. Mouraõ.

Visto

V Isto estarem conformes com seus "Originaes
estes terceiro, e ultimo tomo, podem correr.
Lisboa 23. de Março de 1753.

*Fr. R. Alencaastre. Abreu. Paes. Trigozo.
Sylveiro. Castro.*

P O'de correr. Lisboa 24. de Março de 1753.

D. J. A. L.

Q Ue possa correr. Lisboa 24. de Março de
1753.

Marquez P. Carvalho. Correa.

ERRATA

CORRIGENDA

N Um. 13. l. 9.
N. 85. l. 22.
N. 87. l. 10.
N. 95. l. 2.
N. 117. l. 2.
N. 118. l. 6.
N. 133. l. 10.
N. 138. l. 6.
N. 146. l. 11.
N. 148. l. 13.
N. 151. l. 14.
N. 210. & 211.
N. 262. l. 18.
N. 268. l. 21.
N. 316. l. 20.
N. 318. l. 24.
N. 337. l. 8.
N. 343. l. 3.
N. 366. l. 1.
N. 370. l. 33.
N. 384. l. 14.
N. 393. l. 8.
N. 409. l. 22.
N. 444. l. 19.
N. 460. l. 7.
N. 490. l. 21.

scientia
Est
cætero qui
sequas
incumbui
vellint
spaciatim
inæqualitas
modi
modi
eadem
clase
personæ
priori
finaliter
ingenito
divisibiles
de
rediculum
judicant
quantitati
calor
intendantur
fatisfit
duas
depuncto

scientia
Est
cæteroqui
sequaces
incubui
velint
speciatim
æqualitas
modis
modis
eandem
classe
suppositi
pro priori
finaliter
in genito
divisibilis
ab
ridiculum
judicent
qualitati
calor,
intenduntur
fatisfacit
duæ
de puncto

IN-



INDEX

RESOLUTIONUM PROÆMII,
& Disputationum, Sectionum, & Quæstio-
num Tractatûs.

RESOLUTIO I.

Metaphysica definitur : Scientia speculativa &c. p.2.

RESOLUTIO II.

Metaphysica est Scientia in toto rigore. pag. 3.

RESOLUTIO III.

Metaphysica est simpliciter speculativa. pag. 4.

RESOLUTIO IV.

*Metaphysica est formaliter unus habitus sapientiæ.
pag 6.*

RESOLUTIO V.

*Objectum materiale per se Metaphysicæ est substan-
tia. pag. 9.*

RESOLUTIO VI.

*Objectum attributionis Metaphysicæ est Ens reale.
pag. 10.*

INDEX.

RESOLUTIO VII.

*Objectum formale quod Metaphysicæ est formalitas
Entis in quantum Ens. Objectum verò formale sub
quo est scibilitas relucens in ipsa Entis formali-
tate. pag. 12.*

RESOLUTIO VIII.

*Principia Metaphysicæ sunt hæc: Impossibile est &c.
Quod libet est &c. pag. 13.*

RESOLUTIO IX.

Metaphysica est virtus mentis. pag. 15.

RESOLUTIO X.

Metaphysica est utilissima. pag. 16.

DISPUTATIO I.

De Conceptu, & transcendentia Entis.

SECTIO I.

De Conceptu Entis.

QUÆSTIO UNICA:

*Utrum Ens habeat conceptum unum objectivè præ-
cisum à differentiis suorum inferiorum? pag. 19.*

SECTIO II.

De transcendentia Entis.

QUÆS-

INDEX.

QUÆSTIO UNICA:

Utrùm Ens transcendat formaliter suas differentias?
pag. 35.

DISPUTATIO II.

De Entis proprietatibus.

SECTIO I.

De Unitate transcendentali.

QUÆSTIO UNICA:

In quo consistat Unitas transcendentalis? pag. 50.

APPENDICIUM

*De Constitutivo formali Distinctionis juxta veram
Baconii mentem, adversus Recentes Baconistas.*
pag. 62.

SECTIO II.

De Veritate transcendentali.

QUÆSTIO UNICA:

In quo consistat Veritas transcendentalis? pag. 91.

SECTIO III.

De Bonitate transcendentali.

QUÆSTIO UNICA:

In quo consistat Bonitas transcendentalis? pag. 105.

DIS-

I N D E X.

DISPUTATIO III.

*De præcipuis Entis divisionibus, & de Ente Divino
in particulari.*

S E C T I O I.

De præcipuis Entis divisionibus.

Q U Æ S T I O U N I C A :

Quotuplex sit Ens ? pag. 115.

S E C T I O II.

De Ente Divino.

Q U Æ S T I O U N I C A :

*Quale sit prædicatum ultimò constituens Naturam
Divinam Metaphysicè consideratam ? pag. 117.*

DISPUTATIO IV.

De divisione Entis in decem Prædicamenta.

S E C T I O I.

De Prædicamento Substantiæ.

Q U Æ S T I O I.

Quid sit Substantia ? pag. 146.

Q U Æ S T I O II.

Quotuplex sit Substantia prædicamentalis ? pag. 156.
c QUÆS.

INDEX.

QUÆSTIO III.

Quot sint Substantiæ proprietates? pag. 157.

QUÆSTIO IV.

Utrùm Substantia materialis antecederet ad quantitatem habeat partes physicè distinctas? pag. 160.

SECTIO II.

De Prædicamento Quantitatis.

QUÆSTIO I.

Quid sit Quantitas? pag. 174.

QUÆSTIO II.

Quotuplex sit Quantitas? pag. 183.

QUÆSTIO III.

Quot sint Quantitatis proprietates? pag. 184.

QUÆSTIO IV.

Utrùm Quantitas sit accidens realiter distinctum à re quanta? pag. 185.

SECTIO III.

De Prædicamento Qualitatis.

QUÆSTIO I.

Quid sit Qualitas? pag. 192.

QUÆSTIO II.

Quotuplex sit Qualitas? pag. 201.

QUÆS-

INDEX.

QUÆSTIO III.

Quot sint Qualitatis proprietates? pag. 206.

QUÆSTIO IV.

Quomodo fiat intensio Qualitatis? pag. 208.

SECTIO IV.

De Prædicamento Relationis.

QUÆSTIO I.

Quid sit Relatio prædicamentalis? pag. 234.

QUÆSTIO II.

Quotuplex sit Relatio prædicamentalis? pag. 246.

QUÆSTIO III.

Quot sint proprietates Relationis prædicamentalis?
pag. 248.

QUÆSTIO IV.

*Utrùm Relatio prædicamentalis requirat necessariò
terminum actu existentem?* pag. 251.

SECTIO V.

De Prædicamentis Actionis, & Passionis.

QUÆSTIO I.

Quid, & quotuplex sit Actio? pag. 263.

QUÆSTIO II.

Quid, & quotuplex sit Passio? pag. 265.

QUÆS-

INDEX.

QUÆSTIO III.

Quot sint proprietates Actionis, & Passionis? p. 266.

SECTIO VI.

De Prædicamentis Ubi, & Situs.

QUÆSTIO I.

Quid, & quotuplex sit Ubi? pag. 267.

QUÆSTIO II.

Quid, & quotuplex sit Situs? pag. 268.

QUÆSTIO III.

Quot sint proprietates Ubi, & Situs? pag. 269.

SECTIO VII.

De Prædicamentis Quando, & Habitus.

QUÆSTIO I.

Quid, & quotuplex sit Quando? pag. 271.

QUÆSTIO II.

Quid, & quotuplex sit Habitus? pag. 272.

QUÆSTIO III.

*Quot sint proprietates Quando, & quot Habitus?
pag. 273.*



INTEGER
PHILOSOPHIÆ
CURSUS

Juxta inconcussam, singularemque doctrinam

JOANNIS BACCONII

Doctoris Resoluti.

TOMUS ULTIMUS

IN METAPHYSICAM.

*Deha Libreria del Carmen
Carag.* DE PROŒMIUM *de Sevilla*



ETAPHYSICÆ prologomena, si-
ve proœmialia, non pro dignita-
te discutimus, sed pro Tyronum
notitiâ breviter explanamus. Et
cùm fieri nequaquam possit, ut
quis Metaphysicus perfectus eva-
dat, nisi hæc omnia sciat: primò,
quid sit Metaphysica, & quis ejus
Author: secundò, utrùm sit rigorosè scientia: ter-
tiò,

Author: secundò
Tom. Ult.

A

tiò,

tiò, utrùm sit simpliciter speculativa: quartò, an sit unicus habitus sapientiæ: quintò, quale sit hujus scientiæ objectum materiale per se: sextò, quale sit objectum attributionis ejusdem: septimò, quale sit objectum formale: octavò, qualia sint principia Metaphysicæ: nonò, an Metaphysica sit virtus mentis: decimò, an sit utilis: idcirco de his omnibus per sequentes resolutiones differemus. Sit ergo

1 Resolutio prima: Metaphysica, juxta Baconii doctrinam, sic potest definiri: *Scientia speculativa agens de Ente, in quantum Ens*. Probo bonitatem definitionis ex eo, quòd constet genere, & differentiâ. Nam per primas particulas, *scientia speculativa*, convenit Metaphysica cum aliis scientiis speculativis, v. g. cum Logica, & Physica: per reliquas, *agens de Ente in quantum Ens*, describitur ab illis, quoniam nulla scientia considerat Ens, in quantum Ens, præter Metaphysicam. Dixi, quòd præfata definitio sit *juxta Baconii doctrinam*, quia Doctor in 1. Prolog. quæst. 4. art. 1. in articul. 5. §. 2. vers. *Respondeo*, docet, Metaphysicam esse scientiam speculativam, & ibidem q. 3. articul. 3. vers. *Ad argumentum*, asserit, quòd consideratio Metaphysicæ est de Ente, in quantum Ens. Est igitur Metaphysica, juxta Baconium, *Scientia speculativa agens de Ente, in quantum Ens*.

Bacon.

Aristotel.

Hippal.
Heraclit.
Anaxim.
Anaxim.
Thales.
Miles.
Anaxag.
Plato.

2 Ad inventionem hujus scientiæ quod attinet, Author præcipuus censendus est Aristoteles; quanvis enim alii antiquiores Philosophi de re etiam Metaphysica disputasse videantur, eò quòd idem Aristoteles illorum opiniones in libris suis recenset, & examinat, videlicet Hippasi, Heracliti, Anaximandri, ejusque discipuli Anaximendis, Thaletis, Milesii, Anaxagoræ, Platonis, & aliorum, nihilo-

nihilominus omnes hi Metaphysicam cum Physica miscuerunt, & propterea passim ab eodem Aristotele reprehenduntur, ut benè observavit Laurentius Beierlin. verb. *Metaphysica*; ille verò primus fuit Philosophorum, qui hanc scientiam separatim, & exprofesso tractavit per libros quatuordecim. *Putant* (verba sunt Zimaræ) *de his libris esse querelam illam, & quasi expostulationem Alexandri ad Aristotelem, quòd libros de Philosophia privatim sibi in schola prælectos evulgasset: Aristotelem ita Regi satisfacisse, libros illos editos fore tanquam non editos; neminem intellecturum, nisi qui ab eodem ipso Aristotele audivisset.* Est ergo Author Metaphysicæ præcipuus Aristoteles. Beierlin. Zimara.

3 Resolutio secunda: Metaphysica est scientia in toto rigore. Probo resolutionem. Metaphysica habet propria principia certa, & evidentia, per quæ demonstrat passiones, sive proprietates sui objecti, nempe Intis; demonstrat enim Ens esse unum, verum, bonum. Insuper multa alia demonstrat de substantiis, etiam separatim, de Deo, & de Angelis: ergo est scientia in toto rigore, & ut talis proponitur à Baconio in 1. Prolog. q. 4. art. 1. in articulum 5. §. 2. vers. *Respondeo*, ibi: *Ut probat Philosophus 6. Metaph. textu comm. 3. & 4. Metaph. textu comm. 1. Metaphysica est scientia communis, & generalis, quia (ut dicit) est de ente.* Bacon.

4 Objicies. Metaphysica non est formaliter scientia: ergo non est scientia in toto rigore. Probas antecedens. Metaphysica est sapientia; sed sapientia non est formaliter scientia: ergo Metaphysica non est formaliter scientia. Maior pater, tum ex Aristotele l. 1. Metaph. cap. 1. & 2. tum ex Doctore Aristotel.
re, ubi proximè citato §. 1. vers. *Tunc arguo*, tum Bacon,

ex eo, quòd Metaphysica sit de objecto altissimo, præcisissimo, & simplicissimo. Probas minorem. Sapientia solum est virtualiter scientia & intelligentia, juxta Baconium ibidem vers. *Item quia*, ibi: *Intellectus enim, qui est habitus principiorum, & scientia, quæ est conclusionum, sunt duæ species formaliter, & specificè distinctæ per se ipsas: istis tamen habitibus non repugnat, quin dimittant suas differentias específicas formales, & contineantur virtualiter solum, & non formaliter in tertio habitu specificè distincto ab his.* Sed talis habitus, de quo loquitur Baconius, est sapientia, ut constabit legenti præfatum locum: ergo sapientia non est formaliter scientia, ac per consequens Metaphysica non est scientia in toto rigore.

5 Respondeo ad objectionem, concesso antecedente, negando consequentiam. Quia, ut Metaphysica sit scientia rigorosè, satis est, quòd ei conveniat definitio scientiæ strictè acceptæ, nempe, *Habitus per demonstrationem acquisitus*, & non est opus, quòd sit formaliter talis habitus, idest secundum differentiam suam specificam formalem; sicut non est necesse, ad hoc, ut ipsa sit rigorosè intelligentia, quòd sit formaliter habitus principiorum. Unde sufficit, quòd sit unus habitus mixtus ex scientia, & intelligentia, per continentiam virtutalem gradualem utriusque. Metaphysica enim vera est sapientia, & sapientia, juxta Baconium, consistit in uno habitu inclinante simul ad principia, & ad conclusiones, qualis est habitus mixtus ex scientia, & intelligentia, distinctus quidem specificè ab illis duobus seorsim sumptis, ut docet idem Baconius ubi supra allegatus. De hoc iterum infra redibit sermo.

Bacon.

6 Resolutio tertia: Metaphysica est simpliciter

ter speculativa. Probo resolutionem. Metaphysica habet objectum merè speculabile ab ipsa, nempe Ens, & licèt consideret etiam de practicis, tractat tantum de istis in generali, in quantum participant rationem Entis, de quo est tota sua consideratio, & speculatio: ergo est simpliciter speculativa. Unde Baconius in 1. Prologi q. 3. art. 3. vers. *Item scientiæ*, resolutionem ex Philosopho sic probat, ibi: *Probat 4. Metaph. textu comm. primiloquens de Metaphysica ait Philosophus: Est quædam scientia, quæ speculatur ens, & quæ huic insunt secundum se.* Bacon.

7 Objicies. Theologia Sacra non est simpliciter speculativa: ergo neque Theologia Philosophorum, idest Metaphysica. Probas antecedens. Theologia Sacra, licèt sit etiam speculativa, est tamen principaliter practica, juxta Baconium in 1. Prolog. q. 4. art. 3. in quintum, qui incipit sic: *Terminus articulus: ubi mihi videtur, quòd (Theologia Sacra) magis principaliter sit practica, quàm speculativa:* ergo non est simpliciter speculativa. Probas etiam primam consequentiam: Ideo Theologia Sacra non est simpliciter speculativa, quia tractat etiam de practicis; sed Metaphysica etiam de practicis considerat, & agit: ergo. Bacon.

8 Respondeo ad objectionem, concessio antecedente, negando consequentiam. Ad probationem consequentiæ distinguo maiorem: ideo Theologia Sacra non est simpliciter speculativa, quia tractat etiam de practicis explicitè, & in particulari, inspecto tam fine interiori, quàm exteriori ipsius Theologiæ, concedo maiorem: præcisè, quia tractat de practicis, nego maiorem. Deinde distinguo minorem: Metaphysica etiam de practicis considerat, & agit, in generali, & quatenus participant

pant rationem Entis ab ipsâ speculabilis, concedo minorem: in particulari, & explicitè secundùm rationes sibi proprias, nego minorem, & consequentiam.

9 Est igitur manifesta disparitas inter Theologiam Sacram, & Metaphysicam; prima enim tractat de practicis in particulari, & secundùm rationes sibi proprias; & quamvis agat etiam de speculativis, principalius ordinatur ad operationem, quàm ad speculationem, & hoc tam respectu finis extrinseci, quàm intrinseci, & non solum in via, sed etiam in patria: *Quia certum est, quòd ad scientiam istam attendens, plus addiscens intendit servire Deo secundùm præcepta decalogi in via, quàm scire, & non facere: & similiter in patria plus intendit scire servire, (ut decet) quàm scire, & non facere.* Doctor ubi sup. proximè citatus, sed vers. *Probat.* Ast secunda, nempe Metaphysica, solum agit de practicis in generali, quatenus rationem Entis participant, cujus consideratio, & speculatio est totus finis ejusdem, cum sit gratia sui, non agens de illis propter operari, sed propter scire, & ideo est simpliciter speculativa.

10 Resolutio quarta: Metaphysica est formaliter unus habitus sapientiæ secundùm speciem athomam. Probo resolutionem. Unicum est specificativum Metaphysicæ, nempe objectum formale *subquo*, seu ratio formalis *subqua* Ens ab ipsa attingitur, quæ consistit in scibilitate Entis in ratione Entis, ut dicemus infra; sed ubi est unicum specificativum, ibi est formaliter unicus tantum habitus: ergo Metaphysica est formaliter unus habitus sapientiæ secundùm speciem athomam. Unde Baccotius in 1. Prolog. q. 4. art. 1. in 5. §. 1. vers. *Tunc arguo*, ibi: *Quæ faciunt unum habitum tali unitate,*

te, qualis est Theologia Philosophorum (idest Metaphysica de qua loquitur Philosophus, & Commentator) faciunt unum habitum secundum speciem: hoc patet 4. Metaph. Aristotel.

11 Objicies. Metaphysica non solum est habitus scientiæ, sed etiam est habitus intelligentiæ: ergo non est formaliter unus habitus sapientiæ. Respondeo ad objectionem, concessio antecedente, negando consequentiam. Quia Metaphysica, cum sit omnium scientiarum naturalium certissima, non modo concipit veritates circa conclusiones demonstratas ex principiis, sicut aliæ scientiæ, sed etiam attingit ipsa principia, concipiendo perfectissimè veritates circa eadem, & connexionem prædicati cum subiecto, ex quo est etiam intelligentia. Unde componitur ex habitu scientiæ, & intelligentiæ, tanquam ex partibus, ex quibus resultat unus habitus formaliter sapientiæ, quæ quidem compositio declarari potest exemplo mixti compositi ex duobus elementis: item (ut inquit Doctor ubi infra statim citandus) exemplo de coloribus in medio: *Et cum hoc, quod sapientia sic includat illos duos habitus, nihilominus Philosophus vult, quod sapientia sit habitus specie distinctus ab utroque, & non quasi aggregans illos, sed per se una species. Posuerat enim 3. cap. quinque habitus distinctos specie, scilicet Artem, Prudentiam, Sapientiam, Intellectum, & Scientiam. in 1. Prolog. q. 4. art. 1. in artic. 5. §. 1. vers. Quod sic probo. Vide vers. Item alia, ubi ponit exemplum sup. relatum.* Bacon.

12 Et ibidem ex Commentatore Intelligentiam, Scientiam, & Sapientiam mirificè sic exponit: *Contingit enim aliquem sine scientia intellectuale factum, ea, quæ circa principia habere veritatem, non quidem esse, & scientem ex principiis*

piis demonstrata &c. Ecce hucusque loquitur (Commentator) de intellectu, qui est habitus principiorum, qui solum intuetur principia, & nihil demonstrativè deducit ex principiis :::: Contingit (etiam) aliquid demonstrare de principiis, & :: non possidere veritatem circa ipsa principia, idest nescire demonstrare ea. Unde sequitur: & scientem (tantum) non esse intellectualem. (id est non habere habitum intelligentiæ. Et, paucis interjectis, concludit: Cum autem ambas concipit veritates, & eam, quæ circa principia, & eam, quæ circa ea, quæ ex principiis, & tunc est sapiens. Nihil clarius.

Baccon.

13 Verum ad plenam præfatæ doctrinæ intelligentiam duo adhuc notare oportet. Primum: Sapientiam magis principaliter habere rationem habitus principiorum, quam habitum scientiæ, ut contra Godofredum docet idem Bacconius art. 2. in art. 5. ejusdem q. 4. Prologi, ibi in principio: *Quando habitus componitur ex duobus necessario alterum est principalius. Patet de sapientia, quæ componitur ex intellectu principiorum, & scientiæ: manifestum est autem, quod intellectus principiorum est pars principalior, cum sit ex immediatis, scientia autem ex mediatis. Unde 6. Ethic. probat Philosophus, quod sapientia non solum est de principiis; sed de scibilibus, quia sapientis est de aliquibus habere demonstrationem, & illa scientia est ex immediatis.*

14 Secundum: non omnem habitum mixtum ex scientia, & intelligentia esse sapientiam: (Licet omnis sapientia sit habitus ex una, & altera compositus, ut supra diximus.) Alioquin etiam Logica v. g. & Physica habitum sapientiæ obtinerent; quippe non solum sunt scientiæ, sed & intelligentiæ; utraque enim non tam suas conclusiones, sed & sua principia attingit, & cognoscit. Igitur solus
habi-

habitus compositus ex scientia , & intelligentia circa generalissima & universalissima principia , qui veritatem per illa , sive per altissimas causas , attingit , habitus sapientiæ nuncupatur. *Sapientia enim est habitus , qui habet attingere ad altissimas causas.* Doctor quodl. 2. q. 2. art. 2. §. 2. vers. *Probo* Bacconi.
primo.

15 Resolutio quinta : Objectum materiale per se Metaphysicæ est substantia. Probo resolutionem. Tametsi Metaphysica agat etiam de accidente , de hoc agit secundariò , minus principaliter , & per accidens ; de substantia verò primariò , principalius , & per se : ergo objectum materiale per se Metaphysicæ est substantia. Confirmo ex Bacconi. Bacconio in 1. Prologi q. 3. art. 3. vers. *Ad auctoritates*, ibi : *Dico , quòd cùm Philosophus dederat suum objectum circa quod est ejus (idest Metaphysicæ) consideratio , & dixerat cap 2. quòd subjectum unum continet tanquam materiam subjecti duas partes ad invicem habentes attributionem , scilicet substantiam , & accidens , ex tunc dare voluit , quæ istarum partium materialium magis propriè , & principaliter pertineret ad ejus considerationem , & determinavit , quòd illa pars , cui alia pars attribuitur , scilicet substantia.*

16 Objicies. Si substantia esset objectum materiale per se Metaphysicæ , etiam substantia supernaturalis , nempe Deus , esset objectum ejusdem ; sed substantia supernaturalis non potest esse objectum Metaphysicæ ; cùm hæc sit habitus naturalis : ergo. Probas maiorem. Substantia supernaturalis continetur in ratione communi substantiæ : ergo si substantia esset objectum materiale per se Metaphysicæ , etiam substantia supernaturalis. Respondeo ad objectionem distinguendo maiorem : Si

substantia esset objectum materiale per se Metaphysicæ, etiam substantia supernaturalis, quatenus præcontenta in ratione communi substantiæ, concedo maiorem: quatenus in se supernaturalis est, nego maiorem. Unde non obstat illius probatio, sicut neque illa insinuata minoris; quia tametsi Metaphysica sit habitus naturalis, potest attingere rationem communem ad substantiam naturalem, & supernaturalem per proprium principium, v. g. per hoc: *Quodlibet est, vel non est*, ex quo substantia tam naturalis, quàm supernaturalis est, vel non est.

17 Substantiam verò supernaturalem in se non attingit hæc scientia, quippe Deus solùm cognoscibilis est à nobis ex phantasmatibus creaturarum, quatenus continetur sub objecto adæquato ejusdem intellectûs creati, quod commune est ipsi Deo, & creaturis. Hoc expressè tenet Baconius in 1. dist. 3. q. 1. art. 1. §. 3. ibi: *Dico, quod ens* (idem de substantia) *ut commune ad ens naturale, & supernaturale est objectum intellectûs nostri*. Rem explicat uberiori calamo Mag. Garcia tum in Megalog. dist. 1. q. 2. art. 3. §. 2. tum in Metaph. dist. 1. q. 3. art. 1. §. 3. Cæterum quatenus ipse Deus in se supernaturalis est, non valet à nostro intellectu attingi, spectato secundum suam potentiam, & propriis viribus ordinato ad actum, ut efficaciter ostendit Baconius adversus nostrum Walsingham Doctorem Anglicum, olim ejusdem Baconii Magistrum. Verùm de hoc speciatim agere ad Theologos spectat. Videndus M. Zagaglia tom. 3. tractatu 1. disp. 1. sectione 1. n. 8.

18 Resolutio sexta: Objectum attributionis Metaphysicæ est Ens reale. Probo resolutionem. Objectum attributionis alicujus scientiæ est id, ad quod omnia intra limites ejusdem scientiæ ordinantur,

tur, ipsum verò ad nullum aliud ordinatur; sed omnia, de quibus Metaphysica agit (putà carentiæ, fictitia, accidentia, & ipsæ substantiæ) ordinantur ad Ens reale; hoc verò ad nihil amplius ordinatur: ergo objectum attributionis Metaphysicæ est Ens reale. Confirmo ex Bacconio in 1. Prolog. q. 3. art. 3. in principio: *Illud est ratio subjectiva ad quod stat ultima attributio; quia enim attributio accidentium (idem de cæteris) non solum stat ad substantiam, sed ad ens, in quantum ens, ideo ens est subjectum in Metaph. & non substantia.* Baccon.

19 Objicies. Omnis scientia demonstrat veras passiones sui objecti; sed Ens nullas habet veras passiones demonstrabiles à Metaphysica; cùm nihil subterfugiat conceptum Entis: ergo Ens nullo pacto potest esse objectum Metaphysicæ. Respondeo ad objectionem, concessâ maiore, negando minorem. Quia unitas, veritas, & bonitas sunt veræ passiones Entis, ut disp. 2. dicemus, & has Metaphysica de ipso Ente sic demonstrat: *Est Ens: ergo unum, verum &c.* Neque obstat, quòd sint idem convertibiliter cùm Ente, quippe differunt ex natura rei à conceptu præciso Entis, estò non ab Ente contracto, ut i fra n. 114. explicamus.

20 Audiendus Baconius ubi supra vers. Contra: *Bonum, unum, & verum subterfugiunt ejus conceptum, quia licet sint idem convertibiliter cum ente, sicut omnis passio cum subjecto, tamen differunt ratione, & hoc concedit Philosophus ibidem 4. Metaph. textu comm. 3. sic dicens: Si ergo Ens & unum sunt idem, & una natura, eò quòd ad se invicem consequuntur, non tamen una ratione ostensa. Sed quæ differunt ratione Metaphysicè accepta, unum subterfugit conceptum alterius aliquo modo, & ex* Aristotel.

natura rei. Tum quia Metaphysicus est artifex realis. Tum quia rationem vocat definitionem 7. Metaph. text. comm. 13. & 14. Ratio (inquit) quam significat nomen est definitio, sed quæ differunt definitione differunt ex natura rei : ergo &c.

21 Resolutio septima : Objectum formale quod Metaphysicæ, seu ratio formalis *quæ*, est formalitas Entis, in quantum Ens. Objectum verò formale *quo*, seu ratio formalis *subqua*, est scibilitas relucens in ipsa Entis formalitate. Probo resolutionem quoad primam partem sic : objectum formale quod alicujus scientiæ est id, quod ab ipsa attingitur ratione sui, sed formalitas Entis, in quantum Ens, attingitur ratione sui à Metaphysica : ergo. Confirmo ex Baconio in 1. Prolog. q 3. art. 3. vers. *Ad argumentum* (S. Thomæ) ibi : *Consideratio Metaphysicæ est præcisè de ente, in quantum Ens.* Probo quoad secundam partem sic : Objectum formale *quo* est ultimum specificativum scientiæ ; sed ultimum specificativum Metaphysicæ est scibilitas relucens in ipsa formalitate Entis, concorditer ad ea, quæ diximus tom. 2. in Procœm. ad Physicam n. 36. videlicet, objectum formale *quo*, seu rationem formalem *subqua* Physicæ, consistere in scibilitate relucente in mobilitate : ergo.

22 Objicies. *Metaphysica distinguitur ab aliis per hoc, quòd est circa Ens, in quantum Ens*, ut docet Baconius nuper citatus ibidem arg. 2. vers. *Item* : ergo Ens, in quantum Ens, est ultimum specificativum Metaphysicæ. Respondeo ad objectionem, distinguendo antecedens : distinguitur ab aliis scientiis, per hoc, quòd est circa Ens, in quantum Ens, concedo antecedens : distinguitur etiam à purâ potentiâ intellectivâ, nego antecedens, & consequentiam. Unde tametsi Metaphysica distinguatur

guatur ab aliis scientiis, eò quòd non istæ, benè verò illa agat de Ente, in quantum Ens, non per id distinguitur ab omni eo, quòd ipsa non est, quoniam & intellectus, cùm sit potentia universalissima, attingere valet Ens, in quantum Ens. Ast cùm intellectus in demonstrandis sui objecti passionibus possit errare, idcirco specificativum ultimum Metaphysicæ, quæ coalescit ex habitu intelligentiæ, & scientiæ, est scibilitas relucens in ipsa Entis formalitate, distinguens Metaphysicam non modò ab aliis scientiis, sed etiam à pura intelligentia.

23 Resolutio octava: Principia universalissima & generalissima Metaphysicæ sunt hæc: *Impossibile est idem simul esse, & non esse. Quodlibet est, vel non est.* Probo resolutionem. Metaphysica inter scientias naturales est scientia generalissima, & universalissima, uti eam vocant Philosophus, & Resolutus, habet enim objectum universalissimum, nempe Ens: ergo oportet, quòd habeat principia generalissima & universalissima, qualia sunt præfata principia; nulla enim est alia scientia, cujus illa sint propria, nisi Metaphysica.

24 Observandum modò, nullam scientiam specialem probare sua principia per universalissima propria; quia omnis specialis scientia caret principiis propriis universalissimis, ita quòd non valeat quis amplius arguere ex principiis ejusdem specialis scientiæ adversus negantem prima ejus principia, nisi utatur principiis universalissimis Metaphysicæ; hæc enim & habet sua, perquæ unum de alio probatur, & ex quibus ipsa conclusiones deducit; & rursus habet principia universalissima propria, ita quòd per hæc probentur alia, si fortè negata fuerint in argumento, & hoc tanta activitate, & vi, ut negans, ad impossibile faciliè reducatur. Ad hæc igitur

igitur duo principia reducuntur alia ejusdem Metaphysicæ, quibus & ipsa Logica utitur pro structura syllogistica.

25 Objicies. Metaphysica est dogma omnium Aristotel. scientiarum, & maximè scientia, ut inquit Aristoteles variis in locis: ergo oportet, quòd habeat principia infallibilia; sed principium illud: *Impossibile est idem simul esse, & non esse*, non est infallibile: ergo non est principium Metaphysicæ. Cætera patent. Probas minorem. Tale principium non est verum in Divinis: ergo non est infallibile. Probas antecedens. In Divinis idem simul est, & non est: ergo tale principium non est verum in Divinis. Probas antecedens, & primò sic: Filiatio realiter est producta, Natura, quæ est realiter Filiatio, non est realiter producta: ergo in Divinis idem simul est, & non est, & quidem realiter. Secundò sic: Paternitas est prædicatum realiter distinctum à Filiatione, & Spiratione passiva, Constitutivum Essentiæ, quod est realiter Paternitas, non est distinctum realiter à Filiatione, & Spiratione passiva: ergo idem quod supra.

26 Respondeo ad objectionem concedendo primum antecedens unà cum consequentia, & negando minorem. Ad probationem nego antecedens. Ad ejus probationem distinguo antecedens: in Divinis idem simul est, & non est, sumptum diverso modo, concedo antecedens: idem eodem modo sumptum, nego antecedens. Ad primam probationem patet solutio ex dictis in Logica tractatu 4. disp. 3. sectione 1. q. 2. n. 789. & 790. Ad secundam patet ex dictis in Compendio pro diverso, & eodem disp. 4. sectione 1. q. 4. num. 456 & sequent. Addo, satis esse, quòd principia Metaphysicæ verum habeant in rebus creatis, ut salvetur, quòd ipsa scientia

entia sit naturalis infallibilis. Audi Mag. nostrum Blasco tom. 1. Cursus Philosoph. l. 4. dist. 10. q. 3. Blasco. n. 51. *Si ergo (inquit) semel concedimus in Divinis aliquod principium naturale non tenere , non reputo inconveniens , neque hoc tenere.* Impossibile est idem simul esse , & non esse , affirmari , & negari vere : *Quia ejus sphaera extra creaturas non ascendit.*


27 Resolutio nona. Metaphysica est virtus mentis. Probo resolutionem. Virtus mentis juxta Philosophum 6. Ethic. cap. 3. est habitus , quo *anima verum dicit* ; sed talis est Metaphysica ; cum ipsa sit sapientia , ut ex supra dictis constat : ergo Metaphysica est virtus mentis. Unde Baconius in 1. Prolog. quæst. 4. art. 1. in art. 5. §. 1. non longè à principio , inquit : *Vult (Philosophus) quòd sapientia includat intellectum , qui est habitus principiorum , quia est scientiarum certissima : & quòd includat scientiam parum supra , quia sapientis est de aliquo habere demonstrationem : & tunc concludit : oportet ergo sapientem non solum , quæ est ex principiis scire , sed & circa principia verum dicere.* Baccon.

28 Objicies. Metaphysica tradit multa , quæ vera non sunt : ergo non est virtus mentis ; siquidem , ut ex dictis patet , virtus mentis est habitus , quo *anima verum dicit*. Probas antecedens. Plures Metaphysici ex regulis , & principiis ipsius Metaphysicæ docent , Ens non habere veras passiones , substantiam antecederet ad quantitatem non habere partes distinctas , & alia hujusmodi ; sed hæc vera non sunt : ergo Metaphysica tradit multa , quæ non sunt vera. Respondeo ad objectionem negando antecedens. Ad probationem , concessâ maiore , & minore , nego consequentiam. Quia tametsi plures

res Metaphysici non vera doceant ex principiis Metaphysicæ, id per accidens se habet respectu Metaphysicæ, quæ semper ex se in verum inclinatur. Sicut Medicina semper per se inclinatur in sanitatem, tametsi sæpe morbus, & mors sequantur ex regulis curativis à pluribus Medicis malè applicatis, sive à prava earum applicatione.

- 29 Resolutio decima : Metaphysica est scientia utilissima ad perficiendum intellectum, ad perfectionem aliarum scientiarum, & maximè ad Sacræ Theologiæ consecutionem. Inprimis enim humanus intellectus (ut bene observat Suarius Metaph. disp. 1. sectione 3.) licet indigeat ministerio sensuum, & phantasmatum, eò quòd sit in corpore, tamen secundum se, utpote spiritualis, vim habet res spirituales percipiendi, etiam Divinas, ex quo ab Aristotele l. 1. de Anima textu 82 *quodammodo divinus* appellatus est; quapropter Metaphysica circa sensus etiam, & sensibilia versata, cum sit universalissima, intellectum ipsum humanum perficit. Deinde aliæ scientiæ sæpe utuntur principiis Metaphysicæ, aut ea supponunt, ut in suis demonstrationibus progredi valeant. Tandem, quantum naturali lumine fas est, contemplatur hæc scientia Deum ipsum, & certè inter cæteras scientias naturales Sacræ Theologiæ præcipuè ministrat, proximèque conducit ad ultimum finem cognoscendum.
- Suar. Aristot. D. Thom. Unde ait D. Thomas: *Hoc autem modo se habet Philosophia prima ad alias scientias speculativas: nam ab ipsa omnes aliæ dependent utpote ab ipsa accipientes sua principia, & directionem contra negantes principia, ipsaque prima philosophia tota ordinatur ad Dei cognitionem, sicut ad ultimum finem.* 3. contr. Gent. c. 25. Et sane ista facultas Metaphysica dicitur, eò quòd fines naturæ transgrediatur; est

est enim Metaphysica nomen græcum ; quod ex *Meta*, idest *trans*, sive *ultra*, vel *supra*, & ex *Physis*, idest *natura*, componitur. Ea denique est, quæ tam ab Aristotele, quàm à veteribus Doctores Scholarum Principibus, multis, & quidem honorificis, titulis insignitur. Vocatur per antonomasiam *Philosophia*, item *Philosophia prima*, *Theologia Philosophorum*, *Theologia naturalis*, *Sapientia*, & *omnium Scientiarum Domina*, *Caput*, & *Regina*.





TRACTATUS UNICUS

P R O

ENTE METAPHYSICO.



HABITA jam Proœmialium notitiâ , aggredimur præcipuas quæstiones discutere circa Ens, quod Metaphysica respicit pro objecto. Et quoniam ad perfectam Entis, cognitionem sufficit examinare conceptum, & transcendentiam, proprietates ejusdem, atque divisiones, in quatuor dumtaxat disputationes tractatum dividimus: Primam de conceptu, & transcendentia Entis: Secundam de Entis proprietatibus: Tertiam de præcipuis Entis divisionibus, & de Ente Divino in particulari: Quartam de celeberrima divisione Entis in decem prædicamenta.

DIS-

DISPUTATIO I.

De Conceptu , & transcendentia Entis.

SECTIO I.

De Conceptu Entis.

QUÆSTIO UNICA.

Utrum Ens habeat conceptum unum objectivè præcisum à differentiis suorum inferiorum?

30

RESOLUTIO est affirmativa. Ita Baccon.
Doct̃or in 1. dist. 25. q. 1. art. 3.
per totum. Tenent resolutionem

Mag Zagaglia tom. 2. parte 1. disp. 2. sectione 4. §. Zagaglia,
1. Mag. Aymus in Metaph. parte 1. dist. 3 q. unica Aymus.
art. 1. vers. *Resolutio* 1. Mag. Dionysius Blasco tom. Blasco.
1. l. 4. dist. 12. q. 3. art. 1. Mag. Garcia in Metaph. Garcia.
dist. 1. q. 9. art. 1. §. 2. cæterique discipuli Resoluti. Sotus.
Ex Thomistis Sotus cap. 4. q. 1. conclusione 2. Deca. Deca.
in 1. dist. 3. q. 1. Mercado cap. 1. ante prædicam. Mercado.
Cumel 1. p. q. 13. art. 1. q. 2. conclusione 4. Ex Sco- Cumel.
tistis Mastrius disp. 2. Metaph. q. 1. n. 10. Poncius Mastrius.
ibidem disp. 2. q. 2. conclusione 2. n. 10. ubi ait : Poncius.
Hæc est Scoti 1. l. 3. & dist. 8. cum suis omnibus. Ex
Jesuitis Suarius disp. 2. Metaph. sectione 2. num. 8. Suarius.
Hurtadus ibi disp. 2. sect. 3. & plures alii. Pavet Hurtadus
Aristoteles 4. Metaph. cap. 3. textu 7. dicens: *Unum* Aristotel.
quoddam Entis genus est. Ante resolutionis proba-
tionem,

31 Prænoto primò , Ens reale definiri communiter sic: *Quod potest existere realiter*, idest sine contradictione prædicatorum, quæ quidem definitio, seu potius Entis realis descriptio, convenit etiam Enti actu existenti; quippe, quòd actu existit, certò existere potest, juxta illud: *Ab actu ad potentiam valet consequentia*. Dixi, seu potius *Entis realis descriptio*, quia, cùm ratio Entis ut sic sit universalissima, & simplicissima, non valet Ens strictè definiri, id, quod benè advertunt Philosophi.

Lossada. nominatim Lossada in Metaph. disp. 1. de Ente reali in communi, in principio. Colligitur definitio

Aristotel. illa ex Aristotele Metaph. 1. 9. cap. 4. textu 8. ubi docet, quòd ex Ente reali posito in actu nihil sequitur impossibile.

32 Prænoto secundò, conceptum objectivum correspondere necessariò conceptui formali. Conceptus formalis est actus intelligendi. Objectivus est res intelligibilis. Unde formalis ab objectivo specificatur; cùm actus intelligendi sit per ordinem ad objectum intelligibile. Prænoto tertio contra nonnullos Thomistas, Ens habere in intellectu nostro conceptum unum formalem, qui non repræsentat differentias suorum inferiorum. Nam cùm hæc vox, seu nomen, *Ens*, non solùm materialiter sit una, sed unam habeat significationem ex primæva impositione sua, non potest tali voci, seu nomini, non correspondere in mente unus conceptus formalis. His prænotatis,

33 Probo resolutionem, & primò sic: Ens habet unum conceptum formalem præcisum à conceptibus differentiarum suorum inferiorum: ergo habet conceptum unum objectivum sic similiter præcisum. Probo antecedens. Intellectus potest concipere Ens esse id, quod potest existere realiter,

nihil

nihil cogitans, sit ne substantia, vel accidens; sed hic est conceptus formalis Entis, præcisus à conceptibus differentiarum suorum inferiorum: ergo &c. Item potest aliquis esse certus de eo, quòd aliquid sit Ens, & dubitare, sit ne substantia, vel accidens, ut si quis dubitet, an hic panis sit ritè consecratus, in quo casu dubitat, an ibi sit panis substantia, an tantum accidens. Probo etiam illam consequentiam sup. Unitati conceptus formalis debet necessariò correspondere unitas conceptus objectivi: ergo si Ens habet unum conceptum formalem præcisum à conceptibus differentiarum suorum inferiorum, habet utique conceptum unum objectivum sic similiter præcisum. Probo antecedens. Diversitati conceptuum formalium necessariò correspondet diversitas conceptuum objectivorum: ergo similiter. Antecedens est fundamentum, in quo maximè fidimus, propugnando Distinctionem Baconicam, de qua in Compendio pro Diverso, & Eodem fusè egimus. Consequentia urget, præcipuè illos, qui admittunt unum conceptum formalem præcisum, & negant objectivum. Nonnulli varias huic fundamento afferunt solutiones, quas haud inefficaciter impugnat Mastrius, ubi sup. quapropter, Mastrius. prætermisso hoc labore, ad aliam probationem devenimus.

34 Secundò sic: Ens in suo conceptu objectivo non includit essentialiter differentias suorum inferiorum: ergo habet conceptum unum objectivè præcisum à differentiis eorum. Probo antecedens. Si Ens in suo conceptu objectivo includeret essentialiter differentias suorum inferiorum, ubicumque inveniretur Ens, invenirentur etiam ipsæ differentia; sed hoc falsum est: ergo. Maior ex se clarescit. Probo minorem. In accidente invenitur

tur Ens ; sed non invenitur perfectitas , quæ est differentia constitutiva substantiæ : ergo falsum est, quòd ubicumque invenitur Ens , inveniantur etiam ipsæ differentiæ.

35 Tertiò sic : In tantum Ens non haberet conceptum unum objectivè præcisum à differentis suorum inferiorum , in quantum transcendit ipsas differentias ; sed licet transcendat differentias potest habere , & habet , unum conceptum objectivè præcisum : ergo. Maior est unum ex fundamentis partis adversæ. Probo minorem. Tametsi animal includatur in homine , & leone , habet nihilominus unum conceptum objectivè præcisum ab utroque : ergo idem dicendum de Ente respectivè ad differentias , licet transcendat ipsas.

Proponuntur objectiones , & dissolvuntur.

Caietanus
Zanard.
Arauxo.
Mafius.
Complut.

36 **N**ostræ resolutioni opponuntur ex Thomistis Caietanus de Anal. n. minimum cap. 4. Zanard. 4. Metaph. q. 2. Arauxo ibidem q. 3. art. 4. Mafius in Antepredicam. sectione 1. q. 6. Complutenses nostri in Log. disp. 11. q. 5. n. 46. alique citati à Mafrio, ubi sup. n. 2. vers. *His acceptis* , qui omnes non modò negant Enti conceptum unum objectivè præcisum , sed & formalem , præcipuè perfectum , sive adæquatum. Adversantur etiam Nominales cum Aureolo in 1. dist. 2. q. 1. qui, etsi admittant in Ente unum conceptum formalem , negant objectivum unum , quam sententiam tenet Mag. Valsingham. apud Baconium sup. Suesan. q. 4. Metaph. quæstione 1. & alii. Pro Thomistis citatis

Walsing.
Suesan.
Aristot.

37 Objicies primò. Aristoteles 4. Metaph. cap. 2. docet , Ens considerari à Philosophis , quatenus dicitur de substantia , & de cæteris prædicamentis:

dicamentis : ergo judicat non habere unum conceptum objectivè præcisum. Respondeo ad objectionem , Aristotelem ibi locutum de Ente realiter & physicè sumpto , non formaliter in esse objicibili ad intellectum ; siquidem hanc considerationem admittit etiam ibidem cap. 1. Audiendus Baccon. Bacconius ubi sup. §. 3. vers. *Sed ad hoc : Philosophus 4. Metaph. cap. 1. considerat de ente in quantum ens , & in 2. cap. considerat de ente , ut dicitur de substantia , & de cæteris prædicamentis , quæ attribuuntur ad ipsum ; sed talis consideratio realis diversa , & immediata non posset esse , nisi ens in quantum ens in primò cap. haberet conceptum alium ex natura rei , quàm ens consideratum in secundo capite ubi dicitur de decem prædicamentis.*

38 Objicies secundò. Si Ens haberet conceptum unum objectivè præcisum à differentiis , posset cognosci Ens , non cognitis differentiis ; sed non potest : ergo. Maior liquet. Probas minorem. Ens transcendit differentias : ergo non potest cognosci , non cognitis differentiis. Antecedens est certum. Probas consequentiam. Semel , quòd Ens transcendat differentias , differentiæ sunt formaliter Ens ; sed ex eo , quòd differentiæ sint formaliter Ens , non potest Ens cognosci , non cognitis differentiis : ergo semel , quòd Ens transcendat differentias , non potest cognosci , non cognitis differentiis.

39 Confirmabis. Ideo genus dicit unum conceptum præcisum , & communem , quia non est de essentia differentiarum ; sed Ens est de essentia differentiarum ; cùm transcendat ipsas differentias : ergo Ens non potest dicere unum conceptum præcisum , & communem. Probas maiorem. Quod est de essentia alicujus rei nequit verè præscindi ab illa :

illa : ergo ideo genus dicit unum conceptum præcīsum, & communem, quia non est de essentia differentiarum.

40 Respondeo ad objectionem, concessā maiore, negando minorem. Ad probationem, concessō antecedente, nego consequentiam. Ad probationem consequentiæ, concessā maiore, nego minorem. Quia ex eo, quòd differentiæ sint formaliter Ens, sequitur tantum, quòd sine ratione Entis non possint cognosci ipsæ differentiæ formaliter; non verò sequitur, quòd Ens sine differentiis attingi non valeat. Solutio clarescet ex dictis in Compendio pro Diverso, & Eodem disp. 3. sectione 2. q. 1. n. 311. cui robur acrescit ex dictis in Logica tractatu 2. disp. 3. q. 2.

41 Ad confirmationem nego maiorem. Ad probationem nego antecedens. Nam animal est de essentia Petri, & nihilominus præscinditur ab illo. Complut. 10. Quòd si nostri Complutenſes, ubi supra citati, dicunt, genus propriè loquendo, non præscindi ab speciebus, sed à differentiis tantum, id negamus; siquidem præcisionem objectivam admittimus, ubi ponimus distinctionem Baconicam; & hæc non modò intercedit inter animal, & rationale v.g. sed etiam inter animal, & Petrum, cum hoc discrimine, quòd distinctio inter animal, & rationale est mutua; inter animal autem, & Petrum non mutua, juxta doctrinam traditam in Logica loco supra proximè citato.

42 Unde tametsi Ens sit de conceptu differentiarum, & transcendat ipsas, potest optimè præscindi à differentiis; neque enim conceptus Entis præcīsus assumit taleitates inferiorum, sed solum rationem Entis, neque hæc imbibitur in inferioribus, nisi quando comparatur ad illa. Addit
Mag.

Mag. Blasco ubi sup. n. 3. *Ita ut contracta* (ratio Blasco. Entis ut sic) *non sit ejusdem rationis, ac erat abstracta, & ideo non est univoca, nec genus, sed æquivoca, quia per conjunctionem cum differentiis diversificatur formaliter ratio Entis, non ita conceptus animalis, qui contractus est ejusdem rationis, ac abstractus, quia non imbibitur formaliter in differentiis, & ideo est univocum, & genus, & non transcendit. Transcendentia ergo, cum sit ultima inclusio prædicati superioris in differentiis inferiorum, solum obstat, ne differentiæ inferiorum possint cognosci, quin cognoscantur, ut ens in illis imbibitur, non verò, quòd ens non possit sine illis cognosci, quia illæ non imbibuntur in ente, sed imbibunt illud.*

43 Objicies tertio. Si Ens haberet conceptum unum objectivè præcisum à differentiis, esset univocum; sed non est: ergo idem, quod supra. Probas sequelam. Conceptus ille haberet nomen commune: deinde ratio significata esset omnino eadem, ut requiritur ad univocationem: ergo Ens esset univocum. Antecedens quoad primam partem patet. Probas quoad secundam. Illa ratio est omnino eadem, ut requiritur ad univocationem, quæ in se non includit actum principia distinguentia, etiam si illa includat in potentia; sed ille conceptus præcisus est hujusmodi: ergo. Maior liquet in animali. Minor admittitur. Consequentia sequitur.

44 Respondet P. Suarius, & alii citati Suarius. à Complutens. nostris, conceptum univocum nec actu includere principia distinguentia, nec postulare descendere ad inferiora cum quadam inæqualitate, non modò ex parte inferiorum, sed nec ex intimis visceribus ipsius conceptus; conceptum autem analogum (tametsi hic non includat actum prin-

Complat. cipia distinguuntia) postulare ex se descendere ad
 Scotus. inferiora cum quadam inæqualitate, quod cum ha-
 Mastrius. beat Ens, idcirco non est univocum. Hæc solutio
 validè ab iisdem Complutensibus impugnatur. Sco-
 tus admittit sequelam, quapropter Mastrius illius
 doctrinâ imbutus concedit, Ens esse univocum,
 non tamen purum, sed univocum analogum. Bac-
 conius in 1. dist. 25. art. 3. §. 1. vers. *Dico*, distinctio-
 ne procedit, dicens, quòd Ens, ut est unum præ-
 dicatum abstractum à suis differentiis, non est uni-
 vocum, nec æquivocum, nec analogum: ut autem
 concernit sua contenta esse æquivocum, vel analo-
 gum, non autem univocum. Ex eodem

45 Respondeo ad objectionem negando
 sequelam maioris. Ad probationem, concessio an-
 tecedente quoad primam partem, nego quoad se-
 cundam. Ad probationem secundæ partis, distin-
 guo maiorem: illa ratio est omnino eadem, ut re-
 quiritur ad univocationem, quæ in se non includit
 actu principia distinguuntia, & habet alias condi-
 tiones ad univocationem, concedo maiorem: ali-
 ter, nego maiorem. Quare, ut ratio sit omnino e-
 dem, prout requiritur ad univocationem, non suf-
 ficit, quòd non includat actu principia distinguen-
 tia, sed opus est ulteriùs, quòd talis ratio non con-
 veniat diversimodè suis contentis, idest, uni prin-
 cipaliter, & alteri minus principaliter, quasi per de-
 pendentiam ab alio, ut docet Baconius in 1. dis-
 tinct. 25. art. 4. §. 3. vers. *Item*. Ratio verò Entis
 convenit accidenti dependenter à substantia, &
 creaturæ dependenter à Deo: igitur tametsi præfa-
 ta ratio in se non includat principia actu, non inde
 est univoca univocatione Logicâ.

46 Quod autem non sit univoca univo-
 catione metaphysicâ, patet ex eo; quia ad hoc opus
 erat,

erat, quòd illa ratio communis esset ejusdem rationis respectu suorum contentorum, ut res sunt; & licèt Ens, præcisè acceptum, sit ejusdem rationis in substantia, & accidente, quantum ad prædicatum quidditativum commune, non tamen est ejusdem rationis in illis, ut res sunt, sicut est animalitas in homine, & bruto. Rationem discriminis assignat Bacconius: *Quia si Deus annihilaret quid- quid esset in homine, etiam naturam suam sensitivam, si remaneret asinus in rerum natura, non annihilaretur quidditas animalis, aut realitas hominis* (totaliter) *De ente autem in communi est contrarium: quia si Deus annihilaret accidens, & remaneret substantia, totaliter annihilaretur quidditas, & realitas accidentis. Et sic patet, quòd asinus, & homo in animali sunt ejusdem rationis, ut sunt res, non autem substantia, & accidens in ente. Simile est de Deo, & creatura, ut conveniunt in ente.* In 1. dist. 25. art. 4. §. 1. Ex quibus colligit Doctor, quòd ratio animalis in homine, & bruto est verè, & propriè univoca, univocatione non tantum logicâ, verum & metaphysicâ; secus verò ratio Entis ad substantiam, & accidens, Deum, & creaturam.

47 Hæc intelligenda sunt de Ente concernente sua contenta. Nam si loquamur de illo ita abstracto, quòd nullo pacto contenta respiciat, non est univocum, nec æquivocum, nec analogum, ut sup. etiam ex Bacconio dicebam, sed est unum maiori unitate, & communitate, quàm sit unitas univocationis. Ratio est: quia conceptus univocus, licèt sit omnino idem in inferioribus, respicit ipsa inferiora, in quæ dividitur, & secundum rem multiplicatur. Ens verò abstractum nullum dicit respectum ad pluralitatem, & per consequens

est unum maiori unitate, & communitate, quàm Lalemand sit unitas univocationis. Placuit etiam Lalemandet hic modus discurrendi nostri Bacconii.

48 Objicies quartò. Si Ens haberet conceptum unum objectivè præcisum, & communem, sequeretur posse poni in definitionibus, sed hoc non modò est contra doctrinam Aristotelis, sed etiam absurdum in Philosophia: ergo. Probas sequelam. In definitionibus licèt ponere rationes communes, in quas propinquiora genera possunt resolvi; sed genera suprema possunt resolvi in Ens, ut si in hac definitione Angeli v. g. *Substantia creata intellectualis &c.* loco *substantiæ* ponatur *Ens perse*: ergo, si Ens haberet conceptum unum objectivè præcisum, & communem, sequeretur posse poni in definitionibus. Probas minorem quoad primam partem ex eodem Philosopho 8. Metaph. cap. 6. textu 16. dicente: *Non inest in definitionibus nec ens, nec unum.* Probas eandem minorem quoad secundam partem. Si Ens poneretur in definitionibus, duplici ratione definitiones intraret, semel quidem ratione sui, & iterum ratione differentiæ, in qua necessariò imbibitur; sed hoc est absurdum in Philosophia: ergo.

Aristot.

49 Respondeo ad objectionem, concessâ maiore, negando minorem. Ad probationem primæ partis dico, Aristotelem solùm negare Ens poni in definitionibus propriè essentialibus, & in rigore logico; quia hæ tradi debent per proprium genus, & per propriam differentiam. Cæterùm id non negat, loquendo de aliis definitionibus suo modo explicantibus essentiam definiti; siquis enim loco generis poneret in definitionibus, Ens, cum modo determinante, nihil mali faceret. Hinc ad probationem secundæ partis ejusdem minoris, concessâ

cessâ maiore , nego minorem. Nam , ut non committatur absurdum , sufficit diversus modus concipiendi Ens in definitione , videlicet per modum determinabilis , & determinantis , alioquin enim in hac definitione substantiæ , *Ens per se* , committetur absurdum , & nugatio , cùm in ipso modo , *per se* , includatur Ens , sicut & in omnibus differentiis inferioribus. Nullus autem Philosophorum docet , committi absurdum in præfata definitione , imò omnes tenent , per talem definitionem distinctiùs explicari id , quod substantia dicit confusiùs. Notat Suarius Magnus in Metaph. disp. 32 sección 2 num 8. hanc objectionem procedere non tam contra admittentes , Ens habere conceptum unum objectivè præcisum , sed & adversum omnes ; quia , inquit , sive Ens sit univocum , sive analogum , sive habeat conceptum unum , sive non , semper est certum , substantiam esse *Ens per se* , sicut accidens *Ens in alio*. Suarius.

50. Objicies quintò. Ex resolutione sequitur aliquid esse simplicius Deo ; sed hoc non est admittendum : ergo non stat resolutio. Probas sequelam. Conceptus Entis abstractus habet rationem partis respectu inferioris ; sed omnis pars est simplicior composito : ergo. Respondeo ad objectionem negando sequelam. Ad probationem distinguo maiorem : Conceptus Entis abstractus habet rationem partis respectu inferioris , in rebus creatis , concedo maiorem : in Divinis , nego maiorem. Ratio discriminis est ; quia in rebus creatis distinguimus rationem Entis , & rationem differentiæ Entis contractivam , tanquam potentiam , & actum. Ast in Divinis non est ita , quia rationes formales prædicamentorum ponuntur in Deo , ut depuratæ ab omni imperfectione , quod expresse docet Resolutus variis

riis in locis. Unde licet conceptus determinabilis in creatura se habeat ut pars potentialis, non sic in Deo, in quo non minus est actus, ac conceptus determinans. Verum quavis Deus sit unicus actus realiter, nihilominus formaliter conceptibiliter dicitur plures, unum Entis ut sic, qui est prior in prædicando, & alium talis Entis. Ex quibus sequitur tantum potentialitas in Deo quoad modum significandi, non quoad rem significatam.

51 Objicies sextò. Sequitur etiam, quod prædicamenta non differant se totis, nec sint primò diversa, cum convenient in ratione communi Entis: ergo. Respondeo ad objectionem negando sequelam. Ad insinuatam probationem dico, quod prædicamenta, tametsi convenient in ratione communi Entis, semper sunt primò diversa secundum sua prædicata physica, & ut entia designata, quavis non sint primò diversa transcendentè, sicut Ens, & nihil. Ita Baconius ubi sup. art. 3. §. 4. vers. *Ad tertium*. Igitur prædicamenta sunt primò diversa; quia ultra transcendentiam, in nullo alio prædicato communi conveniunt. Dicuntur etiam conceptus simplices per exclusionem plurium realitatum, non autem per exclusionem conceptuum objectivorum.

Bacon. Complut. Hæc sunt fundamenta, quibus Complutenses nostri maximè fidunt à n. 47. usque ad n. 52. Sed adhuc adversus eandem resolutionem pro Nominalibus supra relatis

52 Objicies septimò. Si Ens haberet conceptum objectivè præcisum à differentiis, talis conceptus aut esset absolutus, aut respectivus; sed non esset absolutus, quia tunc non conveniret respectivis, nec esset respectivus, quia tunc non conveniret absolutis: ergo Ens non habet conceptum objectivè præcisum à differentiis. Sic arguit Aureolus.

Aureolus.

lus. Caterùm, ut benè notavit Mastrius hîc, argu- Mastrius.
mentum si valeret, concluderet etiam contra con-
ceptum formalem, quem Nominales cum Aureo-
lo admittunt. Nam talis conceptus formalis vel es-
set absolutus, vel relativus, adeoque ex eodem ca-
pite implicaret. Bacconius ubi sup. §. 4. verſ. *Ad* Baccon.
secundum, docet, quòd Ens, ut Ens, est indifferens
ad esse absolutum, & respectivum. Hoc posito,

53 Respondeo ad objectionem negando
maiores. Siquidem talis conceptus esset indifferens
ad esse absolutum, & respectivum. Potest tamen
dici, quòd conceptus Entis præcisus sit absolutus
negativè, non positivè, quatenus in illa communi-
tate non est determinatus ad esse respectivum; non
autem, quia sibi determinet in tali communitate
rationem absoluti, alioquin non posset fieri Ens
respectivum.

54 Objicies nonò pro Mag. Valsingham. Walsing.
Admisso conceptu Entis objectivè præciso, sequi-
tur processus in infinitum; sed hic non est admit-
tendus: ergo nec ille. Probas sequelam. Sequitur,
quòd prædicamentum sit Ens per aliud, nempe per
ipsam rationem communem Entis; sed hæc etiam
erit talis per aliam rationem communem, & sic
in infinitum: ergo. Respondeo ad objectionem ne-
gando antecedens. Ad probationem distinguo ma-
iorem: sequitur, quòd prædicamentum sit Ens per
aliud, distinctum in esse objicibili tantùm à differen-
tia, & taleitate prædicamenti, concedo maiorem:
distinctum in esse physico, nego maiorem; quia
ratio communis Entis tantùm in esse objicibili ad
intellectum distinguitur à quolibet prædicamento.
Deinde nego minorem; quia tametsi prædicamen-
to addatur conceptus Entis in communi, non sequi-
tur, quòd Enti in communi addatur alius conceptus.

55 Obji-

55 Objicies decimò , & directè contra primum resolutionis fundamentum. In tantùm Ens posset habere unum conceptum objectivè præcisum , in quantùm intellectus posset esse certus de eo , quòd aliquid sit Ens , & dubitare sit ne substantia , vel accidens ; sed ex hoc non sequitur , quòd Ens habeat unum conceptum objectivè præcisum : ergo. Maior liquet ex sup. dictis. Probas minorem. Etiam intellectus potest esse certus , quòd una res sit individua , & dubitare , an sit hoc individuum , vel illud ; atqui ex hoc non sequitur , quòd detur conceptus communis individui objectivè præcisus : ergo similiter &c.

56 Respondeo ad objectionem , concessâ maiore , negando minorem. Ad probationem , concessâ maiore , & permissâ minore , nego consequentiam. Quia individuum ex conceptu suo dicit rationem singularem , quo posito , sequeretur contradictionem ex ratione communi præcisâ individui ; esset enim , & non esset singularis. Ens verò ex conceptu suo non dicit singularitatem , sed tantùm posse existere ; & cum intellectus possit esse certus , quòd aliquid possit existere , & dubitare , an existere possit per se , vel tantùm in alio , benè potest præscindere à substantia , & accidente rationem communem Entis , absque contradictione. Dixi , *permissâ minore* ; quia ab individuis secundò intentionaliter sumptis optimè potest præscindi ratio communis individui , ut diximus in logica tractatu 3. disp. 1. sectione 3. q. 2. n. 685. Item potest intellectus ex parte objecti concipere naturam , quæ sit individuum vagum , cognoscens v. g. hominem à longè , vagè tamen Petrum , aut Paulum.

57 Objicies undecimò contra secundum ejusdem resolutionis fundamentum. Cognito Ente
ut

ut sic, cognoscuntur omnes differentiæ: ergo Ens non habet conceptum objectivè præcisum à differentiis. Probas antecedens. Cognito Ente ut sic, cognoscitur quidquid habet esse; sed omnes differentiæ habent esse: ergo cognito Ente ut sic, cognoscuntur omnes differentiæ. Respondeo ad objectionem negando antecedens. Ad probationem distinguo maiorem: Cognito Ente ut sic, cognoscitur quidquid habet esse, cognoscitur secundum conceptum communem, concedo maiorem: secundum conceptus particulares, nego maiorem. Quia intellectus cognoscens in aliqua entitate rationem Entis, potest dubitare, an sit substantia, vel accidens, ut supra dicebam. Deinde, si in Ente includerentur omnes differentiæ, certò in substantia includeretur accidens, & è contra; etenim in utroque reperitur ratio Entis.

58 Instabis. Negatio non plus negat, quàm affirmatio affirmat; sed negatio Entis negat omnes differentias: ergo affirmatio ejusdem omnes affirmat. Respondeo ad instantiam negando maiorem; quia negatio, cum sit malignantis naturæ, negat omnia: sic negatio Entis non modò negat Ens in communi, sed omnes illius differentias. Cæterum affirmatio aliter se habet, & ideo optimè potest affirmari ratio Entis in communi, quin affirmantur omnes, vel aliquæ illius differentia. Siquis optat aliam solutionem adeat Mag. Garciam hîc n. Garcia.

373.

59 Objicies duodecimò contra tertium fundamentum. Licèt animal præscindat ab homine, non ex eo probatur Ens præscindere à differentiis: ergo. Probas antecedens. Animal non transcendit differentiam rationalis, sicut Ens suas differentias: ergo licèt animal præscindat ab homine, non ex eo

Tom. Ult.

E

pro-

probatur Ens præscindere à differentiis Respondeo ad objectionem negando antecedens. Ad probationem, concesso antecedente, nego consequentiam. Nam tametii animal non transcendat differentiam rationalis, includitur essentialiter in homine, & si, hoc non obstante, potest præscindere ab homine, ita Ens à differentiis, quin obstat illius transcendentia. Ex dictis

60 Deduces primò, Ens non esse genus ad sua contenta, sicut animal ad sua inferiora, non obstante, quòd Ens habeat conceptum unum objectivè præcisum à differentiis suis, sicut habet animal à suis inferioribus. Quia *secundum Philosophum 3. Metaph. ad rationem generis non sufficit quod sit indifferens conceptus, sed requiritur, quod applicatus ad sua contenta non prædicetur de eis: non enim prædicatur animalitas de rationalitate, sicut entitas prædicatur de omni entitate signata.* Bacconius ubi sup §. 4. in fine.

61 Deduces secundò, in quolibet Ente dari essentiam, & talem essentiam. Unde taleitas aliquid addit supra essentiam ut sic, ita, quòd essentia ut sic, & talis essentia sint conceptus differentes; siquidem essentia ut sic prior est ipsâ taleitate, non enim potest idem esse prius se ipso. Igitur stat optimè, quòd præscindatur conceptus Entis à differentiis suis, etiam non obstante transcendentia, ex qua argui non debet identitas formalis intentionalis Entis cum differentiis, benè verò differentiarum cum Ente, juxta doctrinam, de qua infra n. 65.

SECTION II.

De Transcendentia Entis.

QUÆSTIO UNICA.

Utrum Ens transcendat formaliter suas differentias?

62 **R**ESOLUTIO est affirmativa. Ita Doctor Bacon. expresse in 1. dist. 25 q. unica art. 1 § 2. per totum. Mag. Zagaglia tom. 2. tractat. 1. disp. Zagaglia. 2. sectione 3. parte 2. §. 1. n. 2. Mag. Aymus parte Aymus. 1. Metaph. dist. 3. q. unica art. 2. Mag. Blasco tom. Blasco. 1. Cursus Philosoph. 1. 4. dist. 12. q. 4 art. 5. §. 1. Mag. Garcia in Metaph. dist. 1. q. 7. art. 1. n. 33 i. Garcia. & cæteri discipuli Resoluti. Est certa in sententia D. Thomæ, & Thomistarum, quos sequuntur Complutenses nostri Logicæ disp. 11. q. 5. n. 38. Eidem subscribunt Fonceca 4. Metaph. q. 4. Suarius Granatensis. Metaph. disp. 2. sectione 5. n. 16. & Lustaninus tractatu 1. Metaph. disp. 1 sectione 1 num 10. Vasques, Hurtadus, & alii DD. Societatis, quos citat P. Ludovicus de Loflada disp. 1 Metaph. cap. 4. §. 1. n. 74. & sequitur § 2. Est communis inter Recentiores extra Scholam D. Subtilis, & expressa Aristotelis 3. Metaph. cap. 3. textu 10. Ad illius intelligentiam Aristotel.

63 Prænoto primò, quæstionem non procedere de Ente identicè, & materialiter sumptò, cùm certum sit apud omnes, quòd Ens ita acceptum transcendat suas differentias, eò quòd identificetur cum illis. Procedit igitur quæstio de Ente formaliter spectato, ita ut sensus sit: an differentia Entis sint Ens formaliter.

64 Prænoto secundò , differentias alias dici ultimas, alias non ultimas. Per ultimas differentias intelligunt plures (etiam ex Scotistis nobis contrariis) ultimas formalitates rerum. Sic rationalitas , quæ ultimò constituit hominem , dicitur ultima differentia constitutiva ejusdem. Formalitates verò vegetativi , & sensitivi dicuntur differentia non ultimæ. Aliitaliter explicant præfatas differentias. Cæterùm , quocumque modo explicentur , transcenduntur ab Ente.

65 Prænoto tertio , transcendentiam , de qua in præfenti agimus , esse inclusionem prædicati superioris in inferioribus , ita , quòd inferiora non possint concipi secundum omnia sibi essentialia absque ratione superiore in illis inclusa , tametsi ratio superior attingi optimè valeat absque inferioribus. Et hæc inclusio , strictè loquendo , potius dicenda est identitas formalis inferiorum cum superiore , juxta doctrinam traditam in Logica tractatu 2. disp. 3. q. 2. num. 476. Sic identificatur homo formaliter cum animali , cum vivente , corpore , & substantia ; quia hæc omnia imbibuntur in formali , & quidditativo hominis conceptu ; quæpropter homo ab omnibus illis prædicatis transcenditur. Placet sic discurrere contra paucos. Neque enim transcendentia inferiorum obstat rationi universalis formaliter talis , sed tantum transcendentia differentiarum ipsorum. Jam verò differentia hominis , nempe rationale , ab animali non transcenditur , quia animal non est de conceptu rationalis , nec prædicatum superius respectu illius. E' contra , Ens respectu suarum differentiarum. His prænotatis ,

66 Probo resolutionem , & primò sic : Omne superius transcendit formaliter sua inferiora ; sed Ens est prædicatum superius , & differen-

tiæ

tiae Entis sunt ejus inferiora : ergo Ens transcendit formaliter suas differentias. Probo maiorem. Omne superius praedicatur formaliter de suis inferioribus; sed quod praedicatur formaliter de suis inferioribus, transcendit illa; eò quòd non possit praedicari formaliter de illis, quin sit de illorum conceptu: ergo omne superius transcendit formaliter sua inferiora. Probo etiam primam minorem. Philosophus 3. *Metaph.* probat, quòd Ens non est genus, quia nihil subterfugit ejus praedicationem, idest, neque species, neque differentiae; nam estò praedicatum genericum transcendat sua inferiora, secus eorum differentias: ergo Ens est praedicatum superius, & differentiae sunt ejus inferiora. Igitur &c. *Aristot.*

67. Secundo sic: Quod non est nihil, nec aliquid consequens ad Ens, est aliquid & Ens formaliter, sed perseitas v. g. & quaecumque alia differentia, non est nihil, nec aliquid consequens ad Ens: ergo est aliquid & Ens formaliter. Igitur Ens transcendit formaliter suas differentias. Probo maiorem. Inter contradictoria non cadit medium: ergo si differentia Entis non est nihil, nec consequens ad Ens, sequitur, quòd sit aliquid & Ens formaliter. Sic arguit Baconius ubi sup. citatus.

Bacon.

68. Tertiò sic: Non potest objectivè praescindi perseitas v. g. à ratione illa, per quam Ens reale differt ab ente ficto, maxime cum perseitas non consequatur ad Ens; sed de ratione essentiali talis differentiae ab ente ficto, est, quòd formaliter sit Ens: ergo perseitas non potest objectivè praescindi à formali ratione Entis. Igitur &c. Maior liquet ex eo, quia illa differentia Entis realis ab ente ficto est de conceptu quidditativo perseitatis. Probo minorem. De ratione essentiali talis differentiae est, quòd possit positivè existere à parte

te

te rei : ergo & quòd formaliter sit Ens. Sed quod formaliter est Ens, transcenditur ab Ente formaliter : ergo Ens transcendit formaliter suas differentias.

Proponuntur objectiones, & dissolvuntur.

- 69 **N**ostræ resolutioni opponuntur vetustiores, & candidiores Scotistæ, videlicet, Trombeta 4. Metaph. q. 2. Antonius Andreas 4 etiam Metaph. q. 3. Zerbius ibidem q. 1. conclusione 3. Mairon tractatu de Univ. Entis q. 4. & Mastrius. alii, quos citat, & sequitur Mastrius in Metaph. Poncius. disp. 2. q. 7 art. 1. n. 178. Poncius ibidem q. 3. conclusione 1. Dominicus à D. Petro in Metaph. tractatu 4. disp. 2. q. 8. n. 3. Cæterique Scotistæ fideles, sequentes Subtilem Doctorem in 1. dist. 3. q. 3. Dixi sup. *Vetustiores, & candidiores Scotistæ*, quia ita loquitur Mastrius, deplorans num. 176. loci citati, quòd etiam multi ex sua Schola, clamoribus Adversariorum perterriti ab Scoto in hac quæstione recedant. Pugnant etiam pro non transcendentia ex Jesuitis Lince, Quiros, Arriaga, & alii, quos citant Loflada, ubi sup. & Illustr. Palanco, tractatu 5. Logicæ q. 2. n. 11. Ex nostris Mag. Bona Spes tractatu ultimo Metaph. dubio 4. dicens, quòd Ens non aliter includitur in differentiis, quàm animal in rationali, aut irrationali. Pro his omnibus, & maximè pro Scotistis
- 70 **O**bjicies primò. Si Ens transcenderet formaliter suas differentias, sequeretur processus in infinitum, & quòd differentia se totis non differrent; sed neutrum est dicendum : ergo Ens non transcendit formaliter suas differentias. Probas sequelam. Si Ens transcenderet formaliter suas diffe-

Lince.
Quiros.
Arriaga.
Bona Spes

differentias, differentia Entis convenirent in Ente, & differrent per alias differentias; sed hæc etiam in Ente convenirent, & differrent per alias: ergo si Ens transcenderet formaliter suas differentias, sequeretur processus in infinitum, & quod differentia se totis non differrent. Huic objectioni, in qua potissimum fidit Scotus, mille ab Adversariis (inquit Maftrius) adhibentur solutiones, quarum nulla sufficit. An igitur nostra sufficiat, ex dicendis patebit.

Scotus.
Maftrius.

71 Respondeo ad objectionem negando sequelam. Ad probationem, concessâ maiore quoad primam partem, nego quoad secundam; quia differentia, quæcumque sint, conveniunt in Ente, & sub eodem differunt: conveniunt in ratione Entis in communi, quod est indifferens & in plus se habens, quàm Ens signatum: & differunt in hac, & illa ratione Entis signati. Unde non differunt per alias differentias, nec sequitur processus in infinitum. Ad illud, quod differentia se totis differunt, falsum est de differentiis respectu prædicati transcendentis, cum hoc sit superius ad illas. Vide Baconium ubi sup. Ad primum Scoti.

Bacon.

72 Objicies secundò. Conceptus Entis est conceptus determinabilis, & conceptus differentia conceptus determinans; sed determinans in compositione metaphysica non includit conceptum determinabilem: ergo differentia non includit Ens, ac per consequens Ens non transcendit differentias. Maior ex se clarescit. Probas minorem à paritate compositionis physicae.

73 Respondeo ad objectionem, concessâ maiore, distinguendo minorem: determinans in compositione metaphysica non includit conceptum determinabilem, quando conceptus determinabilis non

non

non est superior respectu determinantis, concedo minorem: quando est superior, nego minorem, consequentiam, & consequens. Nec obstat paritas compositionis physicae, quia materia non est prædicatum superius respectu formæ, sicut neque in compositione metaphysica (hominis v g.) animal non est superius respectu rationalis; non enim forma includit materiam, neque rationale animal. Verùm Ens includitur tanquam superius in differentiis suis, quapropter Baconius ubi sup. ad secundum Scoti, loquendo de conceptu determinabili, & determinante, inquit: *Dico quòd utrobique conveniunt in suo superiori transcendente, scilicet in ente.*

Bacon.

74 Instabis. Si rationale, quod est determinans animal, includeret animal, non posset intelligi quomodo animal contraheretur per rationale: ergo si differentia Entis includunt Ens, non potest explicari quomodo Ens contrahatur per differentias. Respondeo ad instantiam negando antecedens. Quia in tali casu posset animal contrahi per rationale secundum id, quod rationale explicitè dicit, tametsi implicitè diceret animal. Aliis terminis: animal in illa hypothese contraheretur per illum conceptum particularem, perquem rationale superabundaret animal. Sic de facto de Ente, & differentiis, quapropter negatur consequentia.

75 Obicies tertio. Si Ens transcendere formaliter suas differentias, istæ convenirent in ratione Entis; sed non conveniunt: ergo &c. Maior est certa. Probas minorem. Una differentia non est alia: ergo differentia in nihilo possunt convenire, ac per consequens nec in ratione Entis. Antecedens est certum. Probas consequentiam. Si in aliquo possent convenire, una non negaretur de alia,

alia, cùm negatio sit malignantis naturæ: ergo.

76 Respondeo ad objectionem, concessâ maiore, negando minorem. Ad probationem, concessio antecedente, nego consequentiam. Ad probationem nego antecedens. Neque obstat innuata probatio, quia una differentia solum negatur d: alia secundum conceptum determinatum Entis, & explicitum talis differentiæ, non secundum conceptum implicitum Entis. Est igitur argumentum parvi momenti, & solutio sequentibus clarescit exemplis: Tametsi de Petro negetur Paulus, uterque dicit rationem hominis: Similiter de homine negatur leo, & in utroque reperitur ratio animalis, & in omnibus ratio Entis.

77 Instabis. Ultima differentia taliter debet negari de alia, quòd in nihilo conveniat cum illa: ergo nulla solutio. Probas antecedens. Si in aliquo conveniret, non esset ultima: ergo. Probas hoc antecedens. Ideo sensibile non est ultima differentia hominis, quia per sensibile convenit homo cum aliis ab homine: ergo si ultima differentia in aliquo conveniret cum alia, non esset ultima. Respondeo ad instantiam negando antecedens. Ad probationem nego antecedens. Ad probationem dico, sensibile non esse ultimam hominis differentiam, quia per sensibile ita convenit homo cum bruto, quòd per illud formaliter sumptum nullo pacto à bruto differat. At verò per rationale formaliter spectatum, & secundum determinatum conceptum, differt homo ab omni non homine, etsi conveniat in ratione communi transcendentem, quæ non nocet ultimæ differentiæ.

78 Replicabis. Principia, & constituenta non habent tantam convenientiam, quantam habent principiata, & constituta. Sed Deus, &

creatura, substantia, & accidens conveniunt in ratione Entis: ergo ultimæ differentiæ non ita conveniunt. Confirmabis. Maior est convenientia inter composita metaphysica, v. g. inter species ad invicem, putà inter hominem, & brutum, quàm inter ipsorum differentias: ergo. Respondeo ad replicam distinguendo maiorem: principia, & constituentia non habent tantam convenientiam &c. Si sumantur per ordinem ad prædicata non transcendentia differentias, concedo maiorem: si sumantur per ordinem ad prædicata differentias transcendentia, nego maiorem. Ad confirmationem distinguo similiter antecedens: maior est convenientia inter composita metaphysica &c. in prædicatis non transcendentibus, concedo antecedens: in prædicatis transcendentibus, nego antecedens. Igitur homo, & brutum, estò magis convenient in ordine ad prædicata superiora non transcendentia illorum differentias, quàm rationale, & irrationale, tamen in prædicatis differentias ipsas transcendentibus non magis conveniunt, quàm ipsæ differentiæ.

Zagaglia.

79 Observat Mag. Zagaglia, rationes istas Scotistarum nimis probare: necdum enim (inquit) probant contra ultimas differentias, verùm & contra non ultimas; cùm etiam hæ rationem habeant principii constitutivi, &, non minus, quàm ultimæ, se habeant per modum contrahentis. Et si, hoc non obstante, docent Scotistæ, differentias non ultimas includere Ens quidditivè, cur non ultimæ differentiæ?

80 Objicies quartò, & simul urgebis solutionem datam. Homo per ultimam differentiam ita differt ab aliis ab homine, putà à brutis, sicut cum aliis convenit per genus; sed per genus, sive per rationem genericam, taliter convenit cum aliis quòd

quòd nullo modo differat : ergo per ultimam differentiam taliter differt ab aliis , quòd nullo modo conveniat. Respondeo ad objectionem negando maiorem , sumpto , *sicut* , in toto rigore ; & concessâ minore , nego consequentiam. Quia in ratione differentiali , cùm reperiatur ratio superior transcendens , homo per talem rationem convenit cum aliis. In ratione autem generica nulla reperitur differentia ; neque enim hæc transcendit rationes communes. Non igitur homo differt per ultimam differentiam , sicut convenit per genus.

81 Objicies quintò. Si Ens transcederet formaliter suas differentias , esset prius , & posterius quolibet gradu generico sibi inferiore ; sed hoc repugnat : ergo. Probas assumptum. Ens includeretur formaliter in substantia : ergo ex hoc capite esset prius gradu generico viventis. Deinde includeretur formaliter in animali : ergo ex hoc esset ipso viventi posterius. Respondeo ad objectionem , concessâ maiore , negando minorem. Quia nulla est repugnantia respectu diversorum. Ens autem , ut contractum ad substantiam , est prius vivente ; posterius verò , ut inclusum in animali.

82 Objicies sextò. Potest concipi differentia Entis realis , quin Ens reale concipiatur : ergo Ens non transcendit omnes , & quascumque differentias. Probas antecedens. Sæpe apprehendimus aliquod objectum dubitando , sit ne Ens reale , vel fictum ; sed in his casibus concipimus differentiam Entis realis : ergo potest concipi differentia Entis realis , quin Ens reale concipiatur. Respondeo ad objectionem negando antecedens. Ad probationem , concessâ maiore , nego minorem. Quia tunc etiam de differentia Entis realis dubitamus , non minus ac de ipso Ente.

83 Instabis. Potest concipi differentia Entis præscindens ab Ente reali, & ficto: ergo potest concipi differentia Entis, quin Ens concipiatur. Probas antecedens. Potest concipi animal præscindens à rationali, & irrationali: ergo similiter differentia Entis præscindens ab Ente reali, & ficto. Respondeo ad instantiam, negando antecedens. Ad probationem, concessio antecedente, nego consequentiam; quia non sequitur, benè verò ista: *ergo potest concipi Ens præscindens à differentiis*, quæ est vera. Unde animal potest concipi absque rationali, & irrationali; quia nulla ratio differentialis transcendit rationem communem. Ast ratio Entis, cùm sit superior respectu differentiarum, & de illarum conceptu quidditativo, idcirco concipi non potest differentia præscindens ab Ente.

84 Objicies septimò. Perseitas non est formaliter substantia, benè quidem differentia constitutiva substantiæ, sive (ut alii dicunt) modus Entis; sed si Ens transcenderet perseitatem, ista esset substantia: ergo non transcendit illam. Maior liquet. Probas minorem. Si Ens transcenderet perseitatem, perseitas diceret Ens, & talem modum ipsius; sed semel, quòd utrumque diceret, esset substantia: ergo. Respondeo ad objectionem, concessâ maiore, de substantia *ut quod*, negando minorem. Ad probationem distinguo maiorem: Si Ens transcenderet perseitatem, perseitas diceret Ens pro implicito, & talem modum pro explicito, concedo maiorem: diceret tam Ens, quàm modum pro explicito, nego maiorem. Deinde nego minorem, & consequentiam. Quia etsi perseitas dicat Ens, & talem modum, non inde est substantia *ut quod*; siquidem non dicit pro explicito id, quod dicit substantia; substantia enim significatur tanquam

quam species, in qua perfectas contrahit rationem Entis, ex quo perfectas significatur tanquam ratio formalis contrahens talem rationem communem Entis.

85 Objicies octavò. Ens non transcendit modos contractivos Entis: ergo neque differentias. Probas antecedens. Si Ens transenderet modos contractivos Entis, sequeretur, quòd Ens, quod per modos dividitur, non esset Ens adæquatum; sed hoc non est dicendum: ergo Ens non transcendit modos contractivos Entis. Probas sequelam. Tales modi per se sunt Ens; sed modi non includuntur in Ente, quod per modos dividitur: ergo si Ens transenderet modos contractivos Entis, sequeretur, quòd Ens, quod per modos dividitur, non esset Ens adæquatum. Respondeo ad objectionem negando antecedens. Ad probationem distingo maiorem: sequeretur, quòd Ens, quod per modos dividitur, non esset Ens adæquatum, idest, non includeret actualiter omnia, quæ participant rationem Entis, concedo maiorem: idest, non includeretur in omnibus, in quæ dividi potest, nego maiorem. Ad probationem distingo maiorem: tales modi per se sunt Ens signatum, concedo maiorem: Ens incommuni, nego maiorem. Deinde, concessâ minore, distingo consequens modo dicto. Est igitur Ens, quod dividitur, Ens adæquatum, quatenus est Ens ab omni Ente abstractum, & in omni differentia, & modo inclusum.

86 Objicies nonò. Ens non transcendit omnes formalitates: ergo neque omnes differentias. Probas antecedens. Aliqua formalitas non est Ens: ergo Ens non transcendit omnes formalitates. Probas antecedens. Malitia formalis peccati est aliqua formalitas; sed malitia formalis peccati non est Ens:

Ens : ergo aliqua formalitas non est Ens : Maior ex se clarescit Probas minorem. Quidquid est Ens à Deo producitur ; sed malitia formalis peccati non producitur à Deo : ergo non est Ens.

87 Respondeo ad objectionem distinguendo antecedens : Ens non transcendit omnes formalitates , tam positivas , quàm privativas , concedo antecedens : omnes formalitates positivas , nego antecedens. Ad probationem , concessio antecedente , & maiore illius probationis de formalitate privativa ; & etiam minore , distinguo consequens modo dicto. Unde in sententia Baconii ponentis malitiam formalem peccati in privativo , facile solvitur hæc obiectio , cætero qui difficilis. Vide tractatum de Distinctionibus disp 4 sectione 1. q. 2. in responsi ad primum

88 Obicies decimò , & directè contra primum nostræ resolutionis fundamentum. Ad hoc , ut Ens non sit genus , sufficit , quòd includatur in differentiis non ultimis : ergo opus non est , quòd transcendat omnes differentias , tam ultimas , quàm non ultimas. Probas antecedens. Genus petit excludi ab omnibus prorsus differentiis , & non à quibusdam solùm : ergo ad hoc , ut Ens non sit genus , sufficit , quòd includatur in differentiis non ultimis. Respondeo ad objectionem distinguendo antecedens : ad hoc , ut Ens non sit genus adæquatè , sufficit , quòd includatur in differentiis non ultimis , concedo antecedens ; quòd tantùm insinuat illius probatio : ad hoc , ut non sit genus , neque inadæquatè , nego antecedens. Igitur si Ens excluderetur ab aliquibus differentiis , esset genus saltem inadæquatè , quod negat Philosophus , ubi supra citatus , cum ibidem distinguat Ens à genere , per hoc , quòd genus de nullis prædicetur differentiis ; Ens verò è contra.

89 Instabis. Aristoteles ibidem non loquitur

quitur ex propria ſententia , ſed habet ſe merè dubitativè : ergo fundamentum ſup. non eſt ſimul a authoritatis. Reſpondeo ad inſtantiam , quòd Philoſophus , tamen dubitativè ſe habeat loco citato , alibi , nempe 6. Topicorum cap. 3. loquitur ex proprio Marte ; & cùm authoritates ejusdem ibi abſolutè pronuncientur , non eſt locus aſſerendi , ipſum tantum probabiliter procedere. Accedit , quòd Baconius in hac quaſtione citat illum ubi ſup. allegabatur. Ex quo non eſt , cur primum noſtræ reſolutionis fundamentum careat ſimul à Philoſophi authoritate. Ariſtotel.

90 Objicies undecimò contra ſecundum ejusdem reſolutionis fundamentum. Licet differentia habeant eſſe oppoſitum *nihil* , non ſequitur , quòd ſint formaliter Ens : ergo neque , quòd Ens tranſcendat formaliter differentias. Probas antecedens. Licet habeant eſſe oppoſitum *nihil* , id non habent ratione ſui , ſed ratione illius , cum quo realiter identificantur , ſcilicet Entis : ergo non ſequitur , quòd ſint formaliter Ens. Reſpondeo ad objectionem negando antecedens. Ad probationem nego etiam antecedens ; quia ſi differentia ratione ſui , & ut formalitates contractivæ Entis , non eſſent Ens , eſſent nihil , & per nihil coarctaretur Ens , quod nullus dicet Philoſophus.

91 Objicies duodecimò , & ultimò contra tertium fundamentum Differentia poſſunt obſectivè præſcindi ab illo , quod non eſt de illarum conceptu formali ; ſed Ens non eſt de conceptu formali illarum : ergo. Maior patet. Probas minorem. Solùm eſt de conceptu formali differentiarum id , per quod ipſæ definiuntur ; ſed differentia non definiuntur per Ens : ergo. Reſpondeo ad objectionem , conſeſſa maiore , negando minorem. Ad probationem diſtinguo
maio-

maiores: solū n est de conceptu formali differentiarum id, per quod ipsæ definiuntur, tam explicitè, quàm implicitè, concedo maiorem: id tantū, per quod explicitè definiuntur, nego maiorem. Quoque pacto definiantur differentia, semper dicunt implicitè Ens, & hoc sufficit, ut Ens sit de illarum conceptu. Ex dictis

92 Deduces, quòd, licèt omnis differentia sit formaliter Ens, non sequitur, quòd aliquod Ens sit formaliter differentia; constat enim ex præcedenti resolutione, Ens habere conceptum præcisum ab omni differentia. Neque ex hoc sequitur, quòd falsificentur regulæ circa propositionum conversiones; nulla enim regula docet, quòd illa propositio, *Omnis differentia est formaliter Ens*, convertatur per istam, *Aliquod Ens est formaliter differentia*. Siquidem ad rectam conversionem, uti suo loco diximus, opus est, quòd prædicatum conversæ fiat subjectum convertentis. Jam verò prædicatum illius, *Omnis differentia est formaliter Ens*, est hoc prædicatum: *definibile per Ens*; quia sic debet exponi: *Omnis differentia est aliquid definibile per Ens*, sive includens Ens in suo conceptu objectivo ad intellectum: cæterū subjectum alterius, *Aliquod Ens est formaliter differentia*, est hoc subjectum: *Aliquod cognitum, sive cognoscibile, sola expressione, Ens*; quia talis propositio ita exponi debet. Et cū n aliquod cognitum sola expressione, Ens, non sonet idem, ac esse definibile per Ens; nam substantia v. g. sub conceptu substantiæ definibilis est per Ens, non tamen est cognita per solam expressionem, *Ens*; claret igitur prædicatum prioris propositionis non transire in subjectum posterioris, ut requiritur ad rectam conversionem.

Lossada.

93

Sic discurret P. Ludovicus de Lossada
supra

supra laudatus, & huic discursui robur accrescit ex doctrina à nobis tradita in Logica tract 2. disp 3. sectione 1. q. 2. Itaque, ut conversio procedat juxta regulas, opus est, quòd prior illa propositio exponatur sic: *Omnis differentia est aliquid definibile per Ens*, quâ expositâ, convertens *per accidens* erit hæc: *Aliquid definibile per Ens est differentia*, quæ est tam vera, quàm conversa. Addit ipse Loslada ibidem n. 100 in fine, novum non esse, quod aliquæ propositiones converti non possint, nisi prius exponantur, aut resolvantur. Placet additamentum; alioquin enim non fieret prædicatum conversæ subiectum convertentis, ex quo sæpe non rectè procedunt conversiones, ut monui tractatu 2. Artis Syllogisticæ disp. 2. sectione 1. q. 2. n. 331 ubi assignavi condiciones ad veram propositionum conversionem requisitas.



DISPUTATIO II.

De Entis proprietatibus.

S E C T I O I.

De Unitate transcendentali.

QUÆSTIO UNICA :

In quo consistat Unitas transcendentalis ?

94

RESOLUTIO : Unitas transcendentalis, quæ est prima Entis proprietas, consistit formaliter in positivo. Ita

Baccon. expressè Doctor in 1. dist. 33. q. unica art. 2. quem
 Zagaglia. sequuntur omnes ejus discipuli, nominatim Mag.
 Blasco. Zagaglia tom. 2. Theologiæ, tract. 2. disp. 2. sectio-
 Garcia. ne 1. §. 1. Mag. Blasco tom. 1. Philosophiæ, l. 4. dist.
 De Castil. 13. q. 2. art. 1. §. 2. Mag. Garcia dist. 1. Metaph. q.
 Ponce 6 articulo 2. §. 3. Mag. de Castilla tom. 1. Theolo-
 Bacca. giæ, tractatu 2. q. 11. num. 353. Mag. Ponce Bacca in
 Ant. Andr. Metaph. nuper in lucem edita, disp. 3. q. 1. Tenent
 Zerba. etiam resolutionem Scotistæ Antonius Andreas,
 Faber. Zerb. Faber, Tartar. Meruiss. Vulpes, Trombeta,
 Tartar. & alii cum Subtili Doctore, quos citat, & sequitur
 Meruiss. Mastrius disp. 5. Metaph. q. 4. art. 1. n. 43. Senten-
 Vulpes. tiam nostram probabiliorem censet P. Vasques tom.
 Tromb. 2. disp. 128. cap. 2. n. 3. ubi pro eâdem citat D. Bo-
 Mastrius. namventuram, Alexandrum, & Scotum, eamdem-
 Vasques. que probat ex Aristotele 10. Metaph. cap. 5. Ad
 D. Bonav. plenam resolutionis intelligentiam, aliqua oportet
 Alexand. præ-
 Scotus.
 Aristor.

prænotare, tam circa proprietates Entis in communi, quàm circa Unitatem in particulari. Igitur

95 Prænoto primò adverbùs Aureolum, & Sequales ejus, Ens habere veras proprietates, sive passionēs, aut attributa; cùm enim omnis scientia realis demonstrat veras passionēs sui objecti (nota valde) oportet, quòd Ens objectum Metaphysicæ habeat veras proprietates, sive passionēs, quæ ab ipsa Metaphysica demonstrari possint. Sunt ergo proprietates, sive passionēs, aut attributa Entis, Unitas, Veritas, & Bonitas, quæ subterfugiunt conceptum Entis, quia etiam si Unum, Verum, & Bonum sint idem convertibiliter cum Ente, differunt tamen præfatæ proprietates ab illo formaliter, non in esse absoluto, ut volunt Scotistæ, sed in esse respectivo, sive relativo ad intellectum, ut docent cum Resoluto candidiores Baconistæ. Verùm de hoc redibit sermo in calce quæstionis.

96 Prænoto secundò, aliam esse unitatem solitudinis, aliam Unitatem transcendentalem. Unitas solitudinis est illa, quæ absolutè excludit consortium plurium, sive pluralitatem; sic Deus est unus solitariè, & Sol etiam ita dicitur unus. Deus enim taliter est unus, quòd excludit consortium alterius Dei. Sol ita est unus, quòd non detur pluralitas Solis. Unitas transcendentalis, de qua in præsentī agimus, illa est, quæ etsi non excludat absolutè consortium plurium, sive pluralitatem, ut patet in specie humana Una non excludente pluralitatem specierum sub eodem genere animalis, excludit tamen divisionem in plura se, idest, in plura, quæ non sint adæquatè idem cum illa. Ad maiorem intelligentiam

97 Prænoto tertio, Unitatem transcendentalem non excludere per se partium distinctionem, sed

posse compati cum distinctione partium. Sic homo est Unus homo, & tamen habet partes distinctas; & similiter quodlibet compositum Unum. Unde quavis Unum, & multitudo opponantur, non tamen Unitas transcendentalis, & partium multitudo. Excludit quidem Unitas transcendentalis partium divisionem, quia si homo esset acta divisus in suas partes, certò non jam esset homo, nec Unus homo. Sic de quolibet composito dicendum. Audiendus

Bacon. Baconius in 1. dist. 33. q. unica art. 2. §. 3. in principio : *Ad declarationem præmissorum est intelligendum, quòd cùm dicimus aliquid esse unum, ly unum non (semper) dicit rem esse simplicem, vel indivisibilem in quantum est res, sed in quantum est una. Ulna enim dicitur metrum unum, non tamen est res simplex, sed multas habens partes, sed dicitur res simplex, in quantum unum est mensura, cui non potest fieri additio, vel diminutio. Si enim aliqua pars addatur, vel diminuatur ab ulna, jam non est ulna, sed quædam alia mensura.*

98 Prænoto quartò, quòd, quavis non reperiatur Unitas transcendentalis ubi datur partium divisio, non sufficit, quòd non detur divisio partium, ut reperiatur Unitas transcendentalis. Nam in uno per aggregationem non datur divisio partium, siquidem hæ sunt ibi conjunctæ, & tamen ibi non reperitur Unitas transcendentalis; hæc quippe propria est Unius Entis perse. Oportet igitur, ut talis Unitas reperiatur in compositis, quòd non detur divisio partium, & ultra, quòd hæ habeant proportionem, & uniantur per se. Dixi, *in compositis*, quia Ens indivisibile, & simplex est propriè Unum, & tamen nulla datur proportio in suis partibus, ut uniantur, cùm careat ipsis. His attentè prænotatis,

99 Probo resolutionem, & primò sic: In omni

omni divisione imperfectior differentia consistit formaliter in negativo, vel privativo, & perfectior in positivo; sed Ens dividitur in Unum, & multa: ergo multitudo, quæ est imperfectior, consistit formaliter in negativo, vel privativo, & Unitas, quæ est perfectior, consistit formaliter in positivo. Discursus est Baconii, quem infra à n. 133. usque ad n. 136. pro viribus explanamus Confirmo ex Aristotele 10. Metaph. cap. 5. textu 12. ubi non modò dividit Ens in Unum, & multa, sed addit, quòd idem, & diversum ita opponantur, ibi: *Aut enim unum, aut non unum natura aptum ens. Diversum igitur, & idem ita opponuntur.* Sed diversum, & idem taliter opponuntur, quòd diversum consistat formaliter in negativo, uti haud inefficaciter ostendimus, loco proximè citato, & identitas consistat formaliter in positivo, ut ex eodem Baconio probavimus in Compendio pro Diverso, & Eodem disp. 5. sectione 1. ergo Unitas, & multitudo ita opponuntur, quòd multitudo consistat formaliter in negativo, & Unitas in positivo.

Bacon.

Aristotel.

100. Secundò sic: Unitas transcendentalis definitur per indivisionem, quæ contradictoriè opponitur divisioni; sed divisio consistit formaliter in negativo: ergo, e conversò, Unitas transcendentalis, sive indivisio, consistit formaliter in positivo. Maior est certa, etiam in sententia Adversariorum; omnes enim conveniunt, quòd Unitas sit *indivisum in se*, ut docet Aristoteles l. 1. Metaph. cap. 5. in principio. Probo minorem. Divisio nihil aliud est, quàm Unitatis negatio, sive privatio: ergo divisio consistit formaliter in negativo, ac per consequens Unitas in positivo.

Aristotel.

101. Tertiò sic: Modi, sive species, aut membra, in quæ Unum dividitur, important formaliter

maliter

maliter positivum : ergo & Unitas transcendentalis. Consequentia liquet ; quia quando membra dividentia sunt positiva , etiam ipsum divisum est positivum. Probo antecedens. Modi , sive species, aut membra multitudinis , important formaliter negativum , sive privativum , nempe diversum , dissimile , inæquale , discontinuum &c. ergo , ex opposito, modi , sive species, aut membra, in quæ Unum dividitur , videlicet idem , simile , æquale , continuum &c. important formaliter positivum. Igitur stat resolutio , quod Unitas transcendentalis consistat formaliter in positivo. Hoc fundamentum , cui magnum robur accrescit ex infra dicendis in appendicio , est primum , & præcipuum , quo in hac questione utitur Mag. Dionysius Blasco , & mirum est , quod Vir , sanè doctissimus , immemor præfatæ doctrinæ , ponat distinctionem formaliter in positivo !

Blasco.

Proponuntur objectiones , & dissolvuntur.

102 **N** Ostræ resolutioni opponuntur communiter Thomistæ , duce Angelico, D. Thom. Durand. Durandus, Gabriel, Capreolus, Gregorius, & Hen- Gabriel. riq affirmantes formalem rationem Unitatis esse ne- Capreol. gationem , seu privationem divisionis. Omnes ci- Gregor. tat , sed non sequitur Vasques tom. 2. disp. 128. cap. Henriq. 1. quam sententiam tenent ex nostris Mag. Bona Vasques. 1. Bona Spes Metaph. tractatu ultimo disp. 2. dubio 1. & Daniel. Mag. Daniel à D. Josepho de Deo Uno disp. 6. cap. Suarius 2. Ex Jesuitis Suarius Gran. disp. 4. Metaph. sectio- Gran. ne 1. n. 6. Lusitanus tractatu 1. Metaph. disp. 1. se- Suar. Lu- ctione 3 n. 41. Arriaga ibidem disp. 1. sectione 3. firanus. subf. 3. dicens , hanc esse inter RR. communem. Arriaga. Pro his ergo

103 Objicies primò. Aritoles l. 5. Metaph. cap.

cap. 6. & l. 10. cap. 5. Unum docet esse negationem, aut privationem divisionis: ergo resolutio non est Aristotelica. Respondeo ad objectionem disting. antecedens: Unum docet esse negationem, aut privationem, quoad famositatem nominis; concedo antecedens: formaliter, nego antecedens, & consequentiam. Quia Philosophus, praefatis locis, solum explicat Unitatem per conceptus, qui quoad modum significandi sunt negativi, aut privativi, non formaliter, & in rei veritate. Ut liquet in immortali, irrationali, & caeteris, qui sunt formaliter conceptus positivi, licet sonent negationem, aut privationem.

104 Objicies secundò. In eo consistit formaliter Unitas transcendentalis, quo posito, vel sublato (omni alio circumscripito, vel posito) ponitur, vel tollitur ipsa Unitas; sed, privatione multitudinis sublatâ, (caeteris positis) tollitur ipsa Unitas transcendentalis: ergo Unitas transcendentalis consistit formaliter in privatione. Respondeo ad objectionem distinguendo maiorem: quo praecise posito, vel praecise sublato, ponitur, vel tollitur ipsa Unitas, concedo maiorem: aliter, nego maiorem, minorem, sub distinctione datâ, & consequentiam. Quia idcirco deficit Unitas transcendentalis, deficiente privatione multitudinis, quia talis privatio non potest deficere, nisi deficiat illud positivum Unitatis, in quo fundatur.

105 Objicies tertio. Dividere Unum in multa est idem ac reducere multa de non esse in actu ad esse in actu, sive de potentia ad actum; ut patet in divisione continui, in quo partes ante divisionem sunt in potentia, post divisionem sunt in actu; sed quod non est in actu, & potest se habere, habet se privative respectu actus: ergo Unitas
con-

Maffius. consistit formaliter in privatione. Respondet Maffius num. 79. in fine, ubi sup. citatus, quòd partes continui, ut Unum totum constituunt, non carent quacumque actualitate, quia in continuo sunt in actu existentiae, quapropter, inquit, neganda est consequentia, videlicet, quòd Unitas consistat in privatione. Solutio vera est, sed non planè satisfacit argumento, quod ita urgebunt Adversarii:

106 Quando Unum dividitur in multa, etsi Unum non reducat^{ur} absolutè de non esse ad esse, nihilominus reducit^{ur} de non esse actu divisum formaliter ad esse actu formaliter divisum: ergo Unitas importat formaliter privationem divisionis. Probabunt antecedens. Quando Unum dividitur in multa, reducit^{ur} de esse actu indivisum formaliter ad esse actu formaliter divisum; sed esse actu indivisum formaliter est esse actu formaliter non divisum: ergo quando Unum dividitur in multa, etsi Unum non reducat^{ur} absolutè de non esse ad esse, nihilominus reducit^{ur} de non esse actu divisum formaliter ad esse actu formaliter divisum. Respondeo igitur ad objectionem sic propositam negando antecedens. Ad probationem, concessâ maiore, nego minorem. Quia esse formaliter indivisum est formaliter positivum, non minus, ac esse formaliter immortale, irrationale, &c. esse verò formaliter non divisum importat formaliter negativum, sive privativum. Hoc discrimen observavit etiam Arriaga subse^{ctione} 2. n. 37. ubi sup. allegatus.

Arriaga. 107 Obicies quartò ex eodem Arriaga. Ad constituendam Unitatem debent auferri entitates: ergo Unitas transcendentalis consistit formaliter in carentia multitudinis. Probas antecedens. Ad constituendam multitudinem debent poni entitates: ergo ad constituendam Unitatem debent auferri entitates.

titates. Probas antecedens. Quo plus additur , eo maior redditur pluralitas : ergo ad constituendam multitudinem debent poni entitates. Respondeo ad objectionem distinguendo antecedens : ad constituendam unitatem solitudinis debent auferri entitates , concedo antecedens : ad constituendam Unitatem transcendentalem, subdistinguo : sumptâ Unitate materialiter , concedo antecedens : sumptâ formaliter , nego antecedens , & consequentiam. Ad probationem antecedentis distinguo similiter antecedens : ad constituendam multitudinem oppositam unitati solitudinis , debent poni entitates , concedo antecedens : ad constituendam multitudinem oppositam Unitati transcendentali, subdistinguo : sumptâ multitudine materialiter , concedo antecedens : sumptâ formaliter , nego antecedens , quin obset ejus probatio vera.

108 Unde , ut ex superioribus constat, alia est unitas solitudinis , alia transcendentalis. Unitas solitudinis , cùm sit unitas , quâ res dicitur solitaria , & carens consortio alterius , nihil mirum, quòd ad sui constitutionem requirat , quòd debeant auferri entitates , alioqui jam non esset unitas solitudinis. Ast Unitas transcendentalis , de qua agimus, solum materialiter spectata id requirit , non autem formaliter sumpta , quia formaliter stare potest cum consortio entitatum , sive partium ; non enim à subjecto Uno excluditur distinctio partium, ut etiam liquet ex supra dictis. Similiter de multitudine proportionali modo discurrendum.

109 Objicies quintò ex eodem Arriaga , & Arriaga. directè contra resolutionem. Unitas transcendentalis est formaliter non divisio ; sed non divisio non est quid positivum : ergo Unitas transcendentalis non consistit formaliter in positivo. Major liquet
Tom. Ult. H ex

ex eo, quòd multitudo consistit formaliter in divisione; divisione quippe positâ, vel sublatâ, ponitur, vel tollitur multitudo, ex quo illius oppositum, nempe Unitas, debet esse formaliter non divisio. Probas minorem. Non divisio competit realiter chimææ: ergo non est quid positivum. Probas antecedens. Verum est dicere, *Chimæra realiter non est divisa*: ergo non divisio competit realiter chimææ. Probas antecedens. Falsum est dicere, *Chimæra realiter est divisa*: ergo verum est dicere, *Chimæra realiter non est divisa*. Antecedens patet. Probas consequentiam. Ex duobus contradictoris unum debet necessariò convenire chimææ, & enti negativo, independenter ab intellectu; ex eo enim, quòd legere, & non legere sint contradictoria, necessariò unum ex illis de chimæra prædicatur, unde est verum dicere, *Chimæra realiter non legit*; sed illæ propositiones, *Chimæra realiter non est divisa*, *Chimæra realiter est divisa*, sunt contradictoriè oppositæ: ergo, si falsum est dicere, *Chimæra realiter est divisa*, verum est, dicere, *Chimæra realiter non est divisa*.

Oviedus.

110

Miratur Oviedus, Metaph. controversia 3. puncto 1. §. 5 n. 43. quòd Arriaga Author acutus hoc argumento diciatur. Sed mirabilius est, quòd ita loquatur Oviedus, quin objectioni Arriagæ satisfaciat. Respondet enim, quòd, quando dicimus, *Chimæra non est divisa*, absque inconvenienti prædicamus de illa per modum negationis prædicatum positivum rationis. Verùm cùm Arriaga ponat in argumento particulam illam, *realiter*, idcirco recursus Oviedi ad rationem tantùm nullius momenti est, nec difficultatem solvit.

Mastrius.

111

Mastrius disp. 5. Metaph. q. 4. art. 3. n. 77. versu *Ad primum*, docet, quòd quisque occurret

curret facilè argumento integro cum sua replica advertendo, quòd estò nullum detur medium inter contradictoria absolutè sumpta, tamen dari possit inter contradictoria sumpta incomplexè, in propositionibus cum aliquo syncategoremate. Nam (inquit) sicut in ista propositione, *Homo perse in primo modo vel est albus, vel non albus*, neutra pars est concedenda, cùm tam albedo, quàm ejus negatio sint prædicata prorsus accidentalia, & prædicatum, *perse*, non appellet, nisi supra prædicata essentialia; ita in propositione, *Chimæra realiter est divisa, vel non divisa*, neutra pars concedi debet, quia divisum, & non divisum realiter sunt prædicata realia, quæ applicari nequaquam possunt Chimæræ. Hæc solutio etiam patitur instantiam; quia prædicatum reale, licèt non possit applicari enti rationis per affirmationem, tamen verè potest de illo negari, ut patet in ista, *Chimæra non est aliquid reale*. Quare non est, cur non sit etiam vera alia, *Chimæra realiter non est divisa*, tametsi non divisum sit prædicatum reale. Igitur ad objectionem propositam

112 Respondeo negando maiorem. Quia Unitas transcendentalis solum est formaliter indivisio, quæ est aliquid positivum, non autem non divisio, quæ negativum formaliter importat, quapropter de Chimæra dici non potest, quòd sit realiter indivisa, sic enim prædicaretur de illa prædicatum positivum; dici autem potest, quòd realiter non sit divisa, quia, quòd negetur de illa prædicatum reale, non est inconveniens. Nec obstat insinuata probatio, videlicet, quòd multitudo Unitati opposita dicat formaliter divisionem, non enim sequitur, quòd Unitas importet non divisionem, quoniam Unum, & multa non contradictoriè, sed pri-

Loflada.

vativè opponuntur, vel etiam contrariè, eo pacto, quo infra explicamus n. 147. quòd si Unitas, sive Unum, definiri solet non tam per hoc, quod sit *indivisum in se*, sed etiam divisum à quolibet alio, tamen ista additio necessaria non creditur ad Unitatem definiendam, ut benè notavit Loflada disp. I. Metaph. n. 133. eò quòd divisio fundetur in illa indivisione tanquam sequela ipsius.

113 Objicies sextò, & ultimò. Si Unitas transcendentalis consisteret formaliter in positivo, non esset proprietas, sive passio Entis; sed est, ut ex superioribus constat: ergo Unitas transcendentalis non consistit formaliter in positivo. Probas sequelam. Si Unitas transcendentalis consisteret formaliter in positivo, esset formaliter Ens; sed si esset formaliter Ens, non esset proprietas, sive passio Entis: ergo si Unitas transcendentalis consisteret formaliter in positivo, non esset proprietas, sive passio Entis. Maior liquet. Probas minorem. Nihil potest esse proprietas, sive passio sui ipsius: ergo si Unitas transcendentalis esset formaliter Ens, non esset proprietas Entis.

114 Respondeo ad objectionem negando maiorem. Ad probationem distinguo maiorem: esset formaliter Ens in concreto, concedo maiorem: esset formaliter Ens in abstracto, vel Ens in statu præcisionis, nego maiorem, & applicatâ distinctione minori, nego consequentiam. Ad probationem minoris distinguo antecedens: nihil potest esse proprietas, seu passio sui ipsius, sumptum in eâdem linea, & sub eâdem consideratione, concedo antecedens: sumptum in diversa linea, & consideratione, nego antecedens. Verum est, quòd Unitas & Ens sunt una simplex essentia & formalitas, præciso ordine ad intellectum, eo proportionali modo,

modo , quo suo loco diximus contra Scotum, Attributa Divina esse idem , formaliter etiam , & non tantum physicè , cum essentia. Ast quatenus Unitas, & Ens comparantur ad nostrum intellectum , distinguuntur formaliter ex natura rei , non sumpto Ente in concreto , quia ita accepto , quanvis Ens distinguatur ab Unitate , Unitas non distinguitur ab Ente , ut supra docuimus ex Baconio , sed accepto Ente in abstracto , & secundum conceptum præcisum ; quia Ens ita præcisum solum dicit prædicata essentialia Entis secundum se , quatenus non repugnat esse. Unitas verò non dicit conceptum Entis præcisi , nec abstracti , quanvis dicat formaliter conceptum Entis contracti. Unde verum est dicere , *Unitas formaliter intentionaliter est Ens* ; falsum verò , *Unitas formaliter intentionaliter est Entitas præcisa* , seu *Ens præcisum* , ex quo non est , cur Unitas non sit vera Entis proprietas , tametsi importet aliquid positivum. Ex dictis

115 Deduces , Unitatem importare de sui ratione esse conceptum secundarium consequentem essentiam Entis constitutam in suo esse. Idem dicendum de Veritate , & Bonitate transcendentali ; quippe (quidquid Thomistæ , Jesuitæ , & plures Scotistæ reclament) Unitas , Veritas , & Bonitas sunt veræ , & rigorosæ Entis proprietates , juxta Baconium. Nec alioquin Metaphysica vera , & rigorosa scientia esset ; proprium enim est scientiæ proprietates , sive passiones veras , sui objecti demonstrare , uti diximus in Proœmio. De hoc pulchrè , ubertim , & validè Mag. Zagaglia tom. 2. tract. 1. disp. 2. sect. 3 §. 2.

APPENDICIUM

*Pro Constitutivo formali Distinctionis,
juxta veram Baconii mentem, adver-
sus recentes Baconistas.*

116 **D**E hoc Constitutivo egi in opuscu-
lo, quod primitus edidi sub titulo:
*Compendium Philosophico-Theologi-
cum pro Diverso, & Eodem*, disp. 1. sectione 1.
q. unica, ubi, ex mente Resoluti, Distinctionem
dixi consistere formaliter in negatione identitatis,
juxta textum ejusdem Doctoris ibidem allegatum,
de quo infra redibit sermo. Dixi etiam eodem lo-
co: *Quidquid garrulent moderni Baconistæ*; liqui-
dem omnes, quos novi in nostro Conimbricensi
Collegio, & in Conventibus ad studia deputatis,
Distinctionem sitam esse in ipsamet positiva rei en-
titate docuerunt, parùm curando de mente Ante-
signani, fortassè, quia ipse non disputat expressè
de Constitutivis Distinctionis, & identitatis, sed
tantùm de Constitutivis unitatis, & multitudinis.

117 Ego verò, qui, ingenti ardore, ad Bac-
conicam doctrinam elucidandam incumbui, summa
ope curavi legitimam, veramque ejusdem Resoluti
mentem investigare, & compositò circa præsentem
materiam, quam primitèr meis auditoribus dictavi.
Ex his ergo, quæ idem Doctor docet in 1. dist. 33.
q. unic. art. 2. §. 4. vers. *Item hæc est*, & ibidem
vers. *Ad propositum*, fundamen habui proceden-
di adversùm juniores Baconistas, & constituendi
Distin-

Distinctionem in negativo; ibi quippe vers. *Item*, inquit Doctor: *Certum est, quod diversum, dissimile, & inæquale sunt privationes, & in rei veritate privatio unitatis.* Quæ quidem verba satis admodum declarant, Distinctionem non in ipsa rei entitate, benè quidem in carentia identitatis consistere, ex mente nostri Doctoris.

118 Pro hac opinione adduxi aliqua fundamenta ab ipsamet ratione exerta, quorum pondere nonnulli pressi, à sententia communi in nostram ultrò descivere. Verùm non pauci sunt, qui adhuc pertinaciter insistant pro positivo, & ita rigidi, ut nequaquam vellint à præfata sententia deflectere, putantes se satisfacere fundamentis nostris, præsertim primo, & principali, cui varias applicant solutiones. Quapropter operæ pretium existimavi, ipsos pro viribus refellere, & veram doctrinam Baconicam hoc in appendicio stabilire.

119 Primum igitur fundamentum, quo usus fui in Compendio sup. allegato, sic se habet: Quotiescumque definit aliquid, præcisè ablatâ tali formalitate, id in ea formaliter consistit; atqui, præcisè ablatâ negatione identitatis, tollitur Distinctio: ergo in negatione identitatis Distinctio formaliter consistit. Maiorem tanquam certam supposui. Minorem verò sic probavi: Si ex hac propositione, *Homo non est leo*, præcisè tollatur negatio, tollitur Distinctio: ergo. Probavi antecedens. Si ex præfata propositione præcisè tollatur negatio, manet identitas subjecti cum prædicato: ergo tollitur Distinctio. Probavi etiam hoc antecedens evidenter. Si ex hac propositione præcisè tollatur negatio, manet hoc modo propositio: *Homo est leo*; sed verbum, *est*, identificat subjectum cum prædicato: ergo si ex præfata propositione præcisè tollatur

latur negatio, manet identitas subjecti cum prædicato. Igitur &c.

120 Ad hoc fundamentum, quod est satis efficax ad propositum, adhuc præscindendo à textibus Resoluti nostri, respondent recentes Baccanistæ, quòd, ablatâ negatione identitas hominis cum leone, manet identitas falsa, non identitas vera; &, cùm sola identitas vera pugnet cum distinctione, non identitas falsa, idcirco homo distinguitur formaliter à leone, adhuc negatione ablatâ. Hæc illi. Ast difficultatem non leniunt.

121 Argumentor ita: Si, ablatâ negatione identitas inter hominem, & leonem, maneret identitas falsa, maneret negatio identitas veræ; sed hoc manifestè repugnat, ut statim probabo: ergo & quòd maneat identitas falsa inter hominem, & leonem, ablatâ negatione identitas inter utrumque. Probo assumptum. Si, ablatâ negatione identitas inter hominem, & leonem, maneret identitas falsa, non maneret identitas vera; sed, si non maneret identitas vera, maneret negatio identitas veræ: ergo si, ablatâ negatione identitas inter hominem, & leonem, maneret identitas falsa, maneret negatio identitas veræ.

122 Maior liquet. Probo minorem. Ubi non datur identitas vera, datur non identitas vera; sed non identitas vera est negatio identitas veræ: ergo, si non maneret identitas vera, maneret negatio identitas veræ. Maior est certa, loquendo de subjectis supponentibus. Probo minorem. Ly, non, est negatio: ergo non identitas vera est negatio identitas veræ, quæ certò maneret inter hominem, & leonem, manente identitate falsâ inter utrumque.

123 Modò ostendam repugnantiam in eo, quòd

quòd inter hominem, & leonem maneat negatio identitatis veræ, ablatâ negatione identitatis inter utrumque. Manifestè repugnat, quòd maneat negatio identitatis veræ inter extrema, ablatâ ab ipsis negatione identitatis veræ; atqui, ablatâ negatione identitatis inter hominem, & leonem, tollitur negatio identitatis veræ: ergo manifestè repugnat, quòd inter hominem, & leonem maneat negatio identitatis veræ, ablatâ negatione identitatis inter utrumque; ac per consequens implicatorium est, quòd, ablatâ negatione identitatis inter hominem, & leonem, maneat identitas falsa.

124 Maior ex se clarescit. Probo minorem. Negatio identitatis inter hominem, & leonem est negatio identitatis veræ: ergo, ablatâ negatione identitatis inter hominem, & leonem, tollitur negatio identitatis veræ. Probo antecedens efficaciter. Ista propositio, *Homo non est leo*, facit hunc sensum: *Homo non habet veram identitatem cum leone*: ergo negatio identitatis inter hominem, & leonem est negatio identitatis veræ. Probo antecedens. Talis propositio est vera; sed vera non esset, si non faceret præfatum sensum; nam si sensus esset iste: *Homo non habet falsam identitatem cum leone*, profectò esset falsa propositio: ergo talis propositio facit hunc sensum: *Homo non habet veram identitatem cum leone*; ac per consequens negatio identitatis inter hominem, & leonem est negatio identitatis veræ; quapropter, sublatâ tali negatione, necessariò manet identitas vera, quæ cum Distinctione pugnat. Ex quibus iterum contra præfatum solutionem

125 Sic argumentor: Sublatâ negatione identitatis inter hominem, & leonem, manet identitas vera: ergo tollitur Distinctio. Probo antecedens. Sublatâ negatione identitatis inter hominem,

& leonem, manet eademmet identitas, quam negatio negabat in hac propositione, *Homo non est leo*; sed identitas, quam in hac propositione negabat negatio, erat identitas vera: ergo hæc eadem identitas manet, sublatâ tali negatione. Maior patet ex eo, quia, ablatâ tantum negatione, remanent cætera, præter negationem: ergo manet eademmet identitas (significata per verbum, *est*), quam negatio negabat in hac propositione, *Homo non est leo*.

226 Probo minorem. Identitas, quam in hac propositione, *Homo non est leo*, negabat negatio, erat eademmet identitas, quæ, ablatâ negatione, affirmatur per propositionem, *Homo est leo*; sed identitas, quæ, ablatâ negatione, affirmatur per propositionem, *Homo est leo*, est identitas vera: ergo etiam identitas, quam in hac propositione, *Homo non est leo*, negabat negatio. Probo maiorem. Hæ propositiones, *Homo est leo*, *Homo non est leo*, sunt contradictoriæ: ergo opus est, quod una neget id ipsum, quod altera affirmat: ergo si ista, *Homo est leo*, affirmat, seu significat veram identitatem leonis cum homine, eandem negabat negatio in altera, *Homo non est leo*.

227 Quod autem (ablatâ negatione) propositio, *Homo est leo*, quæ remanet, affirmet, seu significet veram identitatem leonis cum homine, patet ex eo, quia in tantum talis propositio non affirmaret, seu significaret veram identitatem leonis cum homine, in quantum leo adhuc esset formaliter distinctus ab homine; sed, negatione ablatâ, ut supponitur, non esset distinctus formaliter ab homine: ergo, negatione ablatâ, propositio, *Homo est leo*, affirmaret, seu significaret veram identitatem leonis cum homine. Probo hanc minorem, in qua tantum est difficultas. Si leo, adhuc negatione ablatâ, esset formaliter distinctus ab homine, id haberet per suam entitatem positivam, ex qua

qua esset formaliter alius ab homine; atqui, sublatâ negatione, non esset formaliter alius ab homine, bene verò idem cum illo; alioqui enim verus sensus illius propositionis, *Homo est leo*, (quæ tantum remanet, negatione ablatâ) esset hic: *Leo est alius formaliter ab homine*, ex quo, e conversò, sensus contradictoriæ, nempe istius, *Homo non est leo*, hic esset: *Leo non est formaliter alius ab homine*; utrumque autem aberrare à genuino præfatarum propositionum sensu, nemo erit, qui revocare possit in dubium. Igitur sicut, sublatâ negatione ab illa propositione, *Homo non est leo*, remanet propositio affirmativa, *Homo est leo*. Ita in rei veritate remanet identitas, negatione ablatâ, ac per consequens inconcussum manet primum illud fundamentum, quod Recentiores excogitaverunt labefactare.

128 Et insuper confirmari potest ex Resoluto Doctore in 3. dist. 9. q. unic. art. 2. §. 2. vers. *Item data*, dicente: *Veritas cujuscunque propositionis dependet ab unitate rei significatæ per prædicatum ad rem significatam per subjectum; ex eo enim, quod res est &c. In prædicamentis cap de substantia in fine. Unde identitas rei ad rem est causa propositionis in veritate in affirmatione, & diversitas rei est causa falsitatis in affirmatione, & veritatis in negatione.* Reliqua, quæ Recentiores adversus alia fundamenta adducunt, non vacat pro merito refellere. Accedit, quòd præcipuus hujus appendicii scopus est manifestare germanam mentem Baconii. Neque enim dico, contrariam sententiam probabilitate carere, sed tantum contendendo demonstrare improbabilem esse in via ejusdem Resoluti Doctoris, quod sic ostendo:

229 Doctor, loco sup. citato, vers. *Item hæc est intentio Philosophi*, expressè docet, quòd, *Bacon.* *diversum, sit in rei veritate privatio unitatis; at-*

qui per ly, *diversum*, intelligit *distinctum*, per ly, *in rei veritate*, intelligit, *formaliter*, & per ly, *privatio unitatis*, intelligit privationem, carentiam, sive negationem, non tantum unitatis, sed & identitatis: ergo juxta Doctorem Distinctio pro formali importat negationem identitatis. Maior constabit legenti ipsum Baconium, ubi sup. Minor habet tres partes, quas si ego probavero, opinionem Recentium alienam esse à germana Baconii mente, nemo erit, qui ambigat. Probo primam partem sic: Doctor per ly, *diversum*, intelligit oppositum *eidem*; sed oppositum *eidem* est *distinctum*: ergo Doctor per ly, *diversum*, intelligit *distinctum*. Probo maiorem ex eodem Doctore, ibidem, ubi assignando modos, sive species unitatis, nempe identitatem, simile, & æquale, per hæc verba: *Idem, simile, & æquale*, docet, quod istorum opposita sunt *diversum, dissimile, & inæquale*: ergo per ly, *diversum*, intelligit oppositum *eidem*, nempe *distinctum*. Hæc docet ex Philosopho l. 10. Metaph. textu 10. sic locuto: *Unius quidem est idem, simile, & æquale; multitudinis verò diversum, dissimile, & inæquale est*. Nec est, cur in hoc amplius immoremur; cum certum sit, nomen, *diversum*, &, *distinctum*, in idem collimare. Quapropter AA. de Distinctione, & Identitate dissonantes, agere dicunt de Diverso, & Eodem. Quod si Personæ Divinæ non dicuntur diversæ, licet sint distinctæ, id ex eo provenit; ne diversitas appelleret supra Naturam; si enim ad Relationes referatur, non est, cur non dicantur diversæ, sicut distinctæ.

130 Probo secundam partem ejusdem minoris sic: Doctor utitur termino, *in rei veritate*, contrapposito illis, *secundum nominis famositatem, secundum vulgarem explicationem*; atqui terminus hisce terminis contrapositus est terminus, *formaliter*,

Aristotel.

liter, ut fatentur omnes: igitur Doctor per *ly*, in *rei veritate*, intelligit, seu accipit terminum, *formaliter*. Maior constat ex doctrina, & verbis ejusdem Doctoris infra relatis n. 133. Minor est unanimis Philosophorum consensus. Consequentia ex se claret.

131 Probo tandem eamdem minorem, quoad tertiam partem, de qua est maior difficultas, nempe, quòd per *ly*, *privatio unitatis*, intelligat Doctor privationem, carentiam, sive negationem, non tantum unitatis, sed & identitatis. Doctor, ubi sup. duo docet ex doctrina Philosophi. Primum, quòd *idem*, *simile*, & *æquale* sint modi, sive species unitatis, & quòd opposita, nempe, *diversum*, *dissimile*, & *inæquale*, sint modi, sive species multitudinis ibi: *Textu 10. dicit* (Philosophus) *unum*, *Baccon.* & *multum opponuntur sic, quod idem, simile, & æquale sunt propria uni, & opposita bis, scilicet diversum, dissimile, & inæquale sunt propria multitudini.* Secundum, quòd opposita illis, nempe *eidem*, *simili*, & *æquali*, videlicet, *diversum*, *dissimile*, & *inæquale*, sint privationes, ita quòd quodlibet istorum oppositorum sit in rei veritate privatio unitatis, ibi: *Sed certum est, quòd diversum, dissimile, & inæquale sunt privationes, & in rei veritate privatio unitatis.*

132 Tum sic: quodlibet ex istis, *diversum*, *dissimile*, & *inæquale*, est in rei veritate, juxta Doctorem, privatio sui oppositi, sed (etiam juxta eundem Doctorem ex Philosopho ubi sup.) oppositum *diversi* est *idem*: ergo quando Doctor docet, quòd *diversum* in rei veritate (idest distinctum formaliter) est privatio unitatis, per *ly*, *privatio unitatis*, intelligit privationem, sive negationem non modò unitatis, sed & identitatis. Sic
intelli-

- Silvestr. intelligendus est Bacconius ; & ita eum interpretantur Expositores doctissimi quidem , & circa mentem ejusdem valde solliciti , significanter Mag. Silvestranus in primum sententiarum , ubi Resolutum egregiè illustrat ; ibi enim , lectione septuagesima octava , docet ex eodem , unitatem , & identitatem consistere in positivo , eò quòd opposita importent privativum. *Nam (inquit) sicut oppositum in opposito : ita propositum in proposito. Sicuti nigrum congregat : sic album disgregat visum. Si opposita unius dicunt privationem , ita unum dicendo positionem.*
- Zagaglia. Mag. Zagaglia tom. 2. tractatu 2. disp. 2. sectione 1. §. 2. ubertim de hac re differens ; sed clariùs tom. 4. tractatu 2. disp. 7. sectione 1. num. 8. ibi : *Dico , quòd distinctio ut sic consistit in negatione.* Mag. Garcia Metaph. dist. 1. q. 6. art. 2. §. 3. n. 239. in fine , dicens : *Earum opposita (unitatis, & specierum ejusdem :) nempe , diversum , inæquale , & dissimile stant in carentia unitatis.* Et Mag. de Castilla tom. 1. Cursus Theolog. tractatu 2 q. 3 n. 46. ibi : *In quo consistat Distinctio clarè constabit attentè legenti Resolutum in 1. &c. Ubi satis insinuat , quomodo se habeant unum , & plura : sed unum , asserit , consistere in positivo quo , & plura in negativo : ergo distinctio pro formali negationem dicit ex mente Doctoris.*

133 Sed quoniam disp. 5. ejusdem Compendii probavi , identitatem consistere in positiva rei entitate , concorditer ad illa , quæ docet idem Bacconius , ubi sup. vers. *Ad propositum* ; & etiam ex textu ibidem relato obiter confirmavi , Distinctionem in negativo ; ex quo alii Recentes dixerunt , Resolutum ibidem mentionem nullam facere de identitate , nec de Distinctione , sed tantùm de unitate , & multitudine , ipsos ex doctrina ejusdem
tex-

textus spaciatiim jam insequor. Textus est hic: *Universaliter est verum, quod in omni divisione imperfectior differentia habet rationem privationis in rei veritate; sed cum dividitur substantia in corpoream, & incorpoream, incorporeum est perfectior differentia, ut per se patet: igitur corporeum in rei veritate est privatio respectu incorporei, & incorporeum est solum privatio secundum famositatem nominis: sed in proposito cum ens dividitur in unum, & multa, per se patet, quod ratio unius est perfectior, quam ratio multitudinis, sicut simplex (perfectius est) composito. Igitur unum dicit privationem solum secundum nominis famositatem, & multitudo secundum rei veritatem.* Doctor in 1. dist. 33. q. unica art. 2. §. 4. veris. sup. citato.

Baccon.

134 Atqui ex hoc textu aperte colligitur, non modò identitatem consistere formaliter in positivo, sed & Distinctionem in negativo: ergo ex textu relato utrumque probatur ex mente Doctoris. Probo minorem. Doctor in hoc textu docet, quod cum ens dividitur in unum, & multa, unum dicit formaliter positionem, sive positivum, & multitudo dicit formaliter privationem, sive negativum; quippe tò, *formaliter*, idem sonat, in phrasi Baconica, ac, *in rei veritate*: ergo etiam modi sive species unitatis, debent dicere formaliter positivum, & modi sive species multitudinis negativum; sed identitas est modus sive species unitatis, & Distinctio est modus sive species multitudinis: ergo identitas importat formaliter positivum, & Distinctio importat formaliter negativum: ergo sicut negatio, quam importat multitudo, est negatio oppositi, nempe unitatis, ita negatio, quam importat ille modus sive species multitudinis, nempe Distinctio, est negatio sui oppositi, videlicet identitatis,

titatis, quæ est modus sive species unitatis.

135

Restat probare, quòd, si unum dicit formaliter positivum, & multa formaliter negativum, etiam modi sive species unitatis dicant formaliter positivum, & modi sive species multitudinis dicant formaliter negativum. Probo hoc, & primò sic: Semel quòd unum dicat formaliter positivum, id importare debet tam in substantiis, quàm in qualitatibus, & quantitativibus. Similiter semel quòd multitudo dicat formaliter negativum, hoc debet dicere etiam in substantiis, qualitatibus, & quantitativibus; atqui unitas in substantiis est identitas, in qualitatibus est similitudo, & in quantitativibus est æqualitas, ut tenent communiter Philosophi, & observat Magnus Suarius *Metaph. disp. 7. sect. 3. num. 3. ibi: Est observandum convenientiam hanc plurium rerum in ratione communi in substantiis retinuisse nomen identitatis, simpliciter loquendo, ex accommodatione usûs, & quasi per antonomasiam, in quantitativibus verò vocari similitudinem; in quantitate verò vocari æqualitatem.* Deinde multitudo in substantiis est distinctio, in qualitatibus est dissimilitudo, & in quantitativibus inæqualitas, ut omnes fatentur: ergo benè sequitur, quòd, si unum dicit formaliter positivum, & multa formaliter negativum, etiam modi sive species unitatis dicant formaliter positivum, & modi sive species multitudinis dicant formaliter negativum. Ap-

Suarius

D.Thom.

tissimè D. Thomas l. 5. *Metaph. lectione 12. lit. J. Idem, & diversum consequuntur unum, & multa.*

Zagaglia.

136

Eapropter Mag. Zagaglia tom. 2. tractatu 2. disp. 2. sectione 1. §. 2. num. 24. vers. *Sed contra*, impugnando Adversarios contendentes, quòd identitas, æqualitas, & similitudo non important formaliter positivum, arguit sic: *Opposita præ-*
fatis

fatis modis unitatis dicunt privationem, ex quo dicunt privationem unitatis, vel in substantia, vel in qualitate, vel in quantitate. Idem docet Mag. Garcia Metaph. dist. 1. q. 6. art. 2. §. 3. num. 239. in fine. Uterque discurrens ex principiis Baconii, qui in 1. dist. 33. q. unica art. 2. §. 1. in principio, sic procedit: Secundus articulus; ubi primò probo, quòd unum, vel idem non dicunt formaliter in divisionem, & privationem. Probat sic: Cujus modus, vel species in quæ aliquod commune dividitur sunt positiva, & ipsum commune est positivum: sed modi, vel species, in quos Philosophus 5. Metaph. dividit unum, & idem sunt positivi, sicut patet, quòd unum continuitate, unum genere, unum specie, unum in substantia, unum in qualitate, unum in quantitate dicunt positionem. quod patet; quia illa dicunt positionem, quorum opposita (nota) dicunt privationem; sed diversum, dissimile, inæquale, & non continuum, non unum &c hæc omnia dicunt privationem: ergo. Ex quibus rectè colligitur, non modò, quòd identitas consistat formaliter in positivo, sed etiam, quòd Distinctio importet formaliter negationem identitatis. Et hinc

137 Manifestè ostenditur, quàm sinistra, & à doctrina Baconii aberrans, sit interpretatio aliorum Recentium, qui dicunt, Doctorem per regulam præfatam: *In omni divisione imperfectior differentia habet rationem privationis in rei veritate &c.* nihil amplius intendisse, quàm, quòd imperfectior differentia careat in rei veritate perfectione alterius differentię perfectioris. Nam præter quam quod hæc advertentia esset superflua, cum sit valde notum, quòd imperfectius caret perfectione perfectioris, nihil Resolutus in hac regula diceret ex parte differentię imperfectioris, quod etiam,

proportionali modo, non reperiretur ex parte perfectioris differentiae; quia sicut imperfectius non continet in rei veritate, sive formaliter, perfectionem perfectioris, ita neque perfectius formaliter continet imperfectionem imperfectioris. Si igitur talis esset sensus Resoluti, quid, quaeso, diceret ipse observatione dignum in hac regula ab eodem tam dilligenter excogitata? Quare inconcussum manet discrimen assignatum à Resoluto inter unum, & multa, ex quo imperfectior differentia in omni divisione consistit formaliter in negativo, ita quòd hæc doctrina refelli nequaquam possit, nisi per manifestas tergiversationes, nec opposita defendi sine magno infidelitatis vitio.

138 Probo idem assumptum secundò sic: Semel quòd unum dicat formaliter positivum, & multitudo formaliter negativum, etiam inferiora unitatis debent importare formaliter positivum, & inferiora multitudinis negativum; atqui identitas, similitudo, & inæqualitas sunt inferiora unitatis; deinde Distinctio, inæqualitas, & dissimilitudo sunt inferiora multitudinis: ergo semel quòd unum dicat formaliter positivum, & multitudo formaliter negativum, etiam identitas (sicut & similitudo, & æqualitas) debet importare formaliter positivum, & Distinctio (sicut & dissimilitudo, & inæqualitas) debet importare formaliter negativum. Maior liquet ex eo, quòd in inferioribus sit ratio participata à superiore. Probo minorem ex Philosopho 5. Metaphys. cap. 6. dividente unum in unum continuitate, unum genere, unum specie, unum in substantia, unum in qualitate, & unum in quantitate; sed unum in substantia est identitas, juxta eundem Philosophum eodem lib. 5. Metaph. ibi: *Identitas unitas quædam essentia est*; deinde unum in quali-

qualitate est similitudo , unum in quantitate est æqualitas , ut supra ostendimus : ergo identitas , similitudo , & æqualitas sunt inferiora unitatis. Quod autem Distinctio , inæqualitas , & dissimilitudo sint inferiora multitudinis liquet ex eodem Philosopho dividente ibidem , proportionali modo , multitudinem : *Manifestum autem etiam est* , (inquit) *quod multa quoque uni oppositè dicuntur. Quædam enim, eò quod non sint continua &c.* Aristot.

139 Confirmo hanc doctrinam ex eo , quod unum genere , & unum specie dicunt formaliter quid positivum : ergo etiam unum substantiâ. Antecedens concedunt omnes Baconistæ , eò quod unum genere , & unum specie dicant deformali ratione simplicitatem propriam unitatis. Probo consequentiam. Idcirco unum genere , & unum specie dicunt formaliter positivum , quia unum genere participat rationem unitatis , quæ secundum eandem simplicem rationem dicitur de eo ; & unum specie participat rationem unitatis , quæ etiam secundum eandem simplicem rationem de ipso uno specie dicitur ; atqui etiam unum naturâ participat rationem unitatis , quæ secundum eandem simplicem rationem de ipso uno naturâ dicitur ; non enim datur maior ratio , cur illa ratio unitatis participetur ab uno genere , & ab uno specie , quàm ab uno naturâ : ergo , cum unum naturâ sit identitas , opus est , quod ista sit formaliter quid positivum , eò quod participet rationem unitatis positivè. Ex quo similiter est arguendum ad Distinctionem respectivè ad multitudinem.

140 Reclamant : Sequitur ex hac doctrina , quod irrationale , utpote differentia imperfectior rationali , sit in rei veritate negatio rationalis , quod est apertè falsum , cum sit verum , irrationale im-

portare positivam entitatem in rei veritate, tamen explicetur per negationem. Respondeo: Non sequitur. Quia Doctor solum loquitur universaliter de illis differentiis contrahentibus rationem divisa, quæ diverso modo participatur à suis contentis, ut res sunt, uti se habet ratio substantiæ ad corpoream, & incorpoream, & ratio entis ad unum, & multa. Etenim ratio substantiæ ita participatur à corporea, & incorporea, quod corporea, & incorporea differant etiam in re substantiæ, & se totis; immediatè quippe coarctant supremum genus substantiæ, nec convenire possunt in aliquo constituto per differentiam contentam sub genere supremo. Quare substantia solum est eadem in suis inferioribus immediatè coarctativis, secundum similem modum prædicandi, quod sufficit ad hoc, ut prædicetur de illis tanquam genus logicum. Non est verò eadem in ipsis inferioribus, ut res sunt, ideoque oportet, quod corporeum in rei veritate, utpote imperfectior differentia, dicat negationem incorporei.

141 Ratio autem entis, cum neque sit genus logicum ad sua inferiora, eò quod prædicetur in recto de eorum differentiis, multò minus potest esse ejusdem rationis in suis inferioribus, ut res sunt. Unde ens taliter concernit unum, & plura, quod unum sit ens per se, plura verò per accidens; nam plura, cum sint simpliciter plura, non sunt simpliciter unum; & quod non est simpliciter unum, non est simpliciter ens, ut rectè monet Suarius *Metaph. disp. 5. sectione 5. n. 2.* Igitur, cum ens diverso modo participetur ab uno, & pluribus, oportet, quod multitudo, tanquam differentia imperfectior uno, dicat negationem unius in rei veritate.

Suarius

142 Ast ratio communis animalis est ejusdem rationis in suis inferioribus, ut res sunt, ita quòd differentia irrationalis, perquam contrahitur ad brutum, non diversificet in hoc rationem ipsius animalis ab animali hominis, siquidem utrobique eodemprorsus modo participatur eadem animalis ratio, & ideo irrationale, etsi differentia sit imperfectior rationali, non est in rei veritate negatio rationalis. Eapropter non stat illa regula Resoluti pro omni omninò divisione, sed tantum universalis est pro illis, in quibus ratio importata per conceptum communem diverso modo participatur à suis contentis, ut supra dicebam. Quæ enim, ut res sunt, eodem modo participant rationem communem, non oportet, quòd unum ex illis dicat necessariò privationem in rei veritate; siquidem in illis neque ratio communis participata potest esse imperfectior in uno, quàm in alio, ut ex eodem Doctore Resoluto docet Mag. Zagaglia de ratione importata per genus intermedium, tom. 2. tractatu 1. disp. 4. sectione 4. §. 5. num. 51.

143 Insistunt : Distinctio non semper est imperfectior identitate ; siquidem in Deo perfectior est Distinctio Personarum, quàm identitas inter ipsas. Cæterum hæc ratio dubitandi est impugnatione indigna, cum sit omnibus notum, quòd quando unum cum alio comparatur in ratione maioris, vel minoris perfectionis, sit comparatio circa res existentes, vel saltem possibiles, non autem inter rem existentem, & chimæram ; evidens enim est, quòd omne existens, vel possibile, perfectius est in rebus, quàm chimæricum & impossibile. Cum igitur identitas inter Divinas Personas sit impossibilis & chimærica, nihil mirum, quòd Distinctio, quæ inter ipsas reperitur, sit perfectior identitate, quæ

quæ nec reperitur , nec reperiri potest inter illa extrema. Igitur quando dicimus, Distinctionem imperfectiorem esse identitate , loquimur de Distinctione , & identitate existentibus , & possibilibus.

144 Accedit, quòd si modus iste impugnandi Distinctionem in negativo aliquid probaret, certò convinceret utique , quòd multitudo in rei veritate non esset imperfectior unitate , quod tamen nullatenus est admittendum in via Baconii , qui expressè docet , quòd unum est perfectius multitudine , sicut simplex perfectius est composito , ubi sup. n. 133. *Perse patet , quòd ratio unius est perfectior , quàm ratio multitudinis , sicut simplex composito.* Probo assumptum ex eo , quòd in Deo etiam multiplicitas Personarum sit perfectior , quàm unitas in Personis ; cùm hæc etiam sit chimærica. Sed, hoc non obstante , temper est verum dicere cum Baconio , quòd multitudo ex conceptu suo sit imperfectior unitate : ergo & quòd Distinctio imperfectior sit identitate , ex quo illa , non ista consistit in negativo.

145 Maior difficultas est , si ita arguatur : Distinctio , quæ datur inter Divinas Personas non est imperfectior identitate , quæ reperitur inter ipsas Personas , & Essentiam Divinam. Nihilominus facilis est solutio , quia , estò illa Distinctio in Deo non sit imperfectior illâ identitate , ex hoc non sequitur , quòd Distinctio ex genere suo non sit imperfectior identitate sumptâ etiam ex genere suo. Sicut non sequitur , quòd potentia productiva non sit ex genere suo minus perfecta quàm sapientia , juxta illud : *Melior est sapientia quàm vires*, tametsi Omnipotentia Dei non sit suâ Sapientiâ imperfectior. Ratio est ; quia in Deo omnia sunt æqualis perfectionis ex eo , quòd Deus sit Ens Summum continens

tinens supereminenter omnem perfectionem inæqualium ex genere suo, quapropter Potentia factiva Divina, sive Omnipotentia, ex eo, quod sit Divina, est æqualis Divinæ Sapientiæ, non obstante, quod sapientia ex genere suo sit perfectior potentiâ factivâ. Hinc patet tantam perfectionem importare in Deo Distinctionem, quàm identitatem, tamen si identitas ex conceptu suo perfectior sit Distinctione.

146 Replicant adhuc: Si Distinctio est imperfectior identitate juxta Baconium, ex eò, quod juxta eundem, multitudo imperfectior est unitate, & hac de causa tam Distinctio, quàm multitudo, consistit in negativo, quomodo salvatur doctrina Aristotelis Metaph. I 10. cap. 5. docentis, quod *Aristotel.* unum, & multa sunt contrariè opposita; cum opposito contraria reperiatur tantum inter extrema positiva. Ait enim Philosophus ibi: *Opponuntur autem unum, & multa &c.* & paulo post: *Cum autem oppositiones quatuor sint modi::: contraria erunt profectò.*

147 Pro solutione observandum est ex doctrina Baconii tradita à Mag. Zagaglia tom. 2. tractatu 2. disp. 2. sectione 1. §. 2. num. 28. quod, cum unum possit dupliciter considerari, nempe, vel secundum nominis famositatem, vel secundum rei veritatem, & similiter multitudo, unitas primo modo sumpta importat privativum, seu negativum, & sumpta secundo modo importat positivum: e conversò, multitudo primo modo accepta dicit positivum, secundo modo dicit privativum, sive negativum: ex quibus sequitur, quod, si multitudo secundum rei veritatem, sive formaliter spectata, comparetur cum unitate sumpta etiam formaliter, vel si multitudo secundum famositatem nominis, Zagaglia.
sive

sive materialiter accepta, comparetur cum unitate etiam materialiter sumpta, unitas, & multitudo opponuntur privativè.

148 Si verò multitudo sumatur diverso modo, ac unitas, idest, si sumatur secundum famositatem nominis, seu materialiter, & unitas sumatur secundum rei veritatem, tunc unitas, & multitudo non privativè, sed contrariè opponuntur; quippe hoc pacto tam unitas, quam multitudo important positivum, & ideo docet Aristoteles, quòd unum, & multa contrariè sint opposita, sed non propterea negat, quòd etiam opponantur privativè, factâ aliâ comparatione; inò in textu sup. relato mentionem facit duarum oppositionum inter unum, & multa, nempe privativæ, & contrariæ.

Aristotel. En integrum Philosophi textum: *Opponuntur autem unum, & multa multis modis, quorum uno unum & multitudo, ut indivisibile, & divisibile: quod enim aut divisum, aut divisibile est, multitudo quædam dicitur: quod verò indivisibile, aut non divisum, unum. Cùm autem oppositiones quatuor sint modi, & horum alius secundum privationem dicatur, contraria erunt profectò, & neque ut contradictio, neque ut ea, quæ ad aliquid dicuntur.* 10. Metaph. cap. 5. & apud D. Thomam lectione 4. in principio.

149 Quod autem unum, & multa, non obstante, quòd opponantur contrariè, opponantur etiam privativè (factâ diversâ comparatione) docet Mag. Zagaglia ubi sup. Et Mag. Garcia in Metaph. dist. 1. q. 6. art. 2 §. 3. n. 249. admittit oppositionem contrariam inter unum, & multa, si multitudo materialiter, sive fundamentaliter accipitur, eò quòd ita accepta importat aliquid positivum, quo non obstante, sustinet, dari oppositionem

Zagaglia.
Garcia.

nem privativam inter illa , si multitudo sumatur formaliter , quia formaliter sumpta , inquit , dicit carentiam unitatis. Sic etiam discurret Mastrius Me- Mastrius.
taph. disp. 5. q. 4. art. 1. num. 56. ubi agit de intelli- Vasques.
gentia textûs allegati. Doctissimus Vasques tom. 2. disp. 128. cap. 2. n. 4. ubi docet ex Aristotele , unum , & multa contrariè opponi , cùm dicat ipse : *Contraria erunt profecto* : ibi num. 5. ad objectionem sumptam ex verbis ejusdem Aristotelis : *Horum alius secundum privationem dicatur* , quibus videtur non negare oppositionem privativam inter illa , sic responder : *Si eam oppositionem non negavit , saltem non asseruit , solum opponi secundum privationem : Sed cùm addidit , contraria erunt profecto , (quibus verbis enumeravit genus oppositionis contrariæ unum ex quatuor , quæ esse dixit) expressè sensit opponi contrariè . Quare si concedimus opponi privativè , ita id debemus asserere , ut non negemus etiam opponi contrariè .*

150 Ex his manifestè colligitur , quòd etsi in Compendio pro Diverso , & Eodem docuisssem , multitudinem importare privationem unitatis , ex hoc non sequitur , quòd non opponatur etiam unitati contrariè ; quia , factis diversis comparisonibus inter unum , & multa , stat optimè , quòd ipsa privativè , & contrariè opponantur. Quòd si præfatto loco disp. 5. sectione 1. q. 1. n. 537. teneo , unitatem , & multitudinem solum contrariè opponi , ubi videbatur dicendum , quòd absolutè excludo aliam quamcumque oppositionem , præter contrariam , nihilominus per ly , *solum* , non excludo ibi oppositionem privativam , sed contradictoriam ; quia ibi fit comparatio unitatis , & multitudinis ad identitatem , & Distinctionem ; & cùm Distinctio formaliter spectata opponatur contradictionè identita-

ti, unitas autem, formaliter etiam accepta, opponatur contrariè multitudini, sumptæ secundum famositatem nominis, juxta superius explicata, idcirco insinuo ibidem, non fieri bonum argumentum ab unitate ad identitatem, respectivè ad multitudinem, secundum famositatem nominis acceptam, & ad Distinctionem, formaliter sumptam; quia unitas, & multitudo solùm contrariè opponuntur; idest, non contradictoriè, sicut identitas, & Distinctio. Hæc ita explanare placuit, ut doctrinam à me traditam perfectè intelligant Recentes illi, qui me de incohærentia, in via Baconii, arguere ausi sunt.

Bacon.

151 Restat solvere duas difficultates speciales, quæ videntur manifestæ contradictiones nostri Doctoris, tametsi, re vera, non sint, ut infra ostendam. Prima igitur difficultas fundari potest in doctrina ejusdem Baconii in 1. dist. 33. art. 2. §. 3. vers. *Confirmatur*. Ubi asserit, quòd quando aliqua res habet diversas expressiones, quarum una sonat affirmationem, alia negationem, magis supponendum est, quòd affirmativa ratio sit prima, & ad istam consequatur negativa, quàm econtrario, ibi: *Quando aliqua res habet rationem experimentem eam affirmativè, & negativè, magis supponendum est, quòd affirmativa ratio est prima, & negativa consequitur ad eadem, quàm econverso*: ex quibus verbis videtur dicendum, quòd cùm Distinctio habeat expressionem negativam, nempe negationem identitatis, & affirmativam, scilicet alietatem unius à reliquis, sola expressio affirmativa sit prima, in ipsaque consistat Distinctio formaliter accepta.

152 Verùm hæc difficultas facilè solvitur ex eo, quòd Doctor, ubi supra, solùm loquitur de rebus simplicibus, uti sunt identitas, similitudo, æqua-

æqualitas , quæ sunt species unitatis , de qua ipse agit præfato loco , quem sic concludit : *Cùm igitur unum possit dicere rem esse simplicem , & rem esse indivisibilem , quia unum dicit rem non recipere additionem , vel diminutionem , quod convenit rei , ut simplex , & ut indivisibilis est : igitur magis est supponendum , quod primo unum dicit formaliter istam rationem , quæ est esse simplex , quàm esse indivisibile.* Hæc propter ostendit Mag. Zagaglia unitatem consistere formaliter in positivo , juxta Baconium , non obstante , quod sonet etiam negationem multitudinis , quia unitas est res simplex. Distinctio autem , cùm non sit simplex conceptus , non est de numero rerum , de quibus Resolutus in præsententi loquitur. Baccon. Zagaglia.

153 Maior est secunda difficultas , & rectè fundata in doctrina ejusdem Doctoris , ibidem sup. art 5. ubi impugnat sententiam Aureoli , & aliorum docentium , Relationes Divinas , & Essentiam differre ex eo , quòd non habeant eandem identitatem absolutam , qua una res est eadem sibi ipsi , & hanc identitatem non esse aliquid positivum , contra quos arguit sic : *Illam non est prima differentia , quæ reducitur in priorem : sed ex processu argumenti differentiam istarum non identitatum reducitur in priorem differentiam formalem positivam : igitur prima differentia est per formalia positiva , non per privationes , aut per non identitates.* Ibi , vers. Contra quos. Deinde vers. seq dicit , Adversarios sic argumento suo satisfacere : *Verum est , quòd differentiam illam non identitatum reducitur in priorem positivam fundamentalem , non formalem : imò nulla formalis positiva præsupponitur differentia talium identitatum , quinimò prima distinctio formalis , quæ est ibi , est illarum non identitatum.* Dicit etiam , Baccon.

Baccon.

Adversarios dictum suum multis manifestare exemplis, ex quibus unum affert magis apparens, quo non obstante, solutionem illorum sic impugnat: *Contra, licet infinitis modis possit impugnari istud exemplum, & responsio, tamen directè arguo, quòd illud, & quodcumque exemplum, quod ponit, concedit, quòd præcedit ibi distinctio formalis positiva, sic: tu concedis, quòd illæ non identitates præexigunt distinctionem positivam fundamentalem, scilicet essentiæ, & relationis; sed distinctio illa positiva præexigita, quam vocas fundamentalem, est formalis: ergo ibi præcedit distinctio formalis positiva.*

154 Non levis est hæc difficultas, & quidem maturâ speculatione digna. Miror, quòd Recentiores nullam prorsum de ea mentionem faciant in favorem suæ sententiæ! Sed quidquid de eo sit. Pro expedita solutione est valdè advertendum, Doctorem Resolutum inter Relationes Divinas, & Essentiam admittere Distinctionem intentionalem, de qua uberrimè disputavi in Compendio pro Diverso, & Eodem disp. 3. sectione 2. Et hæc Distinctio, ut ibidem ostendi, non est tantum fundamentalis, sed est formalis, quia in eadem indivisibili entitate invenit Doctor formalitates diversas per ordinem ad intellectum creatum. Sunt autem præfatæ formalitates (putà Essentia, & Relatio) positivæ à parte rei in lineâ obiectibili, relativâ, sive respectivâ ad nostrum intellectum, etiam pro priori ad negationem formalem identitatis intentionalis unius formalitatis cum alia; ex quo sequitur, quòd etiam pro priori ad negationem talis identitatis detur inter ipsas formalitates Distinctio formalis positiva, non (nota hoc) prout terminus, *formalis*, contraponitur termino, *fundamentaliter*,
ex

ex parte Distinctionis, benè quidem prout contraponitur termino, *fundamentaliter*, ex parte extremorum.

155 Pro maiori intelligentia est rursus advertendum, quòd, quantum est ex parte extremorum, Distinctio alia est positiva, alia negativa, & mista alia. Positiva est illa, quæ datur inter duas res positivas. Negativa illa, quæ inter negationem, & negationem consideratur. Mista tandem illa est, quæ habet locum inter unum positivum, & aliud negativum. Hinc est, quòd si Distinctio inter Essentiam, & Relationem v. g. sumatur ex parte extremorum, positiva dicatur, & formalis, Essentia quippe, & Relatio formalitates sunt positivæ. Verùm hæc eadem Distinctio, quæ ratione extremorum est formalis, nihilominus fundamentalis est respectivè ad negationem identitatis intentionalis, in qua stat constitutivum formale ejusdem Distinctionis intentionalis ex parte sui acceptæ; quia omnis Distinctio, quantum attinet ad conceptum Distinctionis formaliter sumptæ ex parte sui, importat negationem identitatis. Et hoc verum habet, vel extrema sint formalitates positivæ, vel sint carentiæ, sive negationes, vel unum eorum sit positivum, alterum negativum. Id, quod rectè observavit Suarius Magnus disp. 7. Metaph. sectione 1. n. 2. Quapropter despiciendæ etiam sunt Recentiores illi, qui, hac doctrinâ prætermisâ, asserunt, genuinam mentem, sententiam ve Baconii in eo stare, quòd si res, quæ distinguitur fuerit positiva, illius quoque Distinctio consistat formaliter in positivo, si negativa, formaliter in negativo consistat. Hoc enim pacto confundunt materiale Distinctionis cum formali. Unde mirum est, quòd Mag. Blasco, cæteroquin doctissimus, tom. 1. l. 4. dist.

Suarius.

Blasco.

13. q. 5. art. 1. num. 19. fundamen illis præbeat sic
finistrè interpretandi Baconium Vide sup. n. 101.

156. Ex supra animadversis non erit ope-
rosus authoritatibus Resoluti satisfacere. Quam-
vis enim ipse velit, quòd Distinctio, quæ præsup-
ponitur ad negationem identitatis sit formalis,
& non fundamentalis, sensus est, quòd extrema
sint veræ formalitates, & non tantum virtualita-
tes, sive fundamenta ad illas, ut Adversarii con-
tendebant, prorsus negantes formalitates ex natu-
ra rei, præsertim in Divinis. Ast non vult, quòd
in ipsis formalitatibus positivis consistat Distinctio
pro formali; siquidem Distinctio formaliter sum-
pta importat privationem, sive negationem iden-
titatis, ex eodem Doctore, ubi supra allegato. Quod
autem hic sit verus, & legitimus Baconii sensus,
multis patet. Primò, quia loco proximè citato pro-
cedit contra Aureolum negantem formalitates an-
te opus intellectus, concorditer ad illa, quæ do-
cuerat in 1. dist. 2. q. 2. art. 3. §. 1. in principio:
Bacon. *Teneo, quod attributa distinguuntur ex natura rei
per rationes formales, quod est contra Aureolum.*
Secundò, quia eadem dist. 33. art. 5. ubi præfatam
difficultatem objicit sibi, remittit se ad dist. 34. art.
2. ubi probat Distinctionem ex natura rei per ra-
tiones formales Essentiæ, & Relationis, juxta Au-
gustinum, declarans Distinctionem positivam for-
malem, de qua disputat ibi, esse Distinctionem for-
malitatum, quas admittit saltem in esse obicibili
ad intellectum. Ibi in fine: *Contra istam viam* (id est
difficultatem propositam) *quære dist. 34. art. 2.*
ubi duæ conclusiones probantur, quarum una est,
quod differunt positivè saltem in esse conceptibili.

157. Tertiò Quia eodem articulo §. 2. vers.
Primò, docet, quòd Paternitas, & Filiatio diffe-
runt

runt non solum quia negationes , sed propriis positivis , ut quia hæc est positivè paternitas , & hæc positivè filiatio ; quia , pro priori ad negationem , Paternitas , & Filiatio sunt formalitates positivæ fundantes negationem identitatis intentionalis , quod est verum ; alioqui enim negatio non haberet proximum fundamentum. Quartò , quia in antecedentibus , præsertim dist. 33. superius citata , expressè tenet , conceptum Diversi , sive Distincti , importare formaliter privationem , non positivum. Id , quod ostendit non tam per authoritatem Philosophi , sed etiam per regulam illam generalem : *Universaliter est verum* , de qua sup. num. 133. Et speciatiim q. unica dist. citatæ , art. 2. §. 1. cujus formalia verba dedimus n. 136. Igitur loquitur Resolutus , ubi supra allegatus , de Distinctione ex parte extremorum acceptâ , sive de Distinctione materialiter sumpta pro formalitatibus illis , quæ sunt extrema positiva ; non autem de formali constitutivo Distinctionis , de quo est nostra quæstio. Nec est cur in hoc amplius immoremur , cum ista sit expedita , veraque solutio præsentis difficultatis.

158 Dices : Privatio , & negatio non in idem collimant ; privatio quippe reperiri potest in subiecto capaci , tametsi impedito ; secus negatio : ergo licèt Baconius doceat , Distinctionem consistere formaliter in privatione identitatis , perperam colligitur negatio ex ejus mente. Respondeo , quòd privatio strictè sumpta tantum in subiecto capaci reperitur. Cæterum in privatione latè acceptâ etiam negatio includitur , & econtra , de quo vide tractatum 4. Logicæ disp. 3. sectione 1. q. 1. n. 784. Accedit , quòd præcipuus noster scopus , ut jam supra animadverti , est ostendere , Doctorem non in ipsa positiva rei entitate constitutivum formale Distin-

Distinctionis collocasse; bene verò in carentia identitatis, privatione, sive negatione, id, quod evidentissimè ex locis ejusdem sup. allegatis apparet.

159 Multa alia ejusdem Doctoris loca facile conciliari possunt, notando, quòd ipse minimè negat fundamentum positivum Distinctioni formaliter sumptæ, imò expressè asserit, tale fundamentum importare positivum v. g. dist. 34. l. primi art. 1. §. 1. vers. *Item cum dicitur*, ibi: *Oporteret istam negationem adæquationis fundari super aliquod positivum.* Et in 3. dist. 1. q. unicâ, art. 2 §. 1. vers. *Contra*, ibi: *Omnis negatio præsupponit confirmationem causam sui.* Siquidem, inquit, oportet, quòd homo sit homo, ut fundet negationem identitatis cum lapide. Sunt & aliæ difficultates, quæ præscindendo à doctrina ejusdem Resoluti, & solâ ratione stante, videntur convincere, Distinctionem consistere formaliter in positiva rei entitate.

160 Prima sic proponitur: Differentia, v. g. rationale, secundùm positivam suam entitatem, est differentia formaliter talis: ergo facit differre formaliter per eandem sui entitatem positivam. Antecedens ex se claret. Probas consequentiam. Semel quòd albedo sit formaliter albedo, facit rem formaliter albam: ergo similiter. Respondeo, concessio antecedenti, negando consequentiam. Ad probationem, concessio etiam antecedenti, nego consequentiam. Discrimen est: quia omnis albedo est formaliter constitutiva albi. Ast non omnis differentia est formaliter distinctiva; benè vero altera formaliter distinctiva, altera formaliter constitutiva. Sicut alius est conceptus rei formaliter constitutæ, alius rei formaliter distinctæ. Nam si per impossibile omnia essent idem, haberent constitutum

vum formaliter tale, non autem distinctivum formale. Unde differentia ex conceptu suo præscindit ab eo, quod sit formaliter constitutiva, vel formaliter distinctiva. Id, quod, adversus P. Comptonum, sagaciter monet Mag. Bona spes Logicæ disp. Bona spes 2 dubio 1. n. 106. Audiendus ibi: *R. P. Comptonus disp. 19. Logicæ, sectione 3. non rectè docet conceptum differentia esse, facere rem diversam ab alia formaliter; quandoquidem id soli differentia, ut differentia distinctivæ convenit, & non differentia, ut differentia constitutivæ, quæ rectè confunditur cum constitutivo rei, sicut illa cum distinctivo.*

161 Secunda difficultas proponitur sic: Distinctio identificatur cum positiva entitate rei distinctæ: ergo non consistit formaliter in negatione. Antecedens liquet ex eo, quod Distinctio sit passio Entis, & omnis passio, sive proprietas, identificetur realiter cum re, cujus est passio. Probatur consequentia. Si consisteret formaliter in negatione, negatio identificaretur cum entitate positiva, non solum creatâ, sed etiam Divinâ; sed nulla negatio, utpote involvens imperfectionem, potest identificari cum Deo, imò cum nullo ente positivo: ergo Distinctio non consistit formaliter in negatione. Respondeo negando antecedens, & consequentiam. Ad probationem consequentiæ nego maiorem, &, concessâ minorem, nego iterum consequentiam. Quia quando dicimus, unum distingui ab alio per negationem identitatis cū illo, non intendimus, quod ipsa negatio identificetur cum positiva entitate unius, sed tantum quod fundetur in entitate positiva ejusdem, ut ex hac entitate, tanquam ex subiecto, & ex negatione ipsa, tanquam ex forma, resultet concretum, *distinctum*. Unde sicut ex subiecto, & albedine resultat album formaliter tale, quin albedo identificetur cum sub-

Tom. Ult. M jecto,

jecto, ita ex subjecto, & negatione resultat *formaliter distinctum*, quin negatio identificetur cum subjecto, sive cum entitate positiva. Ex quo solum sequitur, quod negatio sit de constitutivo rei formaliter distinctæ, non de constitutivo rei formaliter constitutæ. Sicut albedo non est de constitutivo subjecti formaliter constituti, sed tantum de constitutivo subjecti formaliter albi. Videndus ad rem Arriaga Metaph. disp. 1. sectione 3. subsect. 3. n. 43. vers. *Igitur*.

Arriaga.

162

Nec obstat, quod etiam Deus in ratione distincti includat in suo conceptu negationem, sicut non obstat, quod illam includat in ratione solius, cum in omni sententia certum sit, quod unitas solitudinis consistat in negativo, sive in carentia alterius Dei. Eapropter docet Mairon 1. dist. 24. q. 2. non esse inconveniens dicere, quod aliquæ privationes, quæ privant imperfectionibus, sint meliores in quolibet subjecto, quam non ipsæ, quatenus melius est imperfectionibus carere, quam illas habere. Sic *non dependentia est negatio dicens perfectionem*. Doctor in 3. dist. 1. q. unica art. 2. § 1. in fine.

Mairon.

Baccon.

Ad illud, quod Distinctio sit proprietas Entis, ex quo arguebatur identitas saltem realis, dico, Distinctionem solum esse Entis proprietatem, seu passionem, quatenus nullum reperitur Ens, quod non fundet Distinctionem formalem ab alio, seu Distinctionem pro formali sumptam, quæ fundamentaliter accepta certò identificatur cum re positiva.

S E C T I O II.

De Veritate transcendentali.

Q U Æ S T I O U N I C A.

In quo consistat Veritas transcendentalis?

163 **R**ESOLUTIO: Veritas transcendentalis, quæ est secunda Entis proprietas, consistit formaliter in positivo, nempe in conformitate rei existentis ad sua principia constituentia, sive ad suam essentiam. Ita expressè Doctor in 1. dist. 19. q. 1. quem sequuntur Mag. Zagaglia tom. 2. tract. 2. disp. 2. sect. 2. n. 34. Mag. Garcia Metaph. dist. 1. q. 6. art. 4. §. 2. n. 294. M. de Castilla tom. 1. Theolog. tract. 2. q. 12. num. 377. & cæteri ejusdem Doctoris discipuli. Hæc est in re sententia, quam tenent Meruiss. Acerb. & Niph. quos citat, sed non sequitur Mastrius disp. 5. Metaph. q. 6. art. 3. num. 159. Antequam resolutionem probem,

Bacon.
Zagaglia.
Garcia.
De Castil.
Meruiss.
Acerb.
Niph.
Mastrius.

164 Prænoto primò, Veritatem transcendentalem esse illam, quæ vagatur per omnia genera, & transcendit non modò rem quamcumque, sed ultimam illius differentiam; cùm enim talis Veritas sequatur Ens immediatè, necessariò debet transcendere omne id, quod Ens transcendit, videlicet omne habens conceptum oppositum chimære, quod, hac de causa, non iminus est Ens, quàm Verum, ita quòd eo modo sit Verum, quo est Ens. Unde si est Ens in essendo, debet importare Veritatem in essendo; si Ens futurum, Veritatem futuram; si ve-

rò Ens possibile, & Veritatem possibilem debet importare. Semper enim Entitas illa secundùm illud esse, quod habet pro tali differentia temporis, debet adæquari cum sua essentia, in quo stat Veritas transcendentalis, ut infra dicemus.

165 Prænoto secundò, Veritatem transcendentalem esse Veritatem entitativam, sive in essendo, præscindendo à conformitate cum intellectu, etsi dicat ordinem, & respectum ad illum in linea intentionali. Et hæc Veritas ex Resoluto, ubi supra art. 3. in principio, sic definiri potest: *Adæquatio, aut rectitudo, quam res habet quando scilicet ita est in essendo, sicut essentia debet esse*, ex quibus, vel
 Baccon.]
 Zagaglia.] similibus verbis, indubitanter tenet Mag. Zagaglia, ubi supra n. suo 21. sensum Bacconii hunc esse: *Quod tunc res* (do formalia verba) *in actu dicatur importare Veritatem entitativam, seu in essendo, quando in statu existentie ita est secundùm sua prædicata essentialia, sicuti se habet sua essentia in statu potentie, vel objective, vel subjective, ita quòd eadem prædicata essentialia, quæ præcedunt in statu potentie, sint illa eadem, quæ concurrant, ad integrandam essentiam existentem, sicque nihil amplius, vel minus essentialiter dicat res existens, quàm importaret eadem entitas dum erat sub statu potentie; & ideo benè dicit Doctor, quòd hæc Veritas est adæquatio, & rectitudo; quia res sub gradu essendi actu commensuratur suæ essentiae, sive potius sibi ipsi, dum præcedebat sub statu essendi potentia.*

166 Prænoto tertio, Ens commune Deo, & creaturæ, abstractè sumptum, dicere essentiam simpliciter, hanc verò essentiam dicere non repugnantiam ad esse generalissimè, ita quòd sit indifferens, ut contrahatur ad diversas non repugnantias ad esse, (ut ita dicam) nempe ad non repugnantiam ad esse,

esse, quæ dicat potentiam objectivam, ad non repugnantiam ad esse, quæ dicat etiam potentiam subjectivam, & ad non repugnantiam ad esse, quæ dicat possibilitatem semper conjunctam cum esse, sive existere. Hinc

167 Prænoto quartò, quòd, licèt nullatenus dici possit, essentiam Dei pro aliquo priori, etiam rationis cum fundamento in re, præscindere ab existentia, optimè dici potest, essentiam Dei in actu importare possibilitatem ad esse, quatenus excludit impossibilitatem; quod enim cum summa necessitate est in actu, includit possibilitatem ad esse, ac per consequens est conforme ad suam essentiam, ex quo est ita in actu, sicut habet esse ejus essentia, in quo, ut diximus, consistit Veritas transcendentalis, sive entitativa, de qua agimus. His prænotatis,

168 Probo resolutionem, & primò sic: Veritas transcendentalis rei est esse rei; sed esse rei consistit formaliter in positivo: ergo & Veritas transcendentalis. Consequentia sequitur. Minor liquet. Probo maiorem. Verum aurum consistit in esse ipsius auri: ergo Veritas transcendentalis rei est esse rei. Probo antecedens. Antequam intelligatur negatio, sive carentia auri falsi, jam aurum Verum habet per suam entitatem, quòd sit Verum, ut ex se patet: ergo Verum aurum consistit in esse ipsius auri. Sic de Vera domo, & cæteris discurrendum Unde Doctor ubi supra art. 2. *Illa* (inquit) *est vera domus, quia est, sicut esse debet.* Et D. Augustin. 1. 2. Soliloquiorum cap. 5. in fine, Verum sic definit: *Id, quod est.*

Bacon.

D. August

169 Secundò sic: Quando aurifaber v. g. judicat splendorem auri, quem inspicit in lapide lydio, non esse splendorem auri falsi, idcirco id judicat,

dicunt, quia color inspectus in tali lapide cognoscitur ab illo tanquam color proprius correspondens naturæ Veri auri, per experientiam, quam habet, de Veri auri naturâ: ergo Veritas transcendentalis antecedenter ad negationem falsitatis consistit formaliter in positivo.

170 Tertiò sic: Veritas transcendentalis consistit in conformitate rei existentis ad sua principia constituentia, sive ad suam essentiam; sed hæc conformitas est aliquid positivum formaliter, præcindendo ab eo, quòd sit positivum absolutum, vel respectivum: ergo Veritas transcendentalis consistit formaliter in positivo. Probo maiorem, in qua tantum est difficultas. Si hæc res existens, quæ v. g. censetur aurum, non coalesceret ex principiis constituentibus essentiam auri, talis res non esset Verum aurum: ergo, e conversò, si hæc res existens, quæ censetur aurum, re ipsa coalescat ex principiis constituentibus essentiam auri, talis res erit aurum Verum: ergo Veritas transcendentalis consistit in conformitate rei existentis ad sua principia constituentia, sive ad suam essentiam.

Proponuntur objectiones, & dissolvuntur.

171 **N**ostræ resolutioni opponuntur quidam Aureolus. cum Aureolo in 1. dist. 13. q. 3. asserentes, Veritatem transcendentalem dicere quidnegativum formaliter, ita quòd Ens Verum formaliter sit illud, quod non est fictum, nec apparens. Opponuntur etiam Hærvæus, Durandus, & Henricus, (hos citat, & sequitur Vasques tom. 1. disp. 77. cap. 4. in principio) quatenus sistent, Veritatem transcendentalem non dari ex parte rerum, nisi tantum per extrinsecam denominationem à Veritate intellectus.

lectus. Opponuntur etiam tam antiqui, quàm recentiores Thomistæ, quos citant, & sequuntur nostri Complutenses, Metaph. disp. 22. q. 1. §. 1. n. 1. quatenus docent, Veritatem transcendentalem consistere formaliter in quâdam proprietate absoluta, per quam Ens concipitur formaliter conforme intellectui Divino, seu idææ, & exemplari in intellectu Divino esistenti. Addunt tamen ipsi Complutenses n. 3. quòd hæc doctrina intelligitur de Veritate transcendentali creata. Nam si sermo sit de Veritate abstracta à creata, & increata, ratio, & natura ipsius erit constituenda formaliter in Ente, quatenus est aptum facere Veram sui affirmationem in intellectu Divino, & cum eo habere convenientiam, seu conformitatem, abstrahendo ab hoc, quòd talis conformitas induat respectum realem, vel rationis, ita quòd in Ente creato dicat respectum realem, rationis verò in Ente increato. Opponuntur etiam ferè omnes Scotistæ sequentes Doctorem Subtilem, & passim DD. Societatis, signanter Suarius, Arriaga, Hurtad, & alii, quos citat Mastrius Meta, h. disp. 5. q. 6. ar. 3. n. 153. in fine, & sequitur n. 161. Hi enim defendunt Veritatem transcendentalem consistere in conformitate saltem aptitudinali, quam Ens quodlibet natum est habere ad intellectum, ita ut rem esse formaliter Veram nihil aliud sit, quàm esse intelligibilem à quocunque intellectu, & cundùm esse, quod in re habet, ut ex D. Thoma notavit Mairon apud eundem Mastrium Pro his omnibus; & imprimis pro AA. primæ sententiæ

Complut.

Scotus.
Suarius.
Arriaga.
Hurtad.
Mastrius.

D. Thom.
Mairon.

172 Objicies primò Veritas transcendentalis recurrit cum puritate, & sinceritate rei; sed puritas, & sinceritas consistunt formaliter in negativo: ergo & Veritas transcendentalis. Maior liquet. Probo minorem. Puritas, & sinceritas rei consistunt forma-

formaliter in negatione admixtionis rei extraneæ: ergo consistunt formaliter in negativo. Probo antecedens. Aurum Verum idcirco purum, & sincerum dicitur, quia est ab omni metallo defæcatum: ergo puritas, & sinceritas rei consistit formaliter in negatione admixtionis rei extraneæ. Respondeo ad objectionem, concessâ maiore, negando minorem. Ad probationem nego antecedens. Ad probationem antecedentis distinguo antecedens: aurum Verum idcirco purum, & sincerum dicitur, quia est ab omni metallo defæcatum, si sermo sit secundum modum communem loquendi, & explicandi, concedo antecedens: si sermo sit secundum modum loquendi philosophicum, nego antecedens. Igitur quidquid sit de modo communi explicandi Verum aurum; cum certum sit, quod Philosophi investigant rerum essentias, & ita debent assignare pro constitutivo Veri auri id, quod antecedit pro aliquo priori ad ipsam negationem, nempe conformitatem cum natura Veri auri, quæ importat aliquid positivum formaliter, & ipsam negationem extranei tantum consequitivè.

173 Accedit, quod aurum optimè stare pos-
 Mastrius. test cum tali admixtione. Nam (ut benè Mastrius
 n. 144. impugnando Aureoli sententiam) vel per talem admixtionem intelligitur admixtio per confusionem, vel per juxta positionem? Si intelligitur admixtio per confusionem, cum hac bene stat Veritas auri; quia quantumcumque aliquid extraneum cum auro commisceatur, nunquam tamen natura auri transit in naturam alterius, sed semper ibi reperitur aliquod Verum aurum. Si verò intelligitur admixtio per juxta positionem, multò minus tollit esse Veri auri; cum enim ibi perseveret aurum, ita & ejus Veritas perseverat: ergo Veritas auri non potest

test formaliter consistere in negatione admixtionis, eò quòd compatiatur cum ipsa admixtione. Igitur in sola conformitate cum ipsa essentia auri consistit.

174 Objicies secundò pro Authoribus secundæ sententiæ. Veritas transcendentalis solùm importat denominationem extrinsecam derivatam à veritate cognitionis in ipsas res : ergo non consistit formaliter in conformitate rerum existentium ad sua principia constituentia , sive ad suas essentias. Probas antecedens. Non reperitur in rebus Veritas formaliter in essendo : ergo Veritas transcendentalis solùm importat denominationem extrinsecam à veritate cognitionis derivatam in ipsas res. Probas antecedens. Non reperitur in rebus falsitas formaliter in essendo : ergo neque Veritas. Antecedens liquet ex eo , quòd falsitas consistit tantùm in iudicio falso , quo objectum judicatur difformiter ad se ipsum.

175 Respondeo ad objectionem negando antecedens. Ad probationem nego antecedens. Ad cujus probationem , concessio antecedente , nego consequentiam. Disparitas est : quia , ut daretur falsitas formaliter in essendo in rebus , opus erat , quòd res in statu existentia non ita essent secundùm sua prædicata essentialia, sicut se haberent suæ essentia in statu potentia , vel objectiva , vel subjectiva (per oppositionem ad superius dicta , de Veritate in essendo , num. 165) quod est impossibile ; alioqui enim quando res existerent , aliter existerent , atque possent existerent. At , ut detur Veritas formaliter in essendo in rebus , nihil ultra requiritur , quàm quòd res in statu existentia ita sint secundùm sua prædicata essentialia, sicut se habebant suæ essentia in statu potentia , vel subjectiva , vel objectiva , loquendo de Veritate in rebus creatis ; & cùm res in statu

existentiæ ita sint, & habeant adæquationem, seu conformitatem cum suis essentiis, juxta ibi dicta, & explicata, idcirco in illis reperitur Veritas formaliter in essendo.

Aristotel.

176

Instabis. Juxta Aristotelem Metaph. l. 6 cap. 2. in fine, nec Verum, nec falsum reperitur in rebus, sed tantum in intellectu, ibi: *Non enim est falsum, & verum in rebus, sed in mente*: ergo non stat solutio cum doctrina Philosophi. Respondeo ad instantiam distinguendo antecedens, & explicando Aristotelem: nec Verum, nec falsum reperitur in rebus, sed tantum in intellectu, loquendo de Veritate transcendentali manifestativa, concedo antecedens: loquendo de Veritate transcendentali in se, nego antecedens, & consequentiam. Ad intelligentiam hujus textus est notandum, Veritatem transcendentalem sumi posse vel in essendo, & in se, vel in manifestando, & apud intellectum. Prima dicit adæquationem, sive rectitudinem rei in essendo, sicut essentia debet esse, & ipsam non negat Philosophus in rebus, imò, Metaph. l. 2. cap. 1. in fine, eam tribuit omnibus rebus, sicut tribuit esse, ibi: *Quare ut secundum esse unumquodque se habet, ita etiam secundum veritatem*. Secunda verò dicit adæquationem, sive rectitudinem, quæ est manifestatio sui apud intellectum, & de ista loquitur Aristoteles, ubi supra primò citatus.

Aristotel.

177

Quòd autem Veritas transcendentalis non sit extrinseca tantum denominatio, manifestè patet ex eo, quòd aliundè non esset propriè Entis proprietas; passio enim, sive proprietas propriè talis, debet ab intrinseco convenire rei, cujus est proprietas. Eapropter idem Vasques, supra citatus cap. 5. in principio, supponit tanquam certum, quòd, in sua præsentim opinione, non possit Veritas esse pro-

Vasques.

propriè passio Entis , quod benè notavit Mastr. num. 129. addens, quòd, si Veritas in rebus esset tantùm denominatio extrinseca, non modò Entibus realibus, sed & entibus rationis, conveniret, quod quis non videat falsum. Mastrius.

178 Objicies tertio pro AA. tertiæ sententiæ. Primaria ratio Veritatis transcendentalis debet peti per comparisonem ad primam regulam, & mensuram omnino infallibilem; sed intellectus Divinus est prima regula, & mensura omnino infallibilis: ergo Veritas transcendentalis consistit formaliter in conformitate cum cognitione intellectûs Divini. Respondeo ad objectionem, concessâ maiore, distinguendo minorem: intellectus Divinus est prima regula, & mensura omnino infallibilis, respectu Veritatis manifestativæ sui, concedo minorem: respectu Veritatis sumptæ in se, sive in essendo, nego minorem, & consequentiam. Verum est, quòd intellectus Divinus sit prima regula, & mensura omnino infallibilis Veritatis manifestativæ sui; cùm enim creaturæ habeant ab æterno esse resultativum in Deo, ex quo Essentia Divina illas continet eminenter, important intelligibilitatem primariò ad intellectum Divinum, quam ad intellectum creatum, tanquam ad primum intellectivum, in quo nulla potest reperiri falsitas. Ast in præsentì non loquimur de Veritate transcendentali manifestativa sui, sed de Veritate transcendentali sumpta in se, sive in essendo, quæ reperitur in rebus, absque ordine ad intellectum Divinum, sive antecederet ad talem ordinem, & hæc proximè stat in adæquatione, & conformitate cum propria rei essentia, ut supra dicebam.

179 Objicies quartò pro AA. quartæ sententiæ. Veritas transcendentalis consistit formaliter

in conformitate, quam Ens quodlibet natum est habere ad intellectum: ergo non in alia quacumque conformitate. Probas antecedens. Veritas formalis consistit in conformitate objecti interni cum externo: ergo Veritas transcendentalis consistit formaliter in conformitate, quam Ens quodlibet natum est habere ad intellectum. Antecedens est certum. Probas consequentiam. Non datur maior ratio, cur veritas formalis consistat in illa conformitate, & non in ista Veritas transcendentalis, præsertim, cum Veritas ut sic univocè dicatur de utrâque: ergo. Respondeo ad objectionem negando antecedens. Ad probationem, concesso antecedente, nego consequentiam. Ad probationem nego antecedens. Maior ratio est: quia veritas formalis est veritas illa, secundum quam propositio dicitur vera; propositio autem non dicitur vera, nisi objectum internum ipsius actus (v. g. *Petrus est animal*) conformetur cum externo. At Veritas transcendentalis est Veritas entitativa, hæc autem, cum sumatur in se, sive in essendo, nullum dicit respectum ad intellectum, quapropter non potest formaliter consistere in conformitate rei ad cognitionem. Unde solum currit paritas cognitionis formalis ad transcendentalem, si hæc sumatur quatenus est manifestativa sui, tunc enim dicit conformitatem rei ad cognitionem; cæterum de eâ ita sumptâ non est in præsentī sermo. Ad illud, quod Veritas ut sic dicatur univocè de veritate formali, & Veritate transcendentali, dico, non esse verum, maximè si Veritas transcendentalis sumatur in se, sive in essendo.

Mastrius.

180 Instabis ex Mastrio, ubi supra citato. Intellectus dicitur verus formaliter in repræsentando, quando rem intelligit, sicut est a parte rei: ergo, econversò, res quoque Vera dicetur in essendo formaliter,

maliter, eò præcisè, quia intelligitur sicut est, vel saltem sic apta nata est intelligi. Respondeo ad instantiam, concesso antecedente, negando consequentiam. Disparitas est: quia intellectus nihil habet, ex quo dicatur verus formaliter in repræsentando, antecederet ad rem intellectam, ut per se patet. At res antequam intelligatur sicut est, vel apta nata sit intelligi, habet conformitatem ad sua principia constituentia, idcirco ab ista conformitate dicitur Vera in se, tanquam ex primaria ratione. Hæc pro AA. relatis sufficiunt argumenta. Cætera solvuntur ex dictis, maximè si præ oculis semper habeatur differentia veritatis manifestativæ sui à Veritate in essendo.

181 Objicies quintò, & directè contra resolutionem. Si Veritas transcendentalis consisteret in conformitate rei existentis ad sua principia constituentia, sive ad suam essentiam, sequeretur, quòd Veritas transcendentalis eslet tantùm ab intellectu fabricata; hoc non dices: ergo neque id, ex quo sequitur. Probas sequelam maioris Relatio ejusdem ad se ipsum est merus respectus fabricatus ab intellectu; sed si Veritas transcendentalis consisteret formaliter in conformitate rei existentis ad sua principia constituentia, sive ad suam essentiam, consisteret formaliter in relatione ejusdem ad se ipsum: ergo sequeretur, quòd Veritas transcendentalis eslet tantùm ab intellectu fabricata. Maior est certa. Probas minorem. Principia constituentia, sive essentia, & res ipsa existens idem sunt: ergo si Veritas transcendentalis consisteret formaliter in conformitate rei existentis ad sua principia constituentia, sive ad suam essentiam, consisteret formaliter in relatione ejusdem ad se ipsum.

182 Respondeo ad objectionem negando
seque-

sequelam maioris. Ad probationem, concessâ maiore, nego minorem. Ad probationem distinguo antecedens: principia constituentia, sive essentia, & res ipsa existens idem sunt, in essentia, cōcedo antecedens: in essendo, nego antecedens, & consequentiam. Ad intelligentiam solutionis recolenda sunt ea, quæ adduxi ex Baconio circa distinctionem gradualem inter essentiam, & existentiam, tum in Compendio pro Diverso, & Eodem disp. 2. sect. 2. q. 1. tum tom. 2. tract. 1. disp. 1. sectione 1. q. 8. ubi dixi, rem in essendo differre realiter gradualiter à se ipsa in essentia.

183 Igitur, cū in præsentī agamus de Veritate rei in essendo, & hæc distinguatur realiter gradualiter à se ipsa in essentia, non sequitur, quod Veritas transcendentalis rei consistat formaliter in relatione, sive respectu ab intellectu tantū fabricato, tametsi constituatur formaliter per conformitatem ad sua principia constituentia, sive ad suam essentiam; quia inter Veritatem transcendentalem rei in essendo, & prædicata constituentia ipsam, sive essentiam, intercedit distinctio ex natura rei realis, licet gradualis. Eapropter advertit Mag. Zagaglia supra citatus, quod quando Resolutus docet, Veritatem transcendentalem in essendo consistere in adæquatione, sive rectitudine, quam res habet, quando ita est in essendo, sicut essentia debet esse, sic intelligendus est, videlicet, quod res ita ponatur in actu existentiae, sicut erat essentia præcedens in statu essendi potentiâ.

184 Objicies sextò, & ultimò. Veritas transcendentalis competit non modò Enti creato, sed etiam Divino; atqui Veritas, quæ competit Enti Divino, non potest consistere formaliter in conformitate ad sua principia constituentia, si-
ve

ve ad suam essentiam : ergo contra resolutionem. Maior liquet. Probas minorem. Deus, estò sit Verus, non habet principia in essendo, neque illius essentia pro aliquo priori ita præcedit existentiam, quòd præscindat ab illa : ergo Veritas, quæ competit Enti Divino non potest consistere formaliter in conformitate ad sua principia constituentia, sive ad suam essentiam. Respondeo ad objectionem, concessâ maiore, negando minorem. Ad probationem, concesso antecedente, nego consequentiam. Quia etsi Deus non habeat principia in essendo, neque essentiam cum prioritate ad existentiam, nihilominus habet principia in prædicando, nempe prædicata quidditativa integrantia ejus quidditatem, & licet semper sit in actu existens, hoc non obstat, ad hoc ut conformetur cum essentia sua, quatenus hæc excludit impossibilitatem, juxta superius prænotata num. 167. Unde semper importat Veritatem transcendentalem, quæ ex solutione sequentis instantiæ melius explicabitur.

185 Instabis. Stante hac doctrinâ, non explicatur secunda Entis proprietas, nempe Veritas ipsa, sed tantum quidditas rei, & natura : ergo. Probas antecedens. Hæc doctrina stat in eo, quòd res dicatur Vera, quia habet conformitatem ad suam essentiam, & sic dicitur Deus Verus, homo Verus &c. ergo stante hac doctrinâ, non explicatur secunda Entis proprietas, sed tantum ipsa rei quidditas, & natura. Respondeo ad instantiam negando antecedens. Ad probationem, concesso antecedente, nego consequentiam. Quia estò res dicatur Vera, quia habet conformitatem ad suam essentiam; cum tamen inter essentiam, & existentiam creatam detur distinctio realis gradualis, ut supra dicebam; per conformitatem rei ad suam essentiam, non explicatur

plicatur quidditas, sive natura rei, bene verò veritas illius, per hoc, quòd sub gradu existentiae se habeat sicut sua essentia debet esse; non enim aliter homo est Verus homo, nec cætera Entia creata Vera Entia.

186 In Deo autem aliter est discurrendum; quia in eo non potest præscindi essentia ab existentia, sed nihilominus adhuc salvatur illius Veritas per conformitatem ad suam essentiam; quia cum conceptus Dei importet esse Primum Ens independens, & esse Purissimum actum à se habentem suam essentiam cum summa necessitate essendi, exclu-
dendo semper impossibilitatem, & nunquam actualitatem; & hoc idem importet Deus in actu, bene sequitur quòd in Deo semper salvetur illius Veritas per conformitatē ad suam essentiam; in qua conformitate dicimus Veritatem transcendentalem formaliter consistere. Ex iis

187 Deduces, Veritatem transcendentalem Dei non esse respectum ortum ex natura rei ab entitate Dei exercitè, & in actu ad ejus essentiam signatè, sicut se habet Veritas transcendentalis creaturæ, ex quibus sequitur, quòd conceptus generalis Veritatis transcendentalis solùm est communis analogicè Veritati entitativæ Divinæ, & creatæ, quo non obstante, importat utraque respectum ortum ex natura rei in ordine ad intellectum, in quantum ex natura rei utraque est conceptibilis tamquam importans conformitatem, sive rectitudinem cum sua essentia.

S E C T I O I I I .

De Bonitate transcendentali.

Q U Æ S T I O U N I C A .

In quo consistat Bonitas transcendentalis?

188

RESOLUTIO : Bonitas transcenden-
talis, quæ est tertia Entis proprie-
tas, consistit formaliter in positivo,

videlicet in habitione totius esse, quod spectat ad
essentiam rei. Deducitur ex Doçtore in 1. dist. 22.

q. unica art. 4. § 1. vers. *Item ratio boni*, ubi asse- Baccon;
rit, Bonum, ex Phylosopho, idem esse, ac perfectum;

& ibidem dist. 23. q. unica art. 1. §. 2. vers. *Item*
Primus, ubi inquit, ex eodem, quodd perfectum est
id, quod negat à se ipso carentiam alicujus eorum,

quæ suæ naturæ debentur. Tenet resolutionem Mag. Zagaglia tom. 2. tract. 2. disp. 2. sectione 3. § 2. par- Zagaglia;

te prima n. 11. ubi in fine docet, quodd hæc sit ger-
mana mens Bacconii, quapropter ab omnibus suis
debet susteneri. Sed antequam resolutionem probem

189 Prænoto primò, bonum (omissis aliis
divisionibus) dividi in bonum honestum, bonum
delectabile, & bonum utile: & cùm omne bonum
sit conveniens, bonum honestum comprehendit
non modò bonum morale, quod est rectæ rationi
consentaneum, sed etiam Bonum naturæ, (de hoc
agimus) quod ipsi commodum est, præscindendo à
delectatione. Bonum delectabile est bonum conve-
niens tantùm in ordine ad delectationem. Bonum
utile est bonum conveniens in ordine ad aliud bo-

Tom. Ult.

O

num

num obtinendum , præscindendo ab eo , quòd in se sit consentaneum , commodum , aut delectabile.

190 Prænoto secundò , bonum honestum , delectabile , & utile non semper distingui realiter subjective , benè quidè formaliter intentionaliter. Non primum , quia amor Dei est bonus simul honestus , delectabilis , & utilis. Benè verò secundum , quia idem amor in ratione boni honesti terminat diversam conceptibilitatem ab amore in ratione delectabilis , & utilis. Unde bonum honestum delectabile , & utile sunt distincta membra conceptibilia , sive sint subjective idem , sive non.

191 Prænoto tertio , bonum delectabile , & utile , quæ talia , non esse convertibilia cum Ente , ac per consequens nec ejusdem proprietates. Non primum , quia bonum delectabile solum est per ordinem ad creaturas sensitivas ; tametsi improprie , sive per analogiam , extendatur etiam ad alias , quæ sensatione , & cognitione carent. Non secundum , quia bonum utile est tale per extrinsecam denominationem à bonitate finis ; Bonum autem transcendens est intrinsecum Enti , quod Bonum denominatur. Solum igitur Bonum honestum , non in genere moris , sed per comparisonem ad naturam , est adæquata proprietas , sive passio Entis , quia solum Bonum honestum naturale est ipsi intrinsecum , & cum ipso convertitur.

192 Prænoto quarto , hoc Bonum naturale idem esse , ac perfectum substantialiter , sive essentialiter. Dico , *essentialiter , sive substantialiter* , quia , *perfectum* , vel dicitur tale integraliter , vel accidentaliter , vel essentialiter , sive substantialiter. Perfectum integraliter est , quod ita est perfectum , ut nullâ careat parte integrali. Sic Petrus constans omnibus membris ipsi debitis dicitur perfectus integraliter ;

liter; e conversò Paulus, si aliquo careat. Perfectum accidentaliter est, quod habet perfectiones accidentales sibi debitas. Sic substantia cum accidentibus debitis dicitur perfecta accidentaliter. Perfectum verò essentialiter, sive substantialiter est id, quod in ratione substantiæ, sive essentiæ, habet quidquid spectat ad ipsam substantiam, sive essentiam, ita quòd nihil illi desit ad ipsam rationem substantiæ, sive essentiæ, quam habet. Bonum igitur naturale honestum, quod est proprietas, sive passio Entis, & quæ cum ipso convertitur, idem est, ac perfectum substantialiter, sive essentialiter, quod etiam cum omni Ente convertitur; nulla quippe est entitas, quantumvis minima, quæ non habeat quidquid ad suam essentiam spectat. His suppositis,

193 Probo resolutionem, & primo sic: Bonitas transcendentalis, juxta Resolutum supra citatum, idem est, ac perfectum, ibi: *Secundum Philosophum bonum, & perfectum idem est*; sed perfectum consistit formaliter in positivo, etiam stante doctrinâ Resoluti: ergo juxta hanc doctrinam Bonitas transcendentalis consistit formaliter in positivo. Major liquet Probo minorem. Perfectum (substantialiter acceptum, vel etiam accidentaliter) juxta Resolutum, ubi supra secundo citatum, est id, cujus non est extra aliquid accipere, idest, ut exponit Mag. Zagaglia, ubi sup. quod negat à se ipso carentiam alicujus eorum, quæ suæ essentiæ debentur; sed quod negat carentiam est formaliter positivum, etiam ex Resoluto in 1. dist. 3. q. 2 art. 1. vers. *Contra*, ibi: *quod negat negationem ponit positionem*: ergo perfectum consistit formaliter in positivo, etiam stante doctrinâ Resoluti.

194 Secundo sic: Bonitas transcendentalis consistit in habitione totius esse, quod spectat ad

essentiam rei : sed ista habitio est formaliter aliquid positivum : ergo Bonitas transcendentalis consistit formaliter in positivo. Probo minorem , de quâ tantum dubitari potest. Bonitas transcendentalis est perfectio ; sed neque est perfectio integralis , neque accidentalis : ergo est perfectio essentialis , quæ consistit in habitione totius esse , quod spectat ad essentiam rei. Maior liquet ex eo , quod perfectio sit affectio Entis ; sed hæc non importatur per unitatem , neque per veritatem , ut omnes fatentur : ergo per Bonitatem ; adeoque Bonitas transcendentalis est perfectio. Probo minorem. Nec perfectio integralis , nec accidentalis reperitur semper in omni Ente , ut discurrenti patebit ; sed Bonitas transcendentalis convenit omni Enti : ergo Bonitas transcendentalis neque est perfectio integralis , neque accidentalis ; Igitur &c

195 Tertiò sic : Bonitas transcendentalis non consistit formaliter in negativo : ergo consistit formaliter in positivo. Probo antecedens. Si consisteret formaliter in negativo , præsertim , quia negat carentiam alicujus perfectionis sibi debitæ ; sed negatio carentiæ , sive negatio negationis , potius est affirmatio , quàm formalis negatio : ergo Bonitas transcendentalis non consistit formaliter in negativo. Hæc ratio melius constabit ex solutione primæ objectionis , & corroboratur autoritate Resoluti sup. adducta n. 193. in fine.

Proponuntur objectiones , & dissolvuntur.

196 **N** Ostræ resolutioni opponuntur Fonseca, & Faber , quos citat Maltrius disp. 5 Metaph. q. 10. n. 246. vers. *Quidam*, quatenus per solam negationem imperfectionis constituent

Fonseca.

Faber.

Maltrius.

tuunt Bonitatem transcendentalem. Opponuntur etiam Capreolus, Javellus, Pasollus, Mag. Blasius à Conceptione, & Suarius Granatensis, quos citat Mag. Zagaglia tom. 2. tractatu 2. disp. 2. sectione 3. §. 2. num. 8. quatenus asserunt, Bonitatem transcendentalem consistere in conveniente. Opponuntur etiam Mag. Bona spes tractatu ultimo Metaph. disp. 2. dubio 3. Suarius Lusitanus Metaph. tractatu 1. disp. 1. sectione 5. §. 2. n. 93. & communiter Thomistæ, quatenus defendunt, Bonitatem transcendentalem stare formaliter in amabili, seu appetibili. Quam sententiam tenet ex parte Mastrius, ibi sup. proxime citatus n. 265. ubi citat Scotum, & commune Philosophorum, & Theologorum. Opponitur etiam Pasqualig. Metaph. tom. 2. disp. 73. sectione 5. conclusionem 1. ubi Bonitatem transcendentalem constituit per participationem Bonitatis Divinæ. Pro his omnibus, & imprimis pro AA. primæ sententiæ

Capreol.
Javellus.
Pasollus.
Bratius.
Suarius.
Zagaglia.
Bona spes
Suarius
Lusitan.
Mastrius.
Scotus.

Pasqual.

197 Objicies primò. Bonitas transcendentalis consistit formaliter in negativo: ergo non consistit formaliter in positivo. Probas antecedens. Bonum commune omni Enti idem est, ac perfectum, præsertim essentiale; sed perfectum consistit formaliter in negativo: ergo & Bonitas transcendentalis. Maior constat ex supra dictis. Probas minorem ex Aristotele lib. 5. Metaph. cap. 16 ubi perfectum sic definit: *Quod non est ullam accipere particulam*, id est, *cui nihil deest*: ergo perfectum consistit formaliter in negativo. Respondeo ad objectionem negando antecedens. Ad probationem, concessâ maiore, nego minorem. Ad probationem per textum Aristotelis dico, ex tali textu potius colligi perfectum consistere formaliter in positivo; nam sensus definitionis est: quòd perfectum sit id, extra quod non est ullam accipere particulam. Unde negat à

Aristor.

se

se ipso carentiam alicujus eorum , quæ suæ essentia debentur ; cùm autem negatio negationis , sive carentia , sit formaliter positivum , in hoc consistit perfectum , ac per consequens Bonum transcendentale. Solutio patet ex supra dictis n. 193.

198 Objicies secundò pro AA. secundæ sententiæ. Bonitas transcendentalis consistit formaliter in conveniente : ergo non consistit formaliter in habitione totius esse , quod spectat ad essentiam rei. Probas antecedens. Omne Bonum in ipsa ratione Boni est conveniens. Sic Deus est Bonus , quia conveniens creaturis , substantia Bona , quia conveniens accidentibus , accidens Bonum , quia conveniens substantiæ panis Bonus , quia conveniens homini : ergo Bonitas transcendentalis consistit formaliter in conveniente. Respondeo ad objectionem negando antecedens. Ad probationem distinguo antecedens : Omne Bonum in ipsa ratione Boni est conveniens , ita quòd talis convenientia spectet ad secundarium conceptum Bonitatis , concedo antecedens : ita quòd sit de primario Bonitatis conceptu , nego antecedens , & consequentiam. Igitur non negamus , quòd omne Bonum sit conveniens , maxime si sit sermo de Bono alteri. Cæterum primarius conceptus Bonitatis stat in illa ratione , quâ Bonum est tale in se , nempe in habitione totius esse , quod spectat ad essentiam rei , ex quâ resultat illa convenientia , tamquam conceptus secundarius ipsius Bonitatis.

199 Objicies tertio pro AA. tertiæ sententiæ. Bonitas transcendentalis consistit formaliter in appetibili : ergo non consistit formaliter in habitione totius esse. Probas antecedens. Omne Bonum in ratione Boni est appetibile : ergo Bonitas transcendentalis consistit formaliter in appetibili. Probas

bas antecedens. Bonum, vel est honestum, vel delectabile, vel utile; sed honestum est appetibile à rationali, delectabile ab animali, & utile est appetibile ad consequendum finem: ergo omne Bonum in ratione Boni est appetibile. Respondeo ad objectionem negando antecedens. Ad probationem distinguo antecedens: omne Bonum in ratione Boni est appetibile, ita quòd esse appetibile ei conveniat consecutivè, concedo antecedens: ita quòd ei conveniat ex primario conceptu Boni, nego antecedens. Ad probationem, concessâ maiore, & applicatâ distinctione minori, distinguo consequens, modo dicto. Solutio patet ex supradictis, ex quibus constat, quòd primarius conceptus Bonitatis transcendentalis est sola habitio totius esse, quod spectat ad essentiam rei, & præcipuè ex fundamento tertio resolutionis, ex quo sequitur, cætera omnia, quæ in Bono reperiuntur, & considerantur, spectare ad conceptus secundarios, & habere se consecutivè ad primarium conceptum; quia in tantum Bonum est appetibile, conveniens &c. in quantum est perfectum in se essentialiter.

200 Objicies quartò pro Pasqualigo supra Pascalig. laudato. Bonitas transcendentalis consistit formaliter in participatione Divinæ Bonitatis in genere indeterminato: ergo non in habitatione totius esse, quod spectat ad essentiam rei. Respondeo ad objectionem negando antecedens; quia Bonitas transcendentalis præcedit Divinam Bonitatem prioritate logica, non minus ac Pns ut sic Deum, & creaturam. Quare tantum abest, quòd Bonitas transcendentalis sit participatio Divinæ Bonitatis, quinimò, econtra, Bonitas Divina participat Bonitatem transcendentalem, tamquam ejus species. Sic impugnat Mastrius Pasqualigi sententiam diip. 5. Metaph. q. 10. Mastrius. n. 249. 201 Obji-

201 Objicies quintò , & directè contra resolutionem. Bonitas transcendentalis est proprietas, sive passio Entis ; sed habitio totius esse , quod spectat ad essentiam rei , non est proprietas , sive passio Entis : ergo Bonitas transcendentalis non consistit formaliter in illa habitatione. Maior est certa, Probas minorem. Habitio totius esse , quod spectat ad essentiam rei est complementum , seu integritas rei ; sed complementum , seu integritas rei non est proprietas , sive passio Entis : ergo habitio totius esse , quod spectat ad essentiam rei , non est proprietas , sive passio Entis. Maior liquet. Probas minorem. Complementum , seu integritas rei pertinet formaliter ad rem ipsam , cujus est complementum , & integritas : ergo non ad proprietatem , sive ad passionem ejus , ac per consequens non est proprietas , sive passio Entis.


202 Respondeo ad objectionem , concessâ maiore , negando minorem. Ad probationem concessâ etiam maiore , nego minorem. Ad probationem distinguo antecedens : complementum , seu integritas rei pertinet formaliter ad rem ipsam , cujus est complementum , & integritas , tamquam conceptus secundarius , & proprietas ipsius rei , concedo antecedens : tamquam conceptus primarius , & quidditativus , nego antecedens , & consequentiam. Igitur conceptus primarius , & quidditativus rei est conceptus talis , vel talis naturæ , ex quo consequitur habitio omnium , quæ sibi debentur , in qua habitatione stat formaliter ratio Bonitatis transcendentalis , non quod distinguatur realiter physice , nec formaliter in esse absoluto ab Ente , sive ab essentia rei , sed tantùm formaliter intentionaliter per ordinem ad intellectum , secundùm diversam representabilitatem , secundùm quam diversimode concipitur,

capitur, uti supra de cæteris proprietatibus diximus.

203 Objicies sextò, & ultimò. Si Bonitas transcendentalis confisteret formaliter in habitione totius esse, quod spectat ad essentiam rei, non discriminaretur à veritate transcendentali; sed discriminatur, tanquam diversa Entis proprietas: ergo Bonitas transcendentalis non consistit formaliter in habitione totius esse, quod spectat ad essentiam rei. Probas assumptum. Veritas transcendentalis consistit formaliter in adæquatione, seu in conformitate rei existentis ad sua principia constituentia, sive ad suam essentiam; sed conceptus habitionis totius esse, quod spectat ad essentiam rei, in quo stat ratio formalis Bonitatis transcendentalis, non discriminatur à conceptu adæquationis, seu conformitatis rei existentis ad sua principia constituentia, sive ad suam essentiam: ergo si Bonitas transcendentalis confisteret formaliter in habitione totius esse, quod spectat ad essentiam rei, non discriminaretur à veritate transcendentali.

204 Respondeo ad objectionem negando assumptum. Ad probationem, concessâ maiore, nego minorem. Quia veritas minus dicit, quàm Bonitas, estò videatur idem conceptus utriusque. Conceptus enim veritatis transcendentalis consistit formaliter in adæquatione, sive in conformitate in essendo ad suam essentiam sub statu possibilitatis, præscindendo ab eo, quòd essentia habeat totum esse, quod spectat ad ipsam, & quòd extra eam nihil sit accipere. Conceptus verò Bonitatis transcendentalis ab hoc non præscindit, sed dicit habitionem totius esse, quod spectat ad essentiam rei, ita quòd importet negationem carentiæ alicujus perfectionis sibi debitæ. Idcirco alius est conceptus veritatis transcendentalis, alius Bonitatis. Ex dictis

205 Deduces Bonitatem transcendentalem formaliter, & directè importare perfectionem, quam Ens de suo primario conceptu non importat. Ratio est manifesta; quia Bonitas transcendentalis formaliter, & directè importat habitionem omnium, quæ rei debentur secundùm suam essentiam, in quo stat conceptus perfectionis; hunc autem non importat Ens de suo primario conceptu, sed tantùm importat, quòd non habet repugnantiam ad esse, sive ad existere. Hæc pro Entis proprietatibus.



DISPUTATIO III.

De præcipuis Entis divisionibus, & de Ente Divino in particulari.

SECTIO I.

De præcipuis Entis divisionibus.

QUÆSTIO UNICA:

Quotuplex sit Ens?

206

RESOLUTIO: Ens vel est reale, vel rationis. Reale dividitur primò in actum, & potentiam, tanquam per suas differentias ex æquo dividentes totam latitudinem Entis realis. Ita expresse Baconius in 2. dist. 36. q. unica art. 3. vers. *Tunc ad formam quando*, ibi: *Impossibile est esse compositum sine primis differentiis entis, quæ sunt actus, & potentia*. Primum extremum comprehendit omnem actum, etiam omnino purum, nempe Deum Optimum Maximum. Secundum omnem potentialitatem, & ipsam puram potentiam, scilicet materiam primam. Hinc patet, divisionem Entis in increatum, & creatum, in independens, & dependens, in spirituale, & corporeum, supponere illam primam divisionem.

207

Dividitur etiam Ens (omissis aliis divisionibus, de quibus multi pro lixè agunt) in completum, & incompletum. Completum communiter dicitur illud, quod non ordinatur ad componendum

Blasco.
Garcia.

cum alio ; econtrariò verò incompletum. Verùm melius dicendum cum Magistris Blasco , & Garcia, Ens completum esse , cui nihil debitum deficit ; incompletum autem esse , cui deficit aliquid debitum. Unde Ens completum substantiale est Ens habens omnem substantiam sibi debitam , ut homo habens corpus , & animam ; & quodlibet totum habens materiam , & formam. Ens completum accidentale est Ens habens omne accidens sibi debitum , ut ignis v. g. calorem habens , & lucem. Econversò , Ens incompletum substantiale Ens est , cui aliqua deficit substantia debita , ut materia tantum , vel forma tantum. Et Ens incompletum accidentale Ens est , cui aliquod deficit accidens debitum , ut ignis lucens , cui deficeret calor. Obiter advertendum, dari etiam Ens tantum integraliter incompletum, ut homo v. g. cui pars aliqua corporis deficeret. Notandum ulterius , Ens substantiale completum sumi posse vel in esse naturæ , vel in esse suppositi. In esse naturæ non solum est Ens compositum ex substantiis sibi debitis , ut supra dicebam , verùm etiam potest esse simplex , cui nulla alia debeatur substantia , ut Angelus , & Empyreum in sententia Resoluti. Completum autem in esse suppositi est Ens coalescens ex natura completa , & gradu subsistentiæ.

208 De Ente accidentali tria docet Mag.

Blasco.

Blasco tom. 1. l. 4. dist. 13. q. 6. art. 1. n. 153. Primum : Accidens separatum esse essentialiter incompletum , quatenus exigit uniri cum substantia ad efficiendum concretum accidentale. Secundum : Accidens unitum esse completum. Tertium : Accidens consideratum secundum se in abstracto completum etiam esse, saltem metaphysicè ; cum sit species accidentis in communi , de quo novem genera accidentium prædicantur. Id tantum superest, ut de Ente
ratio-

rationis aliqua dicamus: Verùm nihil ultra dicendum judico nisi, quod sit Ens intentionale, reale quidem, si sumatur ut proprietas resultans ab esse physico; chimæricum verò, si pro ente involvente contradictionem, seu repugnantiam ad existendum accipiatur. De Ente intentionali reali obiter, & commodè egimus in Logica tractatu 2. disp. 2. seçtione 1. q. 2. De ente chimærico prolixè, & inutiliter disputant plerique RR.

S E C T I O II.

De Ente Divino.

Q U Æ S T I O U N I C A.

Quale sit prædicatum ultimò constituens Naturam Divinam Metaphysicè consideratam?

209

RESOLUTIO : Prædicatum ultimò constituens Naturam Divinam Metaphysicè consideratam est sola *Primitas* essentialis, & perfectionalis contractiva (nostro modo concipiendi) intellectualitatis. Ita Doctor in 1. dist. 3 q. 2. art. 2. ad medium, dicens: *Item : ille conceptus, qui convenit Deo secundum quòd collocatur in perfectissimo genere viventium est perfectior quolibet alio conceptu, & præcisè si conveniat illi cum quodam excessu super omnia, quæ sunt illius generis: sed hujusmodi est conceptus Dei ut intelligentiæ primæ, quia ut intelligentia collocatur ingenere viventium per intelligere, quod est perfectissimum vivere (de Anima textu com. 36.) & ut primæ hoc convenit illi per excessum super omnes*

Baccon.

Zagaglia. *nes intelligentias.* M. Zagaglia super præfatum textum: *Quatenus ergo sub ratione formali generica intelligentiæ importat esse intelligentiam primam, tunc ultimò constituitur in esse veluti specifico per talem primitatem, quæ denotat excellentissimum modum sive excessum essentialem in participanda de intellectivitate super omnes alias intelligentias: & illa primitas, sive excellentia essentialis, habet rationem veluti ultimi formalis constitutivi, & per hanc distinguitur à reliquis.* tom. 2. part. 1. disp. 6. sectione 4 §. 1. n. 58. prope finem.

210 Ad intelligentiam resolutionis prænoto primò, quòd in Divinis, ex defectu, & imbecillitate intellectus nostri, solemus philosophare proportionali modo, ac in creatis; & cùm in creatis concipiamus prædicata reposita veluti in duabus classibus, ita quòd in prima classe sint prædicata quidditativa, sive essentialia, quæ dicuntur communiter conceptus primarii rei constitutæ, &, (nota) in phrasi Baconica, gradus perfectionales, uti sunt respectu hominis v. g. vivens, animal, rationale, &c. in secunda verò classe sint prædicata, quæ non sunt quidditativa, seu essentialia, sed tantùm sunt proprietates, sive prædicata emanantia ab essentia rei constitutæ, quæ dicuntur absolutè conceptus secundarii, uti sunt admirativum, resibile, &c. respectu ejusdem hominis; sic, ut dicebam, discurre solemus in Divinis; quapropter non obstante, quòd Deus sit una simplicissima entitas & formalitas in rei veritate, concipimus ejus prædicata in duabus clasibus reposita; in prima classe prædicata quidditativa, sive essentialia, ut Substantia, Vivens, Spiritus; in secunda attributa, sive proprietates, ut Omnipotentia, Sapientia, Æternitas; nam ipsamet entitas simplex & formalitas absolutè repræsentabilis

bilis est intellectui nostro secundum conceptus primarios, & secundarios, ut fultè explicavi in Compendio pro Diverso, & Eodem disp 3. sectione 2. q. 2. & 3.

211 Prænoto secundò, quòd sicut in creatis v. g. in homine, prædicata constituentia Metaphysicè debent esse de classe illorum, quæ sunt quidditativa & essentialia, ita proportionali modo discurrendum de prædicatis illis Essentiam Dei Metaphysicè constituentibus. Deinde sicut homo non constituitur ultimò per prædicata transcendentalia, nec per illa, quæ sunt communia aliis ab homine, tametsi ingrediantur etiam constitutivum Metaphysicum hominis, ut ens, substantia, vivens, animal &c. ita Essentia Divina non debet ultimò constitui per prædicata transcendentalia, nec per prædicata communia necdum creaturis, sed nec communia aliis perfectionibus, sive prædicatis extra Essentiam objicibiliter sumptam ad intellectum nostrum. Tandem, sicut in homine prædicatum ultimò constituens Metaphysicè, contrahit alia prædicata quidditativa, & trahit ipsa ad esse speciale humanum, & est per quod homo distinguitur ab omni non homine; ita suo modo prædicatum ultimò constituens Metaphysicè Essentiam Divinam, contrahit alia prædicata quidditativa Divina, & quasi trahit ad esse speciale Divinum; & per tale prædicatum debet Essentia Divina distingui necdum à creaturis, sed etiam à conceptibus secundariis ejusdem esse Divini, saltem in esse objicibili per ordinem ad intellectum nostrum. Illud prædicatum in homine est rationale; hoc verò in Deo est Primitas in gradu intellectualitatis.

212 Prænoto tertio, gradum intellectualitatis convenire Deo, secundum quod collocatur in perfe-

perfectissimo genere viventium, ita quòd non solum perfectè habeant similitudinem Dei illæ creaturæ, quæ de hoc gradu participant, sed etiam perfectius habeant talem similitudinem illæ, quæ perfectius participant præfatum gradum. Sic Angeli magis sunt imagines Dei, quia in intelligendo perfectiores sunt hominibus. Unde dicebat Augustinus citatus à D. Thoma; apud Mag. Zagagliam ubi sup.

D. August § 2. num 65. vers. *Confirmatur: Res, quæ tantummodo sunt, nec tamen vivunt, aut sapiunt, non perfectè, sed exiguè sunt ad similitudinem Dei: quæ vivunt, & non sapiunt, paulo amplius participant similitudinem: quæ sapiunt, ita illi similitudine proxima sunt, ut in creaturis nihil sit propinquius.*

213 Prænotò quartò, gradum vitæ intellectualis habere rationem veluti genericam respectu Dei, & intelligentiarum creaturarum, ita tamen quòd intelligentiæ creatæ semper sint in potentia non modò intrinsecè in sua entitate, ratione dependentiæ essentialis à Creatore, sed etiam in potentia ad operationes immanentes, imò ad transeuntes, salvâ suppositione, quod essent ab æterno, uti asseruit Aristoteles turpiter errans. Verùm etsi ab æterno moverent orbem, & essent semper in actu, nihilominus adhuc essent in potentia receptiva ad actus immanentes receptibiles in ipsis intelligentiis, tanquam in subjecto. Neque operatio intelligentiarum esset ipsarum substantia. Ita Doctor dicens, quòd (in hoc casu) *non tamen sic* (essent actus puri) *quin essent in potentia ad recipiendum suam operationem, & quin essent in potentia intrinsecè in se ipsis, independendo in essendo à Prima Intelligentia.* In 2. dist. 36. q. un. art. 3. vers. *Tunc ad formam, quando.* Deus verò solus est Intelligentia perfectissima & actus purus, & specialissimus in gradu actua-

Baccon.

actualitatis, quòd nullo pacto sit in potentia. Hinc

214 Prænoto quinto, quòd hæc Primitas essentialis, & perfectionalis, quæ est prædicatum ultimò constituens Metaphysicè Naturam Divinam, nihil aliud est, quàm æctus omnino purus excellentissimus, & specialissimus in gradu intellectualitatis, exquo non dicit potentiam transmutabilem, neque ad operationes immanentes receptibiles; est enim sua operatio ipsa substantia. Igitur in hac Primitate (notandum valde) sive in hac ratione æctûs puri involvitur tanquam ratio transcendentalis conceptus æctus puri per exclusionem potentiæ ad esse. Involvitur etiam in conceptu Intelligentiæ Primæ conceptus æctus puri per exclusionem essendi ab alio causaliter, & originativè, qui quidem conceptus, tametsi convenient Naturæ Divinæ, nequeunt ultimò eam constituere Metaphysicè, eò quòd sint communes omnibus prædicatis quidditativis. Tandem involvuntur in præfato conceptu omnes conceptus constitutivi Naturæ Divinæ Metaphysicè sumptæ ab AA. assignati per prædicata quidditativa. Cæteri autem modi dicendi, seu discurrendi pro constitutivo Metaphysico Dei ex aliis capitibus impugnantur, præsertim quando assignatur prædicatum aliquod ex illis, quod potius debet supponere Naturam Divinam Metaphysicè constitutam. His notatis,

215 Probo resolutionem hoc unico, verùm efficaci fundamento: Solùm illud prædicatum constituit ultimò aliquam naturam Metaphysicè consideratam, quod contrahit rationem proximam communem, & genericam, ita quòd, positâ tali contractione, natura ex ipso prædicato, & ratione communi constituta non sit amplius contrahibilis ad aliud esse specificum; sed Primitas essentialis, &

Tom. Ult.

Q

perfe-

perfectionalis contractiva intellectualitatis contrahit gradum vitæ intellectualis tanquam rationem proximam communem, & veluti genericam ad Deum, & intelligentias creatas, ita quòd, positâ tali contractione, Natura Divina ex ipsa Primitate, & gradu intellectualitatis constituta, non sit amplius contrahibilis ad aliud esse specificum: ergo sola Primitas, de qua loquimur, est prædicatum ultimò constituens Naturam Divinam Metaphysicè consideratam. Maior est certa, & patet in rationali, quod est prædicatum ultimò constituens Metaphysicè naturam humanam, sive hominem, quippe contrahit animal, quod est genus proximum, ita ut, positâ tali contractione, natura hominis non sit ulterius contrahibilis ad aliud esse specificum.

216. Probo minorem quoad primam partem, nempe, quòd Primitas essentialis, & perfectionalis contractiva intellectualitatis contrahat gradum vitæ intellectualis tanquam rationem proximam communem, & veluti genericam ad Deum, & intelligentias creatas. Gradus vitæ intellectualis participatur à Deo, Angelis, & hominibus, tum juxta authoritatem Augustini supra relatam, tum quia Angeli, & homines sunt imagines Dei quoad intellectivitatem: ergo Primitas essentialis, & perfectionalis contractiva intellectualitatis contrahit gradum vitæ intellectualis tanquam rationem proximam communem, & veluti genericam ad Deum, & intelligentias creatas. Dico, *veluti genericam*; quia talis convenientia solùm est analogica, non univoca.

217. Probo eamdem minorem quoad secundam partem, videlicet, quòd, positâ tali contractione, Natura Divina ex ipsa Primitate, & gradu intellectualitatis constituta non sit amplius contrahibilis

bilis ad aliud esse specificum. Si Natura Divina ex ipsa Primitate, & gradu intellectualitatis contracto esset amplius contrahibilis, prædicatum illud, per quod ulterius contraheretur, haberet rationem differentię ultimę constitutivę essentialiter, & distinctivę specificę; sed hoc non: ergo. Maior liquet. Probo minorem. Si prædicatum illud haberet rationem differentię ultimę constitutivę essentialiter, & distinctivę specificę, eodem jure gradus intellectualitatis jam contractus per illam Primitatem haberet rationem proximam, & veluti genericam ad Deum, & intelligentias creatas, vel saltem rationem communem aliis prædicatis Divinis; sed neutrum dicendum: ergo.

218 Probo minorem quoad primam partem. Si gradus intellectualitatis jam contractus per illam Primitatem haberet rationem proximam, & veluti genericam ad Deum, & intelligentias creatas, intelligentię creatę (juxta supra exposita) essent actus puri omnino per exclusionem potentię, etiam ad actiones immanentes, sicque operationes immanentes intelligentiarum essent ipsarum substantia; sed hoc repugnat intelligentiis creatis: ergo. Probo eandem minorem quoad secundam partem. Si gradus actualitatis jam contractus per illam Primitatem haberet rationem communem aliis prædicatis Divinis (in esse objicibili ad nostrum intellectum) talis ratio vel esset communis prædicatis Divinis, quę sunt de prima classe, vel prædicatis Divinis, quę spectant ad secundam; sed neutrum sustineri potest: ergo.

219 Probo hanc minorem quoad primam partem sic: Si talis ratio esset communis prædicatis Divinis, quę sunt de prima classe, esset communis Enti Divino, Substantię Divinę, Viventi Divi-

no, cæterisque prædicatis, factâ categoriâ usque ad Intelligentiam Primam; sed nulli ex istis potest talis ratio esse communis, cum omnia hæc prædicata sint superiora respectu Intelligentiæ Primæ. Probo hoc. Ideirco non valet dicere: *Est ens: ergo intelligentia. Est substantia: ergo intelligentia. Est vivens: ergo intelligentia*, quia talia prædicata, *Ens, Substantia, Vivens, &c.* sunt superiora ad intelligentiam; nam nullum prædicatum inferius potest esse commune superioribus, bene verò e converso; atqui etiam *Ens Divinum, Substantia Divina, Vivens Divinum* sunt prædicata superiora ad Intelligentiam Primam: ergo etiam non valet dicere: *Est Ens Divinum: ergo Intelligentia Prima. Est Substantia Divina: ergo Intelligentia Prima. Est Vivens Divinum: ergo Intelligentia Prima*; ac per consequens gradus intellectualitatis jam contractus per illam Primitatem non habet rationem communem prædicatis Divinis, quæ sunt de prima classe. Probo tandem eandem minorem quoad secundam partem sic: Prædicata Divina attinentia ad secundam classem habent conceptibilitatem formaliter distinctam ab Intelligentia Prima: ergo ratio Intelligentiæ Primæ non est communis ipsis. Igitur stat resolutio.

Proponuntur objectiones, & dissolvuntur.

Molina.
Valentia.
Beccanus.
Suarius.
Albiz.
Coninch.
Ribadaneyra.
Perez.
Munieffa.

220 **N**ostræ resolutioni opponuntur AA. omnes, qui asserunt Naturam Divinam Metaphysicè consideratam constitui ultimò per complexum ex cunctis perfectionibus absolutis necessariis, uti sunt Molina, Valentia, Beccanus, Suarius Magnus, Albiz, Coninch. Ribadaneyra, Perez, & alii, quos citat Thomas Munieffa tom. 1. disp. 5. sectione 1. in fine, & sequitur sectione 6. Oppo-

Opponuntur etiam illi, qui docent, Naturam Divinam Metaphysicè sumptam constitui ultimò per prædicatum aliquod, per quod differt à non Deo, tametsi tale prædicatum sit commune omnibus Divinis perfectionibus. At hujusmodi AA. non conveniunt in eodem discursu; quidam enim sentiunt, hoc prædicatum esse Ens à se. Ita Gillius, Morandus, Recupitus, Oregius, & alii, quos citat Mag Zagaglia, ubi sup. sectione 3. n. 34. quam sententiam tenet Joannes Marin tom. 1. tractatu 1. disp. 1. sectione 6. n. 64. loquendo de Deo contrapposito creaturis, et si n. 65. addat, quòd, si sermo fiat de Essentia Dei contraposita ad alia prædicata, constituitur per Ens à se plenum omni perfectione simpliciter simplici. Alii dicunt, asseitatem omnimodam esse ultimum Naturæ Divinæ constitutivum.

Gillius.
Morand.
Recupit.
Oregius.
Marin.

221 Alii judicant tale prædicatum esse infinitatem. Ita Argentina, Toletanus, Amicus apud Mag. Zagaglia sectione 2. loci citati num. 11. idem tenent plures Scotistæ cum Scoto dist 8. q. 3. dicente ibi: (apud Mastrium ubi infra citand.) *Ens per essentiam est ipsum esse infinitum, & non aliquid, cui tantum conveniat ipsum esse, & ideo ex se est hoc, & ex se infinitum, ut quasi per prius intelligatur aliquo modo infinitas ex modis entitatis per essentiam, quam ipsum intelligatur esse hoc.* Cæterum Mastrius tom. 1. disp. 2. q. 1. vers. *In oppositum*, ad medium, docet ex Smising. infinitatem non esse prædicatum quidditativum Dei, licet per tale prædicatum, secundum nostrum modum concipiendi imperfectum, distinguamus Deum primò à creatura: sic interpretatur Scotum, docetque ex eodem, nomen Dei propriissimum significare formaliter existentiam, ex quo videtur contendere cum aliis Scotistis, existentiam Dei esse prædicatum constitutivum

Argentin.
Toletan.
Amicus.
Scotus.

Mastrius.

vum Naturæ Divinæ, de quo disputamus.

222 Opponuntur etiam plures alii, præsertim ex Thomistis, qui estò pro ratione primaria differentiali Dei, & ultimò constitutiva assignent specialem aliquam Dei perfectionem in aliqua linea non transcendentalem, nec communem cæteris Dei prædicatis, nihilominus discordant à nobis in prædicato, quod assignant. Quidam tenent, hoc prædicatum esse radicem intelligendi. Ita Curiel, Arrubal, & Philippus à S. Trinitate, quos citat Gonetius tom. 1. tractatu 1. disp. 2. art. 1. §. 1. in fine. Albertinus, Borral, & Godoy apud Munieffam, ubi sup. sectione 1. n. 10. Mag. Ildephonsus Michael, Ferre, Carrasco, Illustrissimus Palanco, & alii apud Terre. Mag. Paulum à Conceptione.

223 Alii dicunt, tale prædicatum esse ipsum intelligere purissimum, & actualissimum. Ita Nasarius, Gonzales, Joannes à S. Thoma, & alii, quos citat idem Gonetius sup. laudatus, & sequitur §. 5. n. 21. quam sententiam amplectitur Mag. Paulus à Conceptione tom. 1. tractatu 1. dubio 3 §. 1. ubi citat Salmaticenses, Mag. Cornejo, & alios. Magister Lumbier tom. 1. dist. 3. q. 5. art. 1. n. 171. asserit. præfatum constitutivum esse actualem intellectiōnem per modum actūs purissimi à se, qui est intelligens actuale, ex quo videtur non recedere ab hac ultima sententia. Alii docent, esse intellectivum simul & volitivum radicale. Alii tandem, intellectivum, & volitivum actuale. Priorem sententiam tenet Aiosus. Posteriores Zuniga apud Munieffam, ubi sup. Pro his omnibus, & in primis pro AA primæ sententiæ

224 Obijcies primò. Natura Divina Metaphysicè considerata constituitur adæquatè per complexum ex cunctis perfectionibus absolutis necessariis:

cessariis : ergo non constituitur per Primitatem tantum in gradu , sive in genere actualitatis. Probas antecedens. Natura Divina physicè sumpta constituitur adæquatè per complexum ex cunctis perfectionibus absolutis necessariis , & , juxta Baconium , etiam ex relativis : ergo etiam per hoc complexum debet constitui adæquatè Natura Divina Metaphysicè considerata. Antecedens est certum , maxime in sententia Baconii. Probas consequentiam. Essentia Metaphysica Dei est Essentia Metaphysica essentiæ physicæ ipsius Dei : ergo si essentiæ physica adquatè sumpta consistit in tali complexu , ita & Essentia Metaphysica.

225 Respondeo ad objectionem negando antecedens. Ad probationem , concesso antecedente , nego consequentiam. Ad probationem , concesso etiam antecedente , nego consequentiam. Quia tametsi Essentia Metaphysica Dei sit Essentia Metaphysica essentiæ physicæ ipsius Dei , est Essentia Metaphysica considerata per modum generis , & differentiæ , exquo tantum sequitur , quod omnia prædicata inclusa in complexo physicè considerato , seu ad instar complexi physici , reducantur ad conceptum Metaphysicum , & definitivum per genus , seu quasi genus , & differentiam ultimam Metaphysicè constitutivam. Dicimus autem , hanc ultimam differentiam in Deo esse Primitatem supra expositam.

226 Instabis. Natura Divina , etiam Metaphysicè considerata , debet adæquatè constitui per conceptum perfectissimum ; sed conceptus perfectissimus est conceptus complexi ex omnibus perfectionibus Divinis : ergo per talem conceptum debet adæquatè constitui Natura Divina Metaphysicè considerata. Maior liquet. Probas minorem. Conceptus

ceptus, cui nulla perfectio deficit, est conceptus perfectissimus; sed complexum ex omnibus perfectionibus est conceptus, cui nulla perfectio deficit: ergo conceptus perfectissimus est conceptus complexi ex omnibus perfectionibus Divinis

227 Respondeo ad instantiam distinguendo maiorem: Natura Divina Metaphysicè considerata debet adæquatè constitui per conceptum perfectissimum se habentem per modum generis, & differentię, concedo maiorem: aliter, nego maiorem. Deinde distinguo minorem: sed conceptus perfectissimus est conceptus complexi ex omnibus perfectionibus Divinis; conceptus perfectissimus spectans ad lineam physicam, concedo minorem: spectans ad lineam Metaphysicam, nego minorem. Ad probationem distinguo maiorem: conceptus, cui nulla perfectio deficit physicè, sive identicè, est conceptus perfectissimus rei physicè etiam spectatæ, concedo maiorem: conceptus, cui nulla perfectio deficit Metaphysicè, est conceptus perfectissimus rei sumptæ etiam Metaphysicè, nego maiorem. Deinde, concessa minore, distinguo consequens ut sup.

228 Igitur Natura Divina Metaphysicè accepta debet constitui adæquatè per conceptum quidem perfectissimum, sed per modum generis, & differentię, ita quòd tali conceptui nihil perfectionis physicè deficiat, idest, quòd totum esse physicum repositum sit in linea Metaphysica, in qua per genus, & differentiam definiatur. Ast non obstat conceptui perfectissimo, quòd ei deficiat aliquid de linea Metaphysica, putá proprietates, imò, cùm conceptus perfectissimus sit conceptus rei Metaphysicè constitutæ, tales proprietates debent supponere rem adæquatè constitutam. Hoc patet in conceptu Metaphysico constitutivo hominis respectivè ad
refi-

resibile, & admirativum. Proportionali igitur modo de Deo discurrendum.

229 Replicabis: Ergo conceptus adæquatus constitutivus Naturæ Divinæ Metaphysicè sumptæ est complexum ex omnibus perfectionibus Divinis saltem quidditativis: ergo non stat in sola Intelligentia Prima. Respondeo ad replicam distinguendo primum illatum: est complexum ex omnibus perfectionibus Divinis saltem quidditativis, sumptis omnibus per modum generis, & differentiæ, ita quòd sola Primitas sit ultima differentia contrahens reliqua omnia prædicata quidditativa, modo supra explicato, & infra explicando n. 254. concedo illationem: aliter, nego illationem. Deinde nego aliam. Quia sola Intelligentia Prima est adæquatus conceptus Naturæ Divinæ Metaphysicè acceptæ, sive per modum generis, & differentiæ.

230 Objicies secundò pro AA. secundæ sententiæ. Deus per esse à se distinguitur ab omni non Deo: ergo sola asseitas est prædicatum ultimò constituens Naturam Divinam Metaphysicè sumptam. Antecedens est de Fide. Probas consequentiam. Semel quòd homo distinguatur per rationale ab omni non homine, sequitur, quòd solum rationale sit prædicatum ultimò constituens naturam humanam Metaphysicè sumptam: ergo semel quòd Deus per esse à se distinguitur ab omni non Deo, sequitur, quòd sola asseitas sit prædicatum ultimò constituens Naturam Divinam, etiam Metaphysicè.

231 Respondeo ad objectionem, concessio antecedente negando consequentiam. Ad probationem, concessio etiam antecedente, nego consequentiam. Disparitas est: quia rationale est primū distinctivū, & constitutivum hominis purè Metaphysicè considerati: deinde non transcendit alia hominis prædicata.

ta. Ast prædicatum constitutivum Naturæ Divinæ, de quo disputamus, debet esse prædicatum constituens Naturam Divinam non purè Metaphysicè, sed Metaphysicè Theologicè, idest, non solum debet esse prædicatum quidditativum Dei, per quod Deus distinguatur ab omni non Deo, sed prædicatum per quod contraponatur Natura Divina aliis Dei perfectionibus juxta modum loquendi communem SS. PP. & Theologorum. Cùm autem Natura Divina per asseitatem non contraponatur cæteris perfectionibus Dei; siquidem omnes sunt à se, quatenus excludunt principium causalitatis, idcirco in asseitate non stat ultimum Naturæ Divinæ constitutivum.

Munieffa.

Ut enim observat Munieffa, ubi sup. sect 2 n. 14. omnia attributa, & relationes considerantur ad instar individuorum respectivè ad Ens à se, sicut rationale, animal, resibile, & admirativum respectu entis in communi, quod certò non est ultimum hominis constitutivum.

232 Objicies tertio pro AA. tertiæ sententiæ, & simul instabis. Saltem omnimoda asseitas non modò distinguit Deum à non Deo, sed etiam contraponit Naturam Divinam cæteris Dei perfectionibus; non enim illas transcendit: ergo saltem hæc est prædicatum ultimò constituens Naturam Divinam Metaphysice Theologicè acceptam. Respondeo ad objectionem negando antecedens. Quia omnimoda asseitas est illa, quæ excludit necdum rationem essendi ab alio causaliter, sed perfectionaliter, virtualiter, & originativè; non igitur alia potest esse asseitas omnimoda, nisi ista, quæ omnibus modis excludit rationes essendi ab alio: & hæc quanvis non transcendat omnes Dei perfectiones etiam attributales, & relativas, nihilominus est communis omnibus perfectionibus, sive prædicatis

dicatis. quidditativis, ut infra dicemus n. 258. ex quo non potest ultimò constituere Naturam Divinam sumptam Metaphysicè Theologicè.

233 Objicies quartò pro AA. quartæ sententiæ. Infinitas, sive infinitum, est conceptus perfectissimus, quem de Deo habere possumus: ergo est prædicatum ultimò constituens Naturam Divinam Metaphysice acceptam. Probas antecedens per rationes, quas noster Baconius objicit sibi, ubi sup. citatus articulo 2. Prima est: *Quod removet omnem imperfectionem, & aggregat omnem perfectionem, videtur facere conceptum perfectissimum; sed hujusmodi est infinitum: ergo &c.* Secunda: *Ratio, sub qua quietatur intellectus, & appetitus, videtur esse perfectissima; illa est ratio infiniti, quia habito infinito, ut infinitum est, nihil restat quærere: ergo.* Tertia: *Illud, quod additur super quamlibet perfectionem in divinis, ita quòd illa sit summa, illud maximè videtur esse ratio perfecta; hujusmodi est infinitum, quia sapientia divina, ex hoc quod est infinita, est summa, & sic de aliis: ergo.* Quarta: *Ratio perquam redditur causa de omnibus in divinis videtur esse perfectissima; hujusmodi est infinitas; quia si quæratur, quare potest creare, dicitur, propter infinitatem potentiæ, & sic de aliis: ergo &c.* Bacon.

234 Respondeo ad objectionem negando antecedens, & consequentiam. Ad primam antecedentis probationem distinguo maiorem: si removeat omnem imperfectionem, & aggreget omnem perfectionem per modum conceptûs substantialis, sive per modum substantiæ, concedo maiorem: si removeat omnem imperfectionem, & aggreget omnem perfectionem per modum conceptûs proprietatis, sive per modum qualitatis, nego maiorem. Deinde distinguo minorem: hujusmodi est infinitum

tum per modum proprietatis & qualitatis , concedo minorem : per modum ſubſtantię , nego minorem. Unde infinitas , tametsi removeat omnem imperfectionem , & aggreget omnem perfectionem , eſt conceptibilis per modum qualitatis , & proprietatis conſequentis ad Naturam jam conſtitutam , & ideo nec eſt conceptus perfectiſſimus , quem de Deo habere poſſumus , nec in tali conceptu conſiſtere valet ultimum conſtitutivum Naturę Divinę.

Bacon. Audiendus idem Baconius verſ. *Item: Prędicata*, ibi : *Conceptus etiam , qui convenit rei perſe , & primò , eſt perfectior illo , qui convenit ſuperadditè , quaſi proprietas ; ſed huiusmodi eſt conceptus Dei , ut ſubſtantia , conceptus autem infiniti non eſt huius-*

D. Anſelm *modi , ſed per modum proprietatis. Unde Anſelm. Monol. 15. loquens de infinitate , & accidentibus , & ſpiritu , dicit , iſtud ultimum : Spiritus , ſolùm videtur ſubſtantiam ſignificare ; cętera verò ſubſtantię proprietates. Ubi ſupra.*

235 Ad ſecundam diſtinguo maiorem : ratio , ſubqua quietatur intellectus , & appetitus , videtur eſſe perfectiſſima , ſi ſit ratio , ſubqua quietatur &c. tanquam ratio , ex cuius cognitione habetur cognitio aliorum , concedo maiorem : ſit ſit ratio , ex cuius cognitione non habetur aliorum cognitio , nego maiorem. Deinde nego minorem in ſenſu diſtinctionis , videlicet , quòd illa ſit ratio infiniti ; quia aliud eſt , quòd intellectus quietetur in infinito , eò quòd habeat cognitionem Naturę Divinę ; & aliud , quòd quietetur in illo , tanquam in conceptu , ex cuius cognitione habetur cognitio ipſius Naturę. Permiſſo etiam primo , falſum eſt ſecundum ; ſiquidem intellectus ex notitia de Natura Divina , ſive de Intelligentia Prima , cognoscit infinitatem Dei , & non econverſò. Unde non quieſcit
in

in infinitate , tanquam in prædicato , ex cujus cognitione habeatur cognitio prædicati ultimò constitutivi , ideoque ratio infinitatis non est ratio perfectissima in ordine obijcibili ad intellectum. Dixi , *permissio etiam primo* , videlicet , quòd intellectus quietetur in infinito ; quia videtur dicendum , intellectum non quietari , cùm ulterius possit investigare , an tale infinitum sit substantia , vel accidens , ut observavit Mag. Zagaglia , sive an sit de genere activorum , omnia potens , sive omnipotens , ut inquit Mag. de Castilla.

De Castil.

236 Ad tertiam ejusdem antecedentis probationem distinguo maiorem : illud , quod additur super quamlibet perfectionem in Divinis , ita quòd illud sit summa ratio , illud maximè videtur esse ratio perfecta , si perfectio addita sit per modum substantiæ , concedo maiorem : Si sit per modum proprietatis , nego maiorem. Deinde distinguo minorem : hujusmodi est infinitum per modum proprietatis additæ , concedo minorem : per modum substantiæ , nego minorem. Ad insinuatam probationem , nempe , quòd Sapientia Divina ex hoc , quòd sit infinita , sit summa , & sic de aliis , distinguo : ex hoc , quòd sit infinita &c. tanquam ratio à posteriori , concedo : tanquam ratio à priori , nego. Nam ratio à priori , quia Sapientia Divina est summa , ea est : quia est actus purus , & independens ab alio , tanquam à causa ; ex hoc enim sequitur , quòd à nullo possit limitari , ac per consequens , quòd sit infinita , & sic de aliis.

237 Ad quartam distinguo maiorem : ratio per quam redditur causa de omnibus in Divinis , tanquam ratio à priori , videtur esse perfectissima , concedo maiorem : tanquam ratio à posteriori , nego maiorem. Deinde distinguo minorem : hujusmodi

di est infinitas, tanquam ratio à posteriori, concedo minorem: tanquam ratio à priori, nego minorem. Ad insinuatam probationem dico, quòd ratio formalis à priori, quia potest creare, est, quia est Intelligentia Prima, cujus virtus est omnipotens, exquo infinitudo est consequens in esse objicibili ad Naturam constitutam.

238 Instabis. Natura, sive Essentia Divina, non potest objici intellectui, quin objiciatur simpliciter infinita: ergo infinitudo non est consequens in esse objicibili ad Naturam constitutam. Respondeo ad objectionem distinguendo antecedens: Natura, sive Essentia Divina, non potest objici intellectui, quin objiciatur simpliciter infinita radicaliter, concedo antecedens: simpliciter infinita formaliter, nego antecedens, & consequentiam de infinitudine simpliciter formaliter sumpta. Ad perfectam solutionis intelligentiam scire oportet, quòd Natura Divina potest considerari tantum sub conceptu præciso Divinitatis, vel ut Natura Divina, ita quòd dicat etiam conceptum Naturæ, quo modo consideretur est infinita, quia ratio infinitatis est generalis, & transcendentalis per omnia prædicata Divina, exquo omnia sunt à se, & non ab alio tanquam à causa. Hæc autem ratio infinitatis generalis, & transcendentalis per omne Divinum, se habet veluti infinitas ut sic, & contrahitur, juxta nostrum modum concipiendi, per specialem rationem infinitatis secundum quid, vel per specialem rationem infinitatis simpliciter. In attributis, & relationibus, quæ tantum excludunt rationem essendi ab alio causaliter, contrahitur per specialem rationem infinitatis secundum quid tantum, sive per infinitatem in certo genere, quatenus tam attributa, quàm relationes ad se trahunt omnes per-

perfectiões , tam actuales , quàm possibiles de tali genere per illarum continentiam eminentialem. Sic Sapientia Divina est infinita secundùm quid , quatenus continet eminenter omnes sapientias creatas , tam actuales , quàm possibiles , & in infinitum illas excedit in se carens fine. Similiter Paternitas Divina est infinita secundùm quid , quatenus eminenter continet omnes paternitates creatas , & creabiles , quas infinitè excedit. In Essentia verò , sive Natura Divina , quæ non modò excludit rationem essendi ab alio causaliter , sed etiam originativè , ex quo ipsa est origo , & radix attributorum , & relationum , contrahitur infinitas ut sic per specialio rem rationem infinitatis simpliciter , sive in omni genere , quatenus est fundamentum , & veluti radix omnium attributorum , & relationum.

239 Ex hac doctrina sequitur , quòd si Natura Divina consideretur tantùm secundùm id , quòd dicit Divinitatis , sit quidem infinita per infinitatem transcendentalem. Si verò consideretur , vel obijciatur ut Natura Divina , seu secundùm conceptum Naturæ simul & Divinæ , sit infinita simpliciter ; verùm neque hoc pacto obijcitur intellectui formaliter infinita , sed infinita simpliciter radicaliter tantùm , quatenus est radix infinitatis formalis , sicut & aliorum attributorum , quæ formaliter sumpta in esse obijcibili manent extra conceptum Naturæ Divinæ Metaphysicè constitutæ per sua prædicata quidditativa. Mitto alias objectiones , quæ tantùm intendunt probare infinitatem esse prædicatum Naturæ Divinæ quidditativum ; quia , adhuc hoc admisso , non ex eo sequitur , quòd sit ultimum constitutivum , ut ex dictis discurrenti patebit.

240 Obijcies quintò pro AA. quintæ sententiæ. Deus definitur per existentiam : ergo existentia

Exod. 3.

tentia Dei est ultimum prædicatum constitutivum Naturæ Divinæ. Consequentia liquet. Probas antecedens tum ex illo Exodi 3. *Ego sum qui sum* : tum ex variis authoritatibus SS. PP. qui docent Dei Naturam consistere in ipso esse. Respondeo ad objectionem negando antecedens, & consequentiam. Ad probationem antecedentis per textum Sacræ Scripturæ dico, ex illo solum inferri, existentiam esse prædicatum quidditativum Dei, seu attinens ad ejus Essentiam, ut adversus Veteres Scotistas ostendit Mastrius; & ita intelligendi sunt Patres ad idem adducti.

Mastrius.

241 Objicies sextò pro AA. sextæ sententiæ. Natura Divina debet proportionaliter constitui per intellectivum, sicut aliæ naturæ intellectuales, videlicet Angelica, & humana; sed istæ constituuntur per hoc, quòd sint radicaliter intellectivæ: ergo Natura Divina debet constitui per radicem intelligendi. Respondeo ad objectionem distinguendo maiorem: Natura Divina debet proportionaliter constitui per intellectivum, tanquam per rationem genericam, sicut aliæ naturæ intellectuales, concedo maiorem: tanquam per rationem ultimò constitutivam, sive differentialem; nego maiorem. Deinde distinguo minorem: aliæ naturæ intellectuales constituuntur per hoc, quòd sint radicaliter intellectivæ, tanquam per rationem genericam communem omnibus intelligentiis, concedo minorem: tanquam per rationem ultimò constitutivam, sive differentialem, nego minorem, & consequentiam.

242 Verum est, quòd tam Natura Divina, quàm aliæ naturæ intellectuales constituuntur per intellectivum radicale, tanquam per rationem genericam, & communem omnibus, ex quo in homi-
ne

ne contrahitur per rationalitatem, quæ addit rationem discursivi supra illam communem rationem, in Angelis per peculiare rationes intellectualitatis, in Deo autem per Primitatem excellentiæ. Eapropter intellectivum radicale non potest esse prædicatum ultimò constituens Metaphysicè Naturam Divinam. Unde neque ipsi Thomistæ, qui inter se digladiantur, sitne intellectivum radicale, an intelligere actuale, sive actualis intellectio, ultimum Naturæ Divinæ constitutivum, accipiunt nudè intellectivum, benè quidem intellectivum Divinum, ex quo manifestè colligitur, quòd ly, *Divinum*, potius habeat rationem differentiæ contractivæ, quàm intellectivum. Cùm autem per ly, *Divinum*, sumptum pro ultimo prædicato Metaphysicè constitutivo, non possit intelligi complexum ex omnibus prædicatis, nec aseitas, nec infinitudo, ut supra ostendimus, opus est investigare, quodnam sit hoc prædicatum, quod per ly, *Divinum*, intelligitur. Dicimus esse Primitatem in gradu ipso intellectualitatis, sive actum omnino purum per contrapositionem ad potentialitates, quæ in aliis intelligentiis reperiuntur, ut supra probavimus. Hinc facile est satisfacere cæteris objectionibus, quas proponunt pro hac sententia AA. præsertim Thomistæ.

243 Objicies septimò pro AA. septimæ sententiæ. Intelligere actuale in Deo est ultima actualitas lineæ intellectivæ: ergo per intelligere actuale debet constitui ultimò Natura Divina Metaphysicè sumpta. Antecedens liquet. Probas consequentiam. Natura Divina debet constitui ultimò per actum omnino purum, juxta superius dicta; sed ultima actualitas lineæ intellectivæ est actus omnino purus: ergo si intelligere actuale in Deo est ultima actualitas lineæ intellectivæ, per intelligere

Tom. Ult.

S

actuale

actuale debet constitui ultimò Natura Divina.

244 Respondeo ad objectionem distinguendo antecedens: intelligere actuale in Deo est ultima actualitas lineæ intellectivæ, ultima quasi accidentalis (in esse obijcibili ad intellectum) concedo antecedens: ultima essentialis, nego antecedens, & consequentiam. Ad cujus probationem, concessâ maiore, distinguo minorem: ultima actualitas lineæ intellectivæ est actus omnino purus in esse rei, concedo minorem: in esse obijcibili, nego minorem; quia obijcitur intellectui resultans, tanquam à radice, à Natura jam constituta. Unde nego consequentiam. Ultima actualitas essentialis in linea intelligendi non stat in intelligere Divino, sed in Primitate Intelligentiæ, quam primò concipimus, & ex qua, tanquam à radice, provenit ipsum intelligere actuale.

245 Nec obstat primò, quod Resolutus, ubi supra citatus, doceat, quòd Deus collocetur in genere viventium per intelligere, quod est perfectissimum vivere. Nam, ut benè exponit Mag. de
De Castil. Castilla, sensus non est, quòd constituatur per ipsum intelligere, sed quòd Intelligentia Prima, perquam Natura Divina constituitur, dicat ordinem transcendentalem ad intelligere, tanquam ad terminum ad quem.

246 Nec obstat secundò, quod ex Angelico dicunt Thomistæ, videlicet, quòd Verbum Divinum procedit ut Filius, quia intelligere Dei est esse Dei, ex quo identificant formaliter Naturam Divinam cum intelligere, ac per consequens in ipso intelligere ponunt constitutivum Naturæ. Nec obstat, inquam, quia, ut Verbum procedat ut Filius, opus non est, quod intelligere sit Natura Divina formaliter, imò, hoc admisso, sequeretur, quòd
gene-

generatio, & principium generationis essent formaliter idem. Quare, ut Verbum Divinum procedat ut Filius, satis est, quod originetur ab intellectu, qui ex natura sua est assimilativus, & communicativus Naturæ Divinæ, uti docent nostri Theologi Baconistæ.

247 Obijcies octavò pro AA. octavæ sententiæ. Natura Divina est substantia perfectissima: ergo debet constitui Metaphysicè per intellectivum, & volitivum radicale tanquam per gradus perfectionales vitæ. Respondeo ad objectionem concedendo totum; non enim negamus, quod ita Metaphysicè constituatur Natura Divina, sicut & per omnia alia prædicata quidditativa, dum hæc omnia implicitè veniunt, posito ultimo constitutivo, nempe Intelligentia Prima, per modum generis, & differentiæ. Unde aliud est, quod volitivum radicale ingrediatur etiam constitutivum Naturæ Divinæ, quod est verum; aliud, quod sit prædicatum ultimum Metaphysicè constitutivum, quod negamus.

248 Obijcies nonò pro AA. ultimæ sententiæ. Non modò intellectivum actuale, sive intelligere in actu secundo, est ultimum de linea intellectiva, sed etiam volitivum actuale, sive velle in actu secundo, est ultimum de linea volitiva: ergo Natura Divina Metaphysicè accepta per utrumque debet ultimò constitui. Respondeo ad objectionem distinguendo antecedens: non modo intellectivum &c. ultimum veluti accidentale, concedo antecedens: ultimum essentiale, nego antecedens, & consequentiam. Est quidem intelligere ultimum lineæ intellectivæ, sicut & velle ultimum lineæ volitivæ; verum utrumque est veluti accidentale prædicabiliter, quatenus supponit suam potentiam vitalem jam in actu constitutam, quapropter neutrum po-

test constituere Naturam Divinam Metaphysicè sumptam.

249 Objicies decimò & ultimò, & directè contra resolutionem. Primitas, de qua est sermo, non est formalitas distinctiva Naturæ Divinæ; sed formalitas, quæ non est distinctiva Naturæ Divinæ, non potest illam ultimò constituere Metaphysicè: ergo Primitas assignata non est prædicatum ultimò constituens Naturam Divinam Metaphysicè consideratam. Probas maiorem. Primitas illa est formalitas communis cæteris prædicatis quidditativis; sed nulla formalitas communis cæteris prædicatis quidditativis est distinctiva Naturæ Divinæ: ergo præfata Primitas non est formalitas distinctiva Naturæ Divinæ. Probas maiorem. Talis Primitas idem est ac actus omnino purus; sed actus omnino purus est formalitas communis cæteris prædicatis quidditativis: ergo Primitas illa est formalitas communis cæteris prædicatis quidditativis. Maior constat ex sup. dictis. Probas minorem. Præfata ratio actûs puri importatur à Deo, ut est primum ens, ut est prima substantia, ut est primum vivens; sed primum ens, prima substantia, primum vivens sunt prædicata Dei quidditativa: ergo actus omnino purus est formalitas communis cæteris prædicatis quidditativis. Probas maiorem. Primum ens ita est actus purus dicens primitatem in gradu entis, quòd non solum excludit potentialitatem essendi ab alio causaliter, sed etiam originativè: idem dicendum de prima substantia, & de primo vivente; nam etiam prima substantia dicit primitatem in gradu substantiæ, & primum vivens primitatem in gradu viventis per exclusionem essendi ab alio causaliter, & originativè: ergo præfata ratio actûs puri importatur à Deo, ut est primum ens, prima substantia, primum vivens.

250 Respondeo ad objectionem negando maiorem. Ad probationem nego maiorem. Ad probationem, concessâ maiore, nempe, quòd præfata Primitas sit idem ac actus omnino purus, nego minorem, scilicet, quòd actus omnino purus sit formalitas communis. Ad probationem nego maiorem, quod illa ratio actus puri importetur à Deo, ut est primum ens, prima substantia, primum vivens. Ad probationem, concessio antecedente, quòd primum ens ita sit actus dicens primitatem in gradu entis, quòd non solum excludat potentialitatem essendi ab alio causaliter, sed etiam originativè; & similiter de prima substantia, & de primo vivente, nego tamen consequentiam.

251 Ratio est: quia estò primum ens ita sit actus purus dicens primitatem in gradu entis per exclusionem potentialitatis essendi ab alio causaliter, & originativè; & similiter prima substantia, & primum vivens, non propterea primum ens est actus omnino purus, nec prima substantia, nec primum vivens; (loquimur semper in esse obijcibili ad intellectum nostrum) quia ut primum ens (idem de prima substantia, & de primo vivente) esset actus omnino purus, opus erat, quòd esset actus purus in omni genere; cum autem solum sit actus purus in gradu entis, idcirco non est actus purus omnino, prout requiritur ad prædicatum, seu formalitatem ultimò constitutivam Naturæ Divinæ.

252 Instabis. Etiam Primitas essentialis, & perfectionalis contractiva intellectualitatis non est actus purus in omni gradu: ergo etiam non est actus omnino purus, prout requiritur ad prædicatum ultimò constitutivum Naturæ Divinæ. Probas antecedens. Talis Primitas est actus purus in uno gradu; sed actus purus in uno gradu non est actus purus

purus in omni gradu : ergo talis Primitas non est actus purus in omni gradu. Probas maiorem. Præfata Primitas est Primitas in uno gradu : ergo est actus purus in uno gradu.

253 Respondeo ad instantiam negando antecedens. Ad probationem distinguo maiorem. Talis Primitas est actus purus in uno gradu, includens rationem actûs puri in cæteris gradibus, concedo maiorem : non includens rationem actûs puri in cæteris gradibus, nego maiorem. Deinde distinguo minorem : actus purus in uno gradu non est actus purus in omni gradu, si sit actus purus in gradu superiore non includens rationes actûs puri in gradibus inferioribus, concedo minorem : si sit actus purus in gradu inferiore includens rationes omnes actûs puri in gradibus superioribus, nego minorem. Ad probationem maioris distinguo antecedens : Præfata Primitas est primitas in uno gradu, includens rationem primitatis in cæteris gradibus, concedo antecedens : non includens rationem primitatis in cæteris gradibus, nego antecedens, & iterum consequentiam secundum distinctionem datam.

254 Igitur hoc intercedit discrimen inter actum purum in gradu entis, substantiæ, viventis, & actum purum in gradu intellectualitatis, quod ratio actus puri in aliis gradibus est ratio superior ad actum purum in gradu intellectualitatis ; ratio vero actus puri in gradu intellectualitatis est ratio inferior ad rationem actûs puri in aliis gradibus : & cum conceptus superioris sit de conceptu inferioris, & non e converso, uti explicavimus in Logica tractatu 2. disp. 3. sectione 1. q. 2. idcirco actus purus in gradu intellectualitatis, licet sit actus purus in uno gradu, importat rationem actûs puri in omni gradu superiore, ac per consequens est actus purus
omni-

omnino. Sicut enim ex eo, quòd hæc formalitas sit intelligentia, sequitur, quòd sit ens, substantia, vivens, & non econtrariò; cùm intelligentia sit ratio inferior ad ens, substantiam, & vivens; sic in proposito discurrendum de actu puro in gradu intelligentiæ ad rationem actus puri in gradibus superioribus.

255 Ex præfata doctrina infertur adversùs Mag. de Castilla in hac quæstione n. 191. quòd pri- De Castil.
mitas, asseitas, actualitas, excellentia, independentia &c. utpote conceptus communes omnibus prædicatis quidditativis, non constituunt ultimò Naturam Divinam. Nec obstat, quòd conceptus entis, substantiæ, viventis, denique spiritualis, omnes sint communes Deo, & creaturis; non verò primitas, asseitas, actualitas, excellentia, & independentia. Nam ex hoc solum sequitur, quòd priores conceptus sint universaliores posterioribus, non autem, quòd isti non sint conceptus communes prædicatis omnibus Dei; ex quo non possunt habere rationem ultimi constitutivi Metaphysici Naturæ Divinæ. Opus igitur est, quòd ultimum constitutivum Naturæ Metaphysicum non solum sit actus purus à se, excellens, & independens, verum etiam, quòd ita sit in omni gradu per inclusionem ipsorum, sive, ut propriè loquar, per identitatem formalem intentionalem sui conceptus cum conceptu superiorum, modo sup. exposito.

256 Replicabis. Licèt sit bona ista argumentatio: *Hæc formalitas est intelligentia: ergo est ens, substantia, vivens*; tamen ista mala est: *Hæc formalitas est Prima Intelligentia: ergo est primum ens, prima substantia, primum vivens*: ergo non stat solutio. Probas antecedens. Tametsi sit bona ista: *Hæc formalitas est animal: ergo est ens, substantia,*

tantia, & vivens, nihilominus ista est mala: *Hoc est primum animal: ergo est primum ens, prima substantia, primum vivens: ergo similiter.* Antecedens liquet; quia primum animal certò non est primum ens, nec prima substantia, nec primum vivens.

257 Respondeo ad replicam negando antecedens Ad probationem, concedo antecedente, nego consequentiam. Disparitas est: quia, ut aliquid sit primum animal, satis est, quòd in ipso primò reperiatur differentia constitutiva animalis contrahens rationem viventis, idest, quòd sit primum, in quo præfata differentia contrahens vivens reperitur. Unde opus non est, quòd sit primum vivens. Ast, ut aliqua formalitas sit Prima Intelligentia, sumpta ly, *Prima*, in sensu supra explicato, necesse est, quòd sit actus purus omnino, ac per consequens omnino excellens supra omnes intelligentias; & cùm intelligentiæ omnes sint entia, substantiæ, &c. benè sequitur, quòd Prima Intelligentia dicat excellentiam super talia entia, tales substantias, & cæt. ac per consequens, quòd sit primum ens, prima substantia, primum vivens, semel quòd sit Prima Intelligentia.

258 Urgebis: Ergo prædicatum ultimò constituens Metaphysicè Naturam Divinam consistit in actu puro omnino, idest, in omni gradu: ergo consistit in omnimoda asseitate: ergo Baconius nihil de novo docet in hac quæstione. Respondeo ad urg. concessâ primâ illatione in sensu supra exposito, negando secundam, & tertiam. Quia licet actus purus omnino, sive in omni gradu, importet omnimodam asseitatem, non tamen econversò; nam actus purus omnino, & in omni gradu non est prædicatum transcendens per prædicata quidditativa; nul-

nullum enim, præter Intelligentiam Primam, five præter Primitatem in gradu intelligendi, est actus omnino purus, seu purus in omni gradu; (loquor in esse obijcibili ad nostrum intellectum) ast omnimoda asseitas transcendens est per omnia prædicata quidditativa; quia per asseitatem omnimodam, nihil aliud intelligo, quàm esse à se omnibus modis, idest, per exclusionem potentiae essendi ab alio, non solum causaliter, sed etiam originativè; neque enim est in Deo alius modus essendi à se. Cum autem esse à se istis modis conveniat omnibus prædicatis quidditativis, nempe Enti Divino, Substantiæ Divinæ, Viventi Divino &c. siquidem, ut berè advertit Mag. Zagaglia, ubi supra sectione 1. n. 8. nullo prædicatum quidditativum, etiam inferius, importat continentiam radicalem, five originativam respectu alterius, idcirco asseitas omnimoda est transcendens per omnia prædicata quidditativa, quod non competit actui omnino puro supra explicato, videlicet actui puro continenti omnes superiores gradus. Ex quo patet quid novi in hac controversia dicat Baconius. Hinc

Zagaglia.

259 Deduces, quòd, cùm definitio debeat dari per illa prædicata, quæ perfectiora, & nobiliora sunt, quæque habent rationem originis omnium aliorum prædicatorum, quæ in re definita reperiuntur, si Deus, qui lucem habitat inaccessibilem, rectè à nobis definiri posset, optimè definiretur per esse Intelligentiam Primam, eò quòd iste sit conceptus perfectissimus, quem ex naturalibus de illo habere possumus, ut inquit Resolutus ubi sup. in principio quæstionis allegatus.

DISPUTATIO IV.

De divisione Entis in decem Prædicamenta.

S E C T I O I.

De Prædicamento Substantiæ.

Q U Æ S T I O I.

Quid sit Substantia?

260

RESOLUTIO : Substantia, de qua est quæstio, nempe prædicamentalis, optimè definitur sic : *Ens per se existens, sive subsistens radicaliter.* Deducitur ex Do-

Bacon.

ctore in 1. dist. 8. art. 2. §. 1. vers. *Secundus*, ibi : *Substantia non est prædicamentum ratione, quâ aliqua subsistunt in ea, & quâ aliis subsistat, quod est idem, sed qua subsistit in se.* Tenent Resolutionem

Zagaglia.

Mag. Zagaglia tom. 2. p. 1. disp. 5. sectione 1. §. 2.

Aymus.

num. 16. Mag. Aymus part. 2. Metaph. dist. 1. vers.

Garcia.

Substantiam Mag. Garcia Metaph. dist. 2. q. 2. art. 1.

§. 3. n. 506. Cæterique Expositores Resoluti, licet

aliqui verbis differant. Definitio est communis inter

Thomistas, qui eam deducunt ex D. Angelico 1. p.

D. Thom.

q. 3. art. 5. ad primum. Verum nec D. Thomas, nec

Thomistæ eâdem incedunt viâ, qua nostri cum Re-

soluto. Ad intelligentiam præfatæ definitionis in via

Baconii,

261



Prænoto primò, Substantiam non accipi

cipi in præfenti pro effentia ; cùm effentia aliquando accidentia etiam comprehendat ; etenim albedo est de effentia concreti albi. Nec pro quacumque entitate diftincta ab accidentibus fumitur modò Subftantia , aliàs comprehenderet materiam , & formam Subftantialem , de quibus hîc non est fermo , eò quòd fint Subftantiæ incompletæ. Igitur in præfenti agendum tantùm de Subftantia completa , quæ est Subftantia prædicamentalis.

262 Prænoto fecundò ex observatis à Mag. Zagaglia , ubi fup. citato , Subftantiam prædicamentalem poffe confiderari fub diverfis gradibus : primò , fecundùm gradum effentiæ præcifè , ideft , in potentia , antequam creetur , vel exiftat : Secundò , fecundùm gradum exiftentiæ , ideft , poftquam eft actu creata : Tertiò , fecundùm gradum fubfiftentiæ , ideft , quatenus eft incommunicabilis & completa : Quartò , fecundùm rationem fubftandi accidentibus , ideft , prout recipit actualiter accidentia , & ea fuf-tentat. Subftantia fub primo tantùm gradu non confideratur ut Subftantia prædicamentalis , quippe eft incompleta , nec ullam dicit actualitatem. Sub fecundo gradu confideratur ut completa tantùm in effe individui naturæ ; eò quòd fub tali gradu non fit formaliter fubfiftens. Sub tertio gradu , in quo confideratur formaliter fubfiftens , eft completa in ratione perfonæ. Unde in fecundo , & tertio gradu confideratur ut Subftantia prædicamentalis ; nec eft neceffe , quòd fubftet accidentibus pro illo inf-tanti naturæ , cùm antecedenter , five pro priori ad accidentia , jam natura intelligatur completa , modo nuper explicato.

263 Prænoto tertiò , Subfiftentiam in fententia Baconii effe effectum formalem naturæ Subftantialis , præcontinèrique in ipfa originativè. Ex

quo sequitur, quòd pro priori ad ipsam subsistentiam formalem, sive ad naturam formaliter subsistentem, sit natura Substantialis jam constituta in suo esse per subsistentiam, non formalem, sed radicalem; cùm sit jam actu existens, quod in rei veritate idem est, ac radicaliter subsistere. His prænotatis,

264 Probo bonitatem definitionis, & primò sic: Illa est bona definitio, quæ constat genere, & differentia, vel aliquo agente vicem generis, & rationem differentię; sed ita se habet nostra definitio: ergo. Maior liquet. Probo minorem. Talis definitio per particulam, *Ens*, ostendit convenientiam Substantię cum accidente. Deinde per reliquas particulas non modò assignat differentiam ab accidente, sed etiam ab omni eo, quod non est Substantia prædicamentalis, ut melius ex infra dicendis constabit: ergo constat genere, & differentia.

265 Secundo sic: Talis definitio est juxta mentem SS. Patrum: ergo cæteris definitionibus præferenda. Probo antecedens. D. Augustinus l. 7. de Trinitate cap. 4. in fine, sic loquitur: *Ab eo, quod*
D. Dam. *est subsistere Substantiam dicimus.* D. Joannes Damascenus Dialect. cap. 39. de Substantia, sic: *Substantia est res per se existens, nec alio ullo, ad hoc*
D. Isidor. *ut sit, opus habens.* D. Isidorus l. 1. Differentiarum cap. 4. sic: *Substantia est id, quod non est ab alio, sed semper ex se est.*

266 Tertiò sic: Dicta definitio explicat optimè constitutivum Substantię prædicamentalis per hoc, quòd sit Ens per se existens, sive subsistens radicaliter: ergo. Probo antecedens. Per id explicatur optimè constitutivum Substantię prædicamentalis, quo posito, Substantia intelligitur completa, & reposita in recta serie prædicamenti; sed sic intelligitur,

telligitur, ex eo, quòd sit Ens per se existens, sive subsistens radicaliter, ut ex se clarescit: ergo.

Proponuntur objectiones, & dissolvuntur.

267 **N**ostræ resolutioni opponuntur innu-
meri AA. in varias distributi senten-
tias. Prima docet, Substantiam prædicamentalem
meliùs definiri per negationem essendi in alio; cùm
hoc sit de constitutivo Substantiæ. Ita Porphyrius in Porphy.
Interrogationibus cap. 1. de Substantia, Deuxipus Deuxipus
l. 2. quæstionum cap. 17. Soncin. 5. Metaph. q. 14. Soncin.
& alii Veteres. Secunda tenet, Substantiam, de qua
loquimur, definiri debere per substatere accidentibus.
Ita Boetius, & multi ex Latinis, apud Didacum Boetius.
Masium sectione 2. in cap. 1. Categor. q. 6. vers. Didacus.
Severinus. Adversantur etiam PP. Conimbricenses, Conimbr.
& alii Doctores Societatis dicentes, nostram defi-
nitionem non esse essentialem. Pro Authoribus pri-
mæ sententiæ

268 Objicies primò. Substantia prædica-
mentalis debet definiri per negationem essendi in
alio: ergo definitio assignata non stat. Probas ante-
cedens. Substantia prædicamentalis essentialiter non
est accidens: ergo debet definiri per negationem
essendi in alio. Antecedens est certum. Probas con-
sequentiam. Accidens definitur per hoc, quod sit
in alio: ergo Substantia prædicamentalis debet de-
finiri per negationem essendi in alio. Respondeo ad
objectionem negando antecedens. Ad probationem
distinguo, seu explico antecedens: Substantia præ-
dicamentalis essentialiter non est accidens, ita quòd
non esse accidens consequatur ad primarium Sub-
stantiæ conceptum, concedo antecedens; ita quòd
sit primarius conceptus Substantiæ, nego antece-
dens,

dens, & consequentiam. Ad probationem, concessio antecedente, nego consequentiam. Quia cum tam Substantia, quam accidens sint entitates positivæ, per conceptum positivum pariter definiri debent; negatio enim non est primus conceptus, qui in rebus positivis reperitur, sed priori ad negationem constitui debet quidquid positivum est, ex quo in negatione essendi in alio nequit ita bene consistere definitio Substantiæ prædicamentalis.

269 Objicies secundò. Substantia constituitur in esse Substantiæ per id, quod addit supra Ens; sed quod addit supra Ens non potest esse aliquid positivum: ergo est negatio, per quam debet definiri. Maior ex se claret. Probas minorem. Si illud additum esset aliquid positivum, esset positivum reale; sed positivum reale non potest esse additum Enti; alioquin Ens reale per Ens reale esset coarctatum ad Substantiam: ergo. Respondeo ad objectionem, concessâ maiore, negando minorem. Ad probationem, concessâ etiam maiore, nego minorem. Neque obstat insinuata probatio; quia tametsi Ens reale per Ens reale coarctetur ad Substantiam, coarctatur Ens reale in communi per Ens reale signatum, quod jam superabundat Enti in communi, cum sit extra illius conceptum, & differentia constitutiva Substantiæ, per quam unâ cum ratione Entis communi ipsa à nobis definitur.

270 Objicies tertio pro AA. secundæ sententiæ. Aristoteles cap. de Substantia istam definit per substatere accidentibus ibi; *Substantia, quæ propriè principaliter substatere dicitur*: ergo sic definiri debet. Confirmabis ex D. Isidoro, hîc communiter allegato, dicente: *Substantia est quæ propriè substatere dicitur*: ergo. Respondeo ad objectionem negando antecedens; quia Philosophus, præfato loco, non

Aristot.

D. Isidor.

non definivit Substantiam per conceptum sibi essentialem, sed tantum eam descripsit per proprietatem convenientem Substantiæ creatæ.

271 Ad authoritatem D. Isidori respondeo, S. Doctorem locutum secundum etymologiam Substantiæ, quæ non est ratio urgens ad hoc ut dicamus, Substantiam per substare accidentibus constitui. Habemus exemplum vulgare in lapide, qui à ledendo pedem etymologiam sumpsit, & nihilominus non per id constituitur. Accedit quòd D. Isidorus l. 1. Different. cap. 4. docet, quòd Substantia est id, quod semper ex se est, idest, per se existens, ut constat ex secundo nostræ resolutionis fundamento. Unde licet Substantia (creata) etiam substat accidentibus, id habet secundario; primario enim, & principaliter à subsistentia dicitur. Audiendus Bacconius in 1. dist. 8. q. un. art. 2 §. 1. prope finem: *Baccon.*
Quando ergo dicis, quòd Substantia dicitur subjici accidentibus concedo; sed hoc non excludit, quin etiam dicatur à subsistentia & principalius etiam; cum sua subsistentia sit sibi ratio per quam potest aliis subjici. Sicut secundum aliquos habitus est (aliquid) absolutum principalius, licet sit simul relativum.

272 Objicies quartò Aristoteles in hoc cap. docet, primas Substantias esse magis Substantias, quia magis substant: ergo à substantando definit Aristoteles Substantiam. Respondeo ad objectionem distinguendo antecedens: docet primas Substantias esse magis Substantias &c. quantum ad proprietatem, & exercitium Substantiæ, concedo antecedens: quantum ad esse essentialia Substantiæ, nego antecedens, & consequentiam. Solum primum intendit Aristoteles, non secundum; non enim definivit, sed tantum descripsit Substantiam, ut supra dicebam,

273 Obji-

Conimbr.

273 *Objicies quintò pro PP. Conimbricentibus. Definitio Substantiæ supra exposita non traditur per proprium, & rigorosum genus: ergo non est essentialis. Probas antecedens. Traditur per Ens; sed Ens non est genus rigorosum; cùm non sit univocum, sed analogum: ergo non traditur per proprium, & rigorosum genus. Respondeo ad objectionem, concesso antecedente, distinguendo consequens: non est essentialis in rigore logico, concedo consequentiam; in sensu lato, nego consequentiam. Est igitur essentialis talis definitio, quatenus non traditur per proprietatem, optimèque explicat essentiam definiti.*

274 *Objicies sextò. Talis definitio traditur per proprietatem: ergo est descriptiva. Probas antecedens. Traditur per subsistentiam; sed hæc est proprietas Substantiæ: ergo traditur per proprietatem. Respondeo ad objectionem negando antecedens. Ad probationem distinguo maiorem: traditur per subsistentiam radicalem, concedo maiorem: per subsistentiam formalem, nego maiorem. Deinde nego minorem; quia subsistentia radicalis est ipsa essentia Substantiæ; subsistentia verò formalis, in sententia Baconii, est effectus ejusdem Substantiæ in actu posita.*

275 *Objicies septimò. Aristoteles definivit Substantiam; sed nullo modo per subsistentiam; quippe subsistentiam penitus ignoravit: ergo tua definitio non est Aristotelica. Respondeo ad objectionem negando maiorem; quia Philosophus tantum divisit Substantiam in primam, & secundam, quas optimè manifestat, & explicat; Substantiam autem prædicamentalem generaliter acceptam non definivit, forte quia non potest definiri per genus rigorosum, inquit Mag. Blasco tom. 1. dist. 15. q. 1. art.*

Blasco.

1. num. 3. quo non obstante, Doctores, & nos cum ipsis pro quidditativa definitione laboramus.

276 Objicies octavò. Talis definitio convenit tam Substantiæ completæ, quàm incompletæ: ergo non est propria Substantiæ prædicamentalis, quæ debet esse completa. Respondeo ad objectionem negando antecedens; quia præfata definitio tantum convenit Substantiæ per se existenti, quæ etiam pro priori ad formalem subsistentiam est completa, saltem in esse individui naturæ, tametsi per subsistentiam formalem reddatur completa in esse personæ, uti supra dictum, & expositum fuit.

277 Objicies nonò. *Per se subsistere* potest separari à Substantia: ergo nequit esse de constitutivo ipsius. Probas antecedens ex Mysterio Incarnationis. Respondeo ad objectionem distinguendo antecedens: *Per se subsistere* formaliter, potest separari à Substantia, concedo antecedens: *Per se subsistere* radicaliter, nego antecedens, & consequentiam. Unde Substantia non constituitur per subsistentiam formalem, sed radicalem, sive originativam, quæ est per se existens, hæc autem separari nequit à Substantia actuali; ablatâ quippe existentia, non remanet Substantia, nisi tantum in potentia. Ex Mysterio autem Incarnationis solum probatur Substantia absque subsistentia formali creata, non sine radicali.

278 Instabis. Existentia est accidentaria creaturæ; sed Substantia non constituitur per aliquod accidens: ergo neque per existere per se, sive subsistere radicaliter. Respondeo ad instantiam, concessâ maiore, & minore, negando consequentiam. Quia in maiore sumitur existentia pro persistencia in esse, sive pro exercicio ejusdem existentia, quod certò accidentale est creaturæ. In con-

sequentia verò sumitur existentia pro reali gradu essendi Substantiæ, cui convenit essentialiter esse completam in esse individui, ac per consequens esse Ens per se existens, sive subsistens radicaliter.

279 Replicabis. Causa non potest constitui per esse radicem effectûs, nisi effectûs tantum primarii; sed subsistentia non est effectus primarius naturæ Substantialis, benè verò secundarius: ergo natura Substantialis non potest constitui per esse radicem subsistentiæ. Respondeo ad objectionem negando maiorem; quia quemadmodum rationale non modò constituitur per potentiam ad apprehendendum, sed etiam ad discurrendum, non obstante, quòd apprehensio sit prior discursu, ita Substantia non tantum per esse radicem effectûs primarii, sed etiam secundarii constituitur.

280 Objicies decimò. Existere per se convenire potest accidenti: ergo non est de constitutivo Substantiæ. Probas antecedens. Nulla apparet repugnantia in eo, quòd Deus producat aliquod accidens per se existens, sive subsistens; quinimò de facto in Eucharistia habet accidens esse per se: ergo existere per se convenire potest accidenti. Respondeo ad objectionem distinguendo antecedens: existere per se convenire potest accidenti, Divinitus, concedo antecedens: connaturaliter, nego antecedens. Bene verum est, quòd constitutivum rei nec Divinitus potest alteri convenire: cæterum existere per se connaturaliter, & sine exigentia ad subiectum, quod est de essentia Substantiæ, nec Divinitus competit accidenti.

281 Objicies undecimò. Differentiæ divisiivæ Substantiæ non sunt formaliter Substantia; atqui illis convenit existere per se: ergo talis definitio convenit aliis à definito. Respondeo ad objectionem,

ctionem , concessâ maiore , & minore , negando consequentiam. Nam tametsi talis definitio conveniat differentiis Substantiæ , ipsæque non sint formaliter Substantia , sunt nihilominus Substantia realiter , exquo non sequitur , quòd præfata definitio conveniat aliis à definito ; conceptus enim existendi per se potius respicit entitatem physicam , quàm metaphysicam.

282 Obijcies duodecimò. Anima rationalis , adhuc separata , est Ens per se existens ; sed non est Substantia prædicamentalis , eò quòd non sit completa : ergo idem , quod supra. Respondeo ad objectionem distinguendo maiorem : est Ens per se existens ordinatum ad existendum in alio , nempe in corpore , concedo maiorem : est Ens per se existens , non ita ordinatum , nec exigens in alio existere , nego maiorem. Deinde , concessâ minore , nego consequentiam. Quia animæ non convenit per se existere eo modo (independenti ab alio) proprio Substantiæ completæ , & prædicamentali , quæ in præsentia definitur.

283 Obijcies decimo tertiò. Præfata definitio non convenit materiæ primæ ; sed materia prima est Substantia : ergo non convenit omni Substantiæ. Probas maiorem. Materia prima in via Baconii non habet propriam existentiam : ergo definitio præfata non convenit materiæ primæ. Respondeo ad objectionem concessâ maiore , distinguendo minorem : est Substantia incompleta , concedo minorem : Substantia completa & prædicamentalis , quæ hîc tantùm definitur , nego minorem , & consequentiam intellectam de Substantia prædicamentali. Ex dictis

284 Deduces , Deum Optimum Maximum non excludi à prædicamento Substantiæ , siquidem

genus supremum Substantiæ de Deo formaliter prædicatur; etenim genus Substantiæ contrahitur per intellectivum, quod Deo, & homini commune est. Nec obstat primò, quòd Substantia dicatur substantiare accidentibus; nam conceptus Substantiæ est absolutus, & prior conceptu substandi, qui est relativus, ex quo non est de conceptu essentiali Substantiæ prædicamentalis ut sic. Nec obstat secundò, quòd Substantia Divina sit perfectio infinita actualis potentialitatem, & perfectibilitatem excludens, non enim dicimus, quòd potentialitas, aut perfectibilitas sit de ratione Substantiæ contractæ ad Deum; solus quippe conceptus Substantiæ ut sic præcisus, & indifferens ad Deum, & creaturam dicit potentialitatem, aut perfectibilitatem. Unde remotâ omni imperfectione, non est, cur Deus non collocetur in Substantiæ prædicamento, ut jam diximus ex Baconio tom. 1. tractatu 4. disp. 2. sectione 1. in fine. Scio aliquos, etiam ex nostris, docere solam perfectibilitatem physicam repugnare Deo, non intentionalem, de quo videndus Mag. Blasco tom. 1. Philosoph. l. 5. dist. 14. q. 2. art. 3. n. 41.

Blasco.

Q U Æ S T I O II.

Quotuplex sit Substantia prædicamentalis?

285 **R**ESOLUTIO: Substantia prædicamentalis dividitur in primam, & secundam. Prima definitur sic: *Quæ in subiecto non est, nec de subiecto dicitur.* Hæc est singularis, ut Petrus, qui in subiecto non est, idest, non inhæret; alioquin potius esset accidens, quàm Substantia: nec de subiecto dicitur, idest, non prædicatur, nisi tantum identicè. Secunda sic: *Quæ in subiecto non est,*
sed

sed de subiecto dicitur. Hæc est universalis, ut homo, qui licet non sit in subiecto per inhaerentiam, sicut accidens, prædicatur tamen de subiecto tanquam de inferiori. Habet præfata divisio membra distincta; nam etsi Substantia universalis sit de essentia singularis, v. g. homo de essentia Petri, nihilominus à Petro distinguitur formaliter intentionaliter, quia homo, qui est secunda Substantia, non est formaliter intentionaliter Petrus, etsi Petrus sit formaliter intentionaliter homo. Hæc doctrina clarescit ex dictis in Log. tractatu 2. disp. 3. sect. 1. quæst. 2.

286 Difficultas, quæ præfata divisionem obscuram reddit, est hæc: Divisum talis divisionis coincidere videtur cum uno membro dividente, nempe cum secunda Substantia; siquidem divisum est Substantia communis, & cum talis sit secunda Substantia, videtur divisum in hac divisione coincidere cum uno membro dividente. Cæterum dicendum cum Mag. Didaco à JESU Logicæ disp. 12. Didacus, q. 4. vers. *Dico secundo*, & Complut. nostris, eadem Complut. disp. q. 2. num. 23. quod divisum hujus divisionis est Substantia prædicamentalis secundum se, idest, accepta secundum sua prædicata essentialia, præscindens ab eo, quod sit universalis, vel particularis.

QUÆSTIO III.

Quot sint Substantiæ proprietates?

287 **R**ESOLUTIO: Proprietates Substantiæ sex communiter assignantur à Philosophis. Prima: *Quod non sit in subiecto per inhaerentiam*; & hæc proprietas convenit tam primæ, quam secundæ Substantiæ, & non modò Substantiæ com-

Garcia.

completæ, verùm & incompletæ, quæ estò sit in subiecto informationis, non tamen in subiecto in-
hæssionis. Secunda: *Quod prædicetur univocè de in-*
ferioribus. Docet Mag. Garcia hîc q. 2. art. 4. n. 556.
quòd hæc proprietas intelligenda sit de univocatio-
ne logica. Ast videtur incohærenter procedere;
nam si univocatio logica esset proprietas Substan-
tiæ prædicamentalis, hæc prædicaretur univocatio-
ne logicâ de Deo, & creatura, cùm Deus etiam col-
locetur in prædicamento Substantiæ, juxta doctri-
nam expressam Resoluti, quam sustinet hic Author;
sed Substantia non prædicatur univocatione logica
de Deo, & creatura, juxta probabiliorem ejusdem
Resoluti sententiam traditam, & approbatam ab
eodem Garcia dist. 2. q. 1. art. 4. §. 2. igitur videtur
procedere incohærenter.

288 Verùm pro concordandis doctrinis
huius Magistri observandum est primò, sufficere
univocationem logicam ad Substantiam prædica-
mentalem, & non requiri semper univocationem
metaphysicam. Utramque explicavimus in Logica
tractatu 4. disp. 1. sectione 2. n. 718. Observandum
est secundò, Deum non reponi in prædicamento
Substantiæ, nisi hæc sit depurata ab imperfectioni-
bus limitationis, finitatis, potentialitatis &c. quo
pacto supremum genus Substantiæ importat univo-
cationem logicam, ut tenet citatus Garcia. Quod
si hic docet, ubi supra, Substantiam non esse logicè
univocam ad Deum, & creaturam, intelligendus
est de Substantia secundùm rem generis, & ratio-
nem formalem simul, sed non de Substantia depu-
rata ab imperfectionibus; hoc enim modo tantùm
analogiam importat, exquo non competit inferiori-
bus per prædicationem æque primò. Ita procedit
solutio cujusdam objectionis à nobis adductæ in Lo-
gica

gica tractatu 2. disp. 3. n. 578. Alioqui enim nos etiam posset quis incohærentiæ arguere.

289 Tertia: *Quòd significet hoc aliquid*, idest, quòd Substantia sit per se individua; nam accidentia carent propriâ individuatione, cum solum à Substantia propriè individuentur. Verùm præfata proprietas non convenit omni Substantiæ prædicali, sed tantum Substantiæ primæ. Quarta: *Quòd non habeat contrarium*: hæc convenit tam primæ, quàm secundæ Substantiæ; nihil enim assignabitur, quod propriè sit contrarium Substantiæ; accidens enim respicit Substantiam tanquam suum subiectum, ex quo nequit esse contrarium Substantiæ. Potest nihilominus Substantia radicaliter habere contrarium, ut v. g. forma ignis, quæ radicat qualitatem formali-ter contrariam qualitati aquæ. Non soli Substantiæ, sed quantitati etiam convenit præfata proprietas.

290 Quinta: *Quòd non suscipiat magis, & minus*, idest, quod non intendatur, aut remittatur per maiorem, aut minorem subiecti radicationem, sicut qualitas; Substantia enim, cum non sit in subiecto, non potest magis, aut minus radicari in illo: & hæc proprietas convenit etiam quantitati, ut infra suo loco dicemus. Docet Baconius, Bacon. aliquam Substantiam materialiter acceptam suscipere magis, & minus secundum gradus translationis, ut docuimus ex eodem Doctore in Compendio pro Diverso, & Eodem disp. 2. n. 187. Sexta: *Quòd sit susceptiva contrariorum*; siquidem est subiectum commune accidentium, quæ sunt formæ contrariè oppositæ: & hæc proprietas licet conveniat primæ Substantiæ, non tamen omni; Deus enim, qui certò est prima Substantia, non suscipit formas contrarias. Addit Mag. Garcia, Garcia. quòd si *contraria* analo-

analogicè sumuntur pro impossibilibus, profecto omnis Substantia erit contrariorum susceptiva.

291 Præter istas proprietates, aliam assignat Aristoteles 7. Metaph. cap. 1. nempe, *Quod sit prior accidentibus*, per hæc verba, ibi: *Patet primum horum ens esse ipsum quid est; quodque Substantiam significat*: & hæc proprietas maximè convenit Substantiæ formaliter acceptæ, quæ ita independens est ab ipsis accidentibus, ut ab omnibus valeat separari. Agunt Philosophi hoc loco de substantia, inquiruntque: quomodo natura Substantialis distinguatur ab illa. Verùm hoc de puncto in Compendio pro Diverso, & Eodem ubertim disputavimus.

QUÆSTIO IV.

Utrum Substantia materialis antecederet ad quantitatem habeat partes physicè distinctas?

292 **R**ESOLUTIO est affirmativa, & expressa Doctoris in 3. dist. 15. q. 1. art. 2. §. 3. per totum, quem sequuntur Mag. Aymus parte 2. Metaph. dist. 1. q. 2. art. 2. Mag. Blasco tom. 1. Philos. libro 5. dist. 15. q. 3. art. 1. num. 35. Mag. Garcia in Metaph. dist. 2. q. 2. art. 3. §. 1. n. 539. Tenent, etiam ex nostris, Mag. Bona spes, Mag. Castelvi, Mag. Blanc. apud ipsum Garciam citatum. Ex Thomistis Lerma, Martinez de Prado, & Ortiz, quos citat, sed non sequitur Illustrissimus Joannes Cano infra relatus. Item Sotus cap. de Quantitate q. 2. Didacus à JESU in Log. disp. 13. q. 2. Illustrissimus Palanco Logicæ tractatu 6. q. 5. Ex Scotistis ferè omnes, Subtili duce, in 2. dist. 12. q. 2. Ex Jesuitis Suarius tomo posteriori Metaph. disp. 40. sectione

Baccon.
Aymus.
Blasco.
Garcia.
Bona spes
Castelvi.
Blanc.
Lerma.
Martinez.
Ortiz.
Cano.
Sotus.
Didacus.
Palanco.
Scotus.
Suarius.

Etione 4. n. 7. Oviedo ibidem Controversia 7 puncto 2. §. 2. & alii. Fuit hæc eadem sententia antiquorum Nominalium Aureoli, Gofred Gabriellis, & Okam quos citat, & sequitur noster Didacus à JESU, ubi nuper laudatus. Ante resolutionis probationem

Oviedo.
Aureolus.
Gofred.
Gabriel.
Okamus.

293 Prænoto primò, Substantiam aliam esse spiritualement, aliam materialement. Spiritualement, qualis est Deus, Angelus, & anima rationalis, caret partibus physicè distinctis, estque indivisibilis non tam quantitativè, sed etiam entitativè. Materialis, v. g. leo, equus, & quævis alia corporea, ratione suæ materialitatis continet partes physicè sive entitativè distinctas, de hac procedit quæstio: an talis distinctio proveniat à quantitate, an detur antecederent ad ipsam?

294 Prænoto secundò, partes dici relativè ad totum, quod duplex est, unum essentiale, integrale aliud. Essentiale vel est physicum, vel metaphysicum: primum componitur ex partibus physicè distinctis, ut homo ex materiâ, & formâ: secundum ex partibus metaphysicè distinctis coalescit, ut homo ex animali, & rationali. Totum autem integrale est per ordinem ad partes, quæ integrant ipsum, sive ex quibus tale totum resultat, estò hoc sit pars respectu totius essentialis physici. Sic caput, manus, pedes &c. integrant totum corpus, quod est pars hominis physicè constituti. Quæritur ergo: an, si Deus auferret quantitatem ab ipsis partibus integrantibus, adhuc ipsæ manerent physicè, seu entitativè distinctæ, sive haberent extensionem entitativam? Affirmativam resolutionem proponimus cum Baconio. His prænotatis,

295 Probo resolutionem, & primò sic: Substantia manûs v. g. est distincta physicè à Substantia pedis; sed talis distinctio non potest provenire

Tom. Ult.

X

nire

nire à quantitate : ergo Substantia materialis antecedenter ad quantitatem habet partes physicè, sive entitativè distinctas. Probo maiorem. Quæ physicè separantur, aut separari possunt, physicè distinguuntur ; sed manus v. g. & pes separari possunt, ut experientiâ constat : ergo Probo etiam minorem primi syllogismi. Quantitas est ejusdem rationis in manu, & pede, estque forma accidentalis : ergo distinctio inter manum & pedem, cum non sit accidentalis, non potest provenire à quantitate.

296 Secundò sic : Si Deus, ut potest, separasset quantitatem, Substantiâ remanente, utique remaneret tota entitas partium corporis, quæ antea erat ; sed antea illæ partes erant entitativè distinctæ : ergo & postea. Maior, & minor probatione non indigent. Probo consequentiam. Partes, quæ realiter physicè distinguuntur, nullo pacto possunt ita identificari, ut ex illis resultet aliquid indivisibile : ergo si ante separationem quantitatis illæ partes erant entitativè distinctæ, ita & postea.

297 Tertiò sic : Ablatâ quantitate à Substantia oceani v. g. adhuc talis Substantia maneret divisibilis in partes : ergo distinctio partium aquæ oceani non provenit à quantitate, sed habetur antecedenter ad ipsam. Probo antecedens. Si talis Substantia non maneret divisibilis in partes, sequeretur, quòd homo bibens guttam illius, totum biberet oceanum ; sed hoc est ridiculum : ergo, ablata quantitate à Substantia oceani, adhuc talis Substantia manet divisibilis in partes. Siquis plura optet in favorem nostræ sententiæ, adeat supra re-
latos AA.

Proponuntur objectiones , & dissolvuntur.

298 **N**ostræ resolutioni opponuntur Capreolus, Ferrar. Soncin. Naza, & alii, quos citant, & sequuntur nostri Complutenses disp. 13. Logicæ q. 3. n. 30. Item Aquarius 1. Phys. q. 4. Illustrissimus Joannes Cano Logicæ l. 4. disp. 1. q. 4. vers. *Sit secunda*, ubi affirmat, Substantiam corpoream à quantitate præcisam nullam habere distinctionem partium, addens, hanc sententiam conformem esse menti D. Thomæ. Verùm ex opposito habemus clarum S. D. testimonium, q. 9. depot. art. 7. ibi: *Distinctio in hoc attenditur, quod una res non est alia, quod quidem non habent ex aliquo superaddito.* Eamdem defendunt extra Thomistas Toletus 1. Physicorum q. 7. Vasques in primam p. disp. 196. cap. 3. & alii viri graves, qui eam satis probabilem reddunt. Pro his omnibus, & maximè ex Complutensibus nostris

Capreol.
Ferrar.
Sonc.
Naza.
Complut.
Aquar.
Cano.
Toletus.
Vasques.

D. Thom.

299 Objicies primò, ostendendo extensionem entitativam, quam ponimus in Substantia esse superfluam. Ad recipiendam quantitatem sufficit capacitas Substantiæ; sed hæc reperiri potest sine extensione entitativa: ergo talis extensio entitativa in Substantia est superflua. Maior liquet. Probas minorem. Capacitas recipiendi albedinem in Substantia reperitur sine aliqua albedine entitativa: ergo etiam capacitas, quam habet Substantia, ut recipiat quantitatem dari potest sine extensione entitativa. Respondeo ad objectionem, concessâ maiore, negando minorem. Ad probationem, concessio antecedente, nego consequentiam. Disparitas est; quia capacitas recipiendi albedinem est mera non repugnantia, quam Substantia habet, ideoque su-

perfluum foret admittere in Substantia aliam albedinem entitativam antecedentem. Ast extensio entitativa est illa capacitas, quam habet Substantia, ut quantitas possit extendere illius partes; & cum quantitas non possit extendere partes Substantiæ, nisi hæc habeat capacitatem, ut ejus partes extendantur, opus est, quod habeat suas partes entitativè extensas. Ulterior ratio est: quia quantitas non potest extendere partes Substantiæ, nisi ipsæ sint actu extensibiles, ex quo una actu non est alia.

300 Objicies secundò, ostendendo esse impossibile extensionem entitativam in Substantia, ante quantitatem. Nulla ante quantitatem potest esse in Substantia compositio partium integralium, etiam entitativarum: ergo ante quantitatem non potest dari in Substantia extensio, aut divisibilitas entitativa. Probas antecedens. Compositio partium integralium est accidentalis: ergo nulla ante quantitatem potest esse in Substantia compositio partium integralium, etiam entitativarum. Probas antecedens. Compositio partium integralium non fit ex actu, & potentia simpliciter: ergo est accidentalis.

301 Confirmabis. Distinctio partium, etiam heterogenearum causatur ab accidentibus: ergo, illis ablatis, non manebunt partes distinctæ. Probas antecedens. Caput, & manus v. g. solum secundum figuram cum his, aut illis accidentibus distinguuntur, non materialiter, & secundum Substantiam. Similiter ossa non distinguuntur à carne quoad Substantiam, sed penes durum, & mole, quæ sunt accidentia: ergo &c.

302 Respondeo ad objectionem negando antecedens. Ad probationem nego etiam antecedens. Ad probationem, concessio antecedente, nego consequentiam; quia non est de ratione compositionis

sitionis substantialis, quòd semper fiat ex actu, & potentia, sed tantùm id necesse est ad compositionem, exqua resultat natura physica composita essentialiter. Non igitur est accidentalis illa, quæ caret actu, & potentia, si coalescat ex porcionibus, seu partibus substantialibus, uti se habet Substantia corporea antecederet ad quantitatem.

303 Ad confirmationem respondeo negando antecedens. Ad cujus probationem nego antecedens quoad ambas partes. Cùm enim Substantia capitis possit separari à Substantia manus, sequitur, quòd sint partes distinctæ quoad Substantiam. Idem dicendum de carne, & ossibus, juxta signa distinctionis realis, de quibus suo loco egimus. Nec recurrendum ad distinctionem potentialem, hæc enim validissimè impugnatur ab Illustrissimo Palanco sup. Palanco. laudato dicente, prædictam distinctionem potentialem noviter fuisse à Complutensibus inventam ad solam vim argumenti separationis effugiendam. Et quidem ex tali distinctione potenciali sequeretur una simplex natura potens multiplicari realiter in plura individua ejusdem essentiae physicae, quorum comparatione esset totum potestativum, ex quo nihil disleret ab idea illa. quæ Platoni tribuitur, ut bene observat P. Ludovicus de Loflada disp. 3. Metaph. cap. 4. n. 71. Loflada.

304 Objicies tertio. Materia prima hominis, remotâ quantitate, vel est simplex, vel composita? Si simplex erit indivisibilis. Si composita, aut primâ compositione ex actu, & potentia, aut secundâ ex subjecto, & accidente; sed prima repugnat materiæ; cùm hæc sit pura potentia; secunda verò repugnat, ubi non est prima: ergo.

305 Confirmabis primò. Si materia prima secundùm se componeretur ex partibus, necessariò
ibi

ibi esset distinctio partium; sed hæc est impossibilis in materia prima: ergo. Maior liquet. Probas minorem. Ubi est distinctio unius ab alio, necessario intervenit aliquis actus; siquidem actus est, qui distinguit, ex 7. Metaph. textu 49. sed in materia secundum se nullus est actus, cum sit pura potentia: ergo ibi non potest esse distinctio partium. Confirmabis secundò. Prius est esse, quàm maius esse; sed materia prima de se non habet esse: ergo neque habet maius esse: ergo non est divisibilis, aut extensa, etiam entitativè, sine quantitate.

306 Respondeo ad objectionem, & dico, materiam primam hominis, remotâ quantitate, esse compositam, non primâ compositione, primatu dignitatis, ex actu, & potentia, neque secundâ ex subjecto, & accidente, sed primâ, ordine naturæ, quæ petit, quòd materia pro priori ad formam habeat suam essentiam, quæ absque continuitate partium stare nequit, juxta principia Aristotelica. Est igitur materia prima, ante formam Substantialem, totum quodam homogeneous compactum ex partibus Substantialiter distinctis; cum constet variis portionibus Substantialibus puræ potentiæ.

307 Ad primam confirmationem respondeo, concessâ maiore, negando minorem. Ad probationem distinguo maiorem: ubi est distinctio unius ab alio, necessario intervenit aliquis actus, vel ordo ad actum, concedo maiorem: necessario intervenit actus formaliter, nego maiorem. Deinde, concessa minore, nego consequentiam. Quia, ut materia habeat partes distinctas, sufficit, quòd istæ dicant ordinem ad portiones formarum Substantialium, quæ continentur potentiâ in sinu materiæ, ut suo loco probavimus ex Baconio. Satis etiam est, quòd tales partes dicant ordinem ad quantitatem
divi-

divisibilem , ut inquit Illustrissimus Palanco , adducens exemplum de materia cælesti , quæ est distincta à sublunari in probabilissima sententia , (hanc tenet Bacconius) non quia habeat aliquem actum ex se , sed quoniam ex se dicit ordinem ad actum distinctum , nempe ad formam incorruptibilem. Vide super his , quæ diximus tom. 2. tractatu 1. num. 219. & n. 276. Docet Mag. Garcia ubi sup. quòd sicut materia prima ex se distinguitur à forma , quavis in se nullum actum includat , ut tenent etiam Thomistæ , ita fortè dicendum , partes materiæ absque ullo actu inter se distingui. Ad secundam confirmationem respondeo concedendo totum , præter ultimam consequentiam ; quia totum id potest materia habere à forma , vel per ordinem ad formam , absque quantitate.

Garcia.

308 Objicies quartò. Esse extensum quacumque extensione , sicut esse *quale* , est esse *secundum quid* : ergo sicut esse *quale* provenit , seu accidit Substantiæ à forma accidentali , ita etiam esse extensum quacumque extensione ; & per consequens sicut , ablatâ qualitate , Substantia non manet qualis , ita , ablatâ quantitate , non remanebit ullo modo extensa. Probas antecedens. Illud dicitur esse *secundum quid* respectu Substantiæ , per quod non potest responderi ad quæstionem , quid est esse ipsius Substantiæ ; sed esse extensum est hujusmodi : ergo. Maior liquet. Probas minorem Quærenti , quid sit homo , non respondetur , est extensus entitativè : ergo.

309 Confirmabis primò. Ridiculum est distinguere quodam esse quale entitativè , & aliud esse qualitativè , asserereque , Substantiam esse qualem primo modo , non secundo : ergo etiam distinguere quodam esse extensum entitativè , & aliud esse exten-

extensum quantitativè ; & illud primum tribuere Substantiæ secundum se. Confirmabis secundò. Si Substantia antecederet ad quantitatem haberet aliquam extensionem , sequeretur , nullum esse quantum per accidens. Probas sequelam. Si in Substantia corporea daretur extensio aliqua antecederet ad quantitatem , pari ratione poneretur etiam extensio entitativa in qualitatibus , quæ in quantitate subjunctantur ; sed hoc est alienum ab scholis : ergo

310 Respondeo ad objectionem negando antecedens. Ad probationem , data maiore , nego minorem. Ad probationem distinguo antecedens : quærenti , quid sit homo absolutè , non respondetur , est extensus entitativè , concedo antecedens : quærenti quid sit homo , ut Substantia corporea distincta ab spirituali , non respondetur , est extensus entitativè , nego antecedens. Quia ad esse simpliciter Substantiæ corporeæ spectat habere partes integrales , quæ connaturaliter petant extensionem quantitativam , ex quo ipsæ antecederet ad quantitatem sunt entitativè extensæ , seu distinctæ Dixi supra , *data maiore* , quia rationale non spectat ad esse *secundum quid* , sed ad esse *simpliciter* hominis , & tamen prædicatur de illo *in quale* , non *in quid*. Affert Poncius alias duas solutiones , videndas ; si lubet. Ex eodem

311 Ad primam confirmationem respondeo , concessio antecedente , negando consequentiam. Disparitas est : quia nullum est fundamentum , aut urgens ratio , ut distinguamus quodam esse quale entitativè , & quale qualitativè. Ast datur grave fundamentum , ex quo colligamus dari quodam esse extensum entitativè antecederet ad quantitatem , ut ex superioribus constat. Ad secundam confirmationem respondeo negando sequelam. Ad probationem,

nem, concessâ maiore, nego minorem. Nam sicut Philosophi id docent de Substantia, absque inconvenienti discurrere poterunt de qualitate corporea. Hæc pro Complutensibus.

312 Obicies quintò. Stat optimè identitas partium Substantiæ antecederet ad quantitatem cum distinctione proveniente postea à quantitate: ergo illa capacitas, quam habent partes Substantiæ antecederet ad quantitatem non est distinctio aliqua entitativa. Probas antecedens. Stat optimè, quòd eadem Substantia corporea transeat de potentia in actum: ergo & quòd transeat ab identitate ad distinctionem partium.

313 Respondeo ad objectionem negando antecedens. Ad probationem, concessio antecedente, nego consequentiam. Disparitas est longa: quia potentia, & actus non variant essentiam; cum actus sit gradus essendi ejusdem essentiæ, quæ erat in potentia, ut ex Baconio distinctè explicuimus tom. 2. tractatu 1. disp. 2. sectione 1. q. 8. & sæpe alibi. At identitas, & distinctio entitativa variant essentiam, eò quòd sint termini maximè oppositi. Semel ergo, quòd Substantia sit simplex ex se, & secum identificet actualem simplicitatem, impossibile est, quòd, eadem permanente, habere valeat partes distinctas. Alioquin natura Angeli, tametsi actu simplex, posset in partes dividi beneficio cujusdam accidentis nobis ignoti. Advertit Mag. Garcia, ubi sup. objectionem Garcia. multum probare, nempe, non repugnare transitum à corporeo ad incorporeum, & ab infinito ad finitum.

314 Obicies sextò. Si Substantia corporea haberet partes entitative distinctas antecederet ad quantitatem, daretur ad illam per se motus; sed hoc est contra doctrinam Philosophi 5. Physico-

Aristot.

rum cap. 2. ibi: *Cum autem neque in Substantia, neque in relatione, neque in actione, passioneve sit motus &c.* ergo non stat resolutio cum doctrina Aristotelica. Probas maiorem. Si Substantia corporea haberet partes entitativè distinctas antecederet ad quantitatem, posset illa per istas successivè acquiri; sed, hoc posito, daretur ad Substantiam per se motus: ergo. Respondeo ad objectionem negando maiorem. Ad probationem, data maiore, nego minorem. Quia, ut diximus tom. 3. tractatu 3. disp. 1. sectione 2. q. 1. ad rationem motûs per se strictè sumpti requiritur, quòd observentur duæ conditiones, scilicèt, quòd versetur inter terminos positivos contrarios, & quòd tales termini habeant latitudinem successivam percurrendam, quæ quidem conditiones, ut ibidem ostendimus, certò non observantur in motibus generationis, & corruptionis, qui propriè ad Substantiam terminantur. Dixi, *data maiore*, quia quanvis nutritio sit actio successiva, solùm est talis ratione dispositionum, siquidem si materia alimentaria esset in instanti disposita, certè in instanti daretur nutritio.

315 Objicies septimò. Ablatâ quantitate à Substantia corporea, ipsa conflueret in punctum; sed ex hoc sequitur, Substantiam non componi ex partibus distinctis: ergo Substantia, præcisâ quantitate, caret partibus physicè distinctis. Maior liquet. Probas minorem. Si Substantia corporea in punctum reducta componeretur ex partibus distinctis, posset dividi ab agente naturali; sed agens naturale non valeret ipsam dividere, semel in punctum reductam: ergo. Respondeo ad objectionem, datâ maiore, negando minorem. Ad probationem nego maiorem; quia agens naturale agit in passum per contactum physicum, qui recipi non potest in Substantia corporea,

porea, quantitate denudatâ, qua de causa etiam non potest recipi in Substantia spiritali. Ast cum Substantia corporea, etiam quantitate ablatâ, bene à Deo, & ab Angelo valeret dividi, ex hoc arguitur, quòd ipsa partes distinctas contineret. Dixi sup. *data maiore*, quia multi negant, quòd Substantia corporea denudata quantitate in punctum confluere, eo ducti fundamento, quòd non esset maior ratio, cur conflueret ad unum punctum istius spatii, quàm ad quodcumque aliud. Unde existimant, Substantiam ex se habere partes tam in ordine ad se, quàm in ordine ad locum, etiam quantitate ab ipsa ablatâ. Ita Joannes Poncius Log. disp. 14. q. 2. conclus. 4. num. 19 aliique, qui satis probabiliter procedunt. Poncius.

316 Objicies octavò. Si Substantia corporea antecederet ad quantitatem haberet partes physicè distinctas, esset impenetrabilis; sed hoc est falsum: ergo. Probas maiorem. Si haberet partes physicè distinctas, haberet partes extensas; sed partes extensæ resistunt penetrationi: ergo si Substantia corporea antecederet ad quantitatem haberet partes physicè distinctas, esset impenetrabilis. Respondeo ad objectionem negando maiorem. Ad probationem distinguo maiorem: haberet partes extensas in ordine ad se, sive ad totum, concedo maiorem: in ordine ad locum, & situm, nego maiorem. Deinde distinguo minorem: partes extensæ in ordine ad locum, & situm, resistunt penetrationi, transeat minor: in ordine ad se, sive ad totum, nego minorem. Quia stat optimè, quod partes Substantiæ sint entitivè extensæ, seu distinctæ, & penetrabiles; impenetrabilitas enim propria est quantitatis cum alia quantitate ejusdem, vel alterius totius, quæ habent partes sinualiter, & localiter extensas,

ita quòd cum quocumque alio ipsamet quantitas valeat naturaliter penetrari, ut cum materia, & forma Substantiali, & accidentali. Dixi supra, *transfert minor*, quia saltem miraculosè possunt partes extensæ quantitativè penetrari, ut liquet in Christo Domino penetrato cum ostio sepulchri.

317 Objicies nonò. Substantia corporea sine quantitate non est divisibilis: ergo non habet partes distinctas. Probas antecedens. Divisibilitas est effectus formalis primarius quantitatis: ergo Substantia corporea sine quantitate non est divisibilis. Respondeo ad objectionem negando antecedens. Ad probationem nego antecedens. Quia effectus formalis quantitatis est petere extensionem localem, & situalem in se ipsa, ut melius ex infra dicendis constabit. Et quanvis divisibilitas sit etiam propria quantitatis, est tantùm divisibilitas illa, quæ velut complet extensionem, & divisibilitatem, quam in se, & secundùm se habet Substantia, si enim hæc ex se non esset divisibilis, & entitativè extensa, nec etiam, quantitate positâ, dividi, aut extendi posset.

318 Objicies decimò. Individuatio Substantiarum corporearum ita sumitur à quantitate, ut, sublata istâ, tollatur illa: ergo implicant partes physicè distinctæ in Substantia corporea, ablata quantitate. Respondeo ad objectionem negando antecedens; quia si Deus destrueret omnem quantitatem Petri, & aliam infunderet, semper daretur idem numero Petrus Substantialis: patet igitur principium individuationis Substantiarum corporearum non consistere in quantitate. Hanc doctrinam multis probat Blasco ex Baconio. Primò ex eo, quod Petrus v. g. sit unum individuum Substantiale distinctum ab alio, ante omne accidens. Secundò, quia cùm accidentia in suo genere habeant propria individua acciden-

accidentalia à principio accidentali, multò meliùs ipsa Substantia habebit individua Substantialia à Substantiali principio. Tertiò, quia quantitas advenit subjecto in individuo Substantiali, exquo non potest illud constituere. Quartò, quia prima divisio, & numerus fit per formas Substantiales, uti clarè docet idem Bacconius in 3. dist. 12. q. 1. art. 2. Baccon. Quintò, quia, variatâ quantitate hominis juvenis, & senis, manet formaliter idem Substantiale hominis individuum. Sextò, quia ingenito, & corrupto manet eadem quantitas, secus idem Substantiale individuum. Septimò, quia accidens non habet esse simpliciter. Octavò, quia quantitas, si est terminata, supponit formam, & individuum. Si vero est interminata, est communis genito, & corrupto, quæ sequuntur materiam individuum. Itaque idem Blasco Blasco. tom. 1. *Curfus Philosoph.* l. 4. dist. 13 q. 2 art. 2. §. 2. n. 43. citat Bacconium dicentem, sententiam de accidente principio individuationis Substantiarum damnatam fuisse inter articulos Parisienses. Ex his

319 Deduces, principium intrinsecum individuationis Substantiarum corporearum consistere in sola forma, ut mirificè probat Bacconius in 3. dist. 11. q. 2 art. 3. §. 3. Idem dicendum de principio individuationis substantiarum spiritualium tam incompletarum, puta animarum rationalium, quàm completarum, v. g. Angelorum; hi enim individuantur à propria ipsorum entitate, quæ est forma, exquo est actus. Et quanvis careant materiâ, possunt nihilominus multiplicari à Deo intra eandem speciem infimam, juxta Doctorem in 2. dist. 11. q. 1. art. 2 §. 4. Hinc sequitur, naturam D. Michaelis v. g. habere rationem speciei de pluribus prædicabilem. Quod si oppositum docuimus ex eodem Bacconio, in *Logica* n. 662. id intelligendum, suppositione

Salmat. fitione ibidem factâ , videlicet , quòd repugnarent
 plura , de quibus talis natura prædicaretur. Hoc ma-
 ximè advertendum , ne inconsequenter loqui videa-
 mur. Æquum erat de principio individuationis , &
 multiplicationis in via ejusdem Baconii tractatum
 instituire , utî Salmaticenses nostri per integrum
 tractatum tomi primi de hac celebri controversia
 disputant in via Doctoris Angelici. Ast multis mihi
 intento tempus deficit. Videndi Mag. Blasco , ubi
 sup. Mag. Garcia Metaph. dist. 1. q. 6. art. 3. Mag.
 Ponce Bacca disp. 3. q. 3. qui de præfato principio
 ubertim pertractant. Sed uberrimè Mag. Zagaglia ,
 legendus per otium tom. 2. tractatu 1. disp. 8. Dixi
 sup. principium *intrinsecum individuationis substan-*
tiarum corporearum consistere in sola forma : quia si
 sermo sit de principio extrinsecò , sive de differen-
 tiâ extrinsecâ & quoad nos , illâ videlicet , quæ nos
 ducit in cognitionem individuorum , admittimus
 sententiam Porphyrii , & aliorum de collectione ac-
 cidentium , ut liquet ex dictis in Logica n. 670.

S E C T I O II.

De Prædicamento Quantitatis.

Q U Æ S T I O I.

Quid sit quantitas ?

320

RESOLUTIO: Quantitas optimè de-
 finitur : *Accidens exigens propriam*
extensionem situalem , & impene-
trabilem. Deducitur ex Doctore in 3. dist. 1. q. 1. art.

Bacon.

4. vers. *Ad tertium dico.* Coincidit cum definitione
 tra-

tradita à Mag. Blasco tom. 1. Philos. l. 5. dist. 17. q. 2. art. 2. num. 17. Eamdem amplectitur Mag. Garcia Metaph. dist. 2. q. 4. art. 1. §. 2. n. 728. Ad definitionis intelligentiam prænotò primò, Quantitatem hîc non sumi metaphoricè pro quantitate virtutis, sed propriè pro quantitate molis. Quantitas virtutis consistit in intrinseca rei perfectione, secundùm quam dicitur maior, aut minor, vel magna, aut parva, etiam si res spiritualis sit, ut Deus, qui *Optimus Maximus* dicitur à quantitate virtutis. Quantitas molis consistit in eo, quòd rem corpoream causet molem, & extensam, ut accidens, de quo in præsentì agimus, quod substantiam reddit extensam.

321 Prænotò secundò ex Magistro Garcia, Garcia. extensionem aliam dici entitativam, aliam totalem, aliam situalem, aliam impenetrabilem. Extensio entitativa integratur ex partibus realiter distinctis. Totalis stat in extensione partium per ordinem ad totum, ita quòd una alteri immediatè uniatur, & non aliis. Situalis consistit in illa extensione, quam partes habent, quando una est extra locum alterius, tametsi penetrari possint. Impenetrabilis dicitur illa extensio, quam habent partes, quæ in eodem loco coexistere non possunt. Hinc

322 Prænotò tertio Quantitatem non consistere in actuali extensione entitativa, totali, situalli, aut impenetrabili. Non in prima, aut secunda, quia utraque reperiretur in Substantia corporea, sublatâ quantitate. Non in tertia, aut quarta, quia quantitas Corporis Christi in Sacramento nec habet actualem extensionem situalem, nec impenetrabilem. Dixi supra, *in actuali extensione*, quoniam tantùm per exigentiam ad extensionem situalem, & impenetrabilem Quantitatem definimus, non per actualem extensionem, sicut neque per exigentiam ad exten-

extensionem Substantiæ; bene verò ad propriam extensionem; prius enim est, quod Quantitas sit in se extensa, quàm quòd sit extensiva Substantiæ. Unde primum est effectus formalis primarius quantitatis; secundum verò est tantùm effectus secundarius ejusdem. His prænotatis,

Bacon. 323 Probo resolutionem, & primò ex Doctore, ubi sup. ad illa verba: *Extendi est actus formalis quantitatis primus, extendere subjectum est secundarius.* Ex quibus sic: Definitio Quantitatis debet explicare id, quod primò intelligitur in quantitate; sed ita se habet nostra definitio; cùm explicet extensionem propriam Quantitatis: ergo talis definitio rectè procedit juxta doctrinam Resoluti.

324 Secundò sic: Talis definitio constat genere, & differentia: ergo est bona. Probo antecedens. Particula, *accidens*, habet locum generis in hac definitione, eò quòd per talem particulam conveniat Quantitas cùm cæteris accidentibus, quæ non habent essentiam Quantitatis. Deinde reliquæ particulæ, *exigens propriam extensionem situalem, & impenetrabilem*, obtinent locum differentiæ; per illas quippe describitur Quantitas ab omni alio, quod ipsa non est: ergo.

325 Tertiò sic: Bona definitio alicujus rei recurrit cum constitutivo ipsius; sed constitutivum Quantitatis consistit in exigentia propriæ extensionis, ut declarat præfata definitio: ergo. Maior liquet Probo minorem. Illud est formalissimum constitutivum alicujus rei, quòd prius intelligitur in tali re, estque radix cæterorum, quæ in ipsa reperiuntur; atqui exigentia propriæ extensionis situalis, & impenetrabilis est id, quòd prius intelligitur in Quantitate, estque radix cæterorum, quæ in ipsa reperiuntur: ergo. Maior est certa. Probo minorem. In

Quan-

Quantitate tametsi reperiatur ratio mensuræ, divisibilitas partium, impenetrabilitas, & virtus extensiva substantiæ, nihilominus, ideo ipsa potest mensurare, quia est extensa: ideo est divisibilis in partes, quia illas extensas habet: ideo est impenetrabilis, & extensiva substantiæ, quia exigit extendi impenetrabiliter: ergo exigentia propriæ extensionis situalis, & impenetrabilis est id, quod prius intelligitur in Quantitate, estque radix cæterorum, quæ in ipsa reperiuntur. Igitur &c.

Proponuntur objectiones, & dissolvuntur.

326 **N**ostræ resolutioni opponuntur innumeri AA. in varias distributi sententias. Prima docet, Quantitatem consistere in ratione mensuræ. Ita D. Albertus Magnus tom. 1. tractatu 8. cap. 1. Tribuitur etiam hæc sententia Caietano, imò & D. Thomæ. Cæterum Thomistæ potius in nostram inclinant. Secunda sententia essentiam Quantitatis ponit in divisibilitate partium. Ita Soncin. q. 21. Jabellus q. 20. Citatur pro hac eadem Scotus in Præd. q. 17. Tertia sustinet, essentiam Quantitatis stare in impenetrabilitate naturali. Ita communiter Scotistæ, quos sequitur Poncius Logicæ disp. 14. q. 2. conclusione ultima, & Dominicus à D. Petro tractatu 3. Log. disp. 3. q. 1. num. 4. Idem docent communiter Doctores Societatis, nominatim Conimbricenses, Suarius, Hurtadus, Oviedus, quos citat, & sequitur P. Arriaga disp. 6. Metaph. sectione 1. subsectione 6. n. 38. Quarta Quantitatis essentiam tribuit extensioni partium substantiæ: hanc defendunt plures Thomistæ, quibus adhæret Illustrissimus Palanco tractatu 6. Logicæ q. 4 Unde n. 17. sic Quantitatem definit: *Accidens extensivum partium*
 Tom. Ult. Z sub-

D. Alb. M.
Caietanus
D. Thom.

Soncin.
Jabell.
Scotus.

Poncius.
A. D. Petr.
Conimbr.
Suarius.
Hurtad.
Oviedus.
Arriaga.

Palanco.

178 *Tractatus Metaph. Disputatio IV.*

substantiæ in ordine ad se. Mitto alias sententias, quorum fundamenta ex dictis, & dicendis in hac quæstione solvuntur facilè. Pro his omnibus, & in primis pro Authoribus primæ sententiæ

327 Aristotel. Objicies primò. Quantitas, juxta Philosophum, definitur per mensuram: ergo tua definitio, & quæcumque alia rejicienda est. Probas antecedens ex eodem Philosopho l. 10. Metaph. cap. 2. in principio, dicente: *Maximè autem mensuram esse cujusque generis primum, & maximè propriè Quantitatis: hinc enim ad alia advenit: mensura enim id est, quo quantum cognoscitur.* Respondeo ad objectionem negando antecedens. Ad probationem dico, Aristotelem, citato loco, non docere Quantitatem esse mensuram essentialiter, sed tantum, mensuram esse proprietatem Quantitatis. Mensura enim vel est activa, vel passiva, hæc nullo pacto potest esse essentia Quantitatis; quia nihil aliud est, quàm potentia rei, ut mensuretur per mensuram activam, putà potentia pani mensurabilis per ulnam: illa verò, nempe activa, si est actualis, utpote contingens, nequit Quantitatem essentialiter constituere; si verò est potentialis, etiam non; quia punctum Quantitatis non habet hanc potentialitatem, nec etiam linea infinita possibilis. Cæterum tametsi probetur aliquid esse quantum, quatenus est mensurabile, id provenit à posteriori, eo modo, quo per resibilitatem probare possumus hominem.

328 Aristotel. Objicies secundò pro secunda sententia. Quantitas expressè definitur ab Aristotele per divisibilitatem partium: ergo sic definiri debet. Probas antecedens ex eodem l. 5. Metaph. cap. 13 in principio: *Quantum dicitur, quod in insita divisibile.* Respondeo ad objectionem negando antecedens. Ad probationem dico, Philosophum ibi solum describere

cribere *Quantitatem* per proprietatem divisibilitatis, quæ, cum supponat prius extensionem partium, non potest *Quantitas* per divisibilitatem ita propriè definiri; essentia enim semper est prædicatum formale, & primarium rei, in quo proprietates radican-
cantur.

329 Objicies tertio pro eâdem sententia. Species *Quantitatis* ponuntur juxta diversos modos divisibilitatis: ergo per divisibilitatem debet definiri *Quantitas*. Probas antecedens. *Quantitas* continua ponitur juxta divisibilitatem partium, quæ termino communi copulantur: *Quantitas* autem discreta per divisibilitatem partium, quæ non copulantur termino communi: ergo species *Quantitatis* ponuntur juxta diversos modos divisibilitatis. Respondeo ad objectionem distinguendo antecedens: Species *Quantitatis* ponuntur juxta diversos modos divisibilitatis, tanquam à signo nobis notiori, concedo antecedens: tanquam ex prima radice, nego antecedens. Deinde, applicatâ distinctione illius probationi, nego consequentiam. Unde tametsi per diversos modos divisibilitatis cognoscamus *Quantitatis* species, non sequitur, quòd in ipsa divisibilitate consistat essentia *Quantitatis*; hæc enim debet esse radix cæterorum, quæ in ipsa reperiuntur, ut supra dicebam; constat autem ex dictis, radicem istam esse extensionem illam, per quam *Quantitatem* definivimus.

330 Objicies quarto pro tertia sententia: *Quantitas* debet definiri per definitionem, quæ comprehendat omne definitum; sed ita se habet impenetrabilitas, non autem extensio: ergo per illam, non per istam debet definiri *Quantitas*. Maior liquet. Probas Minorem. Minimum *Quantitatis* est *Quantitas*; sed non est extensum, benè quidem impenetrabile: ergo. Respondeo ad objectionem, concessâ

maiore, negando minorem. Ad probationem nego suppositum, quòd detur, vel possit assignari minimum Quantitatis: quia continuum, juxta nostram sententiam, quæ est Aristotelica, divisibile est in infinitum, exquo nulla Quantitas dari potest ita minima, quæ saltem à Deo dividi non valeat. Quod si punctum non est extensum, etiam non est Quantitas, sed tantum Quantitatis terminus, & complementum extensionis ejusdem.

331 Objicies quintò pro eadem sententia. Non repugnat Quantitas unius palmi indivisibilis; sed hæc non esset extensa, benè verò impenetrabilis: ergo idem, quod supra. Respondeo ad objectionem negando maiorem. Repugnantia enim stare in eo, quòd talis Quantitas esset, & non esset materialis, & continua: esset, ut supponitur: non esset, quia non haberet partes, quæ sunt de essentia continui. Quòd si cælum non est ab agente naturali divisibile, est tamen à Deo.

332 Objicies sextò pro quarta sententia. Ratio formalis Quantitatis debet explicari per id, quod primò intelligitur in Quantitate, tanquam ratio à priori; sed quòd Quantitas sit extensiva substantiæ est quod primò intelligitur in Quantitate, tanquam ratio à priori: ergo. Maior est certa. Probas minorem. Ideo Quantitas potest mensurare aliam, vel ab alia mensurari, quia est extensiva substantiæ. Ideo etiam est divisibilis in partes, & impenetrabilis: ergo quòd Quantitas sit extensiva substantiæ est quod primò intelligitur in Quantitate, tanquam ratio à priori. Respondeo ad objectionem, concessâ maiore, negando minorem. Ad probationem nego antecedens quoad utramque partem. Nam ratio à priori, & radix cæterorum, quæ in Quantitate reperiuntur, non ab eo, quòd ipsa sit extensiva

va substantiæ proveniunt , sed ab eo , quòd ipsa in se sit extensia ; prius enim est , quòd Quantitas sit in se extensa , quàm quòd sit extensiva substantiæ , ut supra non semel est dictum. Hoc idem sentire videtur Illustrissimus Palanco , ubi sup. laudatus , tametsi per esse extensivam substantiæ Quantitatem definiat.

Palanco.

333 Objicies septimò pro eadem sententia. Essentia accidentis debet explicari per ordinem ad substantiam , cui inhæret ; sed Quantitas est accidens : ergo definiri debet per hoc , quòd sit extensiva substantiæ , non per propriam extensionem. Respondeo ad objectionem distinguendo maiorem : secundum rationem communem accidentis , concedo maiorem : secundum rationem distinctivam talis accidentis , subdistinguo : si accidens fuerit relativum , concedo maiorem : si fuerit absolutum , nego maiorem. Unde quòd Quantitas dicat ordinem ad substantiam , cui inhæret , satis declarat prima particula posita in definitione ; nempe *accidens* , quo non obstante definitur in ratione talis accidentis , non per hoc , quòd sit extensiva substantiæ , sed per propriam extensionem , tanquam per rationem ultimò distinctivam. Cum ergo sit accidens absolutum , prius debet intelligi id , quod habet in ordine ad se , quàm ad illud

334 Objicies octavò , & directè contra nostram definitionem , sive adversùs constitutivum , quod Quantitati assignamus. Quòd Quantitas habeat partes extensas , non est id , quod prius in Quantitate reperitur : ergo malè definitur illa per propriam extensionem. Probas antecedens. Prius est , quòd Quantitas habeat partes , quàm quòd illas habeat extensas : ergo. Respondeo ad objectionem distinguendo antecedens : non est id , quòd prius in Quantitate

titate reperitur, tanquam distinctivum ipsius Quantitatis à substantia, & cæteris, quæ Quantitas non sunt, nego antecedens: aliter, quidquid sit. Ad probationem dico, quòd habere partes non est distinctivum Quantitatis à substantia, hæc quippe etiam habet partes, & quidem independenter à Quantitate. Est igitur primum distinctivum Quantitatis exigentia propriæ extensionis situalis impenetrabilis.

335 Objicies nonò. Exigentia extensionis situalis impenetrabilis convenit substantiæ corporeæ: ergo non est id, quod Quantitatem prius à substantia distinguit. Probas antecedens. Substantia corporea, sublatâ Divinitus Quantitate, maneret extensa impenetrabiliter: ergo. Respondeo ad objectionem negando antecedens. Ad probationem nego antecedens. Siquidem substantia corporea, Quantitate sublatâ, nec maneret extensa impenetrabiliter, nec exigentiam haberet ad extensionem situa-lem, sed meram non repugnantiam.

336 Objicies decimò. Definitio Quantitatis sup. tradita non convenit omni Quantitati: ergo rejicienda est. Probas antecedens. Non convenit Quantitati Corporis Christi in Eucharistia: ergo non convenit omni Quantitati. Probas antecedens. Quantitas Corporis Christi in Eucharistia non habet extensionem situa-lem, nec impenetrabilem: ergo. Respondeo ad objectionem negando antecedens. Ad probationem nego antecedens. Ad probationem dico, Corpus Christi in Eucharistia habere Quantitatem naturaliter exigentem extensionem situa-lem, & impenetrabilem, tametsi actu illam non habeat, & sit Divinitus penetratum cum Quantitate panis. Ex dictis

337 Deduces primò, Quantitatem non constitui per rationem mensuræ; quia admissâ lineâ infini-

infinitâ , hæc vera esset Quantitas prædicamentalis, & tamen non posset mensurari, nec mēsurare, nisi fortè aliam lineam infinitam. Deduces secundo, divisibilitatem partium non posse constituere essentialiter Quantitatem; alioquin, sublata Quantitate, non esset substantia in partes divisibiles, nec illas distinctas haberet, cum tamen oppositum constet ex sectione antecedente, quæstione 4. Deduces tertio, nec impenetrabilitatem partium, nec virtutem extensivam substantiæ rationem constitutivi Quantitatis obtinere: non primam; quia calor summus non est Quantitas, & tamen impenetrabilis est per summam frigiditatem: non secundam; quia extensio partium substantiæ supponit extensionem Quantitatis.

QUÆSTIO II.

Quotuplex sit Quantitas?

338 **R**ESOLUTIO: Quantitas dividitur in continuam, & discretam. Prima definitur sic: *Cujus partes copulantur termino communi*, ut linea, cujus partes, medio puncto illas afficiente, copulantur. Secunda sic: *Cujus partes non copulantur termino communi*, ut numerus, qui ex unitatibus nullo medio unitis componitur. Prima subdividitur in Quantitatem permanentem, & successivam. Quantitas permanens est: *Cujus partes simul existunt*, ut v. g. Quantitas ligni, quod habet partes simul existentes; & hæc subdividitur in lineam, superficiem, & corpus, quæ cum habeant (nota) diversas extensiones, dicuntur diversæ species Quantitatis. Linea sic definitur: *Extensio versus longitudinem*. Superficies sic: *Extensio versus latitudinem*. Cor-

Corpus sic : *Extensio versus profunditatem*. Quantitas verò successiva est illa : *Cujus partes non simul existunt*, ut tempus, & motus, quorum partes nequam simul existere possunt; benè verò una post aliam. Unde Quantitas successiva subdividitur in motum, & tempus. Motus definitur : *Actus entis in potentia prout in potentia*. Tempus sic : *Numerus motûs, seu partium motûs secundum prius, & posterius*. Utraque definitio explicatur tom. 3.

339 Secunda species Quantitatis, scilicet discreta, subdividi solet in numerum, & orationem. Numerus definitur : *Multitudo numerata per unum*. Subdividitur in numerum numerantem, & numeratum. Primus est actus intellectûs, quo multitudinem numeramus: Secundus verò consistit in ipsis rebus numeratis. Tandem oratio, quæ est altera species Quantitatis discretæ, definitur : *Quantitas, quæ mensuratur syllabâ longâ, & brevi*. Subdividitur autem hæc in musicalem, & poeticam, de quibus pro dignitate agere ad aliam disciplinam spectat.

Q U Æ S T I O III.

Quot sint Quantitatis proprietates?

340 **R**ESOLUTIO : Proprietates Quantitatis quatuor communiter assignantur à Philosophis. Prima : *Quod non habeat contrarium*; siquidem duæ Quantitates non contrariantur, sicut duæ formæ, quæ ab eodem subjecto mutuo se expellunt; linea enim, superficies, & corpus sunt veræ Quantitatis species, & tamen una aliam non excludit à subjecto, in quo est. Convenit hæc proprietas etiam substantiæ, ut suo loco diximus. Secunda : *Quod non suscipiat magis, nec minus*; nam li-
cèt

Corpus sic : *Extensio versus profunditatem*. Quantitas verò successiva est illa : *Cujus partes non simul existunt*, ut tempus, & motus, quorum partes nequam simul existere possunt; benè verò una post aliam. Unde Quantitas successiva subdividitur in motum, & tempus. Motus definitur : *Actus entis in potentia prout in potentia*. Tempus sic : *Numerus motûs, seu partium motûs secundum prius, & posterius*. Utraque definitio explicatur tom. 3.

339 Secunda species Quantitatis, scilicet discreta, subdividi solet in numerum, & orationem. Numerus definitur : *Multitudo numerata per unum*. Subdividitur in numerum numerantem, & numeratum. Primus est actus intellectûs, quo multitudinem numeramus: Secundus verò consistit in ipsis rebus numeratis. Tandem oratio, quæ est altera species Quantitatis discretæ, definitur : *Quantitas, quæ mensuratur syllabâ longâ, & brevi*. Subdividitur autem hæc in musicalem, & poeticam, de quibus pro dignitate agere ad aliam disciplinam spectat.

Q U Æ S T I O III.

Quot sint Quantitatis proprietates?

340 **R**ESOLUTIO : Proprietates Quantitatis quatuor communiter assignantur à Philosophis. Prima : *Quod non habeat contrarium*; siquidem duæ Quantitates non contrariantur, sicut duæ formæ, quæ ab eodem subjecto mutuo se expellunt; linea enim, superficies, & corpus sunt veræ Quantitatis species, & tamen una aliam non excludit à subjecto, in quo est. Convenit hæc proprietas etiam substantiæ, ut suo loco diximus. Secunda : *Quod non suscipiat magis, nec minus*; nam li-
cèt

cet una Quantitas sit maior aliâ, nulla est nãgis Quantitas. Convenit etiam substantiæ præfata proprietas.

341 Tertia: *Quòd ab eâ dicantur res æquales, vel inæquales*; æqualitas quippe, & inæqualitas consequuntur ad mensurabilitatem; mensurabilitas autem convenit omni, & soli Quantitati; propriissimum est ergo Quantitatis esse mensuram: Ætivè, vel passivè, dum est apta, ut ejus applicatione metiatur alterius quanti magnitudo, & ut ipsa per alteram mensuretur Quantitatem. Quarta: *Quòd sit divisibilis in partes impenetrabiles cum alia quantitate, reddatque subjectum impenetrabile cum alio quanto, seu impossibile naturaliter in eodem loco*, exquo ipsa naturaliter extendit suas, & subjecti partes in ordine ad locum.

QUÆSTIO IV.

[*Utrùm Quantitas sit accidens realiter distinctum à re Quanta?*]

342 **R**ESOLUTIO est affirmativa. Ita Doctor in 1. dist. 28. q. 2. art. 3. §. 1. ubi probans relationem habere propriam realitatem distinctam à realitate aliorum prædicamentorum, idem docet de qualitate, Quantitate, & cæteris prædicamentis. Unde ibi §. 2. vers. *Item quinto*, expressè ait: *Accidens est differens à substantia*. Idem docet l. 3. dist. 11. q. 2. & multis aliis in locis. Sequuntur Magistrum suum omnes ejus discipuli, nominatim Blasco, tom. 1. Cursus Philos. l. 5. dist. 17. q. 2. & Garcia, D. Thom. Metaph. dist. 2. q. 4. art. 2. §. 1. Estque sententia communis cum Aristotele, D. Thoma, Scoto, Ægidio, Suario, & cæteris Peripateticis, contra Nominales, Tom. Ult. Aa

Baccon.

Blasco.

Garcia.

Aristotel.

D. Thom.

Scotus.

Ægidius.

Suarius.

nales,

nales, & Atomistas. Sed ante resolutionis probationem

343 Prænoto, quæstionem procedere non modo de distinctione reali Quantitatis à substantia corporea, sed etiam de accidentibus materialibus; non enim sola substantia corporea dicitur Quanta, sed & ipsa accidentia. Est igitur sensus quæstionis: an id, quo substantia corporea, & accidentia dicuntur Quanta, sit idem cum illis, an distinctum realiter? Dicimus esse realiter distinctum.

Aristot.

344 Probo resolutionem, & primò ex Aristotele 7. Metaph. cap. 3. text. 8. dicente: *Materia substantia est: nam si hæc non est substantia, quæ alia esset, fugeret nos: demptis etenim cæteris, nihil aliud remanere videtur; cætera namque passiones corporum, & effectiones, & potentiæ sunt. Longitudo verò, latitudo, & profunditas quantitates quædam, sed non substantiæ sunt, quantitas etenim non est substantia.* Confirmo ex eo, quòd materia prima, quæ est substantia, debet ut talis radicare aliquam proprietatem permanentem, à qua realiter distinguatur; sed nulla alia est, quam radice, nisi Quantitas: ergo Quantitas est accidens realiter distinctum à re Quanta.

345 Secundò sic: Si Quantitas identificaretur realiter cum substantia, identificaretur cum materia prima Quanta, sed hoc non: ergo. Maior liquet. Probo minorem. Si identificaretur realiter cum materia prima Quanta, etiam cum forma materiali; sed cum forma non: ergo neque cū materia. Maiorem concedunt Adversarii. Probo minorem. Si identificaretur cum forma, sequerentur duo aperte falsa: primum, quòd materia, & forma non possent penetrari, sicut non possunt duæ materiæ. Secundum, quòd minus Quantitatis haberet homo, quàm brutum æqualis dimensionis,

fionis , ac densitatis ; cùm ille solùm gauderet Quantitate materiæ , hoc autem Quantitate materiæ , & formæ.

346 Tertiò sic : (hoc est potissimum hujus sententiæ fundamentum.) Quod realiter separatur , aut separari potest ab alio , realiter distinguitur ab illo ; sed substantia corporea realiter separatur à Quantitate ; & ab ista separari possunt alia accidentia : ergo Quantitas realiter distinguitur tam à substantia corporea , quàm ab aliis accidentibus. Maior est certa , constatque ex signis distinctionis realis , de quibus suo loco egimus. Probo minorem quoad primam partem. In Sanctissimo Eucharistiæ Sacramento manet Quantitas panis absque substantia : ergo substantia corporea separatur à Quantitate. Probo eandem minorem quoad secundam partem. Frigus , & calor possunt separari ab aqua , perseverante eadem Quantitate in illa : ergo. Hoc fundamentum adeo efficax est , quòd P. Arriagam impulit , ut fate-retur nostram sententiam probabiliorem esse , tamet-si ipse contrariam docuisset. Unde Metaph. disp. 6. sectione 1. subsectione 5. n. 36. inquit : *In præsen-ti verò ob argumentum de Sacramento Eucharistiæ nihilominus negari nequit , quin longè faciliùs , & clarius circa Mysterium illud per quantitatem dis-tinctam discurratur , quam sine illa.*

Arriaga.

Proponuntur objectiones , & dissolvuntur.

347 **N**ostræ resolutioni opponuntur Vete-res Stoici existimantes , Quantitatem non distingui realiter à substantia , sicut neque ab aliis accidentibus , quam opinionem , ut refert Ma-sius Logicæ sectione 1. de Quantitate q. 5. jam ferè oblivioni traditam suscitavit Okamus , Gabriel , Gre-

Masius.
Okamus.
Gabriel.
Gregor.

Marfilius. gorius, Marfilius, & cæteri Nominales. Eandem amplectuntur Atomistæ omnes, & Cartesiani, quos alibi ex professo impugnavimus. Modò adveriùs resolutionem statutam

348 Objicies primò. Ponamus Petrum in aliquo loco; Deumque auferre ab eo Quantitatem. In hoc casu, vel Petrus manet adhuc in eodem loco, vel non? Si primum: ergo in illo habet partem extra partem, & per consequens Quantitatem indistinctam à substantia. Si secundum: ergo moveretur ad alium locum. Sed quod movetur habet partem extra partem: igitur semper habet Quantitatem indistinctam. Respondeo ad objectionem, & dico, Petrum in tali casu non manere in eodem loco circumscriptivè; nam ipse in eodem loco perseverans, solum esset divisibilis intensivè in partes subjectivas, non extensivè in partes extra partes; siquidem hæc divisibilitas fit à Quantitate, quâ Petrus careret, ut supponitur; certum enim est: *Quod divisibilitas partis extra partem, & extensiva primò, & essentialiter convenit Quantitati.* In 2. dist. 11. q. 1. art. 2. §. 3. vers. *Ad aliud dicitur.* Addo, non repugnare Petrum habere partem extra partem in tali loco, adhuc ablatâ Quantitate, quia extensio localis est à Quantitate per exigentiam; Petrus verò posset illam habere per non repugnantiam.

Baccon.

349 Objicies secundò. Substantia materiæ primæ per se ipsam exigit impenetrationem; sed impenetratio est propria Quantitatis: ergo substantia materiæ primæ per se ipsam est Quanta, non per Quantitatem distinctam. Respondeo ad objectionem negando maiorem; quia substantia materiæ primæ solum ratione Quantitatis exigit impenetrationem, sicut ratione tantum ejusdem exigit extensionem, ex quo sequitur, quòd si fortè sine Quantitate essent
ex-

extensæ illius partes, facile reducerentur ad punctum ab agente naturali.

350 Objicies tertio. Substantia corporea non potest dari, nec intelligi sine corpore; sed corpus ex se est Quantum: ergo Quantitas non distinguitur realiter à substantia corporea. Respondeo ad objectionem, concessâ maiore, negando minorem, & consequentiam. Quia corpus solum est quantum per Quantitatem distinctam. Loquor de corpore substantiali, sive de illo, quod est de categoria substantiæ, quod quidem distinguitur ab spiritu, non ex eo, quod ex se sit quantum, bene verò quia habet partes realiter divisibiles in partes integrantes, seu entitativas, quibus spiritus caret.

351 Objicies quarto. Substantia corporea, & Quantitas simul oriuntur: ergo sunt idem realiter. Respondeo ad objectionem, dato antecedente, negando consequentiam; quia hæc solum valet, quando antecedens procedit de illis, quæ in eadem categoria continentur. Dixi, *dato antecedente*; quia saltem prioritate naturæ antecedit substantia Quantitatem.

352 Objicies quinto. Substantia spiritualis v. g. Angelus, non indiget formâ aliquâ à se distinctâ, ut sit penetrabilis: ergo neque substantia corporea indiget Quantitate distincta ut sit extensa, & impenetrabilis. Respondeo ad objectionem, concessa antecedente, negando consequentiam. Disparitas est: quia nihil assignabitur in Angelo, per quod penetrationi resistat, ideoque non indiget formâ distinctâ, per quam reddatur penetrabilis. At verò substantia corporea, cum ex se sit indivisibilis Quantitative, & solum entitative divisibilis, indiget Quantitate distincta, per quam reddatur extensa, & impenetrabilis; neque enim ei potest competere effectus formalis Quantitatis.

353 Obji-

353 Objicies sextò. Non sunt multiplicandæ entitates absque necessitate; sed nulla est necessitas distinguendi Quantitatem à re quanta: ergo non distinguitur. Respondeo ad objectionem, concessâ maiore, negando minorem. Quia necessitas hîc stat in eo, quòd alioquin sequerentur duo illa, de quibus sup. n. 345. Præterquamquod definitum est, in Sacra Eucharistia remanere accidentia panis sine substantia panis, ut haud inefficaciter ostendimus in Systemate Baconico de Formis materialibus adversus Atomistas, & Cartesianos. Quòd si ipsi docent, in Sacramento esse species panis, & vini miraculosè, absque Quantitate distincta, optimè impugnantur ex eo, quòd non sint multiplicanda miracula, absque necessitate, utî arguunt de multiplicatione entitatum.

354 Objicies septimò. Non minus in Sanctissimo Eucharistiæ Sacramento experimur effectum Quantitatis, quàm effectum substantiæ, nempe nutritionem; sed ex hoc secundo non sequitur dari substantiam panis in Sacramento: ergo neque ex primo sequitur dari Quantitatem. Respondeo ad objectionem, permissâ maiore, & concessâ minore, negando consequentiam. Dispar ratio est: quia substantia panis est causa efficiens nutritionis, cujus effectum Deus potest supplere. Ast Quantitas est causa formalis extensionis. Docet Mair tom. 2. n. 277. ex Suario, quòd dum homo nutritur ratione præceptæ Sanctissimæ Eucharistiæ, nutriatur ex materia à Deo de novo creata, vel, ut alii dicunt, ex reproductâ illâ, quæ prius per consecrationem fuerat destructa. Dixi, *permissa maiore*, quia illud secundum rarò accidit.

355 Objicies octavò. In Sacra Eucharistia, destructâ substantiâ panis, destruitur pariter Quantitas

titas substantialis ejusdem, remanente Quantitate accidentali cum cæteris accidentibus realiter identificatâ: ergo ex Sacra Eucharistia non colligitur Quantitatem substantialem esse distinctam realiter à re Quanta. Respondeo ad objectionem negando suppositum, videlicet, quòd detur duplex Quantitas, substantialis una, altera accidentalis. Alioquin enim daretur eodem jure duplex qualitas una substantialis, alia accidentalis. Similiter daretur duplex relatio, duplex actio &c. Insuper multiplicarentur miracula in Eucharistia sine necessitate; siquidem unumquodque accidens ibi conservaretur absque subiecto communi, in quo omnia connaturaliter existant. Ex dictis

356 Deduces, Quantitatem esse accidens speciale à cæteris distinctum constituensque speciale prædicamentum. Unde omne accidens extensum, & impenetrabile tale est ratione solius Quantitatis distinctæ, cui inhæret. Est autem impenetrabilitas repugnantia duorum coexistentium in eodem loco, non in eodem subiecto, quæ quidem repugnantia non reperitur in qualitatibus, eò quòd ex se nec sunt impenetrabiles, nec Quantæ.

S E C T I O III.

De Prædicamento Qualitatis.

Q U Æ S T I O I.

Quid sit Qualitas?

357

RESOLUTIO: Qualitas optimè definitur sic: *Accidens absolutum perfectivum subjecti actualis.* Deduci-

Baccon.

tur ex Doctore in 1. dist. 8. q. 1. art. 2. §. 7. vers. *Sequitur*, in fine, ubi concludens, quòd ratio Qualitatis sit informare subjectum, remittit se, ibidem, ad 1. 2. dist. 27. art. 2. ubi informativum Qualitatis explicat per perfectivum, quod rectè notavit Mag. Garcia Metaph. dist. 2. q. 6. art. 1. §. 3. n. 1003. quibus à me satis exploratis, placuit præfatam accipere definitionem, juxta Bacconii mentem, maximè cum omni, & soli Qualitati conveniat absque vitiis, & maculis, quæ in reliquis definitionibus ab AA. inventis reperiuntur, ut mox videbimus. Ad illius intelligentiam

Garcia.

358

Prænoto primò, Qualitatem latè sumptam significare formam actuantem, seu adjacentem non modò accidentalem, sed etiam essentialem, quo pacto non est propria prædicamenti Qualitatis, sed etiam in prædicamento substantiæ, & in aliis prædicamentis reperitur. Etenim, ita sumpta, convenit differentiæ substantiali, sive essentiali, v. g. rationali, quod advenit generi, nempe animali, & de Petro, atque de reliquis naturæ humanæ individuis in *Quale* quid prædicatur, uti in Log. diximus tract.

2 & 3. Convenit etiam omni accidenti, vel hoc sit quantitas, vel relatio &c. omnia quippe prædicantur in *Quale* de subjectis, quibus conveniunt.

359 Prænoto secundo, Qualitatem non ita sumi in præsentī, sed strictè pro forma accidentali, per quam absolutè respondemus interrogationi de *Quale*, quæ propterea est distincta ab omnibus aliis prædicamentis. Nam, si quærat, qualis est Petrus, non satisfat interrogationi dicendo, est rationalis, nisi fortè quærat, quale animal sit, quia in hoc casu quæritur de Qualitate essentiali, factâ illâ modificatione, *Quale animal*, ut benè advertit Mag. Didacus à Jesu infra citandus. Ast si quærat sine *Didacus.* modificatione, *Quale animal*, sed absolutè, Qualis sit Petrus, non ita bene respondetur, ut observat idem Mag. ibidem, & Paulus Valius in Log. de Qua- *Valius.* litate cap. 1. & multò minus, quòd sit quantus, relatus, vel quòd agat, patiat, vel quòd sit amictus &c. sed solùm aptè respondetur, quòd sit albus, calidus, studiosus &c. Quare solùm id, quo aliquis denominatur absolutè, & propriè Qualis, est Qualitas, de qua in præsentī agimus.

360 Idcirco Aristoteles cap. de Quali, & Aristotel. Qualitate, in principio, describit Qualitatem prædicamentalem dicendo, esse illam, *qua quales quidam dicuntur*, ut legitur in textu, quem præmanibus habeo, sive, *qua quales nominamur*, uti refert Didacus Masius Dominicanus disp. de Qualitate *Masius.* sect. unica q. 1. in principio, ubi verf. *Sit tamen*, in illo verbo, *nominamur*, sive, *dicimur*, inquit, ex observatione B. Alberti Magni, Caietani, & aliorum. *B. Albert.* *Caietan.* asserunt) de nobis hominibus. Quod explicat advertendo, alias esse Qualitates corporeas, ut calor, frigus, &c. alias spirituales, ut virtus, scientia &c.

quapropter homines cū corpore, & animā consent, Qualitatibus utriusque generis afficiuntur; & cū Aristoteles utrasque intenderet comprehendere, hāc de causā dixit, Qualitatem esse, *Qua* (nos homines) *quales nominamur*, sive *dicimur*. Ita fermè Mag. Didacus à JESU Carmelita noster in Log. cap. 8. de Qualitate, & Quali disp. 15 q. 1. ex quibus colligit iste, sicut & tenet alter Didacus, rectam esse definitionem Aristotelicam. Verū illa est tantū Qualitatis descriptio, ut infra ostendemus.

Valius.

361 Prænoto tertio ex Valio supra laudato, tres conditiones requiri ad Qualitatem, de quā est sermo. Prima, quod sit forma accidentalis, per quam excluditur differentia substantialis, estō hāc dicatur Qualitas in sensu lato. Secunda, quod sit forma intrinseca rei, determinans ipsam per aliquid, quod sit in ipsa re, per quam excluditur omne id, quod rem extrinsecè tantū determinat, non manens in ipsa re, ut ubi, quando, situs &c. Tertia, quod sit forma propriè rem determinans, per quam excluditur quantitas, quæ solū impropriè dici potest rem determinare, cū ex se solū dicat extensionem propriā determinatione egentem. His prænotatis,

362 Probo bonitatem definitionis sic: Illa est bona definitio, quæ constat genere, & differentiā, & satis benè explicat essentiam definiti; sed ita se habet definitio nostra Qualitatis: ergo. Maior est certa. Probas minorem. Talis definitio constat illā particulā, *accidens*, & aliis *absolutum perfectivum subiecti actualis*; sed *accidens* est genus, estō analogicum, ad alia genera accidentium. Deinde particula, *absolutum*, est differentia à relatione, & particulæ, *perfectivum subiecti actualis*, continent differentiam ab aliis prædicamentis; cū quantitas respiciat

piciat subjectum, sive materiam, tantum in potentia ad formam substantialem, & actio respiciat potius agens, & terminum, quam subjectum; passio solum subjectum potentiale, sive prout est in potentia ad recipiendum: alia verò prædicamenta certè non dicunt denominationem intrinsecam perfectivam subjecti, sed tantum extrinsecam: ergo talis definitio constat genere, & differentiâ, & satis benè explicat essentiam definiti. Nec obstat, quòd non explicet difinitum per genus rigorosum; cum enim Qualitas sit genus supremum hujus prædicamenti, nequit habere supra se rigorosum genus, per quod melius definiatur.

Proponuntur objectiones, & dissolvuntur.

363 **N** Ostræ resolutioni opponuntur unus, & alter Didacus supra. Paulus Valius citatus, Illustrissimus Joannes Cano Log. 1. 4. disp. 5. q. 1. vers. *Sit conclusio*, Illustrissimus Palanco Log. tract. 6. q. 7. Complutenses nostri Log. disp. 15. q. 1. alique plures, præsertim Antiqui, quos citat idem Didacus Mafius, ubi supra, quatenus rectam docent esse definitionem Aristotelicam Qualitatis, videlicet illam, de quâ nuper mentionem fecimus: *Quâ quales esse dicimur*, sive (ut legunt alii) *nominamur*, quam sententiam tenet ex parte Mag. Garcia, ubi supra. Opponuntur etiam Conimbricenses, Telles, Augustinus Laurentius, & alii Doctores, præsertim Societatis, sequentes Suarium Eximium, qui Qualitatem primum omnium sic definivit: *Accidens quoddam absolutum adjunctum substantiæ creatæ ad complementum perfectionis ejus; tam in existendo, quam in agendo*. Omnes citat idem Augustinus Laurentius Metaph. tract. 4. de Qualitate disp. 1. sect. 1.

Didacus
Maf.
Didacus
à JES.
Valius.
Cano.
Palanco.
Complut.

Conimbr.
Telles.
AugLaur.
Suarius.

num. 12. cæterum non dat formalia verba Suarii, ut videre est apud ipsum.

- Poncius. 364 Opponitur etiam Poncius Log. disp. 16. de Qualitate, q. 1. n. 9. ubi, postquam rejecerat varias Qualitatis definitiones, sic eam definit: *Accidens absolutum penetrabile*. Et novissimè P. Ludovicus de Lossada Metaph. disp. 3. cap. 6. n. 107. cui satis apta videtur hæc definitio: *Accidens physicum, & absolutum, & quod sequitur formam potius, quàm materiam*. Mitto definitionem communem Thomistarum, quam in multis peccare ostendit Mag. Banaspes Log. tract. 5. disp. 4. n. 280. Mitto etiam definitionem traditam à Mastrio, quam impugnât Oviedus. Poncius ubi supra n. suo 8. Et Oviedo Metaph. contr. 8. puncto 1. num. 4. Mitto etiam definitionem Hurtadus Hurtadi impugnatam à Complutensibus nostris, ab eodem Poncio, à Mastrio, à Mag. Garcia, & ab omnibus ferè AA. Mitto denique alias definitiones; quippè quas alii approbant, alii reprobant. Unde meritò dixit Aug. lib. Categoriarum, difficile semper fuisse essentiam Qualitatis aptè definire. Igitur pro AA. supra relatis, & imprimis pro illis, qui Aristotelicam definitionem defendunt.

- 365 Objicies primò. Ubi Princeps Peripateticorum definivit, non debent Peripatetici libertatem definiendi usurpare; sed Aristoteles Peripateticorum Princeps, cap. de Quali, & Qualitate, sic definivit Qualitatem: *Qua quales esse dicimur, sive nominamur*: ergo sola hæc definitio cæteris omnibus aptior est. Respondeo ad objectionem distinguendo maiorem: ubi Princeps Peripateticorum definivit &c. quando definivit per definitionem rigorosam, concedo maiorem: quando non ita definivit, nego maiorem. Deinde, applicatâ distinctione minori, nego consequentiam. Igitur Aristoteles loco citato non
- Aristotel.

non definivit rigorosè Qualitatem, sed tantùm eam descripsit, ut tenent Porphirius, Amonius, Simplicius, Boetius, B. Albertus, & Caietanus, quos citat Mastrius supra laudatus. Plures talem descriptionem reprehendunt, ex eo, quòd in eâ idem per ordinem ad se ipsum describatur, cùm Quale formaliter ipsam Qualitatem involvat, adeoque nec prius, nec notius sit Qualitate ipsâ. Quod (ut Hurtadum, Mag. Bonam spem, & alios præteream) validè ostendit Poncius, ubi supra.

Porphir.
Amonius.
Simplic.
Boetius.
B. Albert.
Caietanus
Mastrius.

Poncius.

366 Alii dicunt, quòd est rediculum Qualitatem per *Quale* describere, non minus, ac ignorant v. g. naturam albedinis albedinem ipsam per ordinem ad album explicare, ex quo fundamen arripuit Ona in præsentis q. 1. art. 1. asserendi, Philosophum Ona. essentiam Qualitatis non cognovisse. Cæterùm quamvis Aristoteles non definiat in rigore Qualitatem, non propterea asserendum est, ipsum illius quidditatem ignorasse, nec quòd sit ridicula illa descriptio, cùm enim hominibus tradita sit, ad quos acquisitio scientiarum spectat, ita illam describit Aristoteles, quòd det occasionem investigandi per eam alia prædicamenta; quasi sensus descriptionis sit: *Qualitas est accidens, quod neque est quantitas, nec relatio, nec actio, &c.* ita ut per Qualitatem possimus intelligere formam, quâ non quanti, nec relati &c. sed tantùm quâ Quales nominemur. Sic exponit Poncius præfatam Philosophi descriptionem, Poncius. & fortassè in hoc sensu illam approbat Resolutus in 1. dist. 14. quæst. unica art. 4. §. 2. vers. *Confirmatur* Baccon. tertid.

367 Objicies secundò pro Suaristis supra citatis. Hæc definitio Qualitatis: *Accidens quoddam absolutum adjunctum substantiæ creatæ ad complementum perfectionis ejus, tam in existendo, quàm in*

in agendo, habet omnes conditiones bonæ definitionis: ergo tenenda est. Respondeo ad objectionem negando antecedens; quia præterquamquod talis definitio multas contineat particulas superfluas, nempe particulam, *quoddam*, & particulas, *adjunctum substantiæ creatæ*, ex eo, quod, si est accidens, est quoddam accidens, & est adjunctum substantiæ creatæ; præterea non rectè explicat naturam Qualitatis. Nam vel illæ particulæ, *tam in existendo*, *quàm in agendo*, sumuntur collectivè, vel divisivè? Si collectivè, non conveniunt omni Qualitati, nempe Qualitatibus non activis: si disjunctivè, sequitur, quod per talem definitionem definiantur Qualitates in particulari, non Qualitas, ut sic. Ita discurrunt Complutenses nostri, Mag. Garcia, & Poncius, ubi sup. citati.

Poncius.

368

Objicies tertio pro Poncio laudato.

Hæc definitio: *Accidens absolutum penetrabile*, convenit omni, & soli Qualitati: ergo Qualitas ita debet definiri. Respondeo ad objectionem negando antecedens. Quia talis definitio convenit puncto de genere quantitatis, eò quod punctum de tali genere sit accidens absolutum, & cum aliis rebus in eodem loco penetrabile, utpote indivisibile. In multis aliis peccare talem definitionem ostendit Mastrius, ubi supra, art. 1. propè finem.

Mastrius.

369

Objicies quartò pro Patre Loffada,

Loffada.

etiam supra citato. Inter tot Qualitatis definitiones hæc satis est apta: *Accidens physicum, & absolutum, quod sequitur formam potius, quàm materiam*: ergo. Respondeo ad objectionem negando antecedens. Quia figura Qualitas quædam est, & tamen potius se tenet ex parte materiæ, quàm formæ. Actio, econtrariò, se tenet ex parte formæ, & tamen Qualitas non est. Deinde impulsus lapidis sursum tendis

dentis est Qualitas ei impressa , quæ formam non sequitur , alioqui enim , ut bene notavit Mag. Garcia Garcia. hic , num. 996. talis motus esset naturalis , non violentus.

370 Objicies quintò , & directè contra nostram definitionem. Talis definitio continet particulam superfluam : ergo non est bona. Probas antecedens. Continet illam particulam , *absolutum* ; sed hæc particula est superflua : ergo talis definitio continet particulam superfluam. Maior liquet. Probas minorem. Si equus definiretur : *Animal irrationale hinnibile* , particula , *irrationale* , esset superflua in tali definitione : ergo , similiter , si Qualitas definia- tur : *Accidens absolutum* &c. particula , *absolutum* , erit superflua. Antecedens patet. Probas consequentiam. Ideo particula , *irrationale* , esset superflua in prima definitione , quia immediatè fundatur in proprio equi conceptu , ex eo enim , quòd equus sit *animal hinnibile* , certum est , quòd sit irrationale ; sed etiam ly , *absolutum* , fundatur in proprio Qualitatis conceptu , siquidem ex eo , quòd Qualitas definiatur , jam intelligitur , quòd sit aliquid absolutum : ergo. Respondeo ad objectionem negando antecedens. Ad probationem , concessà maiore , nego minorem. Ad probationem , concessò antecedente , nego consequentiam. Ad probationem consequentiæ distinguo maiorem : Quia immediatè fundatur in proprio equi conceptu , ex quo nobis sufficienter constat differentia ipsius à cæteris omnibus differentiis , concedo maiorem : aliter , nego maiorem. Deinde nego minorem quoad secundam partem ; quia , nisi ponatur illa particula , *absolutum* , in definitione Qualitatis , non intelligitur , quòd ipsa sit aliquid absolutum , nec quòd distinguatur à relatione , maxime cùm hæc dicat etiam perfectionem ex genere suo,

Complut. suo, in sententiâ Resoluti, idcirco opus est ponere talem particulam in definitione. Quidquid in contrarium judicant Complutenses nostri, ubi supra, impugnando, etiam ex hoc titulo, definitionem Suarii.

371 Objicies sextò, & ultimò. Talis definitio competit quantitati: ergo non est propria Qualitatis. Probas antecedens. Quantitas est accidens absolutum perfectivum subjecti actualis; sed in hoc stat definitio Qualitatis: ergo talis definitio competit quantitati. Probas maiorem. Imprimis quantitas est accidens absolutum: deinde perficit subjectum actuale: ergo. Antecedens quoad primam partem est certum. Probas quoad secundam. Quantitas informat subjectum actuale; sed informare, in phrasi Doctoris, est perficere: ergo quantitas perficit subjectum actuale. Probas maiorem. Quantitas non informat subjectum, nempè materiam primam, antequam hæc informetur per formam substantialem; sed subjectum, postquam informatur per formam substantialem, est subjectum actuale: ergo quantitas informat subjectum actuale.

372 Respondeo ad objectionem negando antecedens. Ad probationem nego maiorem. Ad probationem, concessâ primâ parte antecedentis, nego secundam. Ad probationem istius nego maiorem. Ad probationem distinguo maiorem: quantitas non informat subjectum, nempe materiam primam, antequam &c. non informat reddendo illam actu figuratam, & terminatam, concedo maiorem: reddendo illam formaliter figurabilem, & terminabilem, nego maiorem. Informat igitur quantitas materiam in illo prioritatis signo, reddendo illam figurabilem, & extensibilem, quod sufficit ad hoc, ut non sit proprium quantitatis informare, sive perficere

subje-

subjectum actuale, sicut Qualitas; cùm quantitas in illo prioritatis signo sit accidens subjecti potentialis, non actualis; materia enim est in pura potentia prioriori ad formam substantialem. Ex dictis

373 Deduces, quòd licèt in Qualitate idem sit informare, ac perficere, non absolutè hoc ita debet intelligi, sed tantùm quando informatio est juxta, vel supra exigentiam subjecti, cui inest. Calor enim, cùm non sit juxta, nec supra aquæ exigentiam, illam non perficit, sed potiùs ad ejus destructionem disponit, nisi velis dicere, quòd perficit eam in ratione calidæ. Ex quo fit, particulam, *perfectivum*, in definitione semper recurrere cum particula, *informativum*, & quòd informativum re ipsâ perficiat, quando informat juxta, vel supra subjecti exigentiam.

Q U Æ S T I O II.

Quotuplex sit Qualitas?

374 **R**ESOLUTIO: Qualitas dividitur in quatuor species bimembres, videlicet in habitum, & dispositionem; potentiam, & impotentiam; passionem, & passibilem qualitatem; formam, & figuram. Habitus, de quo hic agimus, (omissis variis hujus nominis significationibus impertinentibus ad rem præsentem) definitur: *Qualitas difficile mobilis à subjecto*. Dispositio verò (omissis etiam aliis acceptionibus, quæ hujus loci non sunt) definitur: *Qualitas facile mobilis à subjecto*. In hoc conveniunt omnes cum Aristotele; cæterùm multi non aptè explicant præfatas definitiones, quæ sanè aliquâ elucidatione egent. Igitur ad intelligentiam utriusque definitionis scire oportet, illos, qui disciplinas, sive

facultates, non multum retinent, non dici habere habitum, ſed eſſe tantum diſpoſitos, uti ipſemet Philoſophus docet; eos verò, qui multum retinent facultates, non tam dici eſſe diſpoſitos, quinimò habere habitum; & hoc non aliâ de cauſâ, niſi, quia à prioribus ſubjectis poſſunt facultates illæ faciliè remove-
ri; à ſecundis verò non niſi difficilè.

375 Ex quibus manifeſtè colligitur contra Thomiſtas, habitum, & diſpoſitionem non diſſerre eſſentialiter inter ſe, ſed tantum accidentaliter, & materialiter; ſolum quippe diſſerunt ſecundum quod
Ariſtotel. faciliè, aut difficilè à ſubjecto removeantur. Quapropter dixit Philoſophus, diſpoſitionem, procedente tempore, fieri habitum; eundemque calorem, dum hic faciliè à ſubjecto removetur, eſſe diſpoſitionem; eſſe verò habitum, dum, procedente etiam tempore, difficilè removetur.

Caſietanus 376 Scio Caſietanum docuiſſe, habitum eſſe Qualitatem illam, quæ difficilè ex naturâ ſuâ removetur, non autem illam, quæ ex conditionibus ſubjecti hoc habet; ita quòd, eſtò hoc habeat ex conditionibus ſubjecti, ſi id non habeat ex naturâ ſuâ, ſed potiùs ex natura ſua faciliè removeatur, ſit diſpoſitio, non habitus: ſicut, econtrariò, docuit ipſe, diſpoſitionem eſſe Qualitatem, quæ faciliè ex natura ſua removetur, non autem illam, quæ ex conditionibus ſubjecti hoc habet, ita quòd, licèt hoc habeat ex conditionibus ſubjecti, ſi tamen id non habeat ex natura ſua, ſed potiùs ex natura ſua difficilè removeatur, ſit habitus, non diſpoſitio. Cæterum (quavis verum ſit ſcientias, virtutes, & alias qualitates, quæ ex naturâ ſuâ difficilè removeantur, eſſe habitus; diſpoſitiones verò illas, quæ etiam ex ſuâ naturâ faciliè removeantur,) valè attendendum eſt id, quod de facto illis convenit erga ſubjectum,
ſive

sive ex natura sua, sive per accidens, ita ut si de facto aliqua Qualitas difficilè removeatur à subiecto, etiam per accidens, sit habitus; si verò de facto facilè removeatur, licèt per accidens, sit dispositio. Ex quibus manifestè colligitur, posse dici habitum, quod alioquin erat dispositio, & econvertò. Quia, juxta Aristotelem, quamvis disciplinæ, sive facultates sint verè habitus, si tamen facilè removentur à subiecto, dicuntur dispositiones, etiam si hoc per accidens contingat.

377 Dividitur ulterius Qualitas in Qualitatem supernaturalem, præternaturalem, & naturalem. Naturalis subdividitur in spiritualem, & corpoream. Corporea in cælestem, & sublunarem. Sunt & aliæ Qualitatis species, quæ omnes sparsim ab AA.explicantur, ubi commodiùs de illis agere opus est. Nos in præsentì de istis non multùm curamus; tantùm quippe intendimus tradere sufficientem notitiam earum specierum, in quas Aristoteles pro studentium commodo Qualitatem divisit.

378 Igitur potentia, quæ est primum membrum secundæ speciei Qualitatis traditæ à Philosopho, sic definiri potest: *Qualitas congenita cum natura, & expedita, ut subiectum possit immediatè operari.* Impotentia verò sic: *Qualitas congenita cum natura, & impedita, ut subiectum possit immediatè operari.* Utraque differt ab habitu, & dispositione. Pro quarum intelligentia est advertendum, principium operationis dupliciter considerari posse, vel quatenus est simpliciter necessarium ad operandum, vel tantùm ad benè operandum, ita ut sine illo possit quis absolutè operari. Sic intellectus, sive potentia intellectiva, est principium simpliciter necessarium operandi intelligibiliter, sive intelligendi; habitus verò scientiarum est principium benè intelli-

gendi. Primum invenitur etiam in rustico: secundum non nisi in homine docto. Ex quibus patet, habitum, & dispositionem differre essentialiter à potentiâ, & impotentia; quia potentia, & impotentia ordinantur ad operationem simpliciter; habitus verò, & dispositio ad bene operandum. Item potentia est virtus immediatè elicitiva operationis; habitus autem non immediatè elicit actum, sed potentiam ad agendum disponit, in quo sensu est etiam dispositio, non obstante conceptu habitus de quo supra n. 374.

379 Est igitur potentia Qualitas congenita cum naturâ, ut subiectum possit simpliciter operari; impotentia verò est Qualitas congenita cum naturâ, ut subiectum simpliciter operetur, non quidem promptè, & validè, sed cum aliquo impedimento, & debilitate. Ex quibus sequitur, potentiam, & impotentiam differre tantum accidentaliter inter se, sicut perfectum, & imperfectum intra eandem causam. Neque enim impotentia, de quâ est sermo, est aliquid præter ipsammet potentiam cum defectu, uti se habet potentia debilis videndi comparata cum eâdem potentiâ acutâ, inter quas nulla est essentialis distinctio in ratione potentiæ, sed tantum accidentalis in ratione debilis, & acutæ.

380 Passio, uti de eâ hîc agimus, definiri potest sic: *Qualitas citò transiens à subiecto, quæ vel in ipso à passione causatur, vel est efficiens sensum.* Passibilis verò Qualitas sic: *Qualitas diu permanens in subiecto, quæ alterationem causat, vel ab ipsâ causatur.* Utraque discriminatur specificè, & essentialiter non modò ab habitu, & dispositione, sed etiam à potentiâ, & impotentia, ut consideranti illarum naturas constabit. Quare passio non sumitur in præsentî pro receptione alicujus formæ, sive pro

pro actione, prout recepta in passio, vel in fieri, vel in facto esse, de qua modò præscindimus, hoc enim pacto spectat passio ad sextum prædicamentum, de quo infra.

381 Sumitur ergo hîc passio vel quatenus effectus est passionis, quæ spectat ad sextum prædicamentum, ut quando ex timore objecti, v. g. leonis, recepto in homine, resultat in ipso pallor, vel quatenus aliquo modo est causa alicujus passionis sensûs, ut color respectu visûs. In utràque acceptione sumitur etiam passibilis Qualitas; cum hoc tantum discrimine, quòd si Qualitas ista citò transeat, ut pallor, qui generatur ex timore, dicenda sit passio: si verò diu perseveret, ut pallor in corpore macilento, dicenda sit passibilis Qualitas. Ex quibus deducitur, passionem, & passibilem Qualitatem tantum accidentaliter inter se differre, nempe secundum brevem, & longam durationem.

382 Forma tandem, quæ ad hunc locum spectat, definiri potest: *Qualitas resultans ex terminatione quantitatis extensæ in rebus artificialibus.* Figura verò sic: *Qualitas resultans ex terminatione quantitatis extensæ in rebus naturalibus.* Utraque differt essentialiter ab habitu, & dispositione, à potentiâ, & impotentiâ, à passione, & passibili Qualitate, ut discurrenti patebit. Ex his definitionibus constat, formam hîc non sumi pro formâ substantiali, nec in illâ acceptione, in quâ omnia accidentia dicuntur formæ, quatenus subjectum informant, nec tandem pro dispositione partium in ordine ad locum, quæ est propria alterius prædicamenti, nempe sitûs.

383 Sumitur tantum pro illa externa dispositione, quam habent partes quantitatis in ordine ad se, & secundum quam subjecta dicuntur formosa,

sa, & deformia. In hac acceptione sumitur etiam figura, quæ utique resultat ex terminatione quantitatis extensæ; cùm quantitas inextensa non habeat figuram. Potest autem forma, sicut & figura, esse circularis, quadrata, triangularis &c. eo pacto, quo quantitas fuerit terminata. Ex quibus deduces, formam, & figuram differre inter se materialiter tantum, cùm vel differant secundum respicientiam rerum naturalium, & artificialium, ut non pauci docent, vel sint omnino synonymæ, ut volunt multi.

Q U Æ S T I O III.

Quot sint Qualitatis proprietates?

384 **R**ESOLUTIO: Proprietates Qualitatis à Philosophis communiter enumeratæ sunt tres. Prima: *Quod habeat contrarium*: sic calor contrariatur frigiditati, albedo nigredini &c. Qualitates autem, quæ ex mixtione istarum resultant, nullum habent contrarium ratione sui, sed tantum ratione unius extremi contrariantur alteri: sic tepidum, quod resultat ex calido, & frigido, nulli extremo contrariatur ratione sui. Idem dicendum de colore cæruleo, & similibus, quæ solum ratione unius extremi alteri contrariantur. Hæc proprietas non convenit omni Qualitati, ut patet in luce, & figurâ nullum contrarium habentibus: imò illam nec soli quantitati competere, docent multi; quia etiam calefactio, & frigeffectio, calefieri, & frigesieri contrariantur, & tamen calefactio, & frigeffectio spectant ad actionem, calefieri, & frigesieri ad passionem. Cæterum hæc contrarietas solum convenit actioni, & passioni ratione Qualitatum, nempe frigiditatis, & caloris, quo posito, asserendum est, præfa-

præfatam proprietatem, nempe, *non habere contrarium*, estò non omni, soli tamen Qualitati competere.

385 Secunda Qualitatis proprietas est: *Quod suscipiat magis, & minus*, id est, quòd possit intendi, & remitti. Quomodò autem fiat intensio, quæstione sequenti dicemus. Hæc proprietas non convenit omni Qualitati, ut liquet in quarta ejusdem Qualitatis specie, nempe in formâ, & figurâ, quæ non suscipit magis, & minus: neque enim unus circulus est magis circulus, quàm alius, aut unum quadratum magis quadratum alio, & sic de aliis formis, & figuris; quippe consistunt in indivisibili. Sed quanvis hæc proprietas non conveniat omni Qualitati, nihilominus soli Qualitati convenit.

386 Tertia tandem Qualitatis proprietas est: *Quod reddat res similes, aut dissimiles*, similes, inquam, & dissimiles fundamentaliter; similitudo enim, & dissimilitudo, formaliter sumptæ, potius sunt relationes, quàm Qualitates: unde Qualitas ista est fundamentum relationis similitudinis, aut dissimilitudinis. Hæc proprietas maximè propria est Qualitatis; quia non modò convenit omni, sed soli. Sicut ergo unitas, & multitudo in substantiis faciunt idem, & diversum; in quantitate autem æquale, & inæquale; ita in Qualitate faciunt simile, & dissimile. Sunt enim similia, quorum Qualitas est una; dissimilia verò, quorum multiplex est Qualitas.

Q U Æ S T I O IV.

Quomodo fiat intensio Qualitatis?

Bacon.

387

RESOLUTIO: Intensio Qualitatis fit per additionem gradûs ad gradum in eodem subjecto, id est, in eâdem parte ejusdem. Ita Doctor in 1. dist. 15. q. unicâ art. 4. §. 1. vers. *Ex his*, quem sequuntur Mag. Zagaglia tom. 1. disp. 5. sect. 5. §. ultimo. Mag. Garcia Physicæ parte 2. dist. 2. q. 6. art. 3. §. 4. Mag. Bona spes Physicæ parte 3. disp. 8. dubio 1. n. 1. & omnes ejusdem Doctoris discipuli. Tenet resolutionem Scotus cum omnibus suis, quos citat Poncius Physicæ disp. 24. q. 3. n. 21. in fine, & sequitur n. 34. Tenent etiam Nominales cum Okamo, & Doctores Societatis cum Eximio, quos novissimè citat, & sequitur P. Ludovicus de Loflada parte 3. suæ Philosophiæ tract. de Generatione, & Corruptione disp. 3. cap. 1. §. 3. n. 20. Ad resolutionis intelligentiam,

Zagaglia.

Garcia.

Bona spes

Scotus.

Poncius.

Okamus.

Suarius.

Loflada.

388

Prænoto primò, Qualitates naturaliter productas, & acquisitas ita produci, & acquiri in sui prima productione, & acquisitione, ut possint plus intendi, & augeri usque ad certos terminos à naturâ præfixos. Sic album fit magis album, calidum magis calidum, candidum magis candidum, &c. Dixi, *usque ad certos terminos*; quia Qualitates supernæ sine fine intendi possunt, ut probat Doctor in 1. dist. 46. q. unicâ art. 2. §. 6. ubi sermonem instituit de Charitate.

Bacon.

389

Prænoto secundò, ex eodem Doctore *Quod aliud est extendi, & (aliud) intendi in qualitate, quod patet; quia frequenter extenditur, quando non intenditur, sicut quando spargitur nix, vel lux:*

lux: ergo extendi hîc est suscipere magis, & minus secundum dilatationem formæ, & secundum esse, & secundum essentiam: ergo, proportionaliter, intendi, & remitti hîc est suscipere magis, & minus secundum quandam vigorationem, seu perfectionationem ad intra. Ibid. dist. 14. q. unicâ art. 1.

390 Prænoto tertio, intensiorem, de quâ agimus, definiri posse sic: *Augmentum Qualitatis in eâdem parte subjecti*: Extensionem verò sic: *Augmentum Qualitatis in novis subjecti partibus continuis*. Hinc patet, intensiorem Qualitatis habere se quodammodo sicut nutritio viventis, ut benè observat Mag. Garcia hîc n. 965. & n. 1009. Etenim Garcia. sicut nutritio supponit substantiam viventis per generationem, ita intensio supponit Qualitatem per alterationem: item sicut nutritio non terminatur ad substantiam viventis secundum se, sed ad quasdam partes substantiæ de novo acquisitas, ita intensio non terminatur ad Qualitatem secundum se, sed ad gradus quosdam Qualitatis acquisitos de novo per successionem.

391 Prænoto quarto, totam Qualitatem per intensiorem acquisitam esse eandem Qualitatem, estò compositam ex diversis gradibus, ita quòd in fluxu, aut refluxu graduum perseveret semper eadem numero Qualitas, sicut perseverat eadem numero quantitas, sive idem numero individuum quantitativum in fluxu, & refluxu partium quantitatis. Unde sicut quantitas viventis in decursu vitæ augeatur, aut minuitur, partes acquirendo, aut deperdendo, & nihilominus eadem numero quantitas perseverat; ita Qualitas in decursu intensiorem, aut remissionis intenditur, aut remittitur, gradus acquirendo, aut deperdendo, & hoc non obstante, semper est eadem numero Qualitas. Ad meliorem hu-

jus doctrinæ explicationem ,

392 Prænoto quintò. Gradus super Qualitatem affluentes ex vi intensiōis , & refluentes ex vi remissionis vocari à Doctore partes materiales Qualitatis. Ubi supra dist. 16. q. unica art. 4. vers. *De primo*, ibi : *Sciendum, quod isti gradus se habent respectu hujus formæ, scilicet respectu hujus albedinis, vel hujus caloris, sicut pars materialis ad individuum cujus est pars materialis : sicut enim hæc caro, & hoc os demonstratum, se habent ad hoc individuum hominis signatum, quod, manente eodem individuo numero, partes istæ materiales fluunt, & refluunt; eodem modo hîc, manente eadem albedine in Sorte, potest variatio accipi circa albedinem istam secundum partes materiales albedinis, manente eadem albedine numero. Vult Doctor quod gradus isti Qualitatis dicantur partes materiales ejusdem, non quia sint partes alicujus materiæ intrinsecæ talis formæ, sed quia hujusmodi variatio graduum non consequitur formam secundum esse ejus quidditativum expressum per definitionem, sed esse materiale in subiecto. Ibidem vers. *Ad primum.**

393 Sensus est, quòd gradus isti de materiali se habeant ad rationem formalem Qualitatis, (putà ad albedinem, vel ad calorem) sicut partes materiales se habent ad individuum hominis v. g. ad Petrum; nam sicut Petrus puer, juvenis, & senex, semper est idem individuum numero, licèt fiat variatio circa ejus partes materiales, ita albedo, vel calor in Sorte semper est eadem numero, estò gradus albedinis, aut caloris fluant, vel refluant. Dicuntur ergo gradus isti partes materiales Qualitatis, quatenus eorum variatio non consequitur formam secundum esse ejus quidditativum expressum per definitionem. Sic albedo, ut talis, solùm dicit esse accidens

cidens disgregativum visûs, & ideo de materiali se habet ad hoc individuum albedinis, quòd ista sit magis, aut minus intensa. Sed quoniam hæc videntur facere tantum pro unitate specifica albedinis, non autem pro unitate numerica, idcirco

394 Prænoto sexrò, quòd in individuis hominis v. g. potest unitas secundum materiam dupliciter considerari, vel formaliter, vel materialiter. Unitas formalis est unitas secundum partes materiales, sine quibus non potest individuum conservari. Unitas materialis est unitas secundum partes, sine quibus stare potest conservatio individui, v. g. unitas hujus individui (putà Petri) non potest stare in juventute, & senectute sine partibus primigeniis; potest tamen stare sine maiortate, aut minoritate ipsarum partium, ex quo sequitur, quòd partes primigeniæ spectant ad unitatem formalem; ipsa verò maiortas, aut minoritas ad unitatem materialem; quia, ut conservetur idem individuum Petri, de materiali se habet, quòd ejus partes fiant maiores, aut minores. Sic proportionali modo de Qualitate discurrendum; ad hoc enim, ut conservetur idem individuum albedinis, satis est, quod conservetur idem accidens disgregativum visûs; quod autem sit magis, vel minus intensum de materiali se habet ad hoc individuum. Idem de calore, & aliis Qualitatibus dicendum, maximè advertendo, quòd hujusmodi gradus per intensiorem additi non sunt prius actu existentes, nec sunt per se, & directè Qualitates (hoc enim solum important species, & individua) sed tantum indirectè, & per reductionem ad Qualitatem, cujus sunt gradus. Ad plenam, & perfectam hujus doctrinæ explanationem. Vide Mag. Zagaglia. tom. 1. disp. 5. sect. 5. §. ultimo toto, & Zagaglia. Mag. Garciam Physicæ parte 2. dist. 2. q. 4. art. 3. Garcia.

- §. 3. num. 885. & 886. His itaque prænotatis ,
 Aristotel. 395 Probo resolutionem , & primò ex Philosopho 1. 4. Physicorum cap. 9. textu 84. dicente :
Ex calido fit magis calidum , nulla prorsus ipsius parte tunc emergente calida , cùm calida minus erat.
- Baccon. Unde Baconius in 1. dist. 15. q. unica art. 4 §. 1. vers. *Ex his arguo , ibi : Commentator addens illam determinationem , quòd maior caliditas fit ex intensione ipsius caliditatis , intendit dicere , quòd forma intensa remanet in suo esse positivo , quod præhabuit , & quod recipiat in se ipsam maiorem caliditatem ,*
- D. Thom. *quæ primò fuit in potentia materiæ.* Et D. Thomas sup. hunc Philosophi textum lectione 14. 1. K. *Aliquid (inquit) fit magis calidum non propter hoc , quod aliqua pars materiæ fiat calida , quæ prius non erat calida , cùm esset minus calida , sed quia tota materia reducitur in actu magis , vel minus calidi.*
- Ex quibus sic : Subjectum fit magis calidum non à calore præcisè ; etenim à calore fit calidum , sed à maiore calore ; sed non datur maior calor , nisi detur additio novi gradûs caloris , cùm sit omnibus notum , nullam rem fieri maiorem in tali , vel tali linea , nisi per additionem gradûs ad gradum in eâdem lineâ , ut liquet infinitis exemplis : ergo intensio Qualitatis fit per additionem gradus ad gradum in eodem subjecto , idest , in eâdem parte eiusdem.
- 396 Secundò sic : Quando Qualitas intenditur , redditur magis activa , quàm antea erat , ut experienciâ constat , maximè in calore ; sed maior activitas non potest provenire , nisi ab aliquo , vel ab aliquibus gradibus novis , quibus Qualitas ipsa antea carebat : ergo idem , quod supra. Maior ex se claret. Probo minorem. Si id ex alio capite proveniret , vel à destructione Qualitatis imperfectioris , vel à maiori radicatione eiusdem Qualitatis in sub-
 jecto,

jecto, vel ex eo præcisè, quòd diminuatur Qualitas contraria; sed à nullo ex his capitibus potest maior activitas provenire, ut ex mox dicendis constabit: ergo non nisi ab aliquo, vel aliquibus gradibus novis, quibus Qualitas antea carebat.

397 Tertiò sic: Nostra sententia cohæret determinationi Concilii Tridentini: ergo tenenda est. Probo antecedens. Concilium Tridentinum sessione septima, Canone 7. docet: *Dari gratiam per Sacramenta semper, & omnibus si ritè ea suscipiant*: ex quo sequitur, quòd detur etiam homini justo; sed gratia data homini justo non destruit gratiam præcedentem; quia, ut docet Bacconius in 1. dist. 15. q. unica art. 4. §. 1. arg. 2. *Quando forma noviter acquiritur in aliquo, & non per generationem, tunc forma præcedens non perdit suum esse, quia nunquam est corruptum esse unius, nisi cum generatione alterius*: ergo gratia data homini justo addit gradum ad gradum. Igitur sic fit intensio Qualitatis. Idem probat Mag. Garcia ex illo Apocal. cap. 22. vers. 11. *Qui in sordibus est, sordescat adhuc: et qui justus est, justificetur adhuc, & sanctus sanctificetur adhuc*. Et sanè ex istis verbis juxta expositiones optimum conficitur argumentum ad nostram sententiam confirmandam.

Trident.

Baccon.

Garcia.

Proponuntur objectiones, & dissolvuntur.

398 **N**ostræ resolutioni opponuntur Gilbertus Porret. Avicenas, Godofredus, & Durandus apud nostros Complutenses disp. 4. de Alteratione q. 7. §. 1. vers. *Secunda*, quatenus asserunt, intensiorem Qualitatem fieri per destructionem Qualitatis imperfectioris, & adventum alterius perfectioris. Opponuntur etiam Thomistæ, signanter Caieta-

Gilbertus.
Avicenas.
Godofredus.
Durand.
Complur.

Caietanus Caietanus, Capreolus, Soncinas, & alii apud Sua-
 Capreol. rium Magnum, Metaph. parte 2. disp. 46. sectione 1.
 Soncinas. n 3. dicentes, intensiorem Qualitatis, juxta veram
 Suarius. Aristotelis, & D. Angelici mentem, fieri absque
 productione novæ partis, aut gradûs ejusdem, aut
 diversæ rationis à priori, sed per solam maiorem ra-
 dicationem in subiecto: quam sententiam ample-
 Complut. ctantur nostri Complutenses, ubi supra, q. 9. § 3. Cæ-
 terum hæc sententia, tametsi communis sit inter
 Thomistas, cum variatione in modo explicandi de-
 fenditur; infra tamen ostendemus, quòd nullo pa-
 cto sustineri possit. Opponuntur tandem alii cum
 Ægidius. Ægidio quodlib. 2. q. 14. defendentes, Qualitatem
 intendi per hoc præcisè, quòd diminuatur Qualitas
 contraria, absque variatione Qualitatis, quæ inten-
 ditur. Pro his omnibus, & imprimis pro AA. primæ
 sententiæ

399 Obijciens primò. Terminus à quo, & ad
 quem, cujusvis motûs ita inter se opponuntur, ut
 acquisito termino ad quem, non maneat terminus à
 quo; sed in motu intensiorem Qualitas remissa est ter-
 minus à quo, & intensa est terminus ad quem: ergo,
 hæc acquisitâ, non manet altera; ac per consequens
 intensio Qualitatis fit per destructionem Qualitatis
 imperfectioris, & adventum alterius perfectioris.
 Probas maiorem, in quâ tantum est difficultas, &
 primò sic: In motu locali, acquisitâ unâ præsentia,
 non perseverat altera: ergo. Secundò sic: Cum arcus
 intenditur, acquisitâ novâ ubicatione, prior amitti-
 tur: ergo. Respondeo ad objectionem, concessâ
 maiore, & minore, distinguendo consequens: non
 manet altera formaliter sumpta, & reduplicativè ut
 remissa, concedo consequentiam: non manet alte-
 ra materialiter sumpta, sive sumpta specificativè, & se-
 cundum suum esse positivum, nego consequentiam, &
 consequens.

400 Unde sicut in augmentatione, & in nutritione viventis non destruitur quantitas præcedens, nisi sumpta reduplicativè, ut minor, sive secundum minoritatem, sic in proposito dicendum. Ad primam probationem maioris, concedo antecedens; quia præsentiaæ locales sunt affixæ loco immobili, ex quo sunt impossibiles. Qualitas autem remissa solum ut remissa est impossibilis cum Qualitate intensa, quia ita sumpta est commissa ex privativo, & positivo; est enim Qualitas privata intensione. Secus si sumatur tantum secundum suum esse positivum, & specificativum, nam ita accepta est eadem numero Qualitas. Audiendus est Baconius Bacon.] in 1. dist. 15. in fine vers. *Vel aliter*, ibi: *Nunc autem promissum est, quod ea, quæ sunt contraria in motu unum corrumpitur in adventu alterius, sive contraria positiva, sive negativa, & ideo concedendum est illud argumentum, quod sicut in locali motu unam ibi corrumpitur in adventu alterius, ita in augmentatione, & alteratione, illud quod est in termino à quo commissum de contrario positivo, vel privativo corrumpitur in termino ad quem, non tamen est verum, quod in intensione, aut remissione, aut augmentatione, aut diminutione alicujus formæ, illud, quod præcessit de eadem formâ, & fuit simile gradui ejusdem formæ corrumpitur in adventu illius gradûs.* Ad secundam probationem ejusdem maioris dico, quod intensio arcus non est propriè intensio, sed, ut bene Loffada hic n 7. est tensio consistens in quâdam variatione extensionis, quæ cogit partes mutare locum, & ubicationem.

Loffada.

401 Objicies secundò pro eâdem sententiâ. Actio nova, & totaliter distincta à præexistenti debet habere terminum novum, & totaliter distinctum; sed intensio est actio nova, & totaliter distincta à primâ

primâ Qualitatis productione : ergo opus est , quòd habeat terminum novum , & totaliter distinctum , ac per consequens ejus terminus debet esse nova Qualitas per se distincta totaliter à prima , quæ debet destrui per adventum alterius. Respondeo ad objectionem concedendo totum , usque ad consequens exclusivè. Quia aliud est , quòd intensio habeat terminum novum , & distinctum totaliter à termino primæ productionis Qualitatis ; aliud verò , quòd talis terminus sit Qualitas per se , & novum individuum Qualitatis totaliter distinctæ à primâ Qualitate præcedente , & quòd hæc destruat per adventum alicujus Qualitatis novæ. Verum est , quòd terminus intensiōis sit novus , & totaliter distinctus à termino præcedente , quia talis terminus est novus gradus Qualitatis , qui quatenus gradus est novus , ut talis distinguitur totaliter , & realiter à præcedente Qualitate , non propriè , quia distinctio propriè numerica , qualis esset hæc , est distinctio individuum , sed impropriè , quatenus talis gradus potest signari , & distingui contra alium , ut infra dicemus. Unde talis terminus non debet dici Qualitas per se distincta à primâ Qualitate præcedente tamquam novum individuum , neque enim actio terminatur ad Qualitatem novam per se , sed ad Qualitatem novam per reductionem , id est , ad gradum , quippe terminatur ad maiorem intensiōem ejusdem Qualitatis per se. Vide infra n. 415. Ex quo rectè

402 Colliges , quòd Qualitas præcedens non destruitur per adventum Qualitatis partialis , sive gradus novi , aliàs sequerentur tria inconvenientia contra Philosophum , ut inquit Doctor in 1. dist. 16. q. unicâ art. 1. §. 2. vers. *Item si sic*, ibi: *Primò quòd nullus habitus est auctus per actus sequentes ; nam per te actus sequens , ex quo mutat gradum , mutat*

mutat individuum, & per consequens corrumpit habitum præcedentem, non ergo ipsam augmentat. Secundò sequitur, quòd habitus sit de facili mobilis: per unum enim actum elicitum generatur unus gradus, si per generationem unius gradus ponitur corrumpi illud individuum habitus, quod præcessit; & unus gradus de facili generatur: ergo. Tertiò sequitur, quòd quilibet habitus demonstrativus acquiritur per unum actum tantum: per unum actum enim acquiritur unus gradus, & quilibet gradus est unum individuum habitus: ergo semper per unum actum acquiritur unus habitus, & per alium alius, & sic de infinitis, quæ omnia sunt contra intentionem Philosophi 2. Ethic. cap. 1. Multis aliis argumentis, & quidem subtilissimis, impugnat Doctor hanc sententiam, quæ omnia eodem loco citato per otium videri possunt.

403 Objicies tertiò pro AA. secundæ sententiæ. Aristoteles l. 4. Physic. cap. 9. inquit: *Ex calido fit magis calidum nullâ prorsus ipsius parte tunc emergente calidâ*: ergo juxta Aristotelem intensio Qualitatis sit absque productione novæ partis, aut gradus ejusdem, aut diversæ rationis à priori, sed per solam maiorem radicationem in subiecto. Confirmabis ex Doctore Angelico 22. q. 24. art. 4. *D. Thom. ad 3. dicente: Nihil est aliud ipsam (idest formam) secundum essentiam augeri, quàm eam magis inesse in subiecto, quod est magis eam radicari in subiecto.*

404 Respondeo ad objectionem explicando Authoritatem Philosophi: *Ex calido fit magis calidum nullâ prorsus ipsius parte tunc emergente calidâ*, id est, perseverante eodem numero calore, in intensione ejusdem; ex quo non sequitur, quòd non fiat magis calidum per additionem gradus. Unde ex hoc textu potius probatur, quàm improbat

nostra resolutio, ut constet ex n. 395. Potest etiam sic exponi testimonium adductum: quod nulla pars materiæ fiat magis calida, quæ antea non fuerit calida; sic enim pergit Autoritas: *Nullâ prorsus ipsius parte tunc emergente calidâ, quæ non erat antea calida, cum calida minus esset.* Ex quo etiam non infertur, quod pars jam calida non fiat magis calida per additionem novi caloris realiter distincti, qui est non sit novum caloris individuum, est tamen novus, & distinctus gradus. Ad illud D. Angelici dico, S. Doctorem intelligendum de inhærentiâ, & radicatione, quæ resultat ex additione graduum, & maior est, quod plures partes formæ eidem subjecto unit. Vide Loffadam tract. de Generat. & Corrupt. cap. 1. §. 3. n. 26. 27. & 28. ubi egregiè exponit locutiones D. Thomæ pro nostrâ potius sententiâ, quàm pro illa Thomistarum.

Loffada.

405 Objicies quartò pro eâdem sententiâ. Si intensio Qualitatis non consisteret in maiori radicatione ejusdem in subjecto, Qualitas materialis extra subjectum posset intendi; sed non potest: ergo signum est, quod intensio Qualitatis consistit in maiori radicatione ejusdem in subjecto. Probas maiorem. Qualitas materialis extra subjectum haberet omnes suas partes: ergo si non consisteret in maiori radicatione ejusdem in subjecto, posset extra subjectum intendi. Probas etiam minorem. Estò subjectum dicatur magis, aut minus album, una albedo tamen non potest dici magis, aut minus albedo, quàm alia: ergo Qualitas materialis extra subjectum non potest intendi. Respondeo ad objectionem, concessâ maiore, negando minorem. Ad probationem distinguo antecedens: una albedo non potest dici magis, aut minus albedo, quàm alia, secundum rationem essentialem albedinis, concedo antecedens: secundum

secundùm gradus materiales , nego antecedens. Unde si Qualitas materialis poneretur Divinitus extra subiectum , Divinitus etiam posset intendi. Sicut & linea extendi posset , si extra quantitatem Divinitus poneretur. Ex quibus retorquetur objectio in Adversarios ; Nam si intendi potest Qualitas extra subiectum , evidenter colligitur , quòd intensio Qualitatis non fit per maiorem radicationem in subiecto.

406 Deinde ista maior radicatio Qualitatis in subiecto nullo pacto defendi , aut sustineri potest. Nam si ipsa in novâ Qualitatis existentia consistit , ut tenet Astudillo 1. de Generatione q. 9. sic impugnatur : Illa maior activitas ad agendum , quæ reperitur in Qualitate intensâ , debet provenire ab aliquo habente rationem formalem agendi ; sed existentia , estò sit conditio ad agendum , non est ratio formalis agendi : ergo radicatio illa maior , per quam in hâc sententiâ intenditur Qualitas , non potest consistere in novâ Qualitatis existentia. Si autem talis radicatio maior consistit in additione novi modi , qui licet non præbeat Qualitati novam vim informativam , reducit tamen ipsam ad maiorem unitatem , ut docet Joanes à Sancto Thomâ , sic impugnatur : Unum per accidens non potest esse magis unum , quàm est unum per accidens ; sed Qualitas , sit remissa , vel intensa , semper cum subiecto facit unum per accidens : ergo quando intenditur non potest facere magis unum cum subiecto , nec reduci ad maiorem unitatem. Si verò consistat in modo aliquo actualitatis maioris superaddito essentia , existentia , & unioni ejus ad subiectum , urî dicunt nostri Complutenses disp. 4. de Alteratione q. 9. §. 3. sic impugnatur : Albedo extra subiectum est capax intensificationis , ut dictum est supra : ergo illa maior radicatio Qualitatis non potest consistere in modo ali-

Astudillo.

Joannes à
S. Thom.

Complut.

quò actualitatis maioris superaddito essentia, existentia, & unioni ejus ad subjectum.

407 Dices cum aliis Thomistis, talem radiationem maiorem consistere in productione strictioris unionis cum subjecto. Verum argumentor eodem argumento supra tacto, communi, sed efficaci, in hunc modum: Accidentia in Eucharistia habent intensiorem, aliquando enim ibi magis intenduntur albedo, & calor; sed ibi non datur perfectior unio ad subjectum; siquidem talia accidentia sunt sine subjecto; & licet habeant quantitatem, nihil vetat, quòd Deus sine quantitate accidentia conservaret: ergo. Mitto alios modos dicendi Thomistarum, sicut & alias multas impugnationes videndas, si lubet, apud Suarium, Poncium, Lossadam, & Mag. Garciam, suis locis supra citatis.

Suarius.
Poncius.
Lossada.
Garcia.

408 Objicies quintò pro AA. tertiæ sententia. Aristoteles l. 5. Phys. cap. 2. ad finem docet, maiorem. & minorem intensiorem, & remissionem fieri per maiorem, & minorem contrarii admisionem ibi: *Est autem ex eo magis minusve tale, quia plus, aut minus inest contrarii, & non inest*: ergo intensio Qualitatis fit per hoc præcisé, quòd diminuat Qualitas contraria, absque variatione Qualitatis, quæ intenditur. Respondeo ad objectionem distinguendo antecedens: docet Aristoteles maiorem, & minorem intensiorem, & remissionem fieri per maiorem, & minorem contrarii admisionem, præcisé, nego antecedens: consecutivè, subdistinguo: in Qualitatibus habentibus contrarium, quòd non expellitur per primam productionem ipsarum, concedo antecedens: in Qualitatibus non habentibus contrarium, vel habentibus contrarium, quòd per primam earum productionem expellitur, nego antecedens, & consequentiam.

Aristotel.

409 Non negamus, quòd in Qualitatibus habentibus contrarium detur remotio ipsius contrarii, quando tales Qualitates intenduntur; quia cùm in Qualitatibus habentibus contrarium, quatenus non habent adhuc esse summè intensum, perseveret admistio contrarii, ita quòd, si calor est intensus ut sex, habeat admistos duos frigiditatis gradus, opus est, quòd, quando calor ille intenditur ut octo, corrumpantur illi duo gradus frigiditatis, & in hoc sensu docet Baconius, quòd in intensione Qualitatis habentis contrarium, aliquid positivum de essentia gradûs remissi corrumpatur: *Verum est, quod minus calidum corrumpitur in adventu maioris, secundùm quod est contrarium.* In 1. dist. 15. q. 1. art. 4. §. 3. in principio. Negamus tamen, quod intensio Qualitatis absolurè consistat præcisè in diminutione Qualitatis contrariæ, absque additione gradûs ad gradum Qualitatis intensæ; maximè cùm dentur Qualitates, quæ, estò careant contrario, intenduntur, ut lux, sonus, &c. Et multæ etiam, quæ tametsi contrarium habeant, ipsum, cùm primùm existunt; expellunt, atque adeo, cùm postea intenduntur, jam non habent contrarium, quod expellatur, ut patet in Fide, Charitate, & Gratiâ; Fides enim solùm habet infidelitatem pro contrario, & hæc certè expellitur per ipsam Fidem quantumvis minimam. Charitati etiam, & Gratiæ solùm peccatum est contrarium, quod utique per minimam Charitatem, sive Gratiâ abjicitur, & nihilominus tam Fides, quàm Charitas, & Gratiâ possunt deinde intendi. Certum igitur est, intensiõem Qualitatis non fieri per hoc præcisè, quòd diminuatur Qualitas contraria, absque variatione Qualitatis, quæ intenditur.

410 Objicies sextò, & directè contra resolutionem. Si intensio Qualitatis fieret per additionem

nem gradûs ad gradum , subjectum habens albedinem sub quatuor gradibus esset magis album , quàm si albedinem haberet tantùm sub duobus gradibus ; sed subjectum habens albedinem sub quatuor gradibus non potest esse magis album , quàm si albedinem haberet tantùm sub duobus gradibus : ergo intensio Qualitatis non fit per additionem gradûs ad gradum. Maior liquet. Probas minorem. Subjectum manens æqualiter album non potest esse magis album ; sed subjectum habens albedinem sub quatuor gradibus manet æqualiter album , ac habens albedinem sub duobus gradibus : ergo subjectum habens albedinem sub quatuor gradibus non potest esse magis album , quàm si albedinem haberet tantùm sub duobus gradibus. Maior liquet. Probas minorem. Subjectum habens albedinem sub quatuor gradibus , habet eandem numero albedinem , ac habet , habens albedinem sub duobus gradibus ; sed manente eâdem numero albedine in subjecto aliquo , manet subjectum æqualiter album : ergo subjectum habens albedinem sub quatuor gradibus , manet æqualiter album , ac habens albedinem sub duobus gradibus. Consequentia sequitur. Minor videtur evidens. Maior autem , quam multi negant , est certa in viâ Doctoris asserentis , intensiorem Qualitatis non terminari ad differentes numero Qualitates. In 1. dist. 16. q. unica art. 1. §. 2. ubi hanc doctrinam sex evidentibus probationibus ostendit.

Baccon.

411 Respondeo ad objectionem apparenter difficilem , stando pro doctrina Baconii , concessâ maiore , negando minorem. Ad probationem , concessâ etiam maiore , nego minorem. Ad probationem concedo similiter maiorem , & nego minorem , nempe quòd , manente eâdem numero albedine in subjecto aliquo , maneat subjectum æqualiter album ;

album ; quæ quidem minor , licet appareat vera , re ipsa est falsa (cave ne illam concedas) & ut talis negatur à Resoluto in 1. dist. 16. q. unica, art. 4. vers. Baccon.

Ad illud , ibi : Et cum accipitur ulterius : manente eadem densitate numero in subjeçto , manet subjeçtum æqualiter densum , nego hanc propositionem ; sicut negarem hanc : Manente eadem albedine in subjeçto , manet subjeçtum æqualiter album.

412 Igitur verum est , quod subjeçtum semper habeat eandem numero albedinem , vel illam habeat sub duobus gradibus tantum , vel sub pluribus gradibus ; quia quemadmodum semper perseverat idem numero individuum quantitativum in fluxu , & refluxu partium quantitatis , ita perseverat eadem numero Qualitas in fluxu , & refluxu graduum ipsius ; sic intelligo Aristotelem 4. Phys. cap. 9. dicentem : *Ex calido fit magis calidum nullâ prorsus ipsius parte tunc emergente calida , quæ non erat antea calida , cum calida minus erat.* Hoc tamen non obstante , adhuc salvatur , quod subjeçtum habens albedinem sub quatuor gradibus sit magis album , quàm illam habens sub duobus gradibus , quia esto maneat æqualiter album quoad eandem numero albedinem , non manet æqualiter album quoad rationem albedinis secundum gradus , & hoc sufficit , ut absolutè dicatur magis album. Aristotel.

413 Instabis. Subjeçtum non potest fieri magis album per additionem eorum , quæ non sunt Qualitates ; sed gradus albedinis non sunt Qualitates : ergo subjeçtum habens albedinem sub quatuor gradibus non fit magis album , quàm illam habens sub duobus gradibus. Maior est manifesta ; quia si id , quod additur , non est Qualitas albedinis , quomodo potest reddere subjeçtum magis album ? Probas minorem. Si gradus albedinis essent Qualitates,
tot

tot essent Qualitates albedinis numero distinctæ, quot sunt gradus; sed Qualitas albedinis semper est eadem numero, ut dictum est supra: ergo gradus albedinis non sunt Qualitates.

414 Respondeo ad objectionem distinguendo maiorem: subiectum non potest fieri magis album per additionem eorum, quæ non sunt Qualitates, id est, per additionem eorum, quæ non sunt per se individua Qualitatis, nec reducuntur ad individuum per se Qualitatis, concedo maiorem: per additionem eorum, quæ non sunt Qualitates, id est, quæ non sunt per se individua Qualitatis, sed reducuntur ad individuum per se Qualitatis, nego maiorem. Deinde distinguo minorem: gradus albedinis non sunt Qualitates, id est, individua per se Qualitatis, concedo minorem: id est, non reducuntur ad individuum per se Qualitatis, nego minorem. Ad probationem minoris, nego maiorem, quæ solùm esset vera, si gradus albedinis essent Qualitates per se; constat autem ex dictis esse Qualitates tantùm per reductionem ad unum individuum per se Qualitatis albedinis, quod sufficit, ut subiectum per additionem graduum albedinis fiat magis album, maximè cùm gradus isti sint partes albedinis, sive albedines partiales, & inadæquatæ, ut ita dicam, quatenus reducuntur ad individuum Qualitatis tanquam partes affluentes, & refluentes.

415 Replicabis. Subiectum non potest mutari à pallido in album per solam additionem graduum albedinis, sed opus est, quòd additum sit per se individuum albedinis: ergo neque potest de albo fieri magis album per solam additionem graduum albedinis, nisi addatur individuum albedinis, sive nova albedo. Respondeo ad replicam concessio antecedente, negando consequentiam. Disparitas est
cla-

clara : quia subjeçtum pallidum nullam in se habet albedinem existentem ; idcirco, quando mutatur de pallido in album, necesse est , quòd detur motus ad individuum albedinis novum. At verò quando subjeçtum de albo fit magis album , jam in se habet albedinem existentem , & ideo non mutatur ad individuum albedinis , cùm hoc jam in se habeat , sed movetur tantùm ad novum albedinis gradum. Solutio est Resoluti in 1. dist. 16. q. unica art 4. vers.

Ad rationes , in fine : Sed est notandum , quòd quando mutatur à nigro , vel à pallido ad albedinem, tunc per se iste motus est ad albedinem , quia per se terminatur ad individuum albedinis novum : sed quando fit motus ab albo secundùm unum gradum ad idem sub alio per se non mutatur subjeçtum ad albedinem, nihil enim movetur ad illud , quod jam habet , sed movetur per se ad novum gradum albedinis. Baccon.

416 Objicies septimò. Quod consistit in indivisibili non potest intendi per additionem ; sed essentia Qualitatis (sicut & rerum omnium) consistit in indivisibili : ergo non potest intendi per additionem gradûs ad gradum. Respondeo ad objectionem , concessâ maiore , distinguendo minorem: essentia Qualitatis metaphysica consistit in indivisibili , concedo minorem : essentia physica, sive quoad integritatem physicam, nego minorem , & consequentiam. Solùm essentia metaphysica Qualitatis (sicut & aliarum rerum) stat in indivisibili , id est , essentia sumpta quoad prædicata essentialia expressa per definitionem : sic albedo , calor &c. numquam magis, vel minus verificant nomen , & definitionem albedinis , & caloris ut sic, esse sint sub pluribus , paucioribusvè gradibus : Cæterùm essentia physica , sive quoad integritatem physicam , aliter se habet , hæc enim potest integrari ex pluribus,

vel paucioribus partibus, ut patet in arbore tenera, & procera. Sic in proposito essentia caloris, albedinis &c. potest integrari ex pluribus, vel ex paucioribus gradibus absque aliquo inconvenienti.

417 Instabis. Omnis forma accidentalis est actus purus excludens compositionem integram; sed Qualitas est forma accidentalis: ergo non potest integrari ex diversis gradibus. Respondeo ad instantiam negando maiorem, & concessâ minorem, nego consequentiam. Quia quantitas extensa est forma accidentalis, & tamen non excludit compositionem integram. Quod etiam verificatur de Qualitate intensa, ex quo etiam, cum intenditur, non est cur non sit integraliter composita ex gradibus per quorum additionem intenditur.

418 Replicabis. Saltem intensio gratiæ debet talem compositionem excludere: ergo saltem hæc Qualitas intensa non est integraliter composita ex gradibus. Probas antecedens. Gratia est participatio Divinæ naturæ: ergo debet excludere talem compositionem, illius simplicitatem imitando. Respondeo ad replicam negando antecedens. Ad probationem, concessio antecedente, nego consequentiam. Quia quanvis gratia sit Divinæ naturæ participatio, quatenus sanctificat, & radicat supernaturales operationes intelligendi, & amandi, præstando jus ad gloriam &c. non ita tamen est participatio naturæ Divinæ, quod imitetur naturam Divinam in simplicitate, sicut illam non imitatur in reliquis perfectionibus infinitis. Neque ex hoc sequitur, quod gratia remissa sit perfectior quàm intensa, ut bene observat P. Lossada n. 33. ubi supra; nam estò res simplicior sit perfectior, cæteris paribus, non tamen absolutè est perfectior, alioquin partes essent perfectiores toto, cum sint ipso simpliciores. Unde gratia

Lossada.

tia remissa (& idem de cæteris Qualitatibus dicendum) solum est perfectior intensâ , si posset esse tantæ virtutis ac intensâ , quod est impossibile , & ideo intensâ semper est perfectior remissâ , licet non sit simplicior illâ.

419 Objicies octavò. Ex additione gradûs ad gradum in eâdem parte subjecti sequitur , quòd duo , vel plura accidentia numero tantum distincta possint esse in eâdem parte subjecti ; sed non possunt , cum individuentur à subjecto : ergo neque intensio Qualitatis potest fieri per additionem gradûs ad gradum in eâdem parte subjecti. Probas maiorem. Gradus isti sunt accidentia ; sed solo numero sunt distincti ; non enim sunt heterogenei , sed homogenei in sententia Baconii : ergo ex additione gradûs ad gradum in eâdem parte subjecti , sequitur , quòd duo , vel plura accidentia numero tantum distincta possint esse in eâdem parte subjecti.

420 Respondeo ad objectionem distinguendo maiorem : sequitur , quòd duo , vel plura accidentia numero tantum distincta possint esse in eâdem parte subjecti , si sint distincta numero improprie , concedo maiorem : si sint distincta numero proprie , nego maiorem. Deinde , applicatâ distinctione minori , nego consequentiam. Igitur gradus Qualitatis , tametsi sint numero tantum distincti , non sunt ita proprie distincti numero , sicut distinguuntur individua sub specie ; quia , ut supra dictum est , tales gradus non sunt plura individua Qualitatis , nec Qualitates , nisi per reductionem ad individuum Qualitatis. Sunt igitur tantum numero distincti improprie , quatenus possunt signari ; cum omnis forma aucta designari optimè possit designatione graduum. Sic in albedinis intensione designatur album , albius , & albissimum : similiter in inten-

sione caloris designatur tepidum, calidum, calidius, & calidissimum. Attentâ igitur istâ designatione graduum, distinguuntur quodammodo numero; ast non ita propriè, quòd sint individua per se existentia, ad quæ, propriè loquendo, attinet diversitas numeralis, ut inquit Doctor ubi supra art. 4. in fine: *Ad aliud dico, quòd differunt numero, non tamen propriè, quia diversitas numeralis propriè est diversitas singularium, seu individuorum sub specie: & verum est (ut arguitur) quòd plura accidentia solo numero differentia isto modo simul esse non possunt in eodem susceptivo: sed duo gradus sunt simul in eodem individuo, & quodammodo numero differunt, quia unus gradus potest signari, & distingui contra alium, puta pedalis contra bipedalem, omnis autem signatio est quædam numeratio.*

421 Instabis. Duo, vel plura accidentia solo numero differentia, & ita propriè distincta, non possunt esse in eodem subiecto totali: ergo neque duo, vel plura accidentia solo numero differentia, estò ita impropriè distincta, possunt esse in eodem subiecto partiali; ac per consequens in eadem parte subiecti non possunt esse duo, vel plures gradus Qualitatis, putà albedinis, vel caloris. Respondeo ad instantiam concedendo totum usque ad consequens exclusivè. Quia, ut benè advertit Mag. Garcia hic n. 1000. in fine, pars subiecti solùm dicitur subiectum parziale respectivè ad totum, quod componit cum aliis compartibus, non autem respectivè ad gradus intensiõis, quos in se suscipere potest; respectivè enim ad gradus istos habet se ut subiectum totale, sicut se habet materia respectivè ad formas, quas potest recipere. Unde stat bene, quòd duo accidentia distincta tantùm numero impropriè, non possint esse in eodem subiecto partiali, & nihilominus

Garcia.

nus possint esse in eâdem parte subiecti, uti sunt gradus albedinis, caloris &c. per intensiorem.

422 Obicies nonò Qualitas caloris partialis gradûs supervenientis primo gradui est æquè perfecta ac est Qualitas sub primo gradu existens: ergo non potest intendere ipsam Qualitatem præ-existentem. Antecedens patet ex eo, quòd gradus isti sint homogenii in sententiâ Baconii. Probas consequentiam. Quod est æquè perfectum ac aliud non potest ipsum reddere perfectius: ergo neque intendere. Respondeo ad objectionem, concessio antecedente, negando consequentiam. Ad probationem distinguo antecedens: non potest ipsum reddere perfectius essentialiter, concedo antecedens: integraliter, nego antecedens, & consequentiam. Tametsi gradus caloris additus alteri gradui sit æque perfectus ac ille alter, semper perficit calorem integraliter, & gradualiter; facit quippe quòd calor, qui erat sub uno gradu tantum v. g. maneat sub duobus, & intendatur per gradum additum.

423 Instabis. Gradus additus non potest, nec integraliter, perficere calorem, qui erat sub alio gradu, nisi talis gradus de novo additus habeat rationem actûs; & gradus præcedens rationem potentiæ; sed hoc non; quia non est maior ratio, cur unus, & non alius importet rationem potentiæ, vel actûs: ergo gradus additus non potest, nec integraliter aut gradualiter, perficere calorem, qui erat sub alio gradu. Respondeo ad instantiam negando maiorem, & concessâ minorem, nego consequentiam. Quia gradus de novo additus non perficit gradualiter calorem, qui erat sub alio gradu, quatenus iste se habet ut potentia ad gradum additum, neque per modum continuationis in communi termino indivisibili, sed per attractionem gradûs additi ad gradum præcedentem,

Zagaglia.

tem, tamquam per partes materiales ejusdem caloris fluentes, & refluentes, quæ omnes recipiuntur in eodem subiecto, sive in eadem parte ipsius, quod propterea dicitur magis, & magis calidum, salvâ semper essentiâ, quæ per definitionem caloris explicatur, ut supra dicebam. Vide Mag. Zagaglia supra, n. suo 40. ad finem.

424 Obicies decimò. Quòd subiectum magis actuetur non fit per additionem potentix actuabilis ad potentiam actuabilem: ergo quòd Qualitas magis intendatur, non fit per additionem gradus ad gradum. Respondeo ad objectionem, concessio antecedente, negando consequentiam. Disparitas est: quia ut subiectum magis actuetur, sufficit, & est necesse, quòd addatur forma actuans ad formam actuantem præexistentem, neque opus est, quòd addatur potentia actuabilis ad potentiam actuabilem. At Qualitas non habet per quod intendatur, nisi per additionem gradus ad gradum, ut liquet ex argumentis in adversarios.

425 Instabis. Ut subiectum magis actuetur non est necesse, quòd addatur forma actuans ad formam actuantem præexistentem: ergo nulla solutio. Probas antecedens. Eadem forma potest magis actuare: ergo ut subiectum magis actuetur non est necesse, quòd addatur forma actuans ad formam actuantem præexistentem. Probas antecedens. Idcirco eadem forma non posset magis actuare, quia est tota actuans; sed quamvis sit tota actuans, potest magis actuare: ergo eadem forma potest magis actuare. Maior liquet. Probas minorem. Idem subiectum potest actuari magis, tametsi totum sit actuatum: ergo eadem forma potest magis actuare, quamvis sit tota actuans.

426

Respondeo ad instantiam negando ante-

antecedens. Ad probationem distinguo antecedens: eadem forma potest magis actuare diversam subiecti partem, concedo antecedens, eandem partem subiecti, vel idem subiectum invariatur, quod actuatur, nego antecedens. Ad probationem, concessâ maiore, nego minorem in sensu distinctionis. Ad probationem distinguo antecedens: idem subiectum potest actuari magis, &c. à nova forma, vel à nova formæ parte, concedo antecedens: ab eadem forma invariata, & sine additione alicujus gradûs, vel partis ipsius, nego antecedens. Igitur, ut firmiter sustineamus resolutionem, & huic objectioni satisfaciamus, contenti sumus, quòd neque detur *magis actuari*, neque *magis actuare*, quin detur nova forma, vel nova pars formæ, ut rectè observat Loffada Loffada. circa præsentem difficultatem, ubi supra n. 36. Si igitur supponitur crescere subiectum, satis est, quòd forma crescat. Sic in proposito de Qualitate, quæ nisi crescat per additionem gradûs ad gradum, non potest magis, & magis intendi.

427 Objicies undecimò. Maior velocitas est veluti intensio motûs, quo idem percurritur spatium; sed hæc non fit per additionem partis ad partem motûs: ergo neque intensio Qualitatis per additionem gradûs ad gradum. Respondeo ad objectionem, concessâ maiore, & minore, negando consequentiam. Ratio discriminis est; quia maior velocitas potest dari ex eo, quòd mobile in tempore æquali plures partes spatii percurrat, quàm mobile tardum, ut inquit Commentator 6. Physicorum cap. 11. *Velocius esse quod in parvo tempore multum spatii percurrit.* Cæterùm Qualitas absque additione gradûs ad gradum nihil haberet per quod intenderetur, ut ex supradictis constat.

428 Objicies duodecimò. Extensio quantitatis

tatis potest fieri absque additione novæ quantitatis partialis: ergo etiam intensio Qualitatis absque additione novæ Qualitatis partialis, sive absque additione gradûs ad gradum ejusdem. Probas antecedens. Quando quantitas rarefit, extenditur; sed non per additionem novæ quantitatis: ergo extensio quantitatis potest fieri absque additione novæ quantitatis partialis. Respondeo ad objectionem (omissis aliis solutionibus) negando antecedens. Ad probationem, concessâ maiore, nego minorem; quia rarefactio, in probabili opinione Baconistarum, fit per eductionem novæ partialis quantitatis ex priori materiâ. Ita ex Baconio, & Blasco docet Mag. Garcia, Physicæ parte 2. dist. 2. q. 5. art. 2. n. 920. Ex qua doctrina retorqueri potest argumentum. Si cupis alias solutiones vide Suarium Lusitanum Metaph. tract. 4. disp. 2. sectione 2. §. 2. n. 34. Mag. Garciam in hac quæstione n. 998. Aug. Laurentium Metaph. tract. 4. disp. 1. sectione 3. n. 75. & 76. Loflada Metaph. disp. 3. §. 3. n. 35. Ad 2.

429 Obijcies decimotertiò, & ultimò Saltem Qualitas spiritualis, ut gratia, non potest intendi per additionem gradûs ad gradum: ergo resolutio absolutè non stat. Probas antecedens. Gradus Qualitatis sunt partes Qualitatis; sed Qualitas spiritualis caret partibus; cùm sit indivisibilis: ergo saltem Qualitas spiritualis, ut gratia, non potest intendi per additionem gradûs ad gradum. Respondeo ad objectionem negando antecedens. Ad probationem, concessâ maiore, distinguo minorem. Qualitas spiritualis caret partibus extensionis, concedo minorem: caret partibus intensiõis, nego minorem, & consequentiam. Nec obstat, quòd Qualitas spiritualis sit indivisibilis, quia solum est talis, quatenus excludit partes extensionis, vel conside-

rata

Bacon.

Blasco.

Garcia.

Suarius.

Aug. Laur.

Loflada.

rata secundum essentiam metaphysicam. Ex dictis
 430 Deduces primò, nec formam substan-
 tialem, nec quantitatem, nec relationem, nec actio-
 nem intendi posse, rigorosè loquendo. Ratio primi
 est: quia substantia non suscipit magis, nec minus.
 Ratio secundi: quia non possunt dari plures partes
 quantitatis in eadem parte subjeeti. Ratio tertii:
 quia ad relationem non datur per se motus physicus,
 qui ad intensiorem requiritur. Ratio quarti: quia
 actio est forma simplex. Idem de reliquis prædica-
 mentis, suis locis, dicendum. Igitur sola Qualitas,
 esse non omnis, intendi potest, juxta superius dicta
 n. 385.

431 Deduces secundò, gradus intensiorem
 Qualitatis esse homogeneos, idest, ejusdem omnino
 rationis, & perfectionis. Ratio est: quia ad inten-
 sionem Qualitatis, nec autoritas, nec ratio, aut
 experientia cogit admittere gradus heterogeneos,
 sive diversæ rationis. In iis non amplius immora-
 mur, quoniam ex professo omnia discutere non in-
 tendimus, ea præsertim, de quibus AA. prolixè dis-
 putant, quorum doctrina concors est cum sententiâ
 Resoluti.

S E C T I O IV.

De Prædicamento Relationis.

Q U Æ S T I O I.

Quid sit Relatio prædicamentalis ?

432

RESOLUTIO: Relatio prædicamentalis benè definitur sic: *Forma, cuius totum esse est ad aliud.* Deduci-

- Baccon. tur ex Doctore in 3. dist. 2. q. 1. art. 3. §. 2. vers. *Sed*
 Garcia. *tertium.* Tenet definitionem Mag. Garcia dist. 2.
 Metaph. q. 5. art. 1. §. 2. n. 823. Eandem ad men-
 Zagaglia. tem Resoluti explicat Mag. Zagaglia tom. 2. tract.
 2. disp. 6. sect. 4. §. 2. num. 90. ante medium. Perè
 omnes in hoc conveniunt, quòd totum esse Rela-
 tionis prædicamentalis sit ad aliud, juxta id, quod
 Aristotel. docet Aristoteles cap. *De his quæ ad aliquid*, ubi sic
 Relativa prædicamentalia definit: *Quorum esse idem*
est ei, quod est ad aliquid aliquo modo se se habere,
 id est, *quorum natura, & essentia est aliud respi-*
 Conimb. *cere*, uti exponunt PP. Conimbricenses in Logica
 cap. 7. in principio. Cæterùm maior pars Philosopho-
 rum discordat à nobis non modò in eo, quòd per
 ly, *ad aliud*, intelligat terminum actu necessario
 existentem, docente Baconio, quòd intelligatur
 terminus actu, vel potentiâ ad existendum (de quo
 quæstione 4.) sed etiam in eo, quòd loco particu-
 læ, *Forma*, ponat particulam, *Accidens*, quam
 compositò excludimus à definitione; quippe in sen-
 tentiâ Baconij Relationes Divinæ sunt res hujus
 prædicamenti, sive reales Relationes prædicamen-
 tales;

tales; nequaquam autem accidentia. Ad plenam resolutionis intelligentiam,

433 Prænoto primò, Relationem abstracchè sumptam à prædicamentali, & transcendentali sic definiri posse: *Forma, cujus esse est ad aliud*; cùm enim Relatio ex natura sua dicat ordinem ad terminum, non potest concipi absque tali respectu, seu ordine. Addit igitur Relatio prædicamentalis supra illam rationem communem Relationis, habere seu dicere totum suum esse ad aliud, ut liquidò constat ex definitione supra tradita, quod idem est, ac respicere terminum, ut purum terminum, per contrapositionem ad Relationem transcendentalem, quæ estò terminum respiciat, non tamen, ut terminum purum, sed ultra, exhibendo aliquod particulare exercitium. Hinc

434 Prænoto secundò, in hoc maximè differre Relationem prædicamentalem à transcendentali, quòd prædicamentalis est purus respectus ad terminum, non habens aliud munus, nec exercitium, nisi referendi ad terminum, ut purum terminum, ita quòd nequaquam terminetur ad absolutum formaliter, sed tantum ad relativum. Sic se habent Relationes paternitatis, æqualitatis, similitudinis &c. Transcendentalis verò est respectus ad terminum, sed non purus; quia præterquam quòd referatur ad terminum, refertur habens speciale munus, sive exercitium. Sic se habent Relationes causæ, unionis, actionis &c. Relatio enim causæ refertur causando, unionis, uniendo, actionis, agendo. Placet hoc discrimen Mag. Garciae dist. 2. Metaph. q. 5. art. 2. §. 2. num. 835. Illustrissimo Palanco Metaph. tract. 6. q. 8. n. 2. Balthasari Telles Metaph. parte 3. disp. 42. sectione 1. n. 20. & aliis pluribus, præsertim Thomistis, estò aliis placere nequaquam possit,

Faber. fit, præcipuè Scotistis, nominatim Fab. 5. Metaph.
 Maltrius. disp. 20. cap. 2. & Maltrio disp. 8. Logicæ q. 1. n. 3.
 quorum fundamenta faciliè ex dicendis solvuntur.

435 Dixi supra, *in hoc maximè differre*,
 quoniam alia discrimina tradunt ipsimet AA. quibus
 D.Thom. assignatum placuit. Aliud non omitam ex Doctore
 Angelico pulchrè expositum 1. parte q. 13. art. 7. ad
 1. ibi: *Relativa quædam sunt imposita ad significan-*
dum ipsas habitudines relativas, ut Dominus, ser-
vus, pater, & filius, & hujus modi: Et hæc dicun-
tur relativa secundùm esse. Quædam verò sunt im-
posita ad significandas res, quas consequuntur quæ-
dam habitudines, sicut movens, & motum, caput,
& capitatum, & alia hujusmodi, quæ dicuntur re-
lativa secundùm dici. Ex quibus videtur dicendum,
 Relationem prædicamentalem, juxta D. Thomam,
 illam esse, quæ formaliter, & primariò dicit respec-
 tum ad aliud; transcendentalem verò illam, quæ
 tametsi dicat respectum ad aliud, solum dicit talem
 respectum ex consequenti, primariò verò entitatem
 absolutam.

436 Prænoto tertiò, contra veteres Philo-
 sophos præcipuè Stoicos, dari à parte rei in lineâ
 physicâ utramque Relationem, videlicet prædica-
 mentalem, & transcendentalem, sive secundùm esse,
 & secundùm dici. Quod detur Relatio transcendentā-
 lis ex eo patet, quia seclusâ quâvis intellectûs ope-
 ratione, quilibet effectus à parte rei dicit habitu-
 dinem ad suam causam, respiciendo illam, tam-
 quam principium suæ operationis, à quo habet esse;
 similiter quælibet causa respicit suum effectum, tam-
 quam terminum suæ actionis productivæ. Quod au-
 tem detur Relatio prædicamentalis, de quâ specia-
 tim hîc agimus, ex eo convincitur, quòd Ens reale
 physicum dividatur in decem prædicamenta; cùm
 autem

autem Relatio prædicamentalis sit unum ex illis, juxta Aristotelem, benè sequitur, quòd detur à parte rei in lineâ physicâ.

437 Probant communiter Philosophi, dari à parte rei physicè Relationes reales in creatis, ex eo, quòd sit de fide dari in Deo Relationes reales; nam sicut Paternitas, & Filiatio sunt Relationes in Divinis, quia Pater generat Filium, & Filius à Patre generatur, eâdem ratione paternitas creata, & filiatio erunt reales Relationes. Nos verò addimus, ex hoc convinci tales Relationes non modò esse reales, sed prædicamentales; siquidem tales sunt illæ in Divinis, cùm non sint formæ simpliciter absolutæ, sed una prorsus ad aliam; Paternitas enim in Divinis est purus ordo ad Filiationem, licèt actio generativa Divina, quæ est fundamentum proximum ipsius Paternitatis, transcendentaliter respiciat suum terminum. Nec obstat, quòd non colligatur dari in creatis Relationes substantiales ex eo, quòd substantiales sint Relationes Divinæ; nam ad hoc datur in Divinis diversum fundamentum, nempe incapacitas compositionis rei de novo advenientis, quæ quidem incapacitas in creatis non reperitur, imò implicat dari substantias creatas, quæ sint Relativæ per se ipsas.

438 Prænoto quartò, quatuor in Relato prædicamentali reperiri explicatu dignissima, videlicet subjectum, terminum, fundamentum, & rationem fundandi. Subjectum est id, quod refertur, sive cui Relatio remotè inhæret, seu nititur, idcirco dici solet fundamentum remotum. Terminus est id, quod ab alio respicitur, sive ad quod Relatio terminatur. Fundamentum est motivum proximum, in quo Relatio fundatur. Ratio verò fundandi non coincidit cum fundamento, sive cum motivo proximo,

Bacon.

Garcia.

ximo, in quo Relatio fundatur, ut tenent communiter Philosophi, sed est Relatio ipsa, quatenus subjectivè præcontinetur in potentiâ sui fundamenti ad se ipsam in actu, ut docet Resolutus in 1. dist. 26. q. 2. art. 3. §. 2. versu ultimo, cujus singularem doctrinam expendit Mag. Garcia dist. 2. Metaph. q. 5 art. 6. §. 2. Unde quando dicimus, *Ignis A est similis igni B in calore*, Ignis A est subiectum, ignis B terminus, calor fundamentum; ratio autem fundandi Relationem est Relatio ipsa, distincta quidem à calore, sed præcontenta in illo in potentiâ ad se ipsam in actu. His prænotatis,

439 Probo bonitatem definitionis sic: Illa est bona definitio, quæ constat genere, & differentia; definitio supra tradita constat genere, & differentia: ergo est bona. Maior liquet. Probo minorem. Constat illâ particulâ, *forma*, & aliis, *cujus totum esse est ad aliud*; sed prima habet locum generis ad alias formas, quæ Relationes non sunt; cæteræ verò habent rationem differentia, ut clarè constat ex supra prænotatis: ergo &c.

Proponuntur objectiones, & dissolvuntur.

Platon.

Aristotel.

Oviedo.

Complut.

Poncius.

Telles.

Bona spes

440 **N** Ostræ resolutioni opponuntur Anti- qui Philosophi cum Platone, quem tacitè impugnavit Aristoteles, ubi supra citatus, ob reverentiam sui Magistri, ut nonnulli dixerunt, quos, suppressis nominibus, refert Oviedo contrav. 9. Metaph. puncto 1. in principio. Opponuntur etiam, sed ex parte tantum, nostri Complutenses in Log. disp. 14. q. 1. in fine. Poncius ibidem disp. 15. n. 7. Telles parte 3. Metaph. disp. 42. sect. 1. n. 19. Mag. Bona spes Log. tract. 5. disp. 3. num. 131. & communiter Philosophi, quatenus Relationem prædicamentalem non

non per *formam*, sed per, *accidens*; definiunt. Pro his omnibus, & imprimis pro Antiquis cum Platone

441 Objicies primò. Relativa prædicamentalia sic benè definiuntur: *Quæcunque hæc ipsa, quæ sunt, aliorum esse dicuntur*: ergo malè definitur Relatio prædicamentalis per aliam definitionem. Probas antecedens. Talis definitio convenit omni Relationi prædicamentali: ergo Relativa prædicamentali sic benè definiuntur. Respondeo ad objectionem negando antecedens. Ad probationem, concessio antecedente, nego consequentiam. Quia ut definitio rectè procedat, satis non est, quòd conveniat omni definito, sed ulterius requiritur, quòd alteri à definito non conveniat; definitio autem ista convenit etiam substantiæ; (hæc non est Relatio) siquidem substantia dicitur ad aliquid, ut liquet in capite, & manu, quæ, utpote partes substantiales, alicujus dicuntur v. g. hominis. Hoc fundamento impugnat Aristoteles talem definitionem cap. citato, dicens: Aristotel.
Caput enim alicujus dicitur caput, & manus alicujus dicitur manus, & unumquodque tale eodem modo dicitur, quare hæc videbuntur ad aliquid esse. Si igitur eorum, quæ sunt ad aliquid, definitio sufficienter est assignata, aut omnino est difficile, aut impossibile, nullam substantiam ad aliquid esse ostendere.

442 Objicies secundò pro nostris Complut. Complut.
tenfibus, & aliis AA. supra citatis. Relatio prædicamentalis est accidens reale: ergo debet definiri per particulam, *Accidens*. Respondeo ad objectionem distinguendo antecedens: Relatio prædicamentalis creata est accidens reale, concedo antecedens: Relatio prædicamentalis Divina, vel Relatio præcisè sumpta, sive in communi, nego antecedens. Quia in sententiâ Baconii Relationes Divinæ, quæ certò sunt substantiæ, sunt veræ Relationes prædicamentales;

tales; siquidem in illis optimè potest coordinari series prædicabilium à genere supremo usque ad individuum, v. g. in Paternitate Divinâ, ratio Relationis tanquam genus supremum, ratio Paternitatis tanquam species subalterna, & ipsa ratio Paternitatis Divinæ tanquam individuum; idcirco negamus, quòd omnis Relatio prædicamentalis sit accidens.

443 Instabis. Relationes Divinæ identificantur cum substantia Dei absoluta: ergo non possunt collocari in prædicamento Relationis. Respondeo ad objectionem distinguendo antecedens: identificantur physicè, concedo antecedens: virtualiter, nego antecedens, & consequentiam. Quia sicut sufficit distinctio virtualis inter substantiam Divinam absolutam, & Relationes, ut istæ non dicantur proprietates absolutæ, sed relativæ, ita eadem distinctio sufficiens est ad hoc, ut collocentur in prædicamento Relationis, non obstante identitate physicâ cum substantia absoluta.

444 Objicies tertio ad idem, ex doctrina Resoluti. Doctor expressè asserit, quòd omnis Relatio prædicamentalis sit accidens, ita quòd in Divinis non possint inveniri Relationes prædicamentales: ergo idem, quod supra. Probas antecedens ex eodem in 1. dist. 28. q. 1. art. 4. §. 2. prope finem, vers. *Ad aliud ibi: Dico, quòd non est simile, quia res relationis est in rei veritate accidens, sicut qualitas, & quantitas, ideo sibi repugnat secundum propriam realitatem transferri ad divina, sicut qualitati, & quantitati.* Respondeo ad objectionem negando antecedens. Ad probationem per auctoritatem Doctoris dico, quòd cum Henricus existimasset, Relationem non esse aliquid reale, secundum propriam, & formalem rationem; quia si sic, cum, juxta

juxta Doctorem præsertim, duo prædicamenta transferantur ad Divina, nempe substantia, & Relatio, sequeretur, quòd sicut substantia transfertur secundum rem generis, ita & Relatio. Huic rationi satisfcit Baccotinus, ibi citatus, assignando diversam rationem, scilicet, quòd Relatio secundum rem est accidens, sicut qualitas, & quantitas, non ita substantia, ut ex terminis patet. Unde solum negat, quòd Relatio secundum rem transferatur ad Divina, non autem secundum rationem formalem habitudinis, concorditer ad ea, quæ docuerat etiam in 1. dist. 8. q. unica art. 2. §. 7. in principio, ubi inquit: *Debemus enim imaginari, quod relatio, quæ est genus, & unum de decem prædicamentis, potest accipi dupliciter: uno modo quoad rem sui generis formaliter, & sic non est ponenda in Deo.* Et paulo infra: *Depuratur ergo ista habitudo (quæ est Relatio) ab istis conditionibus accidentalibus, & hujusmodi, & retinetur præcisa ratio habitudinis, & illa præcisa Deo attribuitur.* Baccon.

445 Objicies quartò ad idem, & ex eodem Resoluto in 3. dist. 2. q. 1. art. 3. §. 2. vers. *Item esse.* Ibi docet Doctör, quòd *esse in*, & *esse ad simplicem quidditatem relationis integrant*; sed si Relatio prædicamentalis ex suo conceptu non esset accidens, sive si non definiretur per particulam, *accidens*, saltem *esse in* non esset de integritate Relationis prædicamentalis: ergo idem, ac prius. Maior constabit legenti ipsum. Probas minorem. Si Relatio prædicamentalis non esset accidens, non inhæreret; sed si non inhæreret, *esse in* non esset de illius integritate: ergo si Relatio prædicamentalis ex conceptu suo non esset accidens, *esse in* non esset de integritate ipsius Relationis. Baccon.

446 Respondeo ad objectionem, concessâ
Tom. Ult. Hh maio-

maiore, negando minorem. Ad probationem, concessâ maiore, nego minorem, vel distinguo: si non inhæreret, esse *in* inhærentiæ non esset de illius integritate, concedo minorem: esse *in* innitentiæ, nego minorem, & consequentiam. Ad intelligentiam horum terminorum, quibus utitur Baconius in præsentî, scire oportet, quodd omni Relationi prædicamentali tam creatæ, quàm Divinæ, convenit esse *in* innitentiæ, quia nulla est, quæ non innitatur alicui fundamento, cum hoc discrimine, quodd si Relatio est creata, innitentia, quæ illi convenit, dicitur inhærentia propria accidentis; omnis enim Relatio creata est accidens. Si verò Relatio est Divina, non illi convenit inhærentia, sed tantum innitentia, quæ ex conceptu suo solum dicit inniti fundamento, præscindendo ab eo, quodd tale fundamentum sit realiter, an tantum virtualiter distinctum. Cum autem Relationes Divinæ innitantur naturæ, non minus, ac attributa essentia, sequitur, quodd esse *in* innitentiæ sit de conceptu Relationis prædicamentalis, quæcunque illa sit, esset Divinæ non inhæreant, sicut Relationes creatæ. Audiendus Mag. Zagaglia tom. 4 tract. 2. disp. 2. sect. 1. n. 2. in fine: *Completur ergo (Relatio Prædicamentalis) per suum esse ad cum suo esse in seu cum suo modo fundandi. Hic non loquitur Doctor de in inhærentiæ, sed de esse in innitentiæ, id est, importat de formali inniti fundamento, à quo pullulat.*

Zagaglia.

447 Instabis. Si esse *in* innitentiæ esset de conceptu Relationis prædicamentalis, hoc colligeretur ex definitione ipsius Relationis; sed non colligitur: ergo esse *in* innitentiæ non est de conceptu Relationis prædicamentalis. Maior liquet. Probas minorem. Per definitionem supra traditam videtur evidenter colligi, totum esse Relationis prædicamentalis

mentalis esse ad aliud: ergo estò colligatur, quòd esse *ad* sit de illius conceptu, non tamen esse *in*. Respondeo ad instantiam, concessâ maiore, negando minorem. Ad probationem distinguo antecedens: per definitionem supra traditam videtur evidenter colligi, totum esse explicitum Relationis prædicamentalis esse ad aliud, concedo antecedens: totum esse tam explicitum, quàm implicitum, nego antecedens, & consequentiam. Igitur verum est, quòd in definitione Relationis prædicamentalis supra tradita solum ponimus explicitè esse *ad*, cæterum implicitè includimus in illa esse *in*; semel enim, quòd totum suum esse sit respectus unius ad aliud, unum debet respicere secundum esse *in*. Eapropter docet Garcia. Mag. Garcia hic n. 829. Conceptum *in* priorem esse, saltem prioritare subsistentis consequentiæ conceptu *ad*; quippe valet consequentia ab isto ad conceptum *in*, secus è contra.

448 Obijcies quintò, & directè contra nostram definitionem. Si Relatio prædicamentalis definiretur per formam, *cujus totum esse est ad aliud*, definiretur per purum respectum ad terminum, non habens aliud munus, sive exercitium, nisi referendi; sed hoc est falsum: ergo malè definitur. Maior constat ex supra prænotatis n. 434. Probas minorem. Relatio paternitatis est prædicamentalis; sed ista habet aliud munus, sive exercitium, ultra munus referendi: ergo. Maior est certa. Probas minorem. Relatio paternitatis respicit suum terminum, ut genitum: ergo habet aliud munus, sive exercitium, ultra munus referendi. Respondeo ad objectionem concessâ maiore, negando minorem. Ad probationem, concessâ maiore, nego minorem. Ad probationem nego antecedens; quia respicere terminum, ut genitum, spectat ad actionem generativam, non

ad Relationem paternitatis, hæc enim solum respicit terminum, ut purum terminum.

449 Objicies sextò. Si Relatio prædicamentalis definiretur per formam, *cujus totum esse est ad aliud*, definiretur per id, quod refertur; sed Relatio non est id, quod refertur: ergo non aptè definitur. Maior liquet. Probas minorem. Relatio solum est id, quo aliquid refertur: ergo non est id, quod refertur. Respondeo ad objectionem negando maiorem; quia ex tali definitione, si more logico accipiat, solum colligitur, quod Relatio referatur in actu signato, non in actu exercito, quod idem valet, ac esse principium referendi, & quod referatur, ut *quo*, non, ut *quod*; hoc enim est proprium Relationis in concreto, sive Relati. Quod si ex definitione Aristotelica deprehenditur, Relationem referri, ut *quod*, ideo est, quia Philosophus Relationem in concreto, nempe Relatum, definivit. Et, Conimbr. ut PP. Conimbricenses supra citati advertunt ex B. B. Albert. Alberto Magno cap. 2. ex tribus vocabulis, quæ huic prædicamento attribuuntur, videlicet Relatio, Relativum, & Relatum, solum Relatum est magis proprium, quippe significat exercitium referendi.

450 Objicies septimò. Definitio supra tradita convenit materiæ primæ; sed hæc non dicit Relationem prædicamentalem ad formas, bene quidem transcendentalem: ergo talis definitio convenit aliis à definito. Probas maiorem. Materia prima nihil aliud est, quam pura potentia ad formas substantiales; sed hoc idem est, ac habere totum suum esse ad aliud: ergo definitio supra tradita convenit materiæ primæ. Respondeo ad objectionem negando maiorem. Ad probationem, concessâ maiorem, distinguo minorem: hoc idem est, ac habere totum suum esse ad aliud, intuitu recipiendi aliud,

con-

concedo minorem : intuitu tantum referendi , nego minorem , & consequentiam. Igitur materia prima , licet totum suum esse habeat ad formas substantiales , non sistit in puro respectu , quoniam respicit formas intuitu recipiendi ipsas , & constituendi composita. De ratione autem Relationis prædicamentalis est , nullum habere commercium , præterquam quod referendi , sive respiciendi terminum , ut purum terminum.

451 Objicies octavò , & ultimò. Talis definitio convenit Unioni Hypostaticæ ; sed hæc dicit transcendentalem habitudinem ad Verbum Divinum : ergo idem , quod supra. Probas maiorem. Unio Hypostatica respicit Verbum Divinum sub pura ratione termini : ergo talis definitio convenit Unioni Hypostaticæ Respondeo ad objectionem negando maiorem. Ad probationem nego antecedens ; quia Unio Hypostatica taliter respicit Verbum Divinum , quod realiter illi conjungit naturam humanam , quapropter illud respicit , aliquod munus exercendo , non ut purum terminum , prout requiritur ad Relationem prædicamentalem. Ex hucusque dictis

452 Deduces , Relationem prædicamentalem non mutuam terminari ad absolutum , mutuam verò ad Relativum. Ratio prioris partis est : quia Relatio prædicamentalis non mutua est illa , cui nulla in termino respondet Relatio realis , ut Relatio mensurabilis ad mensuram ; sed terminus , cui nulla Relatio realis respondet , est in se quid absolutum undequaque : ergo Relatio prædicamentalis non mutua terminatur ad absolutum. Ratio posterioris partis est : quia Relatio prædicamentalis mutua est illa , cui in termino alia Relatio respondet , ut paternitas , cui in termino respondet filiatio ; sed semel , quod ex parte fundamenti detur , Relatio per hanc

hanc idem fundamentū respicit terminū : ergo semel, quod ex parte termini sit etiam Relatio, per hanc respicitur terminus à fundamento, ac per consequens, si Relatio prædicamentalis est mutua, terminatur ad Relativum formaliter, estò materialiter terminetur ad absolutum. De hoc nullus est, qui non disputet ; cū sit quæstio satis controversa inter Thomistas, & Scotistas. Nos præfatâ distinctione in via Baconii procedimus.

Q U Æ S T I O II.

Quotuplex sit Relatio prædicamentalis ?

Aristotel.

453 **R**ESOLUTIO : Relationes prædicamentales ex Philosopho 5. Metaph. cap. 5. adæquatè distribuuntur in tria genera. Relationes primi generis sunt illæ, quæ fundantur in convenientia, & disconvenientia. Cæterum cū convenientia possit reperiri vel in ratione substantiæ, vel quantitatis, vel æqualitatis ; & convenientia in substantia faciat idem, in quantitate æquale, & in qualitate simile, idcirco, si convenientia duorum fuerit in substantia, fundabit Relationem prædicamentalem identitatis : si convenientia fuerit in quantitate, fundabit Relationem prædicamentalem æqualitatis : si verò convenientia fuerit in qualitate, fundabit Relationem prædicamentalem similitudinis. Proportionali modo discurrendum est de disconvenientia, quæ, si fuerit in substantia, fundabit Relationem prædicamentalem diversitatis : si fuerit in quantitate, fundabit Relationem prædicamentalem inæqualitatis : si tandem fuerit in qualitate, fundabit Relationem prædicamentalem dissimilitudinis.

454 Relationes secundi generis dicuntur illæ,

illæ, quæ fundantur in actione, & passione. Verùm, in sententiâ Baconii, Relationes prædicamentales producentis, & producti fundantur immediatè in entitatibus causæ, & effectus, estò actio, & passio sint conditiones, ut causa denominetur actu Relata, & similiter effectus. Unde dicimus, Relationem prædicamentalem paternitatis fundari in entitate patris immediatè, siquidem debet fundari in eo, quòd manet, transactâ actione generativâ, cùm post generationem maneat denominatio patris. Spectant ad hoc genus non solum Relationes prædicamentales producentis, & producti, sed etiam cognoscentis, & cogniti, domini, & servi, similesque aliæ.

455 Relationes tertii generis fundantur in mensurabili, & mensurâ, ad mensuram namque refertur prædicamentaliter mensurabile (loquimur de mensura intentionali, non de physica ad quantitatem physicam spectante) sic scientiæ, præter Relationem transcendentalem, quam in illis omnes agnoscunt, referuntur prædicamentaliter ad sua objecta, tanquam mensurabiles ad mensuras; quanta enim fuerit veritas intrinseca in objectis, tanta erit perfectio scientiarum, & latitudo in veritate formali. Sic etiam voluntatis actus referuntur ad propria objecta. Docet Mag. Garcia hic num. 890. Relationes prædicamentales hujus generis non esse mutuas; quia quamvis scientiæ referantur ad objecta, secus è contra. Verùm Baconius distinctione procedit, dicens: *Quod relatio mensurati ad mensuram, & è contra, potest pensari dupliciter: uno modo in quantum unum est mensura, vel mensurativa, & aliud mensuratum, vel mensurabile: Alio modo secundum dependentiam mensurationis: quia mensuratum in esse mensurato habet esse constitutum per mensuram, sicut scientia per scibile, & non è converso. Primo modo dici potest,*
quod

Garcia.

Bacon.

*quid est relatio realis, & æqualiter mutua conver-
tentia in mensurâ ad mensuratum, sicut è contra.
Sed secundo modo est relatio realis in substantia men-
surati tantùm, & non in substantia mensuræ: quia
mensuratum est constitutum in esse mensurato per
mensuram, & non è conversò. In I. dist. 29. q. unica
art. I. §. I. vers. Sed ratio.*

Q U Æ S T I O III.

*Quot sint proprietates Relationis prædicamen-
talis?*

456 **R**ESOLUTIO: Quatuor communiter
assignantur proprietates Relationis
prædicamentalis. Prima: *Quod habeat contrarium.*
Verùm hæc proprietas non convenit Relationi ra-
tione sui, sed tantùm ratione extremorum, inter quæ
versatur. Non ratione sui; quia contraria ab eodem
subiecto mutuò se expellunt; paternitas enim, &
filiatio, cùm non possint respectu ejusdem successi-
vè eidem subiecto inesse, neque ab eodem subiecto
se mutuò possunt expellere. Similiter discurrendum
de cæteris Relationibus prædicamentalibus. Conve-
nit nihilominus talis proprietas Relationi prædica-
mentali, ratione extremorum, inter quæ versatur, si
fundetur in qualitatibus, vel in rebus, inter quas est
vera contrarietas; ideoque Philosophus ipse ponit
exempla hujus proprietatis, non in Relationibus ra-
tione sui, sed in qualitatibus, in quibus fundantur,
videlicet in virtute, & vitio, scientiâ, & ignorantia,
quòd benè notavit Mag. Didacus à Jesu in Log.
3 part. disp. 14. q. ultimâ in principio, ubi etiam
observat, hanc proprietatem non tradi ab Aristotele
ex propriâ sententiâ, sed ex sententiâ Antiquorum.

Didacus.

457 Secunda proprietas Relationis prædicamentalis: *Quod suscipiat magis, & minus.* Ast etiam hæc non convenit Relationi prædicamentali ratione sui, sed tantum ratione fundamenti. Non ratione sui, quia suscipere magis, & minus ex contrarietate oritur, hæc autem caret Relatio prædicamentalis, ut dictum est supra; neque ad istam datur per se motus, uti in Physica diximus; benè tamen ratione sui fundamenti, maximè si hoc sit qualitas, quæ absque controversia potest intendi, & remitti.

458 Tertia proprietas Relationis prædicamentalis: *Quod faciat dicere ad convertentiam Relativa.* Quod est idem, ac denotare habitudinem unius ad alterum, ita ut ex vi illius, alterum quoque ad ipsum referatur. Sic pater dicitur pater filii, & filius filius patris. Sed est observandum, duo inter se converti, non esse idem, ac dici ad convertentiam; homo quippe & risibile inter se convertuntur, nam si homo est, & risibilis est; si hic fuerit, & homo quoque esse debet; sed non propterea dicuntur ad convertentiam, quia dici ad convertentiam est referri in aliquem, tamquam in terminum, quo pacto se habent Relata, non autem homo, & risibile. Nilominus non est hæc proprietas ita propria Relationis prædicamentalis, quòd non conveniat etiam transcendentali; nam etiam Relata aliqua transcendentalia ad convertentiam dicuntur.

459 Quarta tandem proprietas Relationis prædicamentalis: *Quod Relata per talem Relationem sint simul naturâ, & cognitione.* Non tamen convenit hæc proprietas omnibus Relativis prædicamentalibus, ut ostendit ipse Philosophus, cap. *de his, quæ ad aliquid.* Mag. Garcia, hîc num. 990 vult, quòd ly, *simul*, intelligatur quoad exigentiam, non
 Tom. Ult. li quo-
 Aristotel. Garcia.

quoad exiſtentiam; quia, inquit, prius, & poſterius ſunt Relata, quin poſſint coexiſtere, & hoc ex D. Reſoluto, quem citat ibid. Verùm ſi Relata ſuman-
tur formaliter, ut actus Relata, necdum exigentiam,
& poſterius. ut docet ipſe Baconius in 1. diſt 6 in
fine verſ. *Ad argumenta*, ibi: *Quando dicunt, quòd
relativa ſunt ſimul naturâ, & intellectu, dico, quòd
verum eſt, ut ſunt relativa formaliter accepta, quia
relativa formaliter accepta dicuntur in habitudine,
& ad convertentiam, & ſic non eſt prius, & poſte-
rius.*

Bacon.

460 Nec obſtat, quòd Relatio prædicamen-
talis non requirat terminum actu exiſtente; quia
ante exiſtentiam termini ſolùm denominat funda-
mentum proximè referibile, non actualiter Rela-
tum. Sed de iis ſequenti quæſtione. Hic tamen adhuc
duo reſtant explicanda. Primum: ad hoc ut Relata
ſint ſimul naturâ, duas requiruntur conditiones, vi-
delicet, quòd ipſa mutuò ſe inferant, & quòd unum
non ſit cauſa alterius, ut colligitur ex Ariſtotele cap.
de Modis ſimul: *Naturâ verò ea dicuntur ſimul, quæ
eſſendi quidem conſequentia cum convertantur, neu-
trum tamen ut ſit alterum, cauſa eſt: ut in duplo di-
midioque intueri licet; hæc enim convertuntur. Nam
ſi duplum eſt, dimidium eſt, & ſi dimidium eſt,
duplum eſt: neutrum tamen eſt cauſa ut alterum ſit.*
Sic etiam pater, & filius ſunt ſimul naturâ, nam ſi
eſt pater, & filius eſt, vel fuit; & ſi filius, utique pa-
trem eſſe, vel fuiſſe neceſſe eſt. Nec obſtat, quòd pa-
ter ſit cauſa filii; nam non eſt cauſa in ratione Re-
lati; ſiquidem una Relatio, cùm non ſit activa, non
efficit aliam. Solùm igitur pater eſt cauſa filii in ra-
tione producentis.

Ariſtotel.

cedit circa simultatem cognitionis Relativorum, videlicet, quod unum Relativum, five Relatum, sine altero cognosci perfectè nequeat; eo enim ipso, quod Relativa formaliter sumpta sint simul naturâ, unum per aliud, secundum quod est Relativum, definiri consequens est. Complutenses nostri in Log. Complut. disp. 14. de Relatione, q. ultimâ in fine. Illustrissimus Joannes Cano ibid. parte. 2. l. 4. disp. 4. q. 6. vers. Cano. *Quarta*, alique plures judicant, proprietatem istam convenire huic prædicamento, quarto modo proprii. Oppositum tamen docet Resolutus in 1. dist. 28. q. 1. art. 2. §. 2. ubi asserit, hanc simultatem quoad cognosci competere aliis à Relatione prædicamentali. Unde, ibid. prope finem, loquendo de materia prima, hæc habet: *Intellectus cogitur intelligere materiam in habitudine ad formam, maxime quando est in potentia propinquâ ad formam, & tamen non est relatio realis inter hæc.* Addit Mag. Garcia, ubi supra Garcia. n. 991. quod neque similtas illa naturæ est propria prædicamentalis Relationis quarto modo; quippe competit risibili & flebili, quæ non sunt Relationes, sed proprietates absolutæ.

QUÆSTIO IV.

Utrum Relatio prædicamentalis requirat terminum actu existentem?

462 **R**ESOLUTIO est negativa. Ita Doctor Bacon. in 1. dist. 26. q. 1. art. 2. §. 3. & 4. & aliis in locis, quos citant, & amplectuntur Mag. Zagaglia tom. 2. tractatu 2. disp. 6. sectione 4 §. 2. n. 91. Mag. Garcia Metaph. dist. 2. q. 5. art. 3. §. 1. & Mag. Bona spes, Logicæ tractatu 5. disp. 3. dubio 5. Bona spes. Cumque certissima sit in via Baconii, ab omnibus
 li ii
 suis

Arimin.

fuis acriter debet defendi contra communem Philosophorum, & Theologorum sententiam. Hæc etiam fuit opinio Gregorii Ariminensis in 1. dist. 28. q. 2. art. 1. quem pauci secuti fuere. Ad intelligentiam resolutionis prænoto primò, essentiam Relationis prædicamentalis non esse actu referre, sed constituere subjectum proximè referibile; antequam enim terminus coexistat, non denominatur fundamentum actu relatum, estò denominetur actu relativum, si-ve referibile, cùm in illo jam existat formaliter Relatio prædicamentalis secundum esse *in*, & etiam secundum esse *ad*, saltem entitativè; est enim esse *ad* in Relatione identificatum cum esse *in*, quapropter utrumque est ens reale.

Baccon.

463 Prænoto secundò, Relationem prædicamentalem creatam esse formam accidentalem congenitam cum fundamento proximo, non advenientem de novo ad positionem termini, uti docet Doctor in 1. dist. 28. q. 2. art. 4 §. 2. vers. *Ad secundum*, dicens, quòd Relatio præcedit in suo fundamento. *Et dicitur* (inquit) *solum noviter advenire quantum ad illam novam conterminationem cum suo opposito, non autem quantum ad realitatem relationis*. Hinc

Baccon.

464 Prænoto tertio, aliud esse, quòd Relatio quoad terminationem pendeat ab existentia termini; aliud verò, quòd pendeat ab illo quoad entitatem. Primum verum est; quia Relatio solum à termino terminari potest. Secundum autem est falsum; quia quoad entitatem est congenita cùm fundamento, quo posito, resultat tamquam modus ipsi fundamento necessariò affixus. Unde idem Baccוניus quodlib. 1. q. 13. vers. *Hoc arguendo*, docet: *Quod aliquid esse realiter, & actualiter, & formaliter relativum potest intelligi dupliciter: uno modo* (hoc modo non pendet ab actuali existentia termini)

ni) *quod relatio consideretur quantum ad quidditatem, & formalem rationem relationis, quæ est ad aliud se habere: alio modo (hoc modo pendet à termini existentia) quantum ad actualem concomitantem terminationem, quam habet per terminum correlativum sibi oppositum.* His prænotatis,

465 Probo resolutionem hoc unico, sed gravi fundamento: Relatio prædicamentalis adæquatè dividitur in Relationem primi, secundi, & tertii generis; sed nulla ex istis requirit necessariò terminum actu existentem: ergo. Maior est certa, constatque ex quæstione 2. hujus præsentis sectionis. Probo minorem, & imprimis quoad Relationes primi generis. Relationes prædicamentales primi generis sunt illæ, quæ fundantur in convenientiâ, v. g. Relationes similitudinis; sed hæ non requirunt terminum actu existentem: ergo. Maior constat etiam ex ibid. dictis. Probo minorem. Relatio similitudinis unius albedinis ad aliam est congenita cum priori albedine: ergo non requirit terminum actu existentem; hic enim solùm requiritur, ut prior albedo actu referatur, non autem, ut actu sit referibilis. Probo antecedens. Si Relatio similitudinis unius albedinis ad aliam non esset congenita cum priori albedine, ad positionem posterioris albedinis, resultaret in priore Relatio similitudinis quoad entitatem; sed hoc non: ergo. Maior liquet. Probo minorem. Si verè resultaret in priore albedine Relatio similitudinis quoad entitatem, album per priorem albedinem mutaretur intrinsecè per talem Relationem noviter resultantem, eique inhærentem; sed hoc non, cùm sit contra Philosophum 5. Physic. cap. Aristot. 2. docentem, ad Relationem non dari per se motum; quia, positâ noviter albedine in termino, album præexistens non mutatur, estò incipiat de novo referri

referri ad aliud quoad illam novam conterminationem: ergo &c.

466 Probo eamdem minorem quoad Relationes secundi, sic: Relationes secundi generis sunt v. g. paternitas, vel maternitas, & filiatio; sed hæ non requirunt terminum actu existentem: ergo. Maior constat ex ibid. supra dictis. Probo minorem. Beatissima Virgo MARIA adhuc in triduo mortis Christi dicebatur Mater Christi, constatque ex Sacris Literis, ipsam doluisse mortem Filii: ergo Relationes prædicamentales secundi generis, quales sunt paternitas, vel maternitas, & filiatio, non requirunt terminum actu existentem.

467 Probo denique eamdem maiorem quoad Relationes tertii generis, sic: Relationes istæ fundantur in mensurabili ad mensuram, uti se habent Relationes scientiæ ad sua objecta; sed huiusmodi Relationes non requirunt terminum actu existentem: ergo. Maior constat ex ibidem dictis eadem questione 2. Probo minorem ex Baconio sic ratiocinante: *Nullâ rosâ existente in actu existentiae, possum habere actualem scientiam de eâ; sed scientia illa erit actu relativa: ergo &c.* Probo, quia scientia illa actualis, quam habeo, non erit respectu scibilis in actu existentis perpetui, nec potest esse sine scibili omnino: quia (alioquin) esset actu sine objecto terminante: igitur requirit in hoc casu scibile solum in esse objectivo; sed scibile solum in esse objectivo, non existit actu in rerum naturâ, & actu conterminat scientiam: ergo &c. Quodlib. 1. q. 13. vers. Item nulla rosa.

Proponuntur objectiones, & dissolvuntur.

468 **N**ostræ resolutioni opponuntur Thomistæ omnes, nominatim Capreolus, Capreol. Caietanus, Soncinas, quos, inter alios, citat, & sequitur Didacus Masius Log. sect. 3. in Cathgor. de Soncinas. Relatis q 7. vers. *His, & aliis.* Opponuntur etiam Masius. Scotistæ cum Doctore Subtili, quem citat, & sequitur Poncius, Log. disp. 15. q. 2. conclusione 2. Doctores Societatis cum Eximio, disp. 47. suæ Metaph. Poncius. Suar. M. sectione 8. n. 4. signanter Oviedo, ibidem, controver. Oviedo. siâ 9. puncto 3 n. 8. Comptonus, ibid disp. 11. sectione Comptonus. 13. n. 3. Telles, ibid. parte 3. disp. 62. sectione 6. Telles. n. 1. ubi affirmat ex eodem Suario citato, neque Divinitus posse Relationem realem existere sine termino reali. Suarius Lusitanus, ibid. tract. 5. disp. 1. Suar. Lusit. sect. 4. n. 104. Pro his omnibus

469 **O**bjicies primò Fundamentum non potest esse actualiter, & formaliter Relativum prædicamentale, nisi terminus actu existat: ergo Relatio prædicamentalis necessario requirit terminum actu existentem. Probas antecedens: Relativa prædicamentalia sunt simul naturâ, ex Philosopho cap. *De his, quæ ad aliquid;* sed quæ sunt simul naturâ, Aristotel. sunt simul secundum actualem coexistentiam: ergo fundamentum non potest esse actualiter, & formaliter Relativum, nisi terminus actu existat. Respondet ad objectionem distinguendo antecedens: si fundamentum sit actualiter, & formaliter relativum quantum ad actualem concomitantem terminationem, quam habet per terminum correlativum sibi oppositum, concedo antecedens: si fundamentum sit actualiter, & formaliter relativum quantum ad quidditatem, & formalem rationem Relationis præcisè, nego

Bacon.
Aristotel.

nego antecedens, & consequentiam. Distinctio liquet ex supra prænotatis. Ad probationem antecedentis, datâ maiore, nego minorem. Quia, quæ sunt simul naturâ, non requirunt necessariò mutuam coexistentiam, sed satis est, quòd habeant mutuam coexistentiam, ut probat Doctor ex Aristotele 5. Metaph. text. com. 2. docente, quod Relativa secundum potentiam dicuntur non solum secundum tempora præsentia, sed etiam præterita, & futura, quæ non possunt habere mutuam coexistentiam cum actu existentibus.

470 Propterea advertit, *quòd aliud est relativa esse simul naturâ secundum mutuam coexistentiam; & aliud secundum mutuam actualem existentiam; omne enim, quod in aliud est ordinatum, seu aptitudinem habens respectu alterius, ipsa se requirunt secundum mutuam coexistentiam, non tamen secundum mutuam actualem coexistentiam; quia tunc res esset, quando est sub sola aptitudine, & sic actu existeret, antequam actu esset. Quod lib. 1 q. 13 vers. Ad declarationem. Dixi supra, datâ maiore. Quia regula illa Aristotelica non est ita universaliter vera, quòd exceptionem non admittat in aliquibus Relativis prædicamentalibus, ut videre est apud eundem Aristotelem, cap. citato ad medium, ubi hæc habet: *At verò ea, quæ sunt ad aliquid, simul natura esse videntur: atque in pluribus quidem vera est hæc sententia, in quibusdam autem vera non est.**

Bacon.

471 Instabis. Est repugnantia intellectûs, quòd aliquid sit Relativum, & non sit per aliud terminatum: ergo & quòd Relativa non requirant necessariò mutuam coexistentiam. Respondeo ad instantiam, ex eodem Doctore ibid. vers. *Dices, distinguendo antecedens: est repugnantia intellectûs, quòd aliquid sit Relativum, & non sit per aliud terminatum*

minatum quoad alterius coexigentiam, vel coexistentiam, concedo antecedens: semper quoad alterius coexistentiam, nego antecedens, & consequentiam. *Quia eò quòd ad aliud est, coexigit; sed non oportet per actualem concernentem existentiam.* Doctor, ibidem.

472 Replicabis. Terminus non existens est non ens; sed ad non ens, non est Relatio realis: ergo, si aliquid est Relativum reale, oportet, quòd terminetur per actualem concernentem coexistentiam. Respondeo ad replicam distinguendo maiorem: terminus non existens est non ens, quod tamen est ens possibile; concedo maiorem: quod est ens impossibile, nego maiorem. Deinde distinguo minorem: ad non ens, quod est ens impossibile, non est Relatio realis, concedo minorem: ad non ens, quod tamen est ens possibile, non est Relatio realis, nego minorem, & consequentiam. Igitur ad non ens, quod est ens impossibile, verum est, quòd non sit Relatio; siquidem impossibile non est exigibile, nec ad illud est aliquid ex sui naturâ ordinabile. Cæterum ad non ens, quod tamen est ens possibile, est aliquid de sui naturâ ordinabile, ex quo est exigibile. Bacon.
Solutio est ejusdem Doctoris, ubi nuper citati, quam Garcia.
Mag. Garcia hîc n. 859. confirmat exemplo desiderii; quia, inquit, sicut desiderium actu existens in desiderante potest terminari ad rem possibilem, ita Relatio actu existens in fundamento potest similiter terminari ad rem possibilem.

473 Urgebis. Res possibilis est producibilis; sed ad producibile non potest esse Relatio realis ex parte productivi: ergo neque ad rem possibilem. Maior liquet. Probas minorem. Ad productivum non potest esse Relatio realis ex parte producibilis: ergo neque ad producibile ex parte productivi.
Tom. Ult. Kk ctivi.

ctivi. Respondeo ad urg. concessâ maiore, neg. minorem. Ad probationem, concessio antecedente, nego consequentiam. Disparitas est: quia nihil potest fundare Relationem realem, nisi realiter existat, cum autem producibile non existat realiter, ex parte ipsius non potest esse Relatio realis ad productivum. At productivum, cum realiter existat, idcirco ex parte ejusdem potest esse Relatio realis ad producibile. Ultima ratio est: quia Relatio in suo esse actuali pendet à fundamento, cui innititur, non à termino, ab hoc enim solum pendet quoad terminationem concomitantem actualem, ut dictum est supra.

474 Objicies secundò. Relatio creata est modus: ergo requirit terminum actu existentem. Antecedens constat ex supra dictis. Probas consequentiam. Modus actionis requirit terminum actu existentem: ergo etiam modus Relationis. Antecedens frequenter conceditur. Probas consequentiam. Non minus dicit ordinem ad terminum Relatio, quam actio: ergo si ista requirit terminum actu existentem, ita & illa. Respondeo ad objectionem, concessio antecedente, negando consequentiam. Ad probationem, dato antecedente, nego consequentiam. Ad ejusdem probationem distinguo antecedens: non minus, & diverso modo, concedo antecedens: non minus, & eodem modo, nego antecedens. Diversus modus stat in eo, quod actio ita respicit terminum, quod recipitur subjectivè in illo. Cæterum Relatio solum innititur fundamento, & estò respiciat terminum, cum non innitatur illi, idcirco terminum actu existentem non requirit, quoad suum esse actuale. Dixi, *dato antecedente*, ob actionem annihilativam, quæ non petit terminum actu existentem, cum potius sit destructiva ipsius.

Objicies tertio. Si Relatio prædica-
mental

mentalis, similitudinis v.g. non requireret necessario terminum actu existentem, sequeretur, quod paries albus esset similis parieti non albo; sed hoc est dissonum naturæ lumini: ergo Relatio prædicamentalis similitudinis requirit necessario terminum actu existentem. Probas sequelam maioris. Si Relatio prædicamentalis similitudinis non requireret necessario terminum actu existentem, paries albus esset similis parieti non existenti albo, sed potenti existere; sed paries non existens albus, sed potens existere, est paries non albus: ergo sequeretur, quod paries albus esset similis parieti non albo. Probas maiorem. Paries albus diceret Relationem similitudinis ad parietem non existentem album, sed potentem existere: ergo esset similis parieti non existenti albo, sed potenti existere. Respondeo ad objectionem negando sequelam maioris. Ad probationem nego maiorem. Ad probationem, concessio antecedente, nego consequentiam. Quia aliud est dicere Relationem similitudinis, (nota) aliud verò esse simile. Dicere Relationem similitudinis solum importat formaliter esse Referibile ad aliud, sic paries albus Referibilis est ad terminum non existentem album, sed potentem existere. Esse verò simile dicit esse actualiter Relatum ad aliud, & sic paries albus non est Relatus ad terminum non existentem album, sed solum ad existentem album.

476 Igitur, ut salvetur essentia Relationis prædicamentalis, non est opus, quod subiectum sit actualiter Relatum, & quod ita determinetur formaliter, sed satis est, quod sit proximè Referibile formaliter, quod habet per Relationem, cum ex se solum sit materialiter Referibile. Sic species Angelicæ, ante existentiam futurorum, solum denominant intellectum Angelicum proximè, & formaliter assim-

labilem futuris, non formaliter assimilatum.

477 *Objicies quartò. Relatio similitudinis non est congenita cum albedine: ergo corrumpit fundamentum supra traditum. Probas antecedens. Si Relatio similitudinis esset congenita cum albedine, in eodem subjecto albo essent actu infinitæ Relationes similitudinis; sed hoc non: ergo neque id, ex quo sequitur. Probas assumptum. Si Relatio similitudinis esset congenita cum albedine, idem subjectum album esset Referibile ad infinitos terminos albos: ergo in eodem subjecto albo essent actu infinitæ Relationes similitudinis. Respondeo ad objectionem negando antecedens. Ad probationem nego maiorem. Ad cujus probationem distinguo antecedens: idem subjectum album esset Referibile ad infinitos terminos albos, per eandem Relationem, concedo antecedens: per diversas Relationes, nego antecedens, & consequentiam. Quia sicut sufficit unica albedo in subjecto, ut hoc dicatur fundamentaliter simile omni albo, ita unica Relatio similitudinis ei sufficiet ad omnia alba. Unde Doctor in 3. dist. 8. art. 2. §. 2. vers. *Item si*, loquendo de similitudine albedinis, docet, quod talis *similitudo est una numero, sicut fundamentum.**

Baccon.

478 *Objicies quintò. Relatio paternitatis necessariò requirit terminum actu existentem: ergo.*

D.J.Dam. *Probas antecedens primò ex D. Damasceno lib. 1. Orthod. Fidei cap. 8. sic loquuto de Patre, & Filio in Trinitate: Neque enim Pater unquam fuit, quin Filius quoque esset, verum simul Pater, simul Filius. Ex quibus generaliter infert: Neque enim pater vocari queat, qui filio careat. Secundò ex D.*

D.Athan. *Athanasio de S. Spiritu, circa finem: In Divinis semper Pater est, & Filius semper Filius: in rebus autem humanis non est eodem modo, siquidem in hominibus,*

nibus, qui est pater, non semper est pater, neque qui filius semper filius. Tertio ex D. Cyrillo Alexandri- D. Cyril.
no I. de Trinitate cap. 7. dicente: *Non erat unquam Pater, quando Filius non erat, sed simul Pater, & Filius ex ipso genitus; quippe pater, qui caret filio nemo vocetur.*

479 Respondeo ad objectionem negando
antecedens. Ad probationem primam per illationem
Damasceni nostri, dico cum M. Bonalpe, supra etiam Bona spes
laudato, verba illa, *qui filio careat*, sic esse intelli-
genda, id est, *qui filium non genuerit*; nam, qui
numquam filium genuit, vocari non potest pater;
estò enim Relatio secundi generis fundetur imme-
diatè in entitate causæ, tamen generatio activa, &
passiva sunt conditiones, ut causa, & effectus deno-
minentur actu Relata. Ad secundam probationem per
authoritatem D. Athanasii dico, S. Doctorem locu-
tum fuisse de patre creato quoad denominationem
formaliter Relati, ad quam, uti supra diximus, re-
quiritur existentia termini, & in hoc sensu verum
est, quòd, qui est pater, non semper sit pater, ne-
que, qui filius, semper filius, quo non obstante, sem-
per pater, qui habuit filium, est Referibilis formali-
ter ad illum, & e conversò. Ex quibus patet solutio
non tam ad illam causalem nostri S. Cyrilli Alexan-
drini, in qua fundatur tertia ejusdem antecedentis
probatio, sed etiam ad id, quod Adversarii addunt
de communi Antiquorum usu loquendi, juxta illud
Ovidii de Dedalo, & Icaro: *At pater infelix, jam Ovid.*
non pater Icare clamat.

480 Objicies sextò. Communiter dicitur:
Pater est, qui habet filium; sed ista definitio esset
diminuta, nisi Relatio paternitatis requireret actua-
lem existentiam termini: ergo talem existentiam
requirit. Probas maiorem. Parentibus non existentibus,

bus, nullus dicit, Petrum v. g. esse filium illorum sed fuisse tantum : ergo communiter ab omnibus dicitur : *Pater est, qui habet filium*. Probas etiam minorem. Si Relatio paternitatis non requireret actualem existentiam termini, quivis esset pater respectu filii possibilis : ergo talis definitio esset diminuta, nisi Relatio paternitatis requireret actualem existentiam termini. Accedit D. Thomas 4. Contra gentes cap. 14. dicens : *Hæc est ratio patris, ut sit filii pater*.

481 Respondeo ad objectionem, in qua multum fudit P. Comptonus supra laudatus, concessâ maiore, dummodò sensus illorum verborum : *Pater est, qui habet filium*, per ampliationem sit iste : *Pater est, qui gignit, vel genuit filium* : non verò : *qui gignit tantum* ; ex quo sequitur, quòd, adhuc deficiente filio, pater, qui illum genuit, sit verus pater. Ad probationem maioris nego antecedens ; quinimò contrariū constat ex communi usu loquendi ; frequenter enim dicimus : *Comes iste est filius talis Marquionis*, etiam patre defuncto. Deinde nego illam minorem supra, quòd præfata definitio esset diminuta in sensu exposito. Ad probationem nego antecedens ; quia quamvis Relatio generativi, & genitoris sit eadem numero Relatio, est tamen diversimodè terminata ; Relatio enim generativi non dicitur genitoris, nec patrem denominat ante actum generandi. Sicut in opinione Relationem identificante realiter cum substantia, non sequitur, quòd substantia ipsa denominetur pater, ante generationem.

482 Unde estò Relatio paternitatis non requirat actualem existentiam termini, non inde quivis esset pater respectu filii possibilis ; benè verò respectu filii mortui, quem genuit ; sicut dominus dicitur

citur talis respectu servi, etiam mortui, qui ei aliquando inservivit, ita quod ille affirmare possit: *Servus meus mortuus est*: qui modus loquendi, ut observat Mag. Bona spes, verificari non potest, nisi ex præsupposito dictæ ampliacionis. Ex quo liquet responsio ad illud D. Thomæ, & ad similes PP. locutiones. Ex dictis

483 Deduces, Relationem prædicamentalem specificari formaliter à fundamento, sive à modo fundandi, non à termino. Ratio est: quia Relatio prædicamentalis pendet in suo esse à fundamento, cui innititur essentialiter, non à termino, estò hunc essentialiter etiam respiciat. Nam etiam natura respicit transcendentaliter suas proprietates, & tamen non specificatur ab istis. Unde, licet tollatur terminus, semper manet Relatio quoad entitatem, tametsi quoad actuale denominationem deficiat. Vide Mag. Garciam dist. 2. Metaph. q. 5. art. 8. §. 1. Garcia: 2. & 3.

S E C T I O V.

De Prædicamentis Actionis, & Passionis.

Q U Æ S T I O I.

Quid, & quotuplex sit Actio?

484 **R**ESOLUTIO: Actio prædicamentalis definiri potest sic: *Forma, qua agens communicat esse passio*. Deducitur ex Doctore in 1. dist. 8. q. unica art. 2. §. 4. & Bacon: 5. Particula, *Forma*, habet locum generis: Cæteræ locum differentię, explicantque respectum tenentem

Bacon.

tem se ex parte ipsius Actionis, nempe respectum à quo aliud, id est, ejus, à quo aliud accipit esse, qui quidem est de quidditate, & essentiâ Actionis; non enim salvari potest ejusdem quidditas, & essentia, nisi ibi sit datio esse, ut docet idem Baconius Quodl. 3. q. 10. vers. *Item alio modo*, ibi: *Quod actio dicit respectum originis à quo aliud*. Motus verò, vel mutatio, non est de intrinseca, aut quidditativa ratione Actionis, qua talis, sed tantum de ratione Actionis physicæ creatæ. Unde *Actio, ut actio, nullam imperfectionem dicit, quia dicit tantum communicationem, & dationem esse*. In 1. d. 8. q. un. art. 2. §. 4. vers. *Item actio*.

485 Dividitur Actio in Divinam, & creatam. Divina est datio, & communicatio esse Divini; Pater enim producit Filium, eique communicat esse. Similiter Pater, & Filius producant Spiritum Sanctum, cui Naturam Divinam communicant. Actio creata est datio termini creati: hæc subdividitur in Actionem creativam, & eductivam, quas distinguimus, & explicamus tom. 2. tractatu 1. disp. 2. sectione 1. q. 8. n. 351. Nec obstat, quod Actio creativa sit solius Dei, ut dicatur creata; siquidem dicitur talis per ordinem ad terminum creatum: deinde est accidens realiter ab ipso Deo distinctum, ut fatetur

Bacon.

Doctor in 2. dist. 1. q. 2. ubi agit de Creatione. Verum præcipua Actionis creatæ subdivisio est, in Actionem animæ, & corporis: prima est omnis Actio non corporalis, siue sit intellectus, siue voluntatis: Secunda à corporali forma denominatur. De hac divisione videndus B. Albertus Magnus tom. 1. l. de sex Principiis tractatu 2. cap. 3.

Alb. Mag.

486 Ulterius dividitur Actio in substantialem, & accidentalem: substantialis dicitur illa, quæ ad substantiam terminatur, ut Actio productiva ignis,

nis, vel aquæ, vel alterius substantiæ: accidentalis illa dicitur, quæ ad accidens terminatur, ut Actio productiva caloris, frigiditatis, vel alterius accidentis. Dividitur etiam Actio in successivam, & instantaneam: successiva respicit terminum successivè acquisitum, ut Actio productiva lucis in aere: instantanea respicit terminum in instanti productum, ut Actio productiva ignis in stupa. Tandem dividitur Actio in immanentem, & transeuntem: Actio immanens sic dicitur, quia terminus ejus manet in ipso agente, ut intellectio in eodem intelligente: Actio transiens ita nuncupatur, quippe non manet in agente, sed transit ab illo, ut plantatio rosæ v.g.

QUÆSTIO II.

Quid, & quotuplex sit Passio?

487 **R**ESOLUTIO: Passio definiri potest sic: *Forma, per quam in passo recipitur esse ab agente.* Deducitur ex Doctore, loco sup. citato n. Bacon.
484. Prima particula habet locum generis; reliquæ locum habent differentiæ, explicantque respectum, *quod ab alio*, idest illius, quod accipit esse ab alio, sine quo Passio intelligi non potest; sicut neque Actio sine respectu à *quo aliud*, uti supra diximus ex Baconio, docente ipso, ibidem: *Quod actio dicit respectum originis à quo aliud, & passio quod ab alio.* Sine motu verò, vel mutatione, optimè valet intelligi Passio, ut talis, concorditer ad ea, quæ de Actione, ex eodem Doctore, docuimus.

Quod attinet ad Passionis quotuplicitatem judico discurrendum proportionali modo, sicut de Actione; cum Actio, & Passio mutuò se inferant.

QUÆSTIO III.

Quot sint proprietates Actionis, & Passionis?

488 **R**ESOLUTIO: Proprietates Actionis,

& Passionis, quæ communiter à Philosophis assignantur, duæ sunt. Prima: *Quòd Actio, & Passio mutò se inferunt*. Secunda: *Quòd Actio, & Passio sunt unus motus*, in rebus creatis; quippe Actioni, & Passioni Divinæ non competit motus, ut D.Alb.M. nuper diximus. Beatus Albertus, ubi supra, alias duas assignat proprietates Actionis, de quibus etiam Philosophus mentionem facit, videlicet, quòd recipiat contrarium, & quòd admittat magis, & minus, sive intensiorem, & remissionem. Verum, ut bene advertit Mag. Blasco, istæ proprietates non conveniunt productionibus substantiæ, & quantitatis, sed tantum Actioni, & consequenter Passioni, quæ sunt productiones primæ, secundæ, & tertiæ speciei qualitatis.

489 Obiter advertendum, Aristotelem de his duobus prædicamentis parum dixisse, fortasse quia, ex illis, quæ de aliis docuerat prædicamentis, ad istorum cognitionem facile nos devinire posse intellexit. Quapropter Gilbertus Porretanus, ut notat Valius, Logicæ cap. de Actione, & Passione, annotatione 2. tractatum de sex Principiis composuit. Simplicius etiam, ut advertit Baconius Quodl. 3. q. 12. conclusione 6. vers. *Circa primam*, de Actione, & Passione longum tractatum instituit.

D.Alb.M.

Blasco.

Gilbert.

Simplic.

Bacon.

SECTIO VI.

De Prædicamentis Ubi, & Sitûs.

QUÆSTIO I.

Quid, & quotuplex sit Ubi?

490

RESOLUTIO : Ubi definiri potest sic:
*Accidens, per quod res determinatur
 ad certum locum.* Deducitur ex Do. Baccon.

ctore, Quodlib. 3. q. 10. post conclusionem 5. vers.
Ad tertium dico. Particula, *Accidens*, habet locum
 generis; cæteræ locum obtinent differentia. Ubi vel
 est circumscriptivum, vel definitivum, vel indefini-
 tum, seu Sacramentale. Primum est illud, per quod
 res est in toto loco, & pars rei in parte loci deter-
 minati: sic est corpus in loco, quando naturaliter lo-
 cum occupat per extensivam commensurationem
 partium locati cum partibus loci. Secundum est il-
 lud, per quod res est tota in toto loco, & tota in
 qualibet parte loci, ita tamen, quod extra talem lo-
 cum non valeat esse naturaliter, nec maiorem im-
 plere, cum ibi claudatur, contineatur, & definia-
 tur: sic est Angelus in loco, sive in sua sphaera, &
 anima rationalis in corpore. Verum Angelus, tamet-
 si sit in loco per Ubi intrinsecum, est tanquam per
 formam totius, non tanquam per formam partis,
 quo depuncto videndus M. Zagaglia tom. 5. disp. 4. Zagaglia.
 sectione 1. num. 19. Tertium tandem est illud, per
 quod res est tota in toto loco, & tota in singulis par-
 tibus, ita tamen, quod possit eodem essendi modo
 assistere in aliis pluribus locis: sic est Corpus Christi

in Eucharistia ; non enim definitur loco , sicut Angelus , aut anima rationalis.

491 Aliqui dividunt Ubi in increatum , & creatum. Cæterum Deus nequit dici propriè ubicatus , sed tantum metaphoricè ; neque enim prædicamentum Ubi , etiam depuratâ ejus ratione formalis ab imperfectionibus , propriè potest Deo competere. Idem Mag. Zagaglia hoc docet ex Baconio , & efficaciter probat tom. 2. tractatu 2. disp. 6. sectione 5. n. 125. Quod si Deus specialiter dicitur esse in Cælo Empyreo , ideo sic dicitur , quia ibi apparet , ut inquit noster Incognitus sup. verba illa Psalmi 47. *Deus in loco sancto suo.*

Zagaglia.
Michael
Aiguan.
Bonon. n-
fis.

Q U Æ S T I O II.

Quid , & quotuplex sit Situs ?

492 **R**ESOLUTIO : Situs definiri potest sic : *Accidens , per quod partes rei determinantur ad certam positionem in loco.* Deducitur ex Doctore in 2. dist. 3. q. 2. art. 1. §. 1. vers. *Contra primam conclusionem.* Prima particula habet locum generis ad alia prædicamenta , quæ accidentia sunt ; ultimæ locum habent differentiarum , etiam respectivè ad Ubi ; solus quippe Situs determinat partes rei ad hanc , vel illam positionem in loco. Positio hîc vulgò sonat idem , ac *postura* ; & hæc positio , sive *postura* , diversa est multis modis , quibus res potest esse in loco , v. g. homo erectus , vel sedens , vel jacens.

Baccor.

493 Notandum valde , posse variari Ubi , invariato formaliter Situ , ut liquet in eo , qui in navi movetur ad motum navis : *Quia in locali motu , motum in quolibet instanti est in alia , & alia distantia ad cælum secundum differentiam loci , scilicet vel*

secun-

secundum ante, & retro, vel dextrum, vel sinistrum, vel sursum, vel deorsum; sed cum ista sint differentie specificæ loci, quod ex intentione aicit Commentator 4. Physicorum comm 4. & l 3. comm 54 oportet, quod continuè in quolibet instanti acquiratur novus locus secundum speciem, sive secundum numerum, & cum proportionaliter ubicitates in corpore locato varientur secundum variationem locorum, oportet necessariò, quod in quolibet instanti sit ibi ubi novum acquisitum. Hæc Doctor in 1. dist. 15. q. unic. art. 4 §. 3. vers. Ad illud. Verum Situs idem est, si homo, etiam motus ad motum navis, sedens semper perseveret. Ex quibus patet, Situm realiter distinguì ab Ubi, sicut & à cæteris prædicamentis.

Baccon.

494 Dividitur communiter Situs in rectum, & inflexum, tanquam in species subalternas, quæ rursus subdividi possunt in alias multas species, & totidem, quot sunt figuræ. Unde D. Albertus Magnus tom. 1. l. de sex Principiis tractatu 4. cap. 2. in principio: *Positio igitur est secundum quam alia dicuntur sedentia, & stantia, & adjacentia, quæ verè dicuntur positiones.*

B. Albert.

QUÆSTIO III.

Quot sint proprietates Ubi, & Situs?

495 **R**ESOLUTIO: Proprietates Ubi tres communiter assignantur à Philosophis, & totidem Situs. Prima proprietas Ubi: *Quod non habeat contrarium*; cum enim duæ Ubicationes non possint esse in eodem subiecto, eò quod id sit impossibile, nisi subiectum Divinitus replicetur in duplici loco, non possunt mutuò se expellere ab eodem subiecto, quod est de ratione contrariorum. Secunda:

da: *Quod non suscipiat magis, & minus*; siquidem repugnat Ubi habere gradus distinctos in eodem sub-
jecto, quoniam indivisibile est secundum gradus in-
tensionis. Utraque proprietas convenit etiam Situi:
prima, quia sessio v. g. & statio, quanvis eidem vi-
cissim inesse possint, nulli tamen simul; nam impos-
sibile est, aliquem stare simul, & sedere in eodem
instanti: secunda, quia sessio non est magis, nec
minus positio, quàm statio, vel cubatio. Deinde
unus sedens non magis, minusve sedens est, quàm
alter, quod si habeat diversam positionem, mutat
Situm.

496 Tertia proprietas Ubi: *Quòd sit ter-
minus motus localis*, seu, *quòd consequatur ad mo-
tum localem*; quippe, ad continuam motus localis va-
riationem, movens novum Ubi acquirit, ut inquit
Doct̃or sup. citatus num. 493. Tertia tandem Sitûs
proprietas: *Quòd substantiæ corporeæ assistat*; siqui-
dem nulla est substantia corporea, maximè extensa,
in qua non reperiatur ordo secundum hanc, vel il-
lam positionem partium ejusdem. Beatus Albertus
sup. laudatus, distinguens, inter accidentia, quædam,
quæ insunt, & quædam, quæ assistunt plusquam in-
sunt, docet ex Gilberto Porretano, proprium esse po-
sitionis substantiæ proximè assistere inter ea, quæ
assistunt substantiæ; quæ quidem proprietas conve-
nit omni Situi, soli, ac semper.

B. Albert.

Porretan.

S E C T I O VII.

De Prædicamentis Quando, & Habitûs.

QUÆSTIO I.

Quid, & quotuplex sit Quando?

497 **R**ESOLUTIO: Quando sic potest defini-
 ri: *Accidens inhærens rei duran-*
ti resultans ex ejus adjacentia ad
tempus. Deducitur ex Doctore quodl. 3. q. 11. vers. Bacon.
Item idem patet de Quando: & in 2. dist. 2. q. 2. art.
 1. § 3. Prima particula ponitur loco generis; cæteræ
 loco differentiæ. Hoc prædicamentum explicat idem
 Doctor, loco secundo citato, per comparisonem ad
 Ubi, ex quo dicendum, quod sicut Ubi non est de-
 nominatio extrinseca proveniens à loco, ita Quan-
 do non est denominatio extrinseca proveniens à
 tempore, bene verò aliquid intrinsecum ex positio-
 ne rei in tempore resultans. Hinc

498 Colligitur, durationem Dei non spe-
 ctare ad hoc prædicamentum, cum illa non deter-
 minetur ad hoc potius, quàm ad aliud tempus, eò
 quod comprehendat omne tempus reale, & imagi-
 narium. De tempore egimus tom. 3. tractatu 2. disp.
 3. De duratione speciatim disputat Mag. Zagaglia Zagaglia.
 tom. 2. tractatu 2. disp. 8. maximè sectione 1. & 4.
 ubi multa ex Baconio adducit ad hoc prædicamen-
 tum attinentia.

Quando aliud vocatur simplex, compositum
 alterum. Simplex est, quod in momento esse dici-
 tur. Compositum, quod reperitur in tempore com-
 posito,

posito, ut in anno, mense, hebdomadâ, die, horâ.

Q U Æ S T I O II.

Quid, & quotuplex sit Habitus?

499 **R** ESOLUTIO: Habitus sic definiri potest: *Accidens inherens corpori ex adjacentia vestium, sive eorum, quæ circa corpus sunt cum debita distantia.* Deducitur ex Doctore in 3. dist. 33. q. 1. ante articulum primum. Habet definitio rationem generis, & differentię, ut patebit discurrenti circa ejus particulas. Ex eâdem colligitur, hoc prædicamentum non consistere formaliter in ipsis vestibus debite applicatis corpori, sicut neque in ipso corpore vestito connotante vestes in obliquo; benè verò in accidente modali distincto tam à corpore vestito, quàm à vestibus, sine quo vestes ipsæ dici nequeunt formaliter tales, sed tantùm materialiter, eò quòd solum per tale accidens denominant corpus formaliter vestitum.

Bacon.

Habitus dividitur in vestimenta, & arma. Unde hujus prædicamenti subalterna sunt, vestitum esse, & armatum esse.

QUÆSTIO III.

Quot sint proprietates Quando, & quot Habitûs?

500 **R**ESOLUTIO : Proprietates Quando duæ communiter à Philosophis assignantur, & totidem Habitûs Prima Quando proprietates : *Quòd non suscipiat magis, & minus* ; non enim una duratio est magis, minusve duratio, quàm alia, estò sit maior, sive diuturnior. Secunda : *Quòd non habeat contrarium* ; quoniam in una & eâdem re est Quando secundùm horam, diem &c. absque aliqua contrarietate. Utraque proprietas convenit etiam Habitui : prima, quia etiam si aliquis dicatur magis vestitus, & armatus, non tamen secundùm eandem omnino formam, quæ habenti habitum inest, ut benè advertit idem B. Albertus sæpe laudatus tract. B. Albert. 7. cap.2. Secunda, quia sine contrarietate aliqua potest quis simul esse vestitus, & armatus, ut ex se claret.

Hæc pro Metaphysica Quòd si ipsa pertractat etiam de Angelis, imò & Deum Optimum Maximum contemplatur, ex quo Angelosofia, & naturalis Theologia dicitur ; de Deo tamen, & Angelis pro dignitate agere ad Theologos spectat. De cæteris verò propriis hujus tractatûs sparsim disseruimus tum in Compendio Philosophico-Theologico de Distinctionibus, tum in Systemate Aristotelico de Formis materialibus. Siquid verò tam in hoc, quàm in aliis laboris mei operibus, mercede aliqua, laude ve dignum censebitur, nullam aliam expecto, nisi studiosæ Juventutis utilitatem, fidelitatem pariter, & amorem erga Antesignanum nostrum Bactom. Ult. Mm conium,

conium , ut mirabilis ejus doctrina Literario Orbi Universo amplius innotescat. Ad maiorem Dei , & Virginis gloriam , Castissimi Josephi , Sanctissim. Joachimi & Annæ , Principum Eliæ & Elisi , Sanctarum Theresiæ , & Mariæ Magdalenæ de Pazzi , omniumque in domo Domini habitantium.

Quidquid notabile scripsi hætenus , judicio Doctorum , & præsertim S. Romanæ Ecclesiæ censuræ , humiliter , ac libenter submissum volo.

F I N I S.





INDEX

RERUM PRINCIPALIU

Quæ in hoc ultimo tomo continentur.
Omnes numeri paragraphos ostendunt.

A

Accidentia

DUO, vel plura, possunt esse in eâdem parte subiecti, si sint distincta numero tantum improprie.
 n. 240.

Actio

Intendi non potest. n. 430.

Definitur. n. 484.

Dividitur in Divinam, & creatam. n. 485.

Ulterius dividitur in substantialem, & accidentalem. n. 486.

Assignantur proprietates actionis. n. 488.

B

Bonitas

TRanscendentalis, quæ est tertia Entis proprietas, consistit formaliter in positivo. n. 188.
 Importat formaliter, & directè perfectionem, quam Ens non importat de suo conceptu primario. n. 205.

Bonum

Dividitur in bonum honestum, delectabile, & utile. n. 189.

Opus non est, quodd hæc distinguantur semper realiter subjectivè, bene quidem formaliter intentionaliter. n. 190.

Nec bonum delectabile, nec utile convertuntur cum Ente, nec sunt Entis proprietates. n. 191.

Bene verò bonum honestum per comparisonem ad naturam. Ibidem.

Tale bonum idem est ac perfectum substantialiter; sive essentialiter. n. 192.

C

Conceptus

Objectivus necessario correspondet conceptui formali. n. 32.

Uterque explicatur. Ibidem.

Corpus

Vid. verb. *Penetratio*, & verb. *Quantitas*, &, præsertim, verb. *Substantia*.

D

Deus

SI à nobis rectè definiri posset, optime definiretur per Intelligentiam Primam. n. 259.
 Non excluditur à prædicamento Substantiæ. n. 284.
 Non reponitur in præfato prædicamento, nisi ipsa Substantiâ depuratâ ab imperfectionibus. n. 288.

Differentiæ

Aliæ ultimæ dicuntur, aliæ non ultimæ. n. 64.
 Licèt omnis differentiæ sit formaliter Ens, non sequitur, quòd aliquod Ens sit formaliter differentiæ. n. 92.
 Differentiæ tantùm distinctivæ convenit facere rem diversam ab alia formaliter. n. 160.

Dispositio

Definitur. n. 374.

Distinctio

Consistit formaliter in negatione identitatis. à num. 116. usque ad 162.
 Ostenditur hanc esse genuinam Baconii mentem.
 Ibidem, præsertim à n. 129. & deinceps.
 Idem docuerunt ejusdem Baconii Expositores. n. 132.
 Refelluntur recentes Baconistæ ponentes distinctionem in positivo. à n. 121. usque ad 128. item à n. 137. usque ad 150.
 Refelluntur etiam alii recentiores confundentes materiale distinctionis cum ipsa distinctione formaliter accepta. n. 155.

E

Ens

D Effinitur. num. 31.

Habet conceptum unum objectivè præcisum à differentiis suorum inferiorum. n. 30.

Habet in intellectu nostro conceptum unum formalem, qui non repræsentat differentias suorum inferiorum. n. 32. & seq.

Ens, ut est unum prædicatum abstractum à suis differentiis, non est univocum, nec æquivocum, nec analogum, juxta Baconium. n. 44.

Ut autem concernit sua contenta est æquivocum, vel analogum; non autem univocum. Ibidem.

Ratio Entis convenit accidenti dependenter à substantia; & creaturæ dependenter à Deo. n. 45.

Ens non est genus ad sua contenta. n. 60.

In quolibet Ente reperitur essentia, & talis essentia n. 61.

Ens transcendit formaliter suas differentias. n. 62.

Vide verb. *Differentiæ*, & verb. *Transcendentia*.

Habet Ens veras proprietates. n. 95.

Ens vel est reale, vel rationis. n. 206.

Reale dividitur primò in actum, & potentiam, tanquam per suas differentias ex æquo dividentes totam latitudinem Entis realis. Ibidem.

Dividitur etiam in completum, & incompletum. num. 207.

Utrumque explicatur. Ibidem, & seq.

Eucharistia

In hac remanent accidentia sine substantia. n. 353.

Dum homo nutritur ratione Sanctissimæ Eucharistiæ præceptæ, (quòd rarò accidit) nutritur ex materia

ria à Deo de novo creata. n. 354.

Accidentia in Eucharistia possunt intendi. n. 407.

Extensio

Alia est entitativa, alia totalis, alia situalis, alia impenetrabilis. n. 321.

Datur etiam extensio in qualitatibus; & hæc definitur. n. 390.

F

Figura

Definitur. n. 382.

Forma

Illa, quæ est primum membrum quartæ speciei qualitatis, definitur n. 382.

Differt materialiter tantum à figura. n. 383.

Forma substantialis intendi non potest. n. 430.

G

Gradus

Super qualitatem affluentes ex vi intensiõis, & refluentes ex vi remissionis vocantur à Baconio partes materiales qualitatis. n. 392.

Gradus intensiõis qualitatis sunt homogenei. n. 431.

Gratia

Intenditur per additionem gradus ad gradum. n. 418. & 429.

Remissa, licet sit simplicior, non est perfectior intensâ. Ibid.

Ha-

H

Habitus

- D** Efinitur. num. 374.
 Non differt essentialiter à dispositione, sed tantum accidentaliter. n. 375.
 Habitus prædicamentalis definitur. n. 499.
 Dividitur in vestimenta, & arma. Ibidem.
 Assignantur proprietates habitus. n. 500.

I

Impotentia

- D** Efinitur. n. 378.

Individuum

- Ex conceptu suo dicit rationem singularem. n. 56.
 Principium individuorum substantiarum corporearum consistit in sola forma. n. 319.
 Idem dicendum de principio individuationis substantiarum simplicium completarum, & incompletarum. Ibidem.

Indivisum

- Formaliter importat aliquid positivum. n. 106. & 112.

Intensio

- Qualitatis fit per additionem gradus ad gradum. n. 387. & seqq.
 Definitur intensio. n. 390.
 Tota qualitas per intensiorem acquisitam est eadem qualitas. n. 391.
 Intensio qualitatis habet se sicut nutritio viventis. n. 390.

M

Materia prima

A Ntecedenter ad formam substantialem est totum quodam homogeneous compositum ex partibus substantialibus distinctis. n. 306.

Metaphysica

Definitur: *Scientia speculativa &c.* n. 1.

Allignatur præcipuus hujus Scientiæ Author. n. 2.

Est quidem Metaphysica Scientia in toto rigore. n. 3.

Est simpliciter speculativa. n. 6.

Est formaliter unus habitus Sapientiæ secundum speciem a hominibus. n. 10.

Quale sit objectum Metaphysicæ? Vid. verb. *Objectum*.

Qualia sint ejusdem principia? Vide verb. *Principia*.

Metaphysica est virtus mentis. n. 27.

Est utilissima ad perficiendum intellectum, ad perfectionem aliarum Scientiarum, & maxime ad Sacræ Theologiæ consecutionem. n. 29.

Multis honorificis titulis insignitur. Ibidem.

Motus.

Ad rationem motus per se sumpti strictè requiritur, quòd observentur duæ conditiones. n. 314.

N

Natura Divina

C Onstituatur Metaphysicè per Primitatem contractivam intellectualitatis. n. 209. & seqq.

Negatio

Plus negat, quàm affirmatio affirmat. n. 58.

Legatio negans imperfectionem est perfectio. n. 162.

O

Objectum.

Materiale per se Metaphysicæ assignatur. n. 15.
Objectum attributionis ejusdem. n. 18.

Objectum formale quod, seu ratio formalis *quæ*. n. 21.

Tandem objectum formale *quo*, seu ratio formalis
sub qua. Ibid.

P

Passio.

Illa, quæ est primum membrum tertiæ speciei
qualitatis, definitur. n. 380.

Definitur etiam passio prædicamentalis. n. 487.

Assignantur proprietates ejusdem. n. 488.

Passibilis qualitas

Definitur. n. 380.

Penetratio

Naturalis stare nequit cum extensione partium in ordine ad locum, aut situm; bene quidem cum extensione in ordine ad totum. n. 316.

Perfectum

Vel est tale integraliter, vel accidentaliter, vel substantialiter, sive essentialiter. n. 192.

Potentia

Illæ, quæ est primum membrum secundæ speciei qualitatis

litatis, definitur. n. 378.

Principia.

Assignantur illa, quæ sunt propria Metaphysicæ. n. 23.
Nulla scientia specialis probat sua principia per universalissima propria. n. 24.

Sola Metaphysica habet principia universalissima propria. Ibid.

Q

Qualitas

Definitur. n. 357.

Latè sumpta significat formam actuantem, seu adjacentem. n. 358.

Ad qualitatem prædicamentalem tres requiruntur conditiones. n. 361.

In Qualitate idem est informare, ac perficere, quando informatio est juxta, vel supra exigentiam subjecti, cui inest. n. 373.

Qualitas dividitur in quatuor species bimembres. n. 374.

Dividitur etiam in qualitatem supernaturalem, præternaturalem, & naturalem. n. 377.

Tres communiter assignantur qualitatis proprietates. n. 384.

Qualitas intenditur per additionem gradus ad gradum n. 387. & seqq.

Qualitates naturaliter productæ possunt intendi usque ad certos terminos à natura præfixos. n. 388.

Supernæ autem sine fine intendi possunt. Ibidem.

In qualitatibus aliud est intendi, aliud extendi. n. 389.

Vid. verb. *Intensio*, verb. *Extensio*, & verb. *Gradus*.

Quando

Definitur. n. 497.

Alterum vocatur simplex, compositum alterū. n. 498.

Assignantur proprietates *Quando*. n. 500.

Quantitas

Definitur. n. 320.

Alia dicitur virtutis, alia molis. Ibidem.

Non consistit in actuali extensione entitativa totali, situati, aut impenetrabili. num. 322.

Neque in ratione mensuræ. n. 327.

Neque in divisibilitate partium. n. 328. & seq.

Neque in impenetrabilitate naturali. n. 330. & seq.

Nec per hoc quod sit extensiva substantiæ. n. 332. & seq.

Dividitur quantitas in continuam, & discretam n. 338.

Prima subdividitur in permanentem, & successivam. Ibidem.

Secunda in numerum, & orationem. n. 339.

Quatuor communiter assignantur proprietates quantitatis. n. 340. & seq.

Quantitas est accidens realiter distinctum à re quantita. n. 342.

Estque speciale accidens à cæteris distinctum. n. 356.

Quantitas non intenditur, 430.

R*Rarefactio*

F It per educationem novæ partialis quantitatis ex priori materia. n. 428.

Relatio

Intendi non potest. n. 430.

Re-

- Relatio prædicamentalis definitur. n. 432.
 Definitur etiam relatio abstractè sumpta à prædicamentali, & transcendentali. n. 433.
 Assignatur discrimen utriusque. n. 434. & seq.
 Utrique datur à parte rei in linea physica. n. 436.
 Quatuor in relato prædicamentali reperiuntur explicatu dignissima. n. 438.
 Non omnis relatio prædicamentalis est accidens. n. 442. & 444 & seqq.
 Ex tribus vocabulis, quæ huic prædicamento attribuantur, solum *relatum* est magis proprium. n. 449.
 Relatio prædicamentalis non mutua terminatur ad absolutum; mutua verò ad relativum. n. 452.
 Relationes prædicamentales adæquatè distribuuntur in tria genera. n. 453.
 Quatuor communiter assignantur proprietates relationis prædicamentalis. n. 456. & seqq.
 Relatio prædicamentalis non requirit necessariò terminum actu existentem. n. 462.
 Relatio prædicamentalis creata est forma accidentalis congenita cum fundamento proximo. n. 463.
 Aliud est, quòd relatio quoad terminationem pendeat ab existentia termini, aliud quòd pendeat ab illo quoad entitatem. n. 464.
 Aliud est dicere relationem similitudinis; aliud verò esse simile. n. 475.
 Relatio prædicamentalis specificatur formaliter à fundamento non à termino. n. 483.

S

Sapientia

Componitur ex habitu scientiæ, & intelligentiæ. n. 11.

juxta

- Juxta Baconium dicit principaliter rationem intelligentiæ. n. 13.
 Contingere potest, aliquem factum esse intellectualem, non tamen scientem. n. 12.
 Potest etiam contingere, aliquem esse scientem, non tamen intellectualem. Ibidem.
 Item contingere potest, aliquem simul intelligentem, & scientem esse, ac per consequens sapientem. Ibidem.
 Licet omnis sapientia sit habitus compositus ex scientia, & intelligentia, non tamen habitus mixtus ex utraque est sapientia. n. 14.

Situs

- Definitur. n. 492.
 Potest variari Ubi, invariato formaliter Situ. n. 493.
 Assignantur proprietates Situs. n. 495.

Subsistentia

- In sententia Baconii est effectus formalis naturæ substantialis. n. 263.

Substantia

- Prædicamentalis definitur. n. 260.
 Potest considerari sub diversis gradibus. n. 262.
 Dividitur in primam, & secundam. n. 285.
 Utræque definitur, & explicatur. Ibidem.
 Assignantur proprietates substantiæ. n. 287.
 Ad substantiam prædicamentalem sufficit univocatio logica. n. 288.
 Substantia materialis antecederet ad quantitatem habet partes physicè distinctas. n. 292.
 Idem est habere partes physicè distinctas, ac habere extensionem entitativam. n. 294 & 310.
 Substantia alia est spiritualis, alia materialis. n. 293.

Implicat dari substantias creatas, quæ sint relativæ per se ipsas. n. 437.

T

Theologia Sacra

Non est simpliciter speculativa, sed magis principaliter est practica, juxta Baconium. num. 7. 8. & 9.

Totum

Aliud est essentialiale, aliud integrale. n. 294.

Transcendentia

Est inclusio prædicati superioris in inferioribus. n. 65.

V

Ubi

Definitur. n. 490.
Aliud est circumscriptivum, aliud definitivum, aliud sacramentale. Ibidem.
Ubi nequit propriè Deo competere. n. 491.
Assignantur proprietates Ubi. n. 495.

Veritas

Transcendentalis, quæ est secunda Entis proprietas, consistit formaliter in positivo. n. 163.

Transcendit non modò rem quacumque, sed ultimam illius differentiam. n. 164.

Est veritas entitativa, sive in essendo. n. 165.

Veritas transcendentalis solùm est communis analogicè veritati entitativæ increatæ, & creatæ. n. 187.

Uni-

Univocatio.

Ut ratio sit omnino eadem, prout requiritur ad univocationem, non sufficit, quòd non includat actus principia distinguentia, sed opus est ulterius, quòd talis ratio non conveniat diversimodè suis contentis. n. 45.

Unitas

Transcendentalis, quæ est prima Entis proprietas, consistit formaliter in positivo. n. 94.

A signatur discrimen inter unitatem transcendentalem, & unitatem solitudinis. n. 96. & 108.

Transcendentalis non excludit per se distinctionem partium. n. 97.

Benè verò excludit partium divisionem. Ibidem.

Non tamen sufficit, quòd non detur divisio partium, ut reperiatur unitas transcendentalis. n. 98.

Unitas importat de sui ratione, esse conceptum secundarium consequentem essentiam Entis. n. 115.

In individuis hominis potest unitas secundum materiam dupliciter considerari. n. 394.

Unum

Duplici modo considerari potest; & pariter multitudo. n. 147.

Unum, & multa opponuntur contrariè, & etiam privativè, si secundum diversas considerationes accipiantur. n. 149.

FINIS LAUS DEO.

1 1810729₂



